

近代中國史料叢刊第一輯

沈雲龍主編

桂之華軒遺集

朱銘盤著

文海出版社印行

桂之華軒

遺集


九四史
馬良題



10/12/2020

桂之華軒著書圖

新安瑤笙程璋繪



米豐同先生像贊

洪麟止彥唯同關步訓鮮瀨厚翰音
飛翥已獲良材履身既踞替簞樂履
福壽玄履嘉止解啁風止於賤十固
終乃片夾難度同筋韓以全諫多故
今遂科吳同離其行

章炳麟謹題



朱屏君先生墨跡 與張季直昆仲致 袁世凱慰廷函稿

盤廷司馬之人是不別後符奉一書因如
司馬勞者功而日不暇給也 然亦均謂全時以

東事付

司馬其舉則皆而予之竊想

司馬夜香雅殿更事極少而於公以三代至

既臨福信由食案如來矣中每更如警務處

由警務處而管帶到警首尾不過三裁今

然其處乃不濟已之境僅管平之有人退守

障盾而亦東中全局為

司馬主功者富貴之基附往舍是富貴者

誠知遇之且深此中之博者瓜也瓜見者乃

事及亦自便不兼務焉疑礙嘆而為

司馬在惟于空寶也

司馬知未幾為敵而沈慨之故且連聊矣

雖如如學以為是有述之主也昔者賢與相宗

之故道

司馬因勞盡二子之微而得會辦營務處見

批委批裁不衛燈塔一亦也福東姑子作

不掩心已指其無之說則以少事私誠不

耐職事當以數月或有遠境也東振事美

通際也人著道也

司馬惜別時

司馬喜氣盈。曉時是事有故者。屬不極情。而帶而取之。首就王多。曾不意一旦及信。登龍。解成。言為。日。所聞。見者。也。只。補。女。堪。如。自。上。申。報。以。七。虛。危。請。誤。用。去。廢。以。破。動。聽。等。事。為。不。宜。以。折。

司馬之心。姓不。視。行。可。借。等。所。罪。被。書。論。之。一。言。極。盛。常。事。耳。而。此。如。深。信。日。經。修。道。病。而。悲。往。有。甚。苦。極。處。之。在。也。往。等。也。

司馬極成。書。徹。骨。之。衰。殘。之。交。而。往。者。而。見。你。福。你。早。子。陽。見。其。文。因。之。賦。二。喜。就。破。之。少。愧。悔。去。一。可。嘆。來。今。若。福。是。一。人。取。

而。老。源。亮。生。其。為。其。見。之。祿。金。受。金。考。不。解。其。始。此。二。可。嘆。解。司。馬。公。文。是。可。

司馬既。有。欲。歎。意。長。故。信。曾。因。事。上。解。子。

司馬平。其。之。情。何。如。而。其。出。則。此。三。可。嘆。破。出。此。等。事。也。然。也。

司馬。介。黃。人。不。宜。以。為。權。重。更。以。有。司。子。司。馬。亦。自。以。斯。為。福。之。司。馬。可。能。嘗。福。處。不。就。三。等。之。等。福。處。也。會。

轉報解防務會存手稿。公錄其五。五理

照和

司馬札材林。飲是北隊大臣會辦報詳

防務法理等務。嚴將不盾。于以。前款。則不。不。不。

受事。將以。由。是。督。東。人。款。則。東。人。不。盡。也。

和。將。藉。藉。此。洋。以。欺。人。欺。則。人。而。可。欺。言。

官。初。在。實。事。則。甚。意。務。飲。是。飲。命。字。

操不公

司馬空舉。于左。或。或。其。月。異。出。其。一。等。務。處。

是。差。復。而。有。何。司。如。之。語。事。就。值。務。用。札。

于。州。款。用。札。等。而。上。之。將。道。夫。皇。帝。務。處。

者。子。實。焚。燬。之。亦。用。札。部。一。五。

司。如。之。意。量。不。在。兩。防。務。自。此。隊。便。用。也。

洋。前。林。款。州。款。植。傳。一。而。上。一。不。經。自。和。部。

將。之。之。札。部。一。款。部。古。例。事。例。其。一。

既。而。考。有。會。辦。報。當。因。見。因。王。使。當。考。事。

在。於。二。應。上。事。便。當。會。考。等。前。衛。西。事。任。

恤。安。自。身。大。或。福。立。我。陸。最。一。切。均。保。保。路。

錄字心士卒起

司。馬。將。福。如。力。可。以。補。人。權。亦。可。以。處。事。

解。不。學。子。是。行。出。其。一。內。此。或。官。博。實。款。出。

則。此。至。若。若。務。馬。當。實。從。者。是。者。用。之。者。

親。委。部

母。依。東。臨。因。王。運。此。肩。與。曹。試。

祗言申飭事裁期解事大考外
 司馬居處無與比蓋教之包馬旂以敝出
 入平時建其能業於大旂不知何處何地置
 考應付地置 國家神廟子何地定其罰罰
 嘗是教以三千歲生苦方微
 司馬其管之目。教厥嗟嘆編其哀憐。且正
 是三世交情。其可減故。必不負要。必不敢要。
 章。其。如。
 司馬其管。初。次。未。應。德。於。高。海。防。為。
 練。其。教。在。其。初。言。其。教。以。曾。祭。
 臣。其。位。之。聲。覺。其。懼。示。不。知。何。者。若。二。千。兩。
 金。則。期。其。在。其。第。一。條。有。謂。之。為。使。者。
 早。子。七。中。十。月。截。止。其。籍。有。身。體。豈。不。爾。
 之。止。其。分。地。人。當。款。作。者。實。多。因。度。日。能。
 而。其。事。始。
 司馬初三言四之否不若耶
 司馬別管之始。權。故。正。根。之。且。其。言。最。公。
 今。且。復。曾。在。君。不。願。義。利。之。謀。更。不。老。
 小。其。一。教。以。訓。其。身。
 司馬。其。聲。譽。與。然。亦。其。相。借。之。意。深。人。
 如。者。視。其。人。一。事。而。為。其。領。性。而。
 司馬。自。於。家。世。撫。撫。其。區。但。三。子。
 便。統。其。言。其。故。是。人。其。子。如。昔。思。祖。文。何。

三十餘年之舊部。司馬子北澤

司馬子北澤。孫靖國。德亦籍。其子。叔

截。未。終。耳。

司馬子。為。權。普。花。去。莫。志。文。誠。公。先。公。事。情。

情。而。已。今。有。以。教。得。其。一。札。必。按。私。面。便。一。則。

曰。司。理。深。有。利。司。字。北。澤。望。若。所。往。無。不。若。

已。修。罪。部。柳。棟。比。厚。之。虛。藏。以。充。軍。一。切。

耶。柳。若。有。云。故。不。過。逃。去。某。方。曾。天。下。之。不。

逃。而。故。徹。去。說。以。階。層。藏。之。未。耶。去。唱。不。可。

民。其。區。亦。必。飲。老。嗟。大。不。之。人。天。下。之。上。去。是。盡。

少

司馬之。師。何。者。命。子。提。解。不。使。數。人。而。徒。自。

實。其。兒。以。不。辨。之。凶。由。甚。一。著。少。至。此。而。農。

之二。如。

司馬。曾。親。為。謀。事。言。甚。難。際。會。部。敗。後。據。

按。一。賊。且。送。之。助。志。命。為。敵。口。德。亦。其。病。

如。喪。心。當。討。意。

司馬。誠。知。人。微。物。子。然。公。者。皆。誤。結。所。主。之。

義。太。何。以。此。而。匯。之。何。罪。

司馬。之。微。誠。身。少。出。某。紀。二。六。之。口。去。其。一。權。事。

多

司馬。相。識。今。三。年。矣。以。

司馬。往。之。男。人。疑。其。不。成。為。此。以。

司馬牛。子何子也。其不止也。誠也。遇其原。
 司馬牛。中。既。情。密。居。而。得。二。許。人。在。堂。瑞。未。
 嘗。宜。推。是。見。知。平。一。被。辦。洋。瑞。三。宰。相。是。
 晚。古。志。者。之。事。有。曾。虛。情。情。信。信。知。國。道。
 如。庸。身。德。為。所。友。之。者。之。知。知。道。道。務。亦。合。子。
 司馬牛。一。可。樂。也。
 司馬牛。道。道。得。喜。而。止。為。私。者。而。不。願。焉。
 不。義。為。家。其。民。何。
 司馬牛。與。子。春。秋。等。操。括。夫。益。聯。統。朝。
 鮮。之。中。德。自。給。附。而。收。金。幣。也。春。帝。志。遠。
 依。者。帝。不。另。而。退。必。圖。與。子。之。術。攝。也。如。欲。
 統。由。重。後。使。夜。以。重。重。互。相。不。可。西。退。也。然。
 此。海。以。平。孫。朝。鮮。一。知。國。人。以。政。之。權。必。又。
 雖。內。知。保。固。王。身。察。以。慮。事。機。出。務。商。務。
 之。極。必。以。取。重。于。國。王。因。而。重。于。此。年。
 帝。作。何。南。道。而。此。之。視。未。先。近。子。遠。德。器。機。
 既。在。列。朝。表。為。提。調。今。謂。是。南。極。是。且。是。
 制。制。制。春。義。為。外。之。飾。其。相。司。以。者。神。
 辨。以。此。因。王。東。國。之。一。不。務。日。表。會。辦。如。考。審。
 辨。以。立。帝。遠。降。為。之。例。中。層。行。如。
 司馬牛。思。也。是。子。張。之。何。謀。而。今。舊。著。于。
 司馬牛。若。春。秋。一。何。事。呢。與。密。知。念。當。財。文。

項城以高才遠號之。願喜聞許術權謀。特使天下人均入我彀中。而不覺而不戒。無物深穢者。早知其切業之不行。矣。信甲午東市拉項城已自。韓歸眾。而咸符其駭。韓曰。久因慮失。當致演成。不可以檢之。而時高階。專文。正在極。建業。要其才。嘗隆其之年。以無事。路。孝。直。修。撰。是。年。及。第。後。余。與。同。籍。諸。人。不。過。孝。直。于。此。世。惟。酒。事。耐。孝。直。述。項。城。在。韓。驕。蹇。不。法。諸。事。偏。步。其。言。之。行。習。與。六。從。交。言。二。通。直。斥。其。非。底。成。有。所。警。覺。亦。君。子。愛。人。以。德。之。一。端。云。歎。如。二。十。年。來。遠。流。世。聖。項。城。已。逝。而。此。書。茶。乃。流。布。

世凱所生母微不齒於諸父昆
弟少無行門以內幾莫能堪其
媯母牒訴諸官陳州守令重世
凱門伐寢其事陰贊之出遊時
李文忠督直隸以通家子投謁
無所用遂渡海依吳武壯時
萌故態應元屢矣卒不死因以
成今日中國之既當庚子拳亂
後世凱驟起代文忠於是飾新
法紊朝政人多指其有異志
惜兼鈞者之終不悟也誦此書

此朱晁君先生與表頌城絕交書也
人事輪轉卒獲歲守幸矣表亦
一時之稱獨以輕才世才類爲人下
誠有負天柱許身當日回春一舉
未嘗非一時之感惜乎其言不終
昔南陽宗士林薄而孟德而不與
矣曰相期之志於君晁君其歲寒
之松柏哉書中張子直以者皆列
名張刺晁君自稱道是事如其且如
表氏諱輒四十年一剝擲迄今披露
於世其心豈君之年表氏之不辛耶



二十二年夏秋前。韓國鈞題

邀矣朱夫子風流今尚存壯游
出關塞長揖到軍門文字雞林
重功名鴨水尋亂瀨久隔世何處
為招魂

生小鄰鄉邑棄年我獨留當時
者王帝並世未相謀垂翼一朝逝
冥心萬古求此才存不易而乃忍
愆；

遠海三千里浮生曾一官祇余東
已後於此不成歡宦轍催人在虛
舟入世難遺文今日讀天地自
荒寒

癸酉春暮題

勞君先子遺集 韓國鈞正史草



桂之華軒詩文序

秦興朱曼君先生少儻善屬文。既壯事武昌張公。張公以古文辭著。而先生善爲儷語。猶申耆出於姬傳之門也。其文上規晉宋。下亦流入初唐。嘗爲魯仲連碑。士庶傳誦。有夏侯氏東方像贊風。佗筆札亦稱是。其效初唐者。非其竭思之作也。亦憲賦詩。頗雜宋體。蓋清代風習固然。先生壽不過四十。著述多未就。有五朝會要。余未見。見其桂之華軒詩四卷。文九卷。序之云爾。民國廿二年六月章炳麟

重編桂之華軒遺集序

秦興鄭權伯君重刻其舅氏朱曼君先生桂之華軒詩集四卷。文集九卷。并鄭君增輯補遺一卷。紀年錄一卷。鄭君生晚。不及親炙於先生。以賦爲先生門弟子也。自上海寓書來。而屬爲之序。邑之朱氏。宋南渡後。蔚爲鉅族。其世系見先生所撰宗譜。引明僉憲一馮公舊序。一馮著有福甯定亂紀事二卷。符離定亂

紀事二卷並經收藏家著錄而爲宗譜及縣志所未收者然則朱氏之舊德遺編其先亡佚者多矣先生所著書先後手自繕寫未及殺青歿後其側室趙孺人囊負以歸旣孺人挈其孤子投依南通張季直范肯堂兩先生出其遺墨張先生因取詩文集稿畀翰墨林書局用活字版印行購者衆多久之無存時鄭君游學海外學成歸國當代賢士大夫咸與納交知爲先生甥也恆從之訪求借讀君無以應會鄭君母壽七十母命以賓筵春酒之介用之津逮學林由是桂之華軒詩文集覆本出焉弒嘗疑崑山徐尙書乾學平生起傳是樓修通志堂集編繅刻其書滿家而於其舅氏顧亭林著述乃不著一字後見鄞全祖望所撰顧先生神道表乃知尙書嘗累書迎舅南歸而皆不至止是顏延之平生不喜見要人之意而安溪李光地之顧寧人小傳又稱顧氏厚自寶秘其書謂五十年後始有知我者故尙書亦不欲強爲之也弒又聞江陰繆筱珊先生言仁和龔自珍者金壇段玉裁外甥也龔氏讀說文段注凡三過以朱墨紫三筆

識之有所可則加朱圈有所否則恭注於下惟謹其子衿則墨擲大點縱橫滿紙云云。弑深感于新舊說之不相融。文字間之各異趣。而鄭君能通泰西語言文字之學。而於國學之義理考據辭章三事。鏗而不舍。斯可謂醇乎醇者矣。顧氏音學五書皆所自刻。歿後其高弟吳江潘耒序而行之。又別輯亭林集。日知錄諸書。先生所撰詩文集外。有四裔朝獻長編。兩晉宋齊梁陳會要。各如干卷。藏諸行笈。亦不輕以視人。當先生在廬江。吳武壯軍幕時。項城袁公世凱方爲僚佐。先生惡其不學無術。移書讓之。遂與絕交。其志行與顧氏蓋相若。鄭君家貧。乃今以母壽進謀爲舅氏之書。刊行壽世。先生有靈。得無笑亭林不如我邪。是集初刊。本無序跋題辭。鄭君因以平居習聞庭訓。又取先生及其親知朋舊之緒言。鈎稽而排纘之。撰紀年錄一卷。無蓋闕。無傳疑。此與平定張穆崑山吳映奎等所編之顧亭林年譜成於後人之手者。又非可同日而語矣。抑弑又有說者。鄭君紀年錄引二知軒文存。泰輿何萱石閩著有韻史八十卷。紅露館文

集十卷按萱爲先生之外曾王父博學好問文章爾雅所撰道光泰興縣志略四卷卓然史家而其人其書世鮮知者念之慨歎何氏爲先生外家鄭君又爲先生宅相宜其學術淵源有自來矣鄭君有徐尙書之學而不矜尙書之行亦不居尙書之位故其力不足以舉刻全書他日者總羅文獻開局名山先生遺著將一一篇第而繡梓之無待言矣弑于何氏蓋重有望於鄭君焉昔漢楊惲始讀外祖太史公記南齊劉瓛聽受舅孔昭先更讀范寧傳事在簡策傳爲美談鄭君今茲重刻先生遺集可以使當世學者更讀異書後此補刊遺稿可以使先世清芬弗墮門業孝思錫類夫何間然獨弑學殖荒落老大無聞自恨不能效潘檢討之輯刻師說而誦龔禮部平生師友小記蓋不勝其夜思疚心涕淚滂沱也已先生所爲詩古文辭久有定論弑分爲弟子義不敢贊一辭惟以鄭君肫肫垂問強綴贅言述其重編是集之原委并及補撰紀年錄之義指云

爾金弑謹識

曼君先生紀年錄

外甥鄭肇經權伯敬編

公姓朱諱銘盤字傲憫號曼君原字日新江蘇泰興人也先是朱氏有宋贈御史中丞諱寶明者於高宗之初以參謀軍事棄官渡江爲始遷泰興之祖（註一）迄今八百餘年枝裔繁衍號爲邑之大族公高大父諱景純字厚蘊乾隆乙酉拔貢直隸州判曾大父諱樹觀字藝田諸生大父諱南薰字舜琴諸生本生大父諱蘭薰字湘浦父諱光魁字斗垣諸生大父本生大父父並以公贈奉直大夫大母何本生大母陳母何繼母蔡並贈宜人（註二）斗垣公有子三人公居長次銘孟字仲雅廩膳生候選訓導次銘孟早卒公生而岐嶷好學不厭少負才名壯參戎幕工詩文善篆隸與通州張季直饒范肯堂當世如臯願延卿錫爵海門周彥升家祿並以文行著重於海內（註三）公以光緒壬午年優貢舉本科鄉試嗣以軍功保

舉知州光緒癸巳積勞致瘵卒於旅順軍中直督王公夔石文韶奏准照知府陣亡例賜卹蔭一子俟及歲後以州判用遺著有桂之華軒詩集四卷文集九卷四裔朝獻長編五十六卷兩晉宋齊梁陳會要二百四十卷妻曹氏諸生曹子勤克成之女男麟之女二適巴適蔡竊按公之歿也距今卅年矣鄉里之間婦孺猶知公名而公之遺墨雖寸楮片縑得之者莫不視同瓊寶顧公之生平事蹟既闕傳誌可考而訪諸鄉里長老亦已難得其詳惟於公之遺著及公之師友譜集中尙能略窺其梗概爰不揣謙陋分年編次如左

清咸豐二年壬子

是年二月廿五日卯時公生於泰興縣城鉞

街私第（註四）

咸豐三年癸丑

二歲

是年五月公摯友通州張季直齋生（註五）

咸豐四年甲寅

三歲

是年七月公摯友通州范肯堂當世生

咸豐五年乙卯 四歲

咸豐六年丙辰 五歲

咸豐七年丁巳 六歲

咸豐八年戊午 七歲

咸豐九年己未 八歲

咸豐十年庚申 九歲

咸豐十一年辛酉 十歲 是年六月十四日大母何卒

同治元年壬戌 十一歲 是年九月廿九日仲弟銘孟生

同治二年癸亥 十二歲

同治三年甲子 十三歲 是年八月公丁母憂

同治四年乙丑 十四歲

同治五年丙寅 十五歲

同治六年丁卯 十六歲 三弟銘盦生

同治七年戊辰 十七歲 是年公受業於同里戴迺卿先生煊並問業

於同里名宿程伯和先生誦

同治八年己巳 十八歲 是年公受業於儀徵劉玉生先生蘊輝館設

泰興送子橋朱芝圃家

同治九年庚午 十九歲

同治十年辛未 二十歲 是年公受業於姻伯蔡緝齋光熙隨讀六合

學署 識通州葛青伯桐與爲友（註六） 識滁州斷指生侯謹之

度時謹之已近周甲屈年輩與公交遊並謂公終當有文章之名請爲之

傳（註七）

同治十一年壬申 廿一歲

同治十二年癸酉 廿二歲 是年游庠

同治十三年甲戌

廿三歲

八月妻曹來歸旋丁父憂

冬兩淮鹽

運使定遠方子箴濬頤聘公爲記室公去揚州師事方公先是公因同里吳禮園寶儉上書方公並達以文爲贄願列門牆之意方公受讀公文以爲高古奇逸離塵絕俗近今人士得未曾有欣然許諾因有是聘（註八）

識武進管才叔樂高郵董策三對廷東臺陳伯生寶與爲友（註九）

光緒元年乙亥

廿四歲

公在揚州與方公及王謙齋許叔平管才叔

陳伯生董策三時有唱酬是年冬公等有消寒第一集至第二十五集聯句之作而公尤爲方公所重消寒第一集聯句方公有海陵朱生人中核

謂曼君（箴）

句消寒第十八集方公有衆中拔俗朱公叔

謂曼君海內知

名管幼安謂才叔句又方公調叔平詩有朱生曼君才可敵顧練句（註

十）是年方公爲公序桂之華軒文稿謂公甫逾弱冠心匠旣巧腹

笥又便由此進而愈上烏能限其所至又序桂之華軒詩草謂公五言善

學太白七律亦有奇氣。五七古歌行則與昌谷少陵爲近。年少才雄。家貧嗜古。自來揚州。角逐壇坫。足張一軍。(註十一) 咸豐三年粵寇陷金

陵。江寧縣知縣祥符張君行澍巷戰力竭死之。同治二年清兵克金陵。張君從子方樾自中州間關跋涉來覓遺骨歸葬。公以張君前宰泰興有善政。民頌其德。因述之於方公。請作張令君歸骨記。以光忠烈。(註十二)

泰興陳虹江啓文嘉慶間官開歸陳許道。性廉介。不可干以私。尋以會翰東科爾寺案。與同官齟齬獲罪。遣戍烏魯木齊。一時賓客星散。獨傭書。梁生毅然從行。在戍六稔。道光元年陳公賜還。甫得偕歸。梁後登賢書。成進士。佚其名。河南祥符人。公言於方公。書梁生事。以爲天下風。(註十三)

泰興何萱字石閭。道光歲貢。善治經。通訓詁聲韻之學。著紅露館文集十卷。韻史八十卷。性節儉。冬一裘。夏一葛。中夜危坐著書。沉思渺慮。無間寒暑。足不出戶。幾三十年。當時名宿如武進李兆洛。仁和龔自珍。邵陽

魏源並爲千里神交於韻史多所商榷陳潮字東之道光舉人通經工小篆當時謂其質樸古雅上埒陽冰又擅周髀之學夜登高臺仰窺星象達旦不寐酒酣耳熱慷慨談天下事十中八九游京師輦下諸巨公咸引重之年才三十九卒於客邸與龔自珍友善人目爲陳龔潘人麟字散木道光歲貢少恃才放佚鄉里怪之長好詞章所爲駢體文瑰麗無匹善繞弋故實典雅淵博有敏之者輒娓娓答不休清代朱竹垞毛西河所著詩文皆能摘其使事之謬舛蓋百無一完者晚益窮困縱酒嗜博放浪規矩之外一日忽治具集朋儕涕泣爲別衆詫之答曰世上鬱鬱吾將從河伯逝也翌日投揚子江死公嘗以三君事蹟述之於方公方公因有泰興三高士傳之作(註十四)

光緒二年丙子

廿五歲

公仍在揚州是年食餼

九月方公入覲

有補授四川按察使之命十月南旋十二月入川履新是時公方抱病方

公貽公書勉以養生之道愛護備至公之起居飲食書內述之尤詳書云養生之道無過於慎起居節飲食二語子癯而善病來揚州二載婁見子病予竊爲子憂之子性不嗜飲少飲輒醉每飯不過一盂葷羶滿前往往不敢下箸意子之飲食固無弗節者而何以不病寒卽病熱且年年病瘍今者患生於左頤口弗能下咽予雖不知醫然曩見族人患此者侵尋數稔云是骨槽風潰則難治昨屬漢卿往爲子診視未稔渠已過子否子才壯而體羸腹便而氣餒當思保此千金之軀以成千秋之業矧遠客傭書家有倚閭老母尙乏含飴之樂而子願負笈出遊夫豈得已哉起居之間一有不慎則病卽乘虛而入（註十五）

光緒二年丁丑 廿六歲 是年二月公至浦口客慶軍統領提督廬江

吳公筱軒長慶軍幕（註十六）始於軍中識張季直周彥升束畏皇邱履

平林怡菴與爲友（註十七）謹按彼時各行省文武大臣能以采納忠讜

敬禮士大夫著重於海內者在粵惟張靖達公樹聲在蘇惟吳武壯公
慶於時張公墓府則有武進何梅孫嗣焜賀縣于晦若式枚如皋顧延
錫爵吳公墓府則有通州張季直齊江都束畏皇綸海門周彥升家祿
縣林怡菴葵及公並爲海內知名之士聚處一軍以文章義理相切劘
難縱橫意氣激發極朋友之樂而未嘗有厭薄之志（註十八）而公尤爲
張季直所推崇日後交誼亦最篤季直酬公詩云盤也弱而才十倍於不
彊自其少日時開口詠鳳皇能爲六朝文亦復資初唐故鄉寂文雅得子
真非常（註十九）又季直祭公文云泔泔廬江風雲千旄偉余兩人河
赤力君氣食牛何有衆豸獨余是親詠陶好喜余之聰明實非君匹意
相資磋磋切切分牋寫檄晝几宵燈提舟並轡抵蹠掄肱（註二十）
五月蝗見江北各縣公與季直合陳總督請通飭捕蝗吳公自天津南
總督檄以軍隊捕吳公部勒各營輒未明起躬自督視指授方法蝗滅

靖 (註廿一)

八月某甲告公與季直吳公欲爲合肥某廬江某及公

與季直納貲爲部郎意若何季直語公彼二人爲吳公鄉里後輩容有是請而吳公有是許我二人特宴會之陪客耳不可於進身之始藉人之力量且安知我二人之必不以科名進徒留此迹無謂公亦云然甲告吳公再三返終謝之 (註廿二) 九月長女生 冬方公在蜀有歲暮懷公詩透迤相見灣靈秀有孤山文筆信天授所期非等閒羅胸星璀璨脫手錦爛班日者參戎幕聞笳足起孱 (註廿三)

光緒四年戊寅

廿七歲

公仍客浦口軍幕

四月江北蝗再見吳

公仍以兵法部勒督捕 (註廿四)

八月陳檢討伯生卒公作墓表

(註廿五)

光緒五年己卯

廿八歲

公仍客浦口軍幕

七月東畏皇被辱於

白塔河鹽卡公與季直上書糾吏時總省侯官沈公幼丹葆植已寢疾未

幾卒於官。公等幾顛而躓，賴吳公而免於危。（註廿六）

光緒六年庚辰 廿九歲 公仍客浦口軍幕 三月二十日公與張

季直、范肯堂同舟至浦口，舟行聯句。（註廿七） 五月女嬰生 吳

公升授浙江提督，五月入覲。（註廿八） 七月公因范肯堂謁武昌張

先生廉卿，裕釗於金陵，問爲古文法，執弟子禮。張先生嘗語人曰：吾得通

州三生，茲事有付託矣。（註廿九） 張先生贈公詩有名區佳山水，蒸餾孕

奇尤。英英范與張，驟駟驂騏驎。與子總六轡，駸駸馳椒邱……况聞子疇

昔佳士，復顧周。遠聞輒心許，想像劍發眸句。（註三十） 冬吳公奉朝

命，調補廣東水師提督，仍幫辦山東防務，乃留軍六營駐浦口，下關吳淞

移軍六營駐登州黃縣，公隨吳公移駐登州。（註卅一） 三弟銘盞卒

光緒七年辛巳 三十歲 仍客軍幕在登州 四月項城袁慰廷世

凱至登州，依吳公。吳公命在營讀書，屬季直彥升及公爲是正制藝。吳公

語公等曰。昔贈公以團練克復廬江。爲賊所困。命赴袁端敏公軍求救。端敏以詢子姪。子文誠公以地當強敵。兵不能分。主不救。姪篤臣以紳士力薄。孤城垂危。主救遷延時日。而廬江陷。贈公殉。嗣與文誠絕不通問。而與篤臣訂兄弟之好。端敏後命隨營讀書。以示恤義。不應。命今留慰廷讀書。所以報篤臣也。按慰廷爲篤臣嗣子。先是以事積忤族里。衆欲苦之。故挈其家舊部數十人赴吳公。以爲吳公督辦海防。用人必多也。而防務實無可展布。故吳公有是命。旋吳公因公言。畀慰廷會辦營務處差。(註卅二)

六月女醫殤。(註卅三)

是年軍事簡。多讀書之暇。公與季直彥

升怡菴諸人時有唱酬。(註卅四)

先緒八年壬午

卅一歲

仍客登州軍幕

公以是年優貢舉本科

鄉試。試後馳往軍中。從吳公援護朝鮮。先是日本干涉朝鮮內亂。六月吳公奉督師援護朝鮮之命。時幕僚率歸。應鄉試。散去。獨張季直丁內艱。留

軍中季直措置前敵事手書口說畫作夜繼乃請留袁慰廷執行前敵營務處事七月三日拔隊朝鮮參判金雲養允植同行七日晨抵朝鮮南陽府十二日軍渡漢江十三日吳公入韓京晤王生父李昰應午後昰應至軍執送南陽軍傳登兵船赴天津十六日應國王密請督軍攻剿亂軍亂平吳公移駐漢城枉尋東廟廟祀關壯繆(註卅五)故季直祭公文云壬午東征鯨鱗撞突君後余先長纓短策朝鮮亂事既定公作東援紀功之碑吳公以下幕府僚佐將吏等姓名並勒碑陰(註卅六)

光緒九年癸未

卅二歲

仍客漢城軍幕

二月公入京應禮部會

試不售(註卅七)

是年秋公旅病兼旬朝鮮國王李熙頒賜藥物旋

又頒賜參帛牋丸等物並牋謝之(註卅八)

是年公與朝鮮士大夫

時有唱酬(註卅九)

光緒十年甲申

卅三歲

是年三月葛青伯桐卒公作墓誌銘(註四)

十) 四月公隨吳公調防奉天金州有留別朝鮮士大夫詩(註四)

十一) 時吳公已病甚吳公自朝鮮分其軍三營畀慰廷留防自統

三營至奉不兩月慰廷自結李相一切更革露才揚己頗有令吳公難堪者公因與張季直昆季移書切讓之(註四十二) 閏五月二十一日

吳公卒於軍軍事在朝鮮者由吳提督兆有繼統在金州者由黃提督仕林繼統賓客星散(註四十三) 公與張季直邱履平南旋有金州述

別聯句之作(註四十四) 公作祭廬江公文哀廬江公文及吳武壯

公墓誌銘(註四十五) 秋公客蘇州潘中丞偉如爵處識江建霞標

(註四十六)

光緒十一年乙酉 卅四歲 是年公客江蘇督學瑞安黃公漱蘭體芳

幕襄定江左校士錄並授黃公子紹裘姪紹第讀(註四十七) 作南

菁書院記(註四十八) 作泰興慶雲寺照潭和尚身塔銘并書丹勒

石 是年朝鮮國王李熙感吳公平亂功爲建靖武祠於漢城歲時致祭祠內有去思碑金尙欽撰金允植沈履澤書碑鐫光緒八年隨征將士賓吏題名首列幕賓優貢江蘇通州張謇訓導江蘇海門廳周家祿舉人江蘇泰興縣朱銘盤第二十一名爲營務處同知河南項城縣袁世凱
(註四十九)

光緒十二年丙戌 卅五歲 是年二月公入京應禮部會試不售四月與張季直劉仲魯若曾出都至保定蓮花書院起居張先生廉卿晤延卿
(註五十) 七月姪女駿芝生 八月叔父嶺梅公卒 吳禮園

寶儉卒於武昌公作墓誌并書丹 (註五十一)

光緒十三年丁亥 卅六歲 公家居丁繼母蔡憂 七月公修朱氏

宗譜作宗譜敘 (註五十二)

光緒十四年戊子 卅七歲 是年公客金州張軍門仲明光前軍幕門

人馬彥循等隨幕受業（註五十三） 六月臨張猛龍碑 十月納姬

趙氏 十二月南旋葬繼母蔡（註五十四） 舅氏何杏衫卒公作

何君之誄（註五十五）

光緒十五年己丑 廿八歲 仍客金州軍幕 六月弟仲雅自湘督

學陸公伯葵寶忠幕歸 十一月弟婦鄭卒仲雅鬱鬱不得志久患失

眠公思有以慰之因歸函召弟赴金州而託姪女駿芝於歸榮陽從妹撫

育之蓋公之弟婦爲公表姑丈鄭琢齋汝玉之長女而公之從妹又爲鄭

公之子婦也（註五十六）

光緒十六年庚寅 卅九歲 仲雅至金州同客張公仲明軍幕 二

月公入都應禮部會試不售（註卅七） 是年公治學日有程格撰四

齋朝獻長編五十六卷敘曰今錄自漢元年以來至于明季凡二十五朝

朝獻故事通爲若干事昔梁有天監職貢之圖唐有入朝首領之記宋有

崔峽列國入貢之編。明有吳氏西洋朝貢之錄。並專紀本朝不貲前古。今此總集。義主闕張。因以明帝皇之至尊。示夷戎之難御。若朽索之控八駿。譬一繩之綴萬石。弛張在於威德。澆濡繫於政道。畏壘可以穰歲。荒宅可以成都。豈况巍巍大聖之朝。必有喁喁慕義之美。司徒司馬各有司存。疆場之事。一彼一此。殷鑒不遠。在於夏后。前車未終。來軫方急。大夫君子。庶幾觀覽焉。(註五十七) 謹按公之著是書也。蓋有感於壬午以後。國事蝸蟻藩籬。動搖深冀。朝野上下。鑒於外患之日亟。而有所警惕也。 公客

金州旅順。僻處濱海。廣斥之域。遙念鄉國。江湖之美。故公與周校官彥升書云。銘盤近年以來。殆百無好趣。婦孕不育。比已四五。妻子紛然。去國千里。門對渤海。日聞潮汐。舟船翻飛。風雲千變。仲夏五月。乃見青草。大暑若火。無一陰樹。如此之日。若彼江南。魚稻之國。竹下烟月之地。瓜李如陵。荷芰如海。清池在前。涼風在後。顧不美歟。且是時公之起居。既甚簡陋。而幕

僚亦不復如當年之盛。故公與顧舍人聘者書云：所居室屋，截板爲蓋，牆則土石相積，最畏滯雨，甚或傾壞。小亦衆漏若矢，箸人牀几，或然燭數起，移牀就燥，檐滴財止。中響仍奏，若此之夕，歲幸不月，觀觀乃在夏秋間耳。門距海水僅三五十步，繚牆五尺，裁及人鼻，舟船出入，堂上皆見。船旗誰某，久亦辨之……若僕屏跡窮裔之外，放意草木之域，騶卒對語，泥塗爲侶，地無冠帶，何有士夫？山無林木，何有禽鳥？井泥一斗，何有滄茗之歡？海魚怖人，何有魴鯉之美？霧風腥鼻，高詠何區？朽石如泥，摩厓無所。以此自構，坐損而已。自夏以往，風力日甚，冬晝出門，更患膚裂，有何可喜，而來此乎。（註五十八）

光緒十七年辛卯

四十歲

仍客金州軍幕

公以軍功保舉知州

得贈大父父並爲奉直大夫，大母母並爲宜人。（註五十九）

七月從

母弟周仲璞維申卒於金州寓公馬氏館，公作哀辭。（註六十）

十一

月邱履平卒於大沽口。公作墓志。(註六十一) 公著四裔朝獻長編。既成。乃纂三晉及南北八朝會要。以續徐博士之書。其體例一依博士之舊。(註六十二) 謹按會要之作。始於唐代蘇冕。嘗次唐高祖至德宗九朝之事。爲會要四十卷。宣宗大中七年。楊紹復等奉詔次德宗以來事。爲續會要四十卷。宋王祁公溥復採宣宗至唐末事。續之爲新編唐會要一百卷。又纂五代會要三十卷。並於宋太祖建隆二年。表進於朝。詔藏史館。(註六十三) 又二百餘年。宋武學博士徐天麟纂西漢會要七十卷。於宋寧宗嘉定四年。表進。有旨付尙書省藏之秘閣。又纂東漢會要四十卷。於宋理宗寶慶二年。表進。詔藏秘閣。(註六十四) 降迄清季。嘉慶間。大興徐松從永樂大典輯宋會要四百六十卷。(註六十五) 同光間。黃巖楊晨纂三國會要二十二卷。永新龍文彬纂明會要八十卷。(註六十六) 除宋會要世傳有鈔本外。餘均刊行於世。公之纂三晉及南北八朝會要。蓋欲竟古人

未竟之功而期有所不朽於後世也。

光緒十八年壬辰 四十一歲 仍客金州軍幕 一月四日公外舅

曹子勤卒公作墓誌銘（註六十七） 二月入都應禮部會試不售（註

卅七及六十八） 邱瓊章卒公作文祭之（註六十九） 七月爲亡友陳

伯生刊遺集並作敘（註七十） 七月臨張黑女誌 十二月敘亡

友邱履平歸來軒遺集（註七十二） 公作朱氏宗祠述頌之碑以昭先

德（註七十二） 公爲張季直作柳西草堂記昔孝標自儼敬通謂有

三同四異而公方於季子則有四同三異文曰季子出身壠晦家爲寒門

噓枯吹生仰於代彥僕單蔭衰薄門無從政祖文父筆裁見彫摧名師佳

朋遭逢壯日此一同也季子偉文閎製照郡騰州明經孝廉匪顏伊伯朝

士望而捧手里賢就而乞論僕小才鄙什髣髴大賢猥同邦州遽齒世喙

顏謝潘陸連類而言此二同也季子負俗孩年不爲里擇浮湛壇旆之下

論議帷帳之內。西曹祭酒。諮議參軍。流連賓僚。激昂府主。僕雁行兄齒。首尾十年。對案裁書。聚火寫檄。此三同也。著錄武昌之門。盡通賀瑒之業。上書侯官之府。幾蹈正平之危。氣壯神高。曾無悔嘆。名滿千里。謗亦隨之。此四同也。季子家有敝廬。可蔽風雨。野有下澗。足供酒糴。一歸不出。堅若邱山。招隱之篇。不日則月。僕一椽一壠。什二不訾。妻兒紛然。留滯窮海。朝對門士。夕呼老兵。眷望端居。報我夢寐。此一異也。季子上有老父。兄祿千鍾。老萊班連之衣。少君挽車之役。昔聞此語。今見此人。僕霜露摧心。遺書在矚。闔門計口。菽粟無情。此二異也。季子軒車所適。多有通人。跽伏鄉邦。匪無忠信。芳草十步。賢士百里。足以陳述高義。激礪心神。僕東走二遼。地如裸國。發言建論。暄寒在心。翻悔平生。猥知文字。此三異也。(註七十三)

是年公作感逝銘。追念師友。以昭達情志。抑揚悲哀。文曰。故縣學生從叔父諱廷蘭。字滋圃。故縣學生李公諱晉。字秋丞。故大使徐公諱兆鴻。字蒨

齋故縣學生儀徵劉公諱蘊輝字玉生故縣學生曹公諱克成字子勤故
署湖北荊門州知州吳公諱寶儉字禮園故四川按察使定遠方公諱濬
頤字子箴故翰林院檢討東臺陳公諱寶字百生故戶部主事高郵董君
諱對廷字策三故太子少保兵部尙書兩廣總督合肥張靖達公字振軒
故廣東水師提督廬江吳武壯公字筱軒故太子太保兵部尙書兩江總
督侯官沈文肅公字幼丹故翰林院庶吉士通州馬君諱毓鏊字勿庵通
州葛君諱桐字青伯右一十四君皆徵生年時被服恩誼者也或乃識賀
循於童齒偉應詹於弱冠拔李含於寒門甄楊方於陋族若嘉澍潤草惠
風振柯投困鱗乎清流縱勁羽乎遙野豈直豫州有吹生之惠司隸有容
接之雅若其調護險阻瀚訟讒謗力逾九虎功隆起痿使夫太行化青松
之道素絲慶返素之日豈非情兼伯叔道稟雷風者歟（註七十四）

光緒十九年癸巳

四十二歲

仍客金州軍幕

九月女翁蟬生

十月姬趙氏生子麟之。十一月十八日公以積勞病瘵卒於金州軍中。直督王公文韶奏准照知府陣亡例賜卹廕一子。俟及歲後以州判用。(註七十五) 翌年甲午中日戰事將起。旅順地處衝要。姬趙氏攜

藐孤抱遺文扶柩倉皇南歸。張季直爲公經紀喪事並安其家屬生計。

(註七十六)

公之遺著有桂之華軒文集九卷詩集四卷四裔朝獻

長編五十六卷所纂兩晉及南北八朝會要已成者爲兩晉會要八十卷宋會要五十卷齊會要四十卷梁會要四十卷陳會要三十卷其他四朝未竟厥功。故張季直祭公文云著書不竟摧腎絕肝。(註七十七) 謹按公

之詩文張公季直曾於光緒三十二年爲之印行四裔朝獻長編及兩晉宋齊梁陳會要稿藏於家世鮮知者而公之詩文當時久有定評狄平子葆賢平等閣詩話云泰興朱曼君孝廉家貧負逸才放任不拘小節類杜樊川之爲人工駢文詩亦清新博雅又云朱曼君孝廉驚才蓋代太白之

流五古五律蕭寥之中咸具勝韻七律典重微患才多朝鮮柳中使小園聽土人雜歌七古一首辭采研妙彌近元白（註七十八）彭澤汪國垣辟疆以瓶水齋主人曾有乾嘉詩壇點將錄之作乃續作光宣詩壇點將錄評曰曼君詩澤古甚深不苟作不矜才自是學人之詩云（註七十九）又山西郭允叔評近代駢文作家頗推崇公文謂其意象則嶽崎磊落其神理則磅礴鬱紆其詞采則雄深雅健其筋力則潛轉從容王壬秋李越縵諸家均不相似云（註八十）

（註一）見朱氏宗譜及公文集卷三朱氏宗譜敘

（註二）見公文集卷六告墓文及卷五朱氏宗祠述頌之碑

（註三）張季直傳記及詩錄挽顧延卿詩云昔年鄉里推同輩周顧朱張范五人又張廉卿濂亭遺詩有贈朱生銘盤詩三首註云朱生泰興人范生當世張生響通州人並從余遊者顧錫爵如皋人周家祿海門人皆以文行知名未之見也

(註四) 見朱氏宗譜及梁廷燦編歷代名人生卒年表。

(註五) 張齋菴年譜及文錄。光緒甲午年祭亡友朱曼君文有云。君昔自語。少余一歲。抗顏贈君。以俶檢字。比君赴來。乃生子。子實長而下。吁。嗟君只。

(註六) 見公文集卷二。葛君墓誌銘。同治之季。始得交遊。於時君年二十有三。

(註七) 見公文集卷四。斷指生傳。

(註八) 方子箴濬頤二知軒文存卷十六。桂之華軒文稿序。

(註九) 見公文集卷六。陳百生遺集敘。往者甲乙之際。余與君同在揚州。兩人相善也。殆無三日不爲詩。

(註一〇) 二知軒詩續鈔卷十八。卷十九。卷二十。

(註十一) 二知軒文存卷十六。桂之華軒文稿序詩草序。

(註十二) 二知軒文存卷二十。張介君歸骨記。

(註十三) 二知軒文存卷二十四。書樂生。

(註十四) 二知軒文存卷二十七秦興三高士傳及秦興縣志人物七

(註十五) 二知軒文存卷十九與曼君書

(註十六) 見公文集卷三光緒十年六月祭廬江公文自我依公丁

申中更八年曰吳曰齊又張季子文錄祭亡友朱曼君文歲在丙子
來爲書

(註十七) 張奮菴自訂年譜卷上及張季子文錄張莘亭七十壽序

吳武壯所統爲當時四軍之一由吳而越而齊而豫楚轉戰五六
浦之招也中原兵事定矣獨海上時時不靖武壯意以爲事變之
當日下春非更得朝氣續之不足以振其弊於是大散貲財畜他
之士於是秦興朱曼君海門周彥升江都東長阜海州邱履平閩

(註十八) 張季子文錄沈友卿集序

(註十九) 張季子詩錄及傳記酬秦興朱曼君銘盤詩三首

(註二十) 張季子文錄祭亡友朱曼君文

(註廿一) 張齋菴自訂年譜卷上

(註廿二) 張齋菴自訂年譜卷上

(註廿三) 二知軒詩續鈔卷二十二

(註廿四) 張齋菴自訂年譜卷上

(註廿五) 見公文集卷一翰林院檢討陳君墓表

(註廿六) 張齋菴自訂年譜卷上及公文集卷三祭廬江公文己卯之秋上書糾吏我與張君

將頌而躡文肅既去微公凡危

(註廿七) 張齋菴年譜卷上與季子詩錄及公詩集卷三舟行聯句

(註廿八) 張齋菴年譜卷上

(註廿九) 濂亭文集贈范生當世序余以今年三月因通州張生審晤其同里范生當世邗江

舟次……泊七月生偕泰興朱生銘盤來金陵復攜所爲文求余爲是正且艱艱問爲文法

又張喬菴年譜卷上。光緒六年庚辰三月。余與楊子青。安震彭。蕭亭。汝雲。偕張先生以事去。山東肯堂以事至揚州。同發。又桐城姚永概。撰范肯堂墓志。武昌張裕釗。客江寧。見張朱范三先生大喜。詫曰。吾一日得通州三生。茲事有付託矣。

(註三十) 濂亭遺詩卷一贈朱生銘盤三首。

(註卅一) 喬菴年譜卷上。

(註卅二) 喬菴年譜卷上及張季子文錄。與朱曼君及叔兄致袁慰廷函。有追司馬因銘盤一言之微。而得會辦營務處之號。委札裁下。銜燈煌然之句。

(註卅三) 見公文集卷一。女醫埒銘。

(註卅四) 喬菴年譜卷上。

(註卅五) 喬菴年譜卷上。

(註卅六) 見公文集卷一。東援紀功之碑。

(註卅七) 見公文集卷四。祭邱瓊章先生文。癸丙庚壬。春官四放。

(註卅八) 見公詩集卷三旅病述感。又見公文集卷二謝朝鮮國王賜藥物牋。又謝朝鮮國王賜物牋。

(註卅九) 見公詩集卷三。

(註四十) 見公文集卷二葛君墓志銘。

(註四十一) 見公詩集卷三留別朝鮮士大夫。

(註四十二) 齋菴年譜卷上文錄卷十一及公文集補遺與張季直昆季致袁慰廷函。

(註四十三) 齋菴年譜卷上。

(註四十四) 張季子詩錄及歸來軒遺稿金州述別聯句。

(註四十五) 見公文集卷三祭廬江公文哀廬江公文卷八吳武壯公墓誌銘。

(註四十六) 按光緒十年蘇州潘公偉如適以贛撫被議家居。十一年潘公出任黔撫。又公詩

集卷三有送江庶常兼懷王五丈詩。

(註四十七) 參考公文集卷三恭送座主少司馬黃公述職入都敍。

(註四十八) 見公文集卷三南菁書院記

(註四十九) 見黃炎培著朝鮮朝鮮壬辰之變中國政府調廣東水師提督吳長慶率登州兵以七月渡韓鎮亂既定韓人倚若長城居三年移駐金州旋卒於軍諡曰武壯韓王李熙於漢城建祠曰靖武祠歲時致祭嗣日本統監府欲廢止之華僑力爭乃移歸華總領事管理明治四十二年四月六日府與領事換文載明祠在京城南明哲坊訓練洞地六百九十坪五合保管修繕由管理者任費所屬地及屋不征稅金及使用費祠有光緒十一年金尙鉉撰金允植沈履澤書去思碑附光緒八年隨征將士賓吏題名首列幕賓優貢江蘇通州張謇訓導江蘇海門廳周家祿舉人江蘇泰興縣朱銘盤皆以文學著稱者第二十一名爲營務處同知河南項城縣袁世凱

(註五十) 盛菴年譜卷上

(註五十一) 見公文集卷三清故署荊州知州吳君志

(註五十二) 見朱氏宗譜

(註五十三) 參考公詩集卷三示馬生彥循及卷四書馬生文。

(註五十四) 見公文集卷四新阡志銘。

(註五十五) 見公文集卷四清故候選訓導何君之誄。

(註五十六) 見公上鄭琢齋姑丈函。

(註五十七) 見公文集卷九四裔朝獻長編敘。又卷四與顧舍人書奉別而還。即以十七日抵

天津。又十二日乃至旅順……家弟相見。強爲喜笑。入則夫婦相慰。出則友朋相溫。稍營几案。便置書筆。日爲程格。以自令督。所撰集西漢已來四裔朝獻事。便已累帙。今須手寫。更村唐史。日可十數紙。裁計文二千許。

(註五十八) 見公文集卷四與周校官書及與顧舍人書。

(註五十九) 見公文集卷六告墓文。

(註六十) 見公文集卷四周仲璞哀辭。

(註六十一) 見公文集卷四邱履平墓志銘。

(註六十二) 見公文集卷四與譚仲脩書

(註六十三) 見唐會要五代會要及四庫全書總目提要史部政書類按王溥字齊物并州祁人漢乾祐中登進士第一周廣順初拜端明殿學士恭帝嗣位官右僕射入宋仍故官進司空同平章事監修國史加太子太師封祁國公卒諡康定事蹟具宋史本傳所纂唐會要凡分目五百十有四於唐代沿革損益之制極其詳核其細瑣典故不能概以定目者則別爲雜錄附於各條之後又間載蘇冕駁議義例該備有裨考證宋慶曆前已鏤版於吳又按五代于戈倣擾百度陵夷故府遺規多未暇修舉然五十年間法制典章尙略具於累朝實錄溥因檢尋舊史條分件繫類輯成編後歐陽修作五代史僅列司天職方二考其他均未之及如晉段顥劉昫等之議廟制周王朴之議樂皆學闕鉅典亦略而不詳又如經籍鏤版昉自長興千古官祿肇端於是崇文善政豈宜削而不書乃一概刊除尤爲漏略賴溥是編得以收放失之舊聞厥功甚偉蓋歐史務談褒貶爲春秋之遺法是編務核典章爲周官之舊例各明一義相輔而行讀五代史者不可無此書也宋慶曆中文潞公帥蜀嘗刻行之

(註六十四) 見西漢及東漢會要四庫全書提要中國人名大辭典按徐天麟字仲祥臨江人
宋寧宗開禧元年進士調撫州教授歷武學博士通判惠澤二州權知英德府纂兩漢會要
漢兵本末西漢地理疏山經等書事蹟附見宋史徐夢莘傳西漢會要仿唐會要體例取漢
書所載制度典章見於紀志表傳者以類相從分門編載其無可隸者亦依蘇冕舊例以雜
錄附之凡分十有五門共三百六十七事班固書最稱博瞻於一代禮樂刑政悉綜括其大
端而理密文繁驟難得其體要天麟爲之區分別白經緯本末一一犁然其詮次極爲精審
昔人稱顏師古爲漢書功臣若天麟者固亦無愧斯日矣東漢會要之體例與前書相同所
列亦十五門分三百八十四事惟西漢會要不加論斷而此書則間附以案語及雜引他人
論說蓋亦用蘇冕駁議之例也東漢自光武中興明章嗣軌皆汲汲以修舉廢墜爲事典章
文物視西京爲盛而當時載筆之事如東觀紀及華嶠司馬彪袁宏之類遺編斷簡亦間有
留傳他若漢官儀漢雜事漢舊儀諸書爲傳註所徵引者亦頗犁然可考故東漢一代故事
較西漢差爲詳備天麟據范書爲本而旁貫諸家悉加哀次其分門區目排比整齊實深有

裨於考證

(註六十五) 嘉慶間徐松從永樂大典輯宋會要卷數不詳張香濤之洞得書稿於京師督學時屬廣雅書局王雪澄乘恩刊印未果辛亥後稿歸吳興劉翰怡承幹已多殘闕劉氏爲之補綴釐爲四百六十卷現藏北平圖書館尙待刊行按徐松字星伯順天大興人嘉慶十年傳臚官至陝西延榆綏道精於史事尤長地理好鐘鼎碑碣文字著新疆識略後漢書西域補註西域水道記西游記考

(註六十六) 見三國及明會要按楊晨字定敷浙江黃巖人光緒三年進士官刑部掌印給事中又按龍文彬字筠圃江西永新人同治四年進士官吏部主事所纂明會要亦沿兩漢會要體例分十五門繫以子目四百九十八事徵引必註書名以事之先後爲次依蘇冕駁議例附錄通鑑輯覽御批及綱目三要發明並雜引各家論說

(註六十七) 見公文集卷六曹君墓志銘

(註六十八) 見公詩集卷四示仲雅詩四放春官未足悲歸來兄弟飽論詩

(註六十九) 見公文集卷四祭邱瓊章先生文。

(註七十) 見陳百生遺集敘。

(註七十一) 見邱履平歸來軒遺集敘。

(註七十二) 見公文集卷五朱氏宗祠述頌之碑。

(註七十三) 見公文集卷六柳西草堂記。

(註七十四) 見公文集卷八感逝銘。

(註七十五) 謹按公實以病瘵卒於軍中。公子驥之今已年逾不惑。無錫丁福保佛學起信編引清代野記。張祖翼據旅順歸客語。謂公在湯餅會席上遇鬼索命。父子同時並死云云。全與事實不符。特辯正之。

(註七十六) 平等閣詩話卷一及舊菴年譜卷上。

(註七十七) 張季子文錄祭亡友朱曼君文。

(註七十八) 狄平子平等閣詩話卷一及卷二。

(註七十九) 民國十四年甲寅周刊第壹卷第五號至第九號

(註八十) 重華月刊第一期

詩 桂 之 華 軒 集

存 舊 集 卷 一

桂之華軒詩草序

予往論詩云五七律當專宗唐人五七古則宜出入於漢魏唐宋之間又謂詩以言情性靈勝於標格彼專以雕琢字句爲能者仍是門外漢故有前輩詩人問予此生作何歸宿予茫然無以應之三百篇兼采里巷歌謠不必皆詩人也大率天籟自鳴無意求工而自然中節夫亦何嘗有所規仿哉予之不作詩話也以此詩與文無二道文既不可言派詩則何獨不然嘗謂學詩者不必讀宋以後詩非宋以後無詩也宋以後詩舉不能出漢魏唐宋人範圍吾之學力足以造之亦猶書家之貴取法乎上也曼君詩五言善學太白七律亦有奇氣五七古歌行則與昌谷少陵爲近年少才雄家貧嗜古自來揚州角逐壇坫足張一軍昨日消寒吟社天甫明諸老尙蒙頭高臥子獨冒雪而至與予並案吟哦運筆若飛予詩甫就視子則亦脫稿已客至輒爲聯句詩子則矢口而成不落人後間有未安者予命之更易援筆點竄絕無難色如子之才予固不願子徒

作詩人也。子請益於予。予以平日之論告之。且戒之曰。作詩以真爲主。最忌辭不達意。若連篇累牘。誇多鬪靡者。往往墮落下乘。弗識此中三昧。舉世目爲詩人。豈得爲詩人哉。予從事於此卅年之久。人笑其癖。而予則終不爲詩所病。近更治古文以擴充而馳騁之。乃益恍然於依門傍戶。隨人作計之非也。予固不願子徒作詩人也。光緒元年歲次乙亥定遠方濬頤序。

桂之華軒詩集目錄

方序

卷一

當庾肩吾詠長信宮中草

隋隄

秋夕懷葛桐

平山堂

史閣部墓

梅花嶺梅花畫壁

過故館懷先師劉公

贈蔣生

天上謠

寄婦

寄示弟孟

寄懷蔣生

題畫蝶寄人

出郭

舟中卽事

書寶應孔太僕遺集一首示管才叔秀

才

同齊丈蔣生遊平山堂作

感舊

送侯謹之一丈祭其師墓清河

夜行到家

露筋祠

書胡厚堂詞本

阻風泊江口

寄婦

憶家園花樹

夜抵燕子磯

隔江望螭磯

秦淮贈人

奔走

枉說

獨飲二首簡何七舅

贈金大冶青

舟出北郭悵然有感書寄所親

歙人洪醕士後圖兄弟喜詩好客邀過其家

和洪秀才見詒之作

同袁四季枚臨湖禪院看牡丹作

舟泊六閘口作

述感三首

寄懷吳司馬湖北

燕子磯

珍珠泉

贈張秀才季直兼懷吳司馬武昌

述情

行路難

日晚

惘悵

贈邱大履平

東海二壯士行

邱生劍歌

客中端午作

江頭

碧泉

喜贈江卿兼懷莊司馬董戶部

苦雨行

與范大鑄

三台洞

舟泊燕子磯作

送邱大履平之淮陰

寄方先生四川

陳檢討輓詩

寄范鑄葛桐

歸思甚亟遲張四季直楊大子青不至

小舟抵江口子青季直適至道左相見喜賦

奉送張中丞巡撫貴州

留別范大无錯范二中木范三秋門

江氏山居同范大兄弟

舟中二首畚陳子璿秀才

送束畏皇視兄疾海門

喜王丈至卽送之揚州兼懷方先生

苦惜

游勇行

屯田行

卷二

人日雜詩

寄范大

水心亭宴集留別諸子

與馬庶常

留別分得飄字

與季直无錯行抵如皋書寄中木兼送

季直入都

舟行聯句

諸葛忠武畫象聯句

哀雙鳳聯句

岡嶺曉發

蓬萊閣

登州雜詩

書蓬萊閣壁

住久一首漫書屋壁

天橋暮望

登州風夜

自蓬萊至福山道中作

消息

登燕台山

車行述感

遲舟不至賦示子青

別人

與朱璞臣才秀

吳淞舟中書景奉懷張夫子二首

將發金陵張道岷適自上海至爲留一

日

留別范觀察

與陶籀

舟抵燕台夜題旅壁

書燕台山亭

新甸旅舍

野店午飯因書屋壁

五十里埠

海色一首奉上所知

蓬萊閣卽事

水城

寄侯一丈兼懷洪竹樓二兄

遊蓬萊閣下石洞作

登州作

登州

登蓬萊閣寄懷馬庶常

中宵

蓬萊閣題壁

頗聞

傍夕一首寄仲弟

高秋

登閣迴望愴然有感

與林秀才夜話

得方先生肥上書奉懷二首

排悶偶賦

與易雲題兼懷邱履平

送沈海秋歸無爲州

書景述意

浩蕩

月

秋深

雜詩

登蓬萊閣懷履平淮上

蘇文忠公祠

周彥升自海門至

觀海有感

奉和周明經大兄寄人之作

早秋感賦

寄孫聖與秀才京師

送周大鶚歸省景州因到官新陽

傳聞一首

美人相鶴圖

宮怨

瑤池曲

奉和林秀才八月十五夜對雨之作

登州九日作示林秀才

邱將軍大刀歌

卷三

風懷九章

燕台作

題槐樹

朝鮮軍中喜履平至

與履平

贈張都督

朝鮮九日作

題林秀才畫

旅病述感

贈朝鮮鄭周溪留守與履平聯句

王伯恭博士招飲不果寄示李蘇堂布衣

書許觀察詩本

畫梅爲葉禮丞大令作

喜舍弟補學官弟子

朝鮮金參判石菱爲其季弟索詩

送王秀才回合肥兼懷方王二先生

贈王伯恭

早晚

漫題示履平

阻風泊無爲州江口

寄懷范无錯武昌兼懷令弟中木同年

朝鮮雜詩

贈徐明經

靜安寺

奉和周大兄題事

喜林怡菴至軍因聞官軍已臨越南

留別朝鮮士大夫

題朝鮮金小棠鴻臚爽準韓齋雅集圖

贈張叅戎

海外春寒殊劇漫題一首示履平

感候怨別愴然有述

贈朝鮮具少年繹書

朝鮮儒生李秉哲以詩見投報以此篇

同履平登青龍山望北漢城有作 青邱篇

朝鮮柳中使小園聽土人雜歌 和朝鮮黃鎮奎石然

龍女圖爲黃仲弢編修題 贈黃叔庸

出朝鮮王城雨中作 送王考功歸省台州

寄張仲明提軍金州兼懷張子翀明經并寄周彥升校官長沙

題畫 馬太夫人七十

送江庶常兼懷王五丈 劉兵備招飲武庫

示馬生彥循 寄肯堂

贈吳靜山

劉海峯贈汪寶書詩卷墨本寶書之孫菊坡乞題因憶往時所見姚郎中爲
溫明叔侍郎平點左氏傳禮記等十餘種

題畫

旅順西有小城土人傳爲蘇武牧羊處云有唐人刻石在焉

卷四

爲馬太守李司馬雜題畫屏 日本花燵女史畫冊

送顧未航同年入秦因呈其尊人耀州刺史

寄樊雲門

天津送朱又笏同年入越并寄譚丈仲修

姚仲實以尊集見示敬題一詩 贈龔兵備

贈李叟 題肯堂照像寄肯堂

贈姚仲實 戲爲淮揚地名詩

二十八宿詩詠軍旅

天榦詩詠史

示仲雅二首

九月二十四日卽事

題畫

寄肯堂

生日

三月一首

百年

入山

答人問旅順

得王謙丈書却寄

漫興示弟

舍弟南還應恩科省試

次韻答弟

詠史

顯忠祠書壁

題畫

題龔芝麓尙書詩集贈龔文卿太守次題畫韻

答文卿次前韻

奉和座主通政使瑞安黃公六十生日次韻

雜詩

上已

左海

傳聞

山寺

馬健父以玉蝶梅一本見贈

書馬生文

高采堂以濬縣子貢墓楷葉一枝見贈

寄懷彥升二首

補遺

雜詩

卽事

醉後口號


都轉方公以二知堂詩集見賜并索余近稿賦詩爲謝兼呈禮園司馬

邊詞六言聯句

消寒第二十一集用昌黎東都遇春韻聯句

金州述別聯句

贈金州同知陳鶴洲聯句



桂之華軒詩集卷一

泰興 朱銘盤 曼君

當庾肩吾詠長信宮中草

匝水斜紆碧。當階細綴青。託根於賤地。同感春風生。

隋隄

隄上已無柳。空傳隋代名。鶯花流實甌。士女說閒情。衰草悲行客。殘壕臥老兵。曉風誰弄笛。感慨想餘聲。

秋夕懷葛桐

落葉故蕭瑟。秋風搖素帷。披衣拂長劍。未足斷相思。念子尙貧賤。况余恆別離。江湖慎風浪。前路有佳期。

平山堂

百年慷慨此登臨。可有甘棠幾樹陰。古壁龍蛇遺跡在。隔江烟樹暮天深。朋簪

歡宴公餘樂。文酒蒼涼異代心。不惜大瓢同一醉。西風歸鳥下空林。

史閣部墓

孝陵松柏晚蕭蕭。地下君臣共寂寥。嶺樹淒涼此明月。江流嗚咽有寒潮。中原
豺虎衣冠盡。南國兵塵士馬驕。天半靈修應浩蕩。白雲凝望暮天遙。

梅花嶺梅花畫壁

香風宛宛春溶溶。寒花夜半青霜濃。靈修忽控赤虬至。孤月卓午蒼煙空。當時
血戰埋秋草。一花一淚鵲血紅。人間暖意不能到。陰厓古雪僵天風。龍虎盤鬱
鳳鸞亞。枝柯瑰異無恆蹤。何年飛來託素壁。開眼疑入羅浮宮。想見下筆走風
雨。直勢一出穿青穹。當時何不添寫萬歲山。頭百尺樹。眼前突兀來髯龍。嗚呼
眼前突兀來髯龍。靈兮靈兮空哭烏號弓。

過故館懷先師劉公

吾師昔高臥。十笏此閑房。當戶晚花笑。捲簾春草香。說經嫌晝短。中酒喜宵長。

今日空相憶。羊曇淚幾行。

贈蔣生

奇士近難得。蔣生何壯哉。江山好秋色。文酒此清才。意氣誰相敵。窮愁大可哀。誰將鵬鷲眼。一爲盼蒿萊。

天上謠

飛瓊手折青蓮花。枝枝片片如朝霞。漢武夜宴王母家。常儀欲睡明星斜。白鳳啣燈素鸞叫。中官催捧金門詔。東風一變忽桃花。執戟兒郎拍手笑。

寄婦

少婦持家拙。念之愁遠人。秋深憐我瘦。書到諱言貧。客路多衰草。歸心滿白蘋。何爲怨離別。屬命在風塵。

寄示弟孟

汝幼不解事。汝兄行路難。先人餘涕淚。貧士古飢寒。對劍悲馮意。臨歧眷墨嘆。

墓門有宿草。搖落夢中看。

寄懷蔣生

西風日蕭瑟。念子尙無衣。今雨人何在。秋江蟹正肥。相期把尊酒。隨意弄清暉。吳下詩才少。青山望爾歸。

題畫蝶寄人

春歸在芳草。春去有殘紅。寂寂若爲語。相思空復空。美人小垂手。妙舞對東風。惆悵年時事。可憐芳樹叢。

出郭

出郭日已夕。布帆風外斜。春情回死草。返照變青霞。小飲難成醉。深宵便憶家。無因兒女淚。涓滴到天涯。

舟中卽事

日夕揚舲去。雙隄暮靄青。天風定高鳥。遠岸出危亭。帆影衝煙沒。潮聲雜鼓聽。

夜深泊孤戍。霜露滿空冥。

書寶應孔太僕遺集一首示管才叔秀才

心血文章在。孔君天所哀。關山猶有淚。忠孝定須才。戎馬江南賦。霜風幕府盃。管生故人意。回首重悠哉。

同齊丈蔣生遊平山堂作

晨雨乍晴人漸晴。人意喜。青山落吾眼。了足辨村市。齊翁淡宕人。蔣生磊砢士。相將命巾車。云當刈蘭芷。緣崖慎躡步。入門壹煩耳。虛榮納蒼碧。嘉卉錯丹紫。大江流我前。百里一尺咫。思欲飛扁舟。散髮此焉始。寂寥紆古情。淡足識初理。請誦和仲句。持謝歐陽子。

感舊

碧玉風情屬小家。絳雲深處有青霞。東風忽地融香雪。錯向風前怨杏花。落花如雪糝春衣。澣向春波慘綠肥。長得和香心上貼。也教蝴蝶夢中歸。

送侯謹之一丈祭其師墓清河

一指一寸折布衣全汝真兔毫寒不落龍性老難馴冰雪師門淚霜風刮後身
廬陵有遺教千載此滌民

夜行到家

深黑不知路白波星亂明樹能奇鬼勢鳥雜怪禽聲江遠愁無地燈疎識近城
入門各歡笑惜此到家情

露筋祠

遠望碧可愛垂楊風細吹淮南古時驛湖上女郎祠夜靜百蟲響露涼雙袖滋
娟娟二更月長與照蛾眉

書胡厚堂詞本

淮水日東去君家淮水邊霜華上短鬢風力勁秋絃一奏清商曲人思天寶年
君看北來雁點點落尊前

阻風泊江口

北風鼓奇勇。薄水風力長。短港擠衆艘。排擊船腹響。斷渡行子怨。爭泊三老曠。排窗不敢語。磊塊塞暗吭。獨鳥去復來。飛渡輟奇想。青山不流去。快哉落吾掌。

寄婦

西風舟在白蘋邊。我與蘋花瘦可憐。欲遣江波遙寄汝。可知流不到門前。

憶家園花樹

先人手種碧桃樹。落盡桃花樹亦枯。剩有窗前木犀在。秋來能放幾花無。

夜抵燕子磯

窺窗訝疎燈。凝審得山影。萬里盪昏波。離合瞬俄頃。近仰駭崔巍。墮恐壓人頂。黝闇不可撓。坐默構幽景。今早百夫力。膠沙舟腹緊。一拔快脫鞢。山靈或造請。明發隨夢去。荒雞破山暝。

隔江望鳩磯

蒼莽蟻磯路。夫人古降靈。魂歸吳月白。眼斷蜀天青。慘淡魚龍氣。微茫草木聲。懸知千載意。流恨在空冥。

秦淮贈人

河漢霜高白雁孤。紅蘭風急不曾枯。酒酣一唱春燈曲。定有空雲下綠蕪。水亭風斷采蓮歌。便有銀蟾墮酒波。莫向菱花照人影。青蓮風急晚涼多。

奔走

奔走空皮骨。歸來就草堂。能貧聊慰藉。偶病得清涼。布被一爐火。中宵萬瓦霜。門前數行樹。期爾共青蒼。

枉說

枉說奇貧極。青天豈汝哀。苦將霜雪意。鑄此飢寒才。凍雨連晨暗。冰花照眼開。慙爲太平物。憔悴到蒿萊。

獨飲二首簡何七舅

獨飲歌呼雜晝昏。東風晴日滿柴門。西邊日夕方金鼓。下土酣嬉况酒尊。眼底
物情到雞狗。天涯芳草失荃蓀。知無肥牡歡諸舅。乘興同開老瓦盆。
耆舊無人我亦才。眼前同輩漫交推。劇憐甥舅元無別。一入詩書百可哀。新月
完完窺牖早。冰花的的向人開。霜風幾日凝寒冱。十萬飢黎哭草萊。

贈金大冶青

春色散遙野。物情閑復閑。偏宜把尊酒。招汝話湖山。席帽風塵下。清標竹柏間。
旁人殊我好。祇作畫師看。

舟出北郭悵然有感書寄所親

流水有本源。脫葉有故柯。男兒守家室。飢來當如何。纜舟久在門。親戚相吁嗟。
甯忍決之去。他言爲蹉跎。汎舟出北郭。初日朝滿河。河水清且夷。風來揚其波。
昨事但默構。獨此當風歌。

歙人洪醕士筱圖兄弟喜詩好客邀過其家

君家老兄弟快意得如何。入世聊中隱。閉門能浩歌。古園有喬木。清蔭俯春波。復此忘羈旅。吾行載酒歌。

和洪秀才見詒之作

美人遠自愁。獨泛沙棠舟。誰適爲顏色。無勞問蹇修。紅蘭有清露。杜若在春洲。安得輕攀折。芳馨慰我求。

子有梅花筆。春風能與期。生平少年日。獨往冰霜時。沅浦無芳草。滄波幾釣絲。眷言蓄光采。素默葆清夷。

同袁四季枚臨湖禪院看牡丹作

麗日滿庭戶。照人生晚霞。可憐遠遊子。對此春風花。林蔭藏鴉暗。湖光掠燕斜。袁生亦憔悴。同是蟄中蛇。

舟泊六開口作

水暝早泊舟。前路不及宿。殘日明斷港。餘暉亂水木。鄰舟聚三五。方音雜楚蜀。

大月漸出地。遠燈見林麓。風物非故園。清景暫我屬。此時吾廬人。聚話對寒燭。
述感三首

臨別鬱惆悵。出門便已休。人情喜歡笑。那得容汝愁。愁來螫人心中夜。腸腹道君看吟寒蟲。安能回窮秋。君子志萬鍾。小人謀一邱。微細不吾界。已矣將何求。我說行路難。旁人亦淒然。豈有憐惜意。貌誠爲周旋。一身有一我。誰肯相纏綿。至人尙大公。下之何有焉。不如飲酒者。高臥羲皇天。

東風草木生。南風草木長。西風草木彫。北風隕其亡。在天爲政令。在物增感傷。何如無生死。真氣含空茫。姬公誠材智。魯叟尤皇皇。令我千載人。智慧無甯康。

寄懷吳司馬湖北

東風作嘉聲。愁人自淒心。好鳥能媚我。觸我爲酸吟。早歲盛意氣。一飽無煩襟。窺匡識嶽險。觀河知水深。豈無趨避術。坐爲飢寒侵。誰肯狹路間。軒豁披真忱。往者邁哀厲。盜儲無升斗。健兒失寸鐵。那得誇身手。吳侯煖我家。如飲雪天酒。

親交亦滿眼。寒溫貌能厚。心知歎此人。感激不在口。

故人隔江漢。同此春風中。我病不任酒。對酒猶能雄。去年共尊疊。五月榴花紅。薄祿子良美。鬻文吾何從。坐見入枯槁。竭澤無蛟龍。誰能背骨肉。暢此心與胸。江上好山色。過眼皆空濛。

燕子磯

危峯截江起。隱視衆山尊。盤踞相終古。咽喉此一門。當時探虎穴。猛氣若鯨吞。故壘頽雲下。悲風激水渾。

珍珠泉

絢石媚平漪。迫視不及丈。前行勢微殺。幽曲失夷曠。百折仍東流。萬荇從所向。茅屋三四家。水碓便溪上。時時汲一瓶。澆濯或茗釀。新獲神驟凝。狹久妙亦忘。買山得吾遂。此境實嘉貺。夷猶憺忘歸。僕夫色惆悵。割戀上馬背。山風帽簷漾。

贈張秀才季直兼懷吳司馬武昌

彊人入世法真意。淒不宣。偶然有告語。知汝猶能憐。旁人看年少。綠鬢春風前。安知我心意。乃在冰霜天。汝家海水上。家有桑麻田。奈何去骨肉。別離動經年。但坐勿復語。期之琴無絃。

濯濯吳仲子。愛我如弟昆。羣喙有謠詠。仲子終不言。仲子才視汝。雁行無卑尊。束縛入冠帶。持版迎高軒。心知非身美。妻孥能相存。念彼江水廣。中夜馳心魂。讀書餌簪紱。明言人所羞。不爲簪紱來。世無儒者流。小人謀升斗。一飽便已休。眼前把寸管。坐見成公侯。松柏無冰雪。螻蛄無春秋。君看往古人。兀兀千年憂。一身爲枯魚。彊爲魴鯉謀。

述情

託身在貧賤。動作都可憐。天豈故厄人。期汝筋骨堅。困窮不及死。或猶天所全。朝粥縮頸啜。暮歸伸足眠。處此好尤怨。毋乃負所天。去年齊豫災。下農無完田。草中萬飢渴。日夜淒風煙。

先人守經史窮死不貶節看人媚春華胸臆獨冰雪田薄不給口剗補心血竭
眼前八兒女昏嫁計瑣屑可憐病在床心知卽長別呼兒說家事忍淚氣哽咽
大母老淚枯張口但空泣當食忽念此肝腸萬釘裂

大妹適吳生老翁困微官一家氣忠厚念當無飢寒五女妹在伯先子昔所賢
薄奩送汝歸兄歸病軀殫次妹今年婚兄客滄海邊幼小適藜藿不羨雞豚餐
努力奉晨夕地下怡心甘

道旁有窮士贈以一飽資明知我亦貧且復憐其飢低頭念我室安知己晨炊
遺去不挂懷入室吟我詩思來條已失茫如焚斷機詩成但自詠甘苦深心脾
何嘗畏示人示人來嘲嗤

得死亦已矣不死且復生投身入霜雪偏仄傷和平學人貴程積華士求近名
萬人則萬好口舌非力爭四海一女術何者爲性情茫茫墮人海事後分枯榮
不能飲醕酒憂來誰能嬰

行路難

羣雛生一巢。長大各自飛。兩蠶同一繭。一半織作綦。半爲美人身。上衣今日道。上騎瘦馬。門前明日君。馬肥世間萬事儻。可必東流水。還西歸。

凍冶善銅出丹陽。洛陽名工製爲鑪。上刻仙人把夫容。下有鳳凰將九雛。鳳咮吐紫煙。令君洞房無春寒。天明月落獸香死。美人嬋娟雙袖單。

京洛出名酒。一斗值十千。黃金不足惜。願得一醉千日眠。黃金有時銷。千日有時寤。含情攪涕復坐愁。長夜如年不知曙。

中庭兩株樹。一株是櫻桃。櫻桃有枝葉。人心有波濤。杖劍出門去。坐使花樹隨風彫。東家女兒好顏色。西家女兒雙眉碧。含情相媚不相言。歸抱銀箏閣瑤席。

日晚

日晚荒臺下。無人獨笑時。榴花紅自好。白拾爲誰緇。地僻關門早。天長下鳥遲。平生開倦眼。我亦識旌旗。

惘悵

醒時每悵悵求醉入模糊骨有能貧氣天難容爾愚
麤疎且琴劍斌媚到屠沽
日暮南風起清涼合在吾

野哭時聞鬼殘燈親夜深駭人有餘厲殲汝豈天心
就枕鼠聲亂窺窗山月陰
平生意寥廓檢押不能禁

贈邱大履平

邱生東海來告我磊山奇眼前卷石不能到坐令鞢袖軒雙眉
邱生二十好男子
百金買劍長安市可憐四十不封侯
舊戰團袍血花紫憂來發興惟高歌
鬼神風雨能誰何胸中萬語但自冷
張口一洩騰風波有時醉出霜鐔舞
眼底鼠魚變龍虎
共道將軍劍術奇誰知國士丹心苦
漢家西北多烽煙健兒十萬長控弦
頻聞戈壁懸軍日空見葡萄入塞年
邱生爾無封侯骨餽肉生來有誰惜
竭澤蛟龍死亦佳
淺草枯泥臥不得聶政堂前有丈人
賈生涕淚空沾巾何當

驅馬山中去。海天高夢羲皇春。

東海二壯士行

東海二壯士。顧盪及馬義。義也善突火。盪也工擊刺。邱生挾之來。飛走健翮翅。邱生亦善兵。平生有通臂。酒酣呼盪前。短仗出游戲。盪臂風力適。回身燭光碎。一鍛千鋒旋。萬人不足刺。橫躍雙側盤。觀者駭及鼻。邱生呼止止。神定吻微吹。滿堂各曼立。聽生說義事。昔在毅皇初。山東盜如蝟。桓桓陳將軍。殺賊輕意氣。蓮池萬賊壘。孤軍突風隊。義爲帳下兒。一鎗不脫背。將軍出殺賊。壁門虛不閉。其時日正午。西風晝陰晦。突賊乘虛來。直前那猜忌。一壁一雷出。十發十人瘞。賊去義不追。賊來義甯避。貂蟬滿頭顱。斯人獨蕉萃。草具長不飽。我嗟生已淚。萬方昔多難。死命責此輩。羣盜一朝盡。草間遂棄置。高官騎大馬。問心竟誰致。秦齊俗彊悍。此輩千萬計。飢窮不能活。草澤或嘯噉。豐膚速蛇蝎。適爲爾曹累。鋌險觸文網。殺之爲勇毅。邱生况蕭條。見人不嘆喟。忍死爲老母。日長但高睡。

兀傲藏深叢。鼠兒遂搖喙。平生結豪猛。二士實其次。蠻夷正歸化。宰相善調劑。小人伏窮巷。眼前暫飽醉。邱生吾告汝。窮死又何異。歸語所知人。努力削材智。

邱生劍歌

邱生有劍懸壁上。抽出視我光十丈。萬里來從日本都。千金脫自雲中將。吁嗟此劍何足奇。惟在健者能用之。猛虎林下臥不醒。小兒寸鐵劊其頸。關西羣盜尙如林。涼州幾載煙塵深。臨洮牧馬不飛度。充國屯田多苦心。生也昔作賢侯客。諸葛用心天下識。橫流滄海竟何歸。變局如棋收不得。自從長揖歸耕去。劍獨與人共朝暮。雪色長沈北地花。星文猶動東陵樹。平生雙眼飽旌旗。好讀陰符注。握奇縱將此劍贈秋水。猶化雙龍天外飛。

客中端午作

癸酉己後三端午。一在家園兩在客。今年又作江頭行。書劍粗疎寄人宅。簋旗打鼓不到眼。細柳青蒲有誰摘。薄田卅畝收不滿。苦憶瓦盆煮新麥。去年亢旱

今蟲蝗便當餓死敢誰責眼前一飯且自足已分甘鮮背骨肉晚來一上城西臺南望蒼煙起林木

江頭

江頭看遊客道上見飢人枯槁誰能顧綺羅他自春衣香回畫楫旗影動青蘋日暮各雲散南風吹野塵

碧泉

湯池多處所未聽碧泉名終古無人浴一泓如此清風回成響細瀄靜測天明流向前溪去波瀾自不平

喜贈江卿兼懷莊司馬董戶部

去歲廣陵月照人同舍眠今年江上水流夢到君邊奔走仍凶歲飢寒送少年南行見諸子爲問好詩篇

苦雨行

孟夏積亢旱。兩月雨澤稀。一雨滯十日。農夫重嗟咨。淮揚地卑下。水性甘所宜。一日江水長。三日及阜陂。我田不給口。年豐猶苦飢。坐見轉溝壑。意外無糞希。但念骨肉遠。不得同涕洟。客中破茅屋。腐儒最能栖。坐臥得牀榻。便已飽我期。夜來屋漏急。著人無頸頤。庭階見魚鼈。几席爲溝溪。開門忽江河。浩浩吾何之。眼前且一飽。言笑相娛嬉。安知泥塗間。餓死無窮黎。

與范大鑄

汝祖及吾祖。先朝並有名。蒼茫百年事。迢遞兩人情。歸路滄波遠。西風尊酒清。何須怨搖落。無用最儒生。

三台洞

午飯旣云飽。獨臥寡所歡。興言迹幽壑。細步前蹢躅。初行微風冷。微汗失故寒。人言茲洞好。紆行無易難。老僧善億客。因奇增鐫剜。蛇行升山腹。穴窮來青天。下有頽雲根。養以不竭泉。夸言神所造。凡夫爲咨嘆。佛堂塗朱碧。巨勝署高官。

人情各有尙。吾生行所安。

舟泊燕子磯作

尼女槌木魚。長夜霜露中。千家俱眠臥。念爾心獨忡。同爲飢寒民。衣食恆不充。所求良非奢。所苦亦已豐。路人相慰藉。若盍爲耕農。耕農亦不生。棄去將何從。

送邱大履平之淮陰

飢來鞞履出。未知向何門。弓刀黯無色。僮僕慘不喧。入門各歡笑。于汝誰寒溫。有母不得養。對案淚爲吞。西風吹北林。荒雲下平原。登高一以望。中心多煩冤。煩冤夫何如。但悲不復言。

貴人富經濟。吐詞皆聖賢。人賤言亦鄙。好語祇自憐。爾昔在年少。仗劍驅幽燕。三戰都護死。道上橫戈鋌。去時擁千騎。歸來張空卷。書生苦信書。剛愎身不全。汝謀悔不用。銜恨終黃泉。

韓侯有高臺。下臨長淮水。君家秦東門。去此三百里。君今到淮陰。故人輒歡喜。

老母雪滿頭。日夜望兒子。扁舟遠迎將。春風在冠履。女兒能挽弓。健婦習春米。開門愁江湖。閉門種蘭芷。坐臥惟高吟。邱生吾語爾。

寄方先生四川

金章犀帶載君恩。駢牡遙遙上劍門。蜀徼河山天下壯。漢朝柱史繡衣尊。文翁講舍林亭舊。丞相祠堂檜柏存。聞道清時多美政。蒼茫懷古不須論。

早歲依人百不如。兵間事業况纍疏。三年江上生秋草。萬里天涯有報書。大酒便思傾北斗。好山聊復愛南徐。何如往日聯吟地。董相祠邊落照初。

陳檢討輓詩

八月燕山道。飛鴻到豈遲。那知報書日。已是蓋棺時。弱女縗初解。雛姬淚可知。遙憐蕭寺夜。風雨暗空帷。

往述星家語。今年可得兒。天心慘到此。一第竟何爲。宛轉懷丹旆。淒涼夢總帷。魂來縱相見。未必是生時。

上將吳都督平生識子才黃金猶有贈老淚不勝哀
戈馬邊防重金繪海國開眼前誰壯士迴望獨登臺

孟六遺文在遙遙千載名事當歸後死誓以報先生
春雨聯吟地秋風顯曲情他年尋舊館芳草意縱橫

寄范鑄葛桐

郭外青山酒客多葛生范大近如何開書豔聽南皮樂
送客遙憐灞上歌天末風高回暮色尊前淚遠與江波
荒城六月西風起曉角殘星夢薜蘿

歸思甚亟遲張四季直楊大子青不至

歸思觸物興乍騰又彊制厭人問行期他詞急蒙翳
兩期無歸金竭蹶吁可畏逆知我當還抵書慮難致
朝朝計歸程今日當某次荒城朔風高飛鴻聞清唳
別離爾所同我更苦留滯夜來放足眠佳夢亦偶至
瑣細不可詳大都有歡會二生來吳門遠道行詎易
鬱伊吾何從高吟發紆氣

小舟抵江口子青季直適至道左相見喜賦

臥行見岸移。何人躍馬過。裘深肩背寬。心訝軀幹大。起視急驚呼。獻笑心自賀。語多猝難詳。斯須亦無那。苦言火舟勞。板梯指爲破。爾去沽輕航。晨夕得坐臥。楊生好眉宇。豪氣扼不挫。時平賤英雄。劍術勿輕播。汝師邱方平。坐是遂坎坷。不逢吳將軍。到今且寒餓。別矣吾東行。歸思急如剉。明朝大江頭。唱詩水風和。

奉送張中丞巡撫貴州

皇帝四年冬。十月中丞入覲。鳴玉珂。明光宣室數。召對斟酌造化。追卷阿。老臣須眉。聖人識劍冠。嶽嶽神峩峩。明年二月下丹詔。使持龍節臨。牂柯山川莽。茫極南徼。古之荒裔。雄包羅。東連五溪。西六詔。三巴北望青穹磨。東來江水絕。怒悍唐蒙一去。空寒波。我聞南徼。瞰百粵。畜牧蕃碩。爛刀戈。蠻夷獷俗。自古爾時。平那得生尉佗。朝廷官人豈無意。坐見萬里如旋螺。要憐飛蓬入。慄炭陰銷兵。甲回天河。先生沈毅富材略。燕趙齊魯銘功多。往者三吳。一持節。秋風八月生。

嘉禾古聞循吏民可惜於公不得當如何
餓生三歲廁軍幕黑髮無用慚義蛾
主人卻過嚴僕射恢張談笑無白科
高臺獨上望旌旗把酒躑躅當風哦
明朝揚舲急東去白頭綠鬢行烟蘿
清觴旨酒不得共夢中祖帳行當過
他時功績勒金石下馬猶得懸崖磨

留別范大无錯范二中木范三秋門

林樾蕭森罨敝廬晚風涼意到襟裾
盤飧却稱貧家味談笑都成策士書
南徼新軍深駐日西征名馬半歸初
草堂此會真難得江上明朝夢更虛

江氏山居同范大兄弟

繫船柳外愛清陰深愧山翁好客心
紫蟹味兼尊酒重白蓮香與暮烟深
微時歌哭都無謂早歲關河空苦吟
珍重主人醅朴意未妨頽語漫題襟

舟中二首畚陳子疇秀才

赤地熾爍炭高雲張炎曦遊子遠行邁
憊矣吁何爲朱門習幽靜臺館臨清池

當午不能汗。焉知征夫疲。我家有庭宇。高柯陰參差。時時臥其下。清風來相吹。當境豈知好。苦來方悟稀。自從勞行役。四序無甯期。去冬十二月。策馬遶江陲。隄裂馬不墮。一墮成沙泥。念此心志。當暑冰在肌。蒲柳入霜雪。龍魚辭淪漪。非願偶所畀。誰能長絕咨。

陳侯振奇人。平生有大志。茫茫人海中。獨云我材異。早年習關河。詩書百廢棄。作賦追屈平。著論準賈誼。高言得十九。窺見靡一二。兀然戴儒冠。吁嗟乃欺世。方今海宇平。東南有萌肆。豈無草間人。張口發高議。夔龍爲糞土。蕭曹爲胥隸。一朝逢聖明。畀汝翮與翅。子何極騫騰。風雲拓初意。陳侯好詩書。仰古求實義。翛然歌一篇。往往露真氣。昨者贈我詩。龍性不可變。賤子方遄征。鬱伊滿天地。回首望故園。莽蒼擢吾慮。江河來眼前。骨肉在夢寐。中年百無成。甯當怨蕉萃。

送東畏皇視兄疾海門

貧賤吾何說。出門事事輕。清宵念骨肉。雙淚暗縱橫。苦竹山中雨。虛窗夢後聲。

吁嗟爾何事復共可憐情

伯子老兼病朝朝望弟來喜從天外得對汝酒邊哀攪鬢秋情起軒眉海色開
未須仍憶我江郭坐蒿萊

喜王丈至卽送之揚州兼懷方先生

霜落秋林朔氣橫巾車歲晚且孤征感時自下江山淚撫景難爲草木情西極
風雲猶戰壘東流日夕更商聲淮南耄舊今仍健爲語深杯好暢傾

苦惜

燕雲荆樹氣如何解佩無人託素波車上猶聞秘書監人間早憶穎川歌荒荒
烏鵲深林少獵獵旌旗落照多苦惜當時三戶老精靈西望亦滂沱

游勇行


江東有窮子早歲曾爲兵殺賊雖多不得賞太平散卒驅歸耕田廬蕩絕骨肉
死商賈不習誰可營短衣數挽足無襪可憐日向街頭行夕陽慘淡照林木此

時肌腹空吞聲。吁嗟此輩故驚悍。火酒肥肉乃壓情。而况當時用彼力。授以金鐵令殺人。一朝偃武尙法律。此輩何識氣頓馴。使酒爭博亦細故。論罪那得隕厥生。何者邏吏騎馬過。道旁見之意不平。呼爲游卒叱縛送。堂上一鞠頭顱傾。嗚呼天下俱赤子。入伍則卒出則民。爾曹媚上亦多術。乃以人肉博汝名。翁歸張湯却遍地。甯成到都那足珍。往者督部沈少保。以猛爲治良可程。遂有鄙夫竊意旨。戈船小吏白骨橫。嗚呼戈船小吏白骨橫。我願大官日夕拂高鑑。慎勿借之鱗甲爲蛟龍。

屯田行

天下戍卒飢莫餉。中山乃有屯田租。屯田租多不到卒。將軍倉高誰敢發。卒謂將軍我良苦。田場我場圃我圃。一年辛苦一月食。將軍大恩高如父。將軍謂言爾不知。爲爾積穀防爾飢。誰令爾曹用不嗇。將軍雖恩無可爲。將軍官貴騎大馬。將軍功高築大廈。但知堂上狐貉人。甯識北風飢凍者。况今天子重將材。將

軍乃爲宰相來。英布車服合都麗。爾曹飢死胡有哉。奮臂大呼獨何妄。幕府寧
爲對簿狀。今朝打鼓噪軍門。明日駢頭彙街上。



桂之華軒詩集卷二

泰輿 朱銘盤 曼君

人日雜詩

百年幾人日。那得不思歸。自分同鴻雁。甘心仰薜薇。荒城寒雨急。茅屋過人稀。坐覺成蕭瑟。燈花慘不輝。

城上高台迴。傳聞勝國爲。鳥巢乾雪墮。蛇蛻晚風披。欲上看山色。無心贈好詩。江流何太苦。日夕更東馳。

東海諸夷國。倭奴老不臣。公然薦藩服。况乃結疆鄰。下瀨戈船少。溟池水戰新。更思前代事。奇計獨何人。

當代推無兩。侯官太保宮。生能容杜密。沒尙憶陳東。遺疏傳天下。精誠滿腹中。憐才有如彼。忠讜更誰同。

感激欲何已。蕭疏還自憐。受恩亦無那。彊笑爲誰妍。轉憶平生恨。長悲老父年。

吁嗟兒萬死痛哭對江天

寄范大

人生有何樂骨肉是真歡便共閉門臥終勝衣錦還遠遊况牢落經歲獨江關不信烹山酒離情醉可刪

念汝衡門下爲歡有歲時書看令弟好詩上老翁嬉植拔能蘿薜烹鮮且蛤蜊日來煑春酒肥牡更招誰

水心亭宴集留別諸子

經年車馬滯江干好友相當骨肉看已快清尊開笑口更令壯語激吾肝春深碧樹陰虛閣晝暖黃蜂上客冠相約今朝須鬥健蘭亭古已雜悲歡
八桂初聞賀解鞍更傳邊部有兵欄大宛善馬談何易東市朝衣事尙難朔檄移營新拜表扶風拱衛舊登壇草間定見升平日珍重瑤篇異候看

與馬庶常

見說都人爭上書。嗟君鬱鬱意何如。甯知天上攀龍客。未勝山中下澤車。野曠衣冠驚鳥雀。時危鐘鼓走鷄鶡。商量更乞無人境。海甸防夷不可居。

留別分得飄字

棟子花如素靄飄。將離還與鬥干瓢。天明月落吾當去。臥聽東風枕上潮。

與季直无錯行抵如皋書寄中木兼送季直入都

明發扁舟下海陵。白狼回首見高稜。賢兒歸夢三更雨。念汝清詩十月冰。爲悔風塵憶茅屋。偶思骨肉怨行滕。素冠三月長安去。有客悲哀况可勝。

舟行聯句（倒押五物全韻）

晨曦逋滯霖。遼原寤蒙蔚。曼君離尊祖膺太。朋簪盍孫尉。彼風激颼颼。張季直
晴漪散澤波。枕聲三老謹。扇勅五兩佩。馴禽尾沿緣。范肯堂沉鱗震談嗽。披髮
凌艷琅。眯眼招垢埽。征役阻况脩。偃仰嗟以哂。季顧念踞腹腸。寧畏走肆砮。飲
口藥疑餅。叩膺稿想苑。曼褐珠養不肥。弁玉淒忽黠。踟躑肩辭鑣。率察脛揜袂。

肯跚跚履屨穿。望望岵岵吻。實芘槃泣。夔痛衰杖耘。芬季昔窆吾悲防。今捲靈
臭。肝眩膏崩雲。騫法條宰樹屹。盤也感斯擊。鑄乎遊可不。曼仲米趣煎憂。歐鎮
奮刺刺疲。頷支遠勞。敖嬉制怒艷。身西心固東。朝娛旰乃怫。肯伏聞皇帝聖。下
閔泉府沆。孟盤乍毛鷲。騫賈輩曠迄。曼詔邊謹土。斷飾瘞減玉。鉉雞鹿築塞牢。
虓虎屯士乞。季懸節新窮巖。規饑競理沕。宛馬萬謀馳。鬼刀四盤剛。隱衷抗辛
有。茲患浮突厥。肯却棊局孔。午燠炭熾矧。歛大車。彘如莢。炎勢手可熨。瀕謀劇
笑當橫行。噲語勿。曼薪火掇。慟慄蓬累窘。魁岷寡喙孤。莫張術道邈。而詘伊和
罹武刑。讓管受威被。季蹇修焉可徠。珍髭自加髻。欽鴟貞長離。留夷婢荒蕪。肯
攬代騷衷。紆怨賦瘳。海弗誓將買地肺。那更艷天綈。若龜甘行淖。詎牛一蔽鼓。
曼入穎把許瓢。封瓢棄炎歎。亮哉十年書。愈彼三百絨。迹與招隱往。口噉草太
吃。季饜粟長艸銷。煮雨破缸訖。怪思摹鼎劓。椎險勇埋掘。腦盪楚晉搏。馥餒愈
郊乞。肯晚犬投啼呼。老鳥墮陰鬱。箸閣半睡飴。板低衆頭屈。曼生拙僕疑。語志

違夢櫻拂。凋弄桃土。偶慰諷紙泥佛。季沒燭禪大月。軒蓬照塊物。肯

諸葛忠武畫象聯句

陳生嬉驩羅罍罇。曼縑緗如雲開軒論。季中間規摹天人尊。肯峩冠修裳微須
髯。曼長吟觀時神龍潛。季南岡滋釐民攸瞻。肯無錚于整旗韜旌。曼風飛雲翻
參炎精。季攀吳連川基襄荆。肯天平亡劉侯忠殫。曼侯精銷亡侯靈嘆。季侯容
惇哉吾摧肝。肯吁今穹蒼昏鈎陳。曼安能英高如侯臣。季躬姬膺衡。曼苦真。肯

哀雙鳳聯句三十二韻并敘

雙鳳如皋倡也。與許生有委身之誓。許貧不能如假母欲。過從遂簡。母既怒
鳳不說他客甚。答苦之。鳳竟以憂將死。屬曰。收我者許也。吾儕哀而爲之詩。
二月江南柳。曼風條踈綠蕪。枇杷門巷在。季裾屐酒尊逋。無意逢花落。肯何緣
救草蘇。爲君數前事。曼愴我鬱嘻吁。碧玉家原小。季紅兒貌不殊。鳳饑梧粒瘦。
肯蟲蝕蕙根枯。絳樹雕闌出。曼青螺寶鏡摹。彈箏愁浪子。季扶酒倚香奴。鬼卦

金錢卜肯歡情斗帳。腴纈雲方空曉。曼璫月莫難敷。含睇羞團扇。季絨盟結繡
襦。郎來鸚鵡覺。肯夢淺碧鸞扶。半臂宵寧冷。曼雙飛願忽孤。繪綈窮贖蔡。季毒
冒獨棲盧。豈悔偷靈藥。肯終難並鄂。柎隔簾牛女怨。曼遞簡角張迂。彊笑成歌
舞。季華妝泫粉朱。縱搖雕玉佩。肯未剖黑心符。宓枕惟遺植。曼蘇臺誓托吳。露
蓮秋後苦。季霜鞠影邊癯。一病秦醫拙。肯千行楚淚俱。名駒猶惜骨。曼靈鳥竟
辭筴。宛轉卷旄拔。季淒涼杠宇呼。命殘留鈿合。肯肌暖待襜褕。誰道城南艷。曼
能從陌上夫。百金豪客贈。季九鼎美人軀。往者曾平視。肯今來失彼姝。芙蓉慳
晚墮。曼蘅芷際春徂。錦瑟鴛絃盡。季香泥燕壘無。欲銘羅幘塚。肯更涕博山鑪。
滄海填精衛。曼窮陰種橐吾。天涯感淪落。季回首重踟躕。肯

岡嵒曉發

曉發岡嵒嶺。征車載夢西。海晴諸島出。林盡百村低。人渴吞殘雪。驟驚入澗泥。
媿爲幕府客。騎吏亦將攜。

蓬萊閣

登州城上蓬萊閣。東控烟台北大沽。坐覺文章變天地。甯聞人世有江湖。籌邊中旨憂方亟。說戰羣公口不孤。便竭東南萬民力。未應漢過不先胡。

登州雜詩

骨肉愁無盡。因人更入齊。殘年慣風雪。終日坐淒迷。但覺飢能飯。猶憎醉不泥。安知櫪中馬。爾亦解鳴嘶。

登州城北島云昔。駐田橫壯士千年盡。寒冰十月生陰霾。思螫劍灌蔓。想空營坐短吾曹氣。憂來漫論兵。

漢將推英布。荆尸寄莫敖。似聞中旨詰。翻惜諫官勞。維柳縈長鈇。濃花倚戰袍。太平惟痛飲。餘事亦弓刀。

連歲窮財賦。樓船幾處新。到今輕陸戍。胡不念庚申。將帥恩都渥。艱危意必親。未應廢邱甲。齊薊出豪民。

書蓬萊閣壁

走也江國田野夫。爾來忽逐旃旆趨。北窮淮水東出吳。海上日共鯨鮫俱。海上女兒肌髮麤。嘔啞不解神索苦。西入登郡愁僻孤。但聞大風鳴雪珠。兀然獨上城北隅。閣台巖律百狀都。習聞大海水所瀦。今來但有嗟復吁。將軍騎吏豪酒徒。金印紫紱拳毛奴。狂發捉飲相叫呼。此樂亦謂天下無。嗚呼吾顏不可扶。願公臥睡但自娛。夜來夢見甘棠湖。沒首大醉凭玉膚。此樂吾得死亦殊。

住久一首漫書屋壁

斗絕登州郡。千山向奉天。地雄須節鉞。氣冷習裘旃。海雨風成雪。河冰馬代船。南人甯慣此。住久亦翛然。

天橋暮望

海上羈孤損客顏。晚憑馬背上雄關。遠岡勢抱爭歸閣。落日潮回欲動山。遙靄知非鄉樹色。倦遊仍傍大旗還。平生未識旌旃好。到此還應語帶蠻。

登州風夜

通夕西風發危哉大海船無緣生羽翼坐覺苦熬煎對客慙詞賦當春感歲年
家人聚燈火應早卜歸舷

自蓬萊至福山道中作

村路含朝氣陰霾喜暫時瘴雲兼海墨遠雪借松明不比從田相還聞召董生
蒼茫向來意爾我若爲情

野店晡停食飯羹何大羸因知民氣瘠終喜霸風殊敵愾疇無意連城勢豈孤
徒聞倚兵力高壘列螿弧

西虜驚宮闕文宗御代辰坤輿萬國定今上七年春體大輕戎略時平息將臣
要知明聖意豈獨在甯人

水落冰橫岸隄傾路轉溪村翁坐弄犬稚女晚呼雞行客空相羨歸雲望更迷
翻思戍邊卒風雪玉關西

消息

北來消息說休兵。夜視城頭太白明。豈惜黃金窮二庫。願聞丹詔慰蒼生。天南海濤雲方動。關隴春回月暫清。喜極恩言召方叔。不應殿上叱橫行。

登燕台山

昔聞東國險。今日上燕台。地向山根盡。天從海底回。勒銘陋秦迹。乘馬壯齊材。薄暮樓船動。風煙畫角開。

車行述感

竟夕西風雪。又深帷車將夢入寒林。瘴雲濃過之罘黑。海色寒窺大竹陰。地異江河難設險。時危將帥更殊心。儒生豈有功名意。矯首瓠稜慮轉侵。風肅平原萬木低。碧空東下雁行齊。誰令幕府從征馬。歸去江南唱大隄。客久廢書恆獨嘆。信來報死每宵啼。弟亡親老兼貧病。下溷何當坐把犁。

遲舟不至賦示子青

隔年書到促還家。行李誰令滯海涯。晝聽番船吹觜栗。夜呼齊女撥琵琶。山窮地角天如蓋。寒入春中雪有花。便合與君狂中酒。枕邊猶得夢煙霞。

別人

北風吹大雪。爲爾苦留人。同有飄零感。難爲草木春。雲開方擢足。泥臥不生鱗。安得蓬蒿下。霜風共苦辛。

與朱璞臣才秀

往得先生白下書。聞君寒病實崎嶇。甯知此日紆征轡。猶得斯堂對酒觚。獨望風陰懸晚鶴。並時星彩失晨烏。更思買宅楊亭畔。竟歲江關事有無。

吳淞舟中書景奉懷張夫子二首

睡起茫茫夢有無。推篷江色帶菰蒲。春潮近海潺潺急。白鳥乘空暗暗徂。爭買樓船趨下瀨。甯聞徐守得黔夫。干戈浩蕩江湖遠。眼見風塵送小儒。

屈亡宋去二千年。漢水湘江浪拍天。不見先朝爭相國。猶聞懷古痛諸賢。武昌

形勝雄荆楚。弟子文章出管絃。往哲先師都不愧。故應此曲與誰傳。

將發金陵張道岷適自上海至爲留一日

夢聞推喚爲誰者。揉眼已驚窗日橫。巧合絕嘆非意及。少留轉更不勝情。蕭蕭北雁青天遠。習習南風江水生。淮海相望二千里。惟應孤月照雙明。

留別范觀察

去年今日謝公墩。野闊霜晴對瓦盆。樹盡江流仍左出。天長山勢欲東奔。登州一去空塵土。諸老重逢尙酒尊。更逐南風看海色。兼天波浪不堪論。

與陶籀

武昌書祖斯邕法。俗手雕鐫那得精。波畫要令存古意。圓方都不合常情。陶生爾出黃岡縣。一夕聲高白下城。此詣艱難要工力。無令邵粟獨成名。

舟抵燕台夜題旅壁

南歸無好興。浩蕩復東征。入海疑非我。辭舟得更生。風收山閣敞。雨過晚霄明。

太息殘燈下。驚濤夢裏聲。

書燕台山亭

五年身逐大旗風。更過黃成覽海東。晝接風煙高閣靜。暮聞笳吹碧天空。正思
往代田橫客。共結愁陰絕島中。彌節防秋須壯士。坐看抵掌策邊功。

新甸旅舍

昔過茲堂宿。西風夜雪深。片帆人渡海。五月綠成林。燈火如催夢。盤飧易感心。
不能竦長劍。愁絕亦空吟。

野店午飯因書屋壁

西入蓬萊縣。亂山森插眉。馬蹄全託命。荒壁暫題詩。池淺魚驚客。林深雀哺兒。
物情吾媿汝。飯罷更何之。

五十里埠

隔嶺闌村薄。哺飢忍乍安。馬知山店立。兒撥草窗看。丐沐泥盆溼。呼茶椀汁寒。

故園櫻樹大朱實未應殘

海色一首奉上所知

海色蒼蒼欲變秋。海波終古盡東流。晚來潮信通江水。樓上征人望去舟。別將旌旗深駐馬。南山父老盼騎牛。平生風義同嚴杜。射虎相從意未休。

蓬萊閣卽事

日對蒼茫意覺伸。後來此景屬何人。夜聞海鳥聲如鬼。朝看青山氣若闐。病客時呼膳藥帖。酒人常笑吐車茵。不須更說田橫島。懷古悲歌實愴神。

水城

水城備倭奴。昔人以爲雄。今人議海防。但云樓船工。十萬泰西鐵。百萬滇南銅。格苗用干羽。堯舜誠愚蒙。登州濱大海。屹立陪京東。人云一戰艦。可以權厥中。鄙夫不解兵。但知歌變風。登樓獨縱眼。水日磨青紅。觸興聊發語。憤激非吾衷。仰視白鳥飛。俯看滄波空。茲世固有極。多言奚爲功。

寄侯一丈兼懷洪竹樓三兄

不見侯生今六年。東來有夢下吳天。逢人見說童孫好。高弟誰將筆法傳。知否老翁瘡肺疾。故應兒子解耕田。洪家兄弟今何似。太息平生仲氏賢。

遊蓬萊閣下石洞作

飛樓跨山背。幽洞出其踝。潮落泥沙乾。邊海容牧馬。堆徑雜萬石。攢若棄敗瓦。承足靳半鞵。失據懸一瀉。仰觀壓人頭。怪壁剝丹赭。危勢杼辭斤。火容鐵出冶。逡巡那敢入。草長不可堵。石佛何年爲。或剝或削者。恐有出世人。繒幽鑿深廈。朝遊坐魚顛。暮歸宿虎下。又疑田橫士。魂氣颯原野。時時來一遊。哀歌涕盈把。壯士功不成。千載聲爲啞。

登州作

昨歲募兵今撤旅。譬如風雨遣波濤。來時芋菽看高會。去日鳧茈聽野號。不畏爾曹爲盜賊。可知主將有弓刀。關山阨塞旌旄重。見汝風雲擁戰袍。

登州

登州寡田地業漁當農功小舟不及丈出入驚濤中船頭蓬髮兒船尾白首翁
赤日更不畏項背成烏銅波浪少人理呼吸騰雷風往往萬斛舟一觸沈鮫宮
招魂哭中野淚竭天帝聾吁嗟生活難有若趨火蟲到此固已極豈復更可窮
去年詔防海募卒黃睡東此曹頗亦至謂當口食豐峩峩爾都督軀大心僮蒙
日啖富羊酒不令汝腹充日暮天地閉昏鴉滿高空此輩實氣數雷霆無由攻
徙倚俯高楹顧望心忡忡對此發三嘆無劍登空同

登蓬萊閣寄懷馬庶常

高閣如人意虛窗面面通登臨思足下望遠憶山東向夕彗星大論兵天下同
我曹無術略坐看握琬弓
有婦能偕老無兒不足憂好呼范當世同棹水西舟原草防回碧山雲易變秋
明年春色好或作帝京遊

吾愛張夫子文章代所無。現當秋後返。從客白門隅。脫粟妻能飯。看雲母共扶。計應如此願。爲客定歡娛。

中宵

高閣中宵起。看天城頭擊柝響。空煙浮雲東出星芒大。缺月西當島際懸。久客能忘千里遠。新涼正得幾人眠。田橫一去精靈沒。快意高歌寶劍篇。

蓬萊閣題壁

漢武秦皇骨作灰。仙人無分入樓臺。何年此閣堂堂出。快意吾曹日日來。翠嶺百重天破碎。素波萬里月徘徊。誰令表海泱泱地。微管翻深孔氏哀。

頗聞

小隊旌旗曙出營。草場坐聽擊槍聲。飛丸百步金能陷。突火孤穿電忽明。開國由來重弓馬。簡師端爲伐蛟鯨。頗聞冒頓工鳴鏑。此器匈奴舊有名。

傍夕一首寄仲弟

傍夕涼風換袷衣。草蟲趯趯向燈飛。從來遠客驚秋早。况是家山到夢稀。見雨遙愁堂室破。無田更望稻粱肥。烹薇挽鹿關吾命。未必生平有釣磯。

高秋

高秋南望思無端。更俯長空百尺闌。海闊諸帆同散鷺。天窮孤月若燒丸。壯談形勝逢時易。細構詩篇下筆難。謀國從來須老輩。惟應鸞鶴半空看。

登閣迴望愴然有感

坐滯山中對苦霖。偶扶危檻一高吟。漸知避謗題詩少。尙覺悲秋古意深。苦茗豈聞能解渴。南風何事但吹襟。江南七月新涼好。憶否離人此際心。

與林秀才夜話

論兵說劍氣嶙峋。夜語環燈味轉親。終覺詩書多古意。暫忘爾我是離人。避檐雀叫風摧翼。濯海龍歸雨帶鱗。此際便思微中酒。故應欹枕葛天民。

得方先生肥上書奉懷二首

肥水園居好。先生報我聞。發書方喜笑。觸舊感風雲。于菴皆新鬼。黃陳已舊墳。頻年多吊逝。何處覓歡欣。

東海秋多雨。天風夜撼樓。四更還獨起。一寐若相讎。坐閱蟲趨燭。因思浪擲舟。無端往來意。觸物不能收。

排悶偶賦

兩月開門看海天。吟詩寫字亦翛然。屢看友病增鄉思。偶聽秋聲憶往年。飢死更應方朔笑。繁憂徒爲孝章憐。男兒未合愁中老。還想如澠酒百船。

與易雲題兼懷邱履平

雲題產南粵。家世善彈琴。此豈軍中樂。空成人外心。邱生能說劍。與汝不孤音。太息都貧賤。西風各苦吟。

送沈海秋歸無爲州

彭郎病返贛江頭。汝更攜扶上海舟。出入風濤殊可念。飄零衣食不能休。暫同

衛遜懸弓往，終爲天平看菊留。共有草堂歸興亟，况君先骨待山邱。

書景述意

地迴臨高鳥，看山戶不扃。海濤迴岸白，樹色蓋城青。田寨知非昔，坡祠或有靈。賞心更懷古，又見桂華馨。

浩蕩

殘陽紅未已，海水綠無情。沙岸何年迹，寒潮不盡聲。看天心浩蕩，觸物意縱橫。萬事懜騰裏，聃周孰弟兄。

月

仰首看明月，由來似我家。閉門還伏枕，擊柝與清笳。漸覺飄桐葉，翻憐負蕙花。何能附潮信，一爲寄瑤華。

秋深

隱几開書卷，臨窗點翠微。蜻蜓雨前出，蝙蝠月中飛。衣漸秋深薄，肌難客裏肥。

江南螿蟹富堪笑不能歸

雜詩

涼風振天地百物生慘陰但今年候暮豈傷遊子心整裝爲孤客譬若籠中禽
既乏武城畝終媿漢上吟瞻聞睇海嶠軫閨覩岑林哀我所殤季闔棺不聞音
同體乃異世生者彌眷忱

萬歲若轉輪百年暫所際行樂當少年何能苦悲厲臨觴怪衡嘆著論驚賈涕
知非彭喬身胡若軍府繫慰懷纂茲圖向影寢獨酸謝彼小己羞遠引慕連惠
屯軍東海濱振武備虜氛揚旌列平野炎炎若浮雲主將忠孝士諸吏桓桓群
張酪誇致楚門廉述破郢寬云從勃績參言屬韓勛六合幸康泰無由致忠勤
忠勤豈不致休氓體吾君

朝上蓬萊山東望海日出登臨非一晨驅憂少干術桂樹繁欲花榴枝茂已實
園叢罕栖螢草根有鳴蟀遺懷更相嬰力禦安可出想像無懷情願依陶生述

登蓬萊閣懷履平淮上

乘風躡飛閣。南望思淮陰。念我所嘉彥。惇惇以愁心。本無馮公舉。兼乏鞠武欽。髀隆信作圃。精竭甘臥林。桑金故殊絕。盆歌胡見侵。遙惟媿媿子。床中呱呱音。朝覩有酸鼻。夜聞少乾衾。穹蒼惡賤士。嚴霜先枯苓。亮哉勿復道。徒憂誰可任。聞君戒脂轄。東欲遊青齊。海隅旣遼僻。弧軍終歲稽。敬陳軍中苦。願言脫轅輅。延年徂洛陽。猶嗟徒御悽。仲宣從關右。詞諛衷則睽。豈謂人馬溢。復恐眉睫低。淮流以爲酒。得酒醉若泥。相彼從軍行。令茲涼風淒。

蘇文忠公祠

坡老祠堂遺像孤。門前海水日東徂。雙丸起伏成朝暮。諸島陰晴或有無。薦醑何因沽蜀酒。迎神誰解舞巴歛。人生只有還鄉樂。願借先生風馬趨。

周彥升自海門至

深秋方病起。欣子故鄉來。知與楊生見。因聞范大回。寒雲齊客島。落葉武皇臺。

從古青州地·登高合舉杯·

觀海有感

秋色帶幽燕·長波接奉天·感時思將帥·撫景重山川·通漢無天馬·當關有控弦·寄言諸徼國·今上是周宣·

奉和周明經大兄寄人之作

靈風散綠見·夫渠睽甯知駐洛車·爲感魚鱗三歲字·却回鳳唼十行書·長波似鑑空闕影·短夢如煙不溼裾·清夜沈沈星斗下·月娥嬾獨意如何·

見語洪厓眼·便青當筵歌舞·一時停·直須對面知劉徹·未惜行廚泥蔡經·留影似嫌斜領細·圖眉長感赫躡靈·蒼茫碧海曾無際·苦說西廂夜不扃·

早秋感賦

庭樹蕭蕭暗送涼·兼旬把卷據胡床·夜深漸覺重衾美·病去微聞淡飯香·遠島藏雲迷紫翠·夕陽搖海變青黃·蓬萊信美非吾土·那得逢秋不憶鄉·

寄孫聖與秀才京師

日對旌旗厭說兵。書來苦道彗星明。公車未合徵郎顛。雪涕誰令慕賈生。三輔風煙佳氣盛。五陵雲物日華清。賢儒不分陳封事。願臥山中看太平。往值侯官太保公。上書糾慝筆生風。長安有客阻袁盎。魯國何因得孔融。鷺鳥不羈常帶鏃。山鷄有口却登籠。祇今結舌無言語。坐看漁人下釣筒。

送周大鶚歸省景州因到官新陽

八年控轡亞旄旛。誰惜龍淵虎氣虛。親老不辭南海尉。時平願秘伯山書。人歸趙北迎征雁。秋入吳中有膾魚。今夕張燈還共醉。更堪後夢逐君車。

傳聞一首

八月秋清海水空。傳聞西下蠡朦幢。北庭未改屠耆貴。東魯甯方季札通。列郡朱旗官負弩。當關韎注吏趨風。書生覽古思元壽。永想蒲陶昔借宮。

美人相鶴圖

蓬閣箕風振翰回。上仙不爲此禽哀。晝從魚媛悲王鼎。夜下羸宮舞堦臺。隴語轉憐鸚鵡意。楚金微識鳳皇才。瑤池阿母能相引。願問嵩高却簡灰。

宮怨

苦道深宮八月涼。齊紈取次閉空箱。秋風不是君王意。枉畫愁眉入鬢長。

瑤池曲

瑤池漱漱黃雲溼。夜半桃樽淚如粒。左旋月躡右旋危。十萬春星向東泣。對面徒聞嚼曉冰。碧文長夢龍須靈。蝦蟆一蝕千霜見。爭得丹壺夜不腥。縞羽微驚下簾際。暗制西鷗共湔涕。榆翻桂覆海波空。忍爲湘竿惜羅袂。去鳳來鸞有異同。花時憶拜朱絃風。一春偏刈蘿從竹。百劫仍忘蕙是叢。楚媛秦娥幾人在。微燈那得輝窮海。穆謠不唱武棺灰。戟叟年年啼素彩。

奉和林秀才八月十五夜對雨之作

林生好酒醉不眠。深夜示我中秋篇。此時誰不念林壑。眼中大海非江天。癸酉

以還幾八月。大半行蹤若飄忽。可憐甲戌當此宵。父病兒啼酸在骨。先十六日爲
先子諱日
嗚呼此哀豈可窮。憂來忽若聞悲風。甯知野樹逢霜豔。徒見山花竝淚紅。林生
望月月何往。怨雨愁雲意淒爽。詞人好事語固奇。觸我淚深似潮長。生乎生乎
爾所知。人生只有歸可怡。堂堂萬戶封侯貴。何似田間酒一卮。


登州九日作示林秀才

九月九日天大風。起視大海白雪同。雄波高浪如此惡。誰能挂席凌長空。我居
山中一百日。夜吟往往聞伏龍。心知神物不可見。鯨鯢百萬俱丸蟲。秦皇漢武
豈不樂高樓。大觀臨海東。金棺下葬一千尺。荒荒萬歲無春冬。英雄作事有本
意。亦知海水非仙宮。阿房桂館旣絕壯。龍舟輶輅聊從容。後儒望古良不識。罾
者腐豎信者蒙。感此便欲揮八極。舉首四顧鷹在籠。眼中吾子真我輩。醉歌夜
夜看青穹。無端哀樂坐何益。不來陽翟賈兒劉巨公。何況儼然二客如飛蓬。

邱將軍大刀歌

將軍名尊謙。沛人數從淮軍破賊。多大功。余與共在府主吳公軍中。觀其刀。誠雄壯。莫二。今將軍死矣。感事懷舊。爲賦此詩。

將軍大刀不可視。七尺練光拓秋水。一生斫得幾頭顱。無數血花大如指。沛中豪傑由來奇。將軍所向風草披。爲言此刀初買日。背有數字鎚去之。我思前人鑄此鐵。爐火深青慘不熱。霜鋒鍛出千人呼。殺氣淬成萬鬼咽。將軍得此氣益壯。突騎軍中取上將。于今老死芒碭間。我說此刀意悽愴。將軍愛我如弟昆。幾年同客信陵門。甯知過墓千行淚。不及當時一酒罇。憤來欲擲寶刀破。如此奇功亦無那。不然便與耕田夫。夜夜五更斬芻莖。



桂之華軒詩集卷三

泰興 朱銘盤 曼君

風懷九章

委地如雲鬢髮長。衆中誰似少年妝。未應薄暮低籠月。乍可輕雲但隔牆。欲語遲回仍暗卜。過來依約得微香。燕雛知傍誰家屋。不分隨風近畫梁。

月墮空江夜色寒。忍涼爲底近闌干。金楣夢去魂猶笑。珠唾飄來事更難。楚國名華知獨秀。小姑新壻卻偷看。蕙蘭生是湘濱草。隔着春波不易餐。

合有仙人拍我肩。不曾語盡便相憐。微聞花氣侵衣角。因甚飛蓬著眼邊。北部襟韡渾約略。東廂鴛鴦暫纏綿。盈盈十五能長好。花底絲來是恨天。

爲話前塵似夢中。紫莖綠葉已成叢。西園公子時相見。南國佳人不易逢。繡被偎寒裁孔翠。黃金刻骨鑄飛龍。緘盟小疏分明記。細字觀書語最濃。

橘包時節帶微霜。斗室冬暄薄曳裳。小坐已珍襟角煖。暫離仍惜帽簷香。蟾脣

鬢鎖銜私誓。蟬翼回燈。慎薄妝。愛護餘溫難再得。推篷山翠見潯陽。
爲貪柳色大隄邊。抵死呼來不上船。啼鼓已成河漢隔。登樓惟見樹陰圓。眼拋
珠淚全侵枕。心拜鐙神更擲錢。一夕西風霜氣緊。中衣仍是薄裝綿。

漢皋三宿睇青螺。觸眼驚魂可奈何。後笑暫期絃上月。收啼更惜去時波。層城
路轉知門近。擁幌衾溫怪夢多。見說相尋渾不著。燕支山畔路嵯峨。
入骨相思不可名。逢人江上問歸船。書來緩緩中冷路。人去雙雙大海萍。歲晚
山冰分距背。風高晨霰束鸚翎。空波衣帶成千里。疆醉無方卻更醒。
生屬飛花已自傷。更堪如水偈年光。襟邊小月圓無準。殿角西風奏易涼。無分
高牙開蜀郡。已拚腫目謝船郎。便搏黃土爲卿我。燒作雌鴛嗅不香。

燕台作

通夕舟船震蕩音。收帆失喜傍山岑。海濱五月鱖鯉美。野郭千家竹柏深。好友
乍如初滿月。墜歡重問舊題襟。恭聞主將籌兵策。屬國風煙逼桂林。

珍髻如雲只自憐。更開倦眼睇戎旃。誰令渤海飛觴地。忽憶京華中酒天。主聖英謨歸將帥。時危猛士喜戈鋌。懷人感事蒼茫意。不待登樓已泫然。

題槐樹

當窗一樹槐。長夏喜森森。秋至攔紅日。翻令惱碧陰。有情惟此木。異候見人心。恩怨尋常事。當前太華岑。

朝鮮軍中喜履平至

昨到三韓日。聞君哭母歸。問人知客瘦。求夢愠眠稀。木脫諸山靜。秋高戰馬肥。縱因排旅病。喜極更沾衣。

與履平

三韓秋色遠冥冥。策馬西來晚帶星。尙喜隨身孤劍在。正堪對榻一燈青。天寒草木邊聲急。風過魚龍海氣腥。記否清涼山下住。夜深鐘鼓兩人聽。

贈張都督

王師橫海薄句驪。猛將先驅擁節麾。夾道萬人驚虎劍。度江片月照龍旗。元戎易理參能解。黃石兵書讀易知。幕府清寒勞過問。高談今夕一伸眉。

朝鮮九日作

殊方九日蕭條極。欲問黃花無一枝。世事苦談有何益。清尊相對不須持。珠厓已見非吾土。都護空聞老漢師。却道江山好秋色。爲誰扶病更題詩。

題林秀才畫

江南春好百花扶。三月燕山興未孤。轉眼行人折楊柳。回頭落日在蘼蕪。秋深旅病時高睡。夢入芳叢莫浪呼。一對林生好圖畫。欲忘寒色滿江湖。

旅病述感

旅病淹旬季。欲驅苦無門。恆感友朋意。時時來相存。秋風日以厲。落葉盈郊原。元鳥思昔壘。衆禽念故樊。常恐老母知。家書不敢言。顧此意不樂。寤寐勞其魂。有弟歲已冠。規當今年昏。不能舉秀才。念之中心煩。有妹在廣陵。家貧難具論。

昨聞發肝病氣咽幾不溫。人生有情性所急。在本根百慮更相到有若茂草蕃。
把卷對昔賢。往往多艱屯。下士今得爾。已荷皇天恩。仲長言樂志。此事古所尊。
百士一不得。隨遇倘可敦。

贈朝鮮鄭周溪留守與履平聯句

殊方爲客又驚秋。耶 履平國老相逢喜唱酬。已媿陳琳惟草檄。曼君苦從李廣

覓封侯。雨晴木葉千峯爽。平風帶霜鴻一夜愁。無分尊前看寶劍。曼憂時欲上
管甯樓。平

王伯恭博士招飲不果寄示李蘇堂布衣

宵衾涼冷覺秋深。獨客何堪百慮侵。此際應知老居士。夜來曾醉菊花林。芳筵
有約吾當往。赤日熏人遂不禁。飲啄從知有天意。歸來倦極更高吟。

書許觀察詩本

邱生來海上。示我故人詩。云昔飄零日。賴君衣食之。高門漢祭酒。好客鄭當時。

此卷留天壤。千春儻可期。

畫梅爲葉禮丞大令作

孤山萬木雪鬚髯。山下逋翁喚不膺。却怪古時一片月。照人銀海欲生冰。
君家老屋洞庭山。霜橘千林落照殷。何似買田種梅樹。好留清蔭待君還。
此邦解種梅花樹。只有龍鍾趙侍郎。相約何時花下坐。小天蝌蚪落衣裳。

喜舍弟補學官弟子

老兄射策只空回。家弟欣聞舉秀才。回首先人翻欲涕。得書笑口暫能開。三韓
旅病逢秋色。十月新寒戀酒杯。珍重故園好花樹。苦辛曾是昔人栽。

朝鮮金參判石菱爲其季弟索詩

石菱小宰前致詞。有弟今爲順安令。書來苦索賤子詩。願得箴言藥從政。我來
此國百餘日。眼見閭閻苦與疾。牧民所貴用書生。要使春風去蕭瑟。海隅颯颯
西風來。千山萬木秋聲摧。嗚呼天意常仁惻。今何不爲衆物哀。爾來旅病聊亦

可薄醉吟懷暫掀簸。臥思好句贈遠人。却恐江山笑魄魄。順安賢宰廉且慈。平生亦有風人詩。煩君細說龔黃傳。爲政風流今在茲。

送王秀才回合肥兼懷方王二先生

君家季父我所師。五年不見霜滿髭。爾來又聞懶不出。終日閉戶哦新詩。定遠夫子結鄰住。三日五日同尊罍。二老平生最愛我。道我文采非凡兒。今年射策成一蹶。從軍又出高句驪。江山雖好非吾土。倭人狙刺况可危。定遠明年政七十。暮春三月鶯花時。往者甲戌當此日。井南留客嘗新鱗。復矣此會那可得。爲君口述還吁嘻。去年沿漢過皖國。心知二老當我思。欲往從之甚風雪。惜哉聚散如沙泥。往時意氣壓流輩。二老往往相勉規。煩君大略語二老。莊生甯作泥中龜。人生作吏行萬里。小大悉荷天子慈。傭書亦復到絕域。便如琉璃安足奇。古人戒勿爲牛後。顧念此語中心悲。定遠按蜀有美政。長吏不說皇天知。世間曲直無平準。修梧擁腫同一灰。大軍駐此四百日。賢王感激臣民咨。新政一一

法中國強鄰不敢來覬窺君歸持此告儕輩二老目笑心則疑九月十月海風
急大舸一夕趨江陲回思賤子坐嘆息得歸不得遙無期

贈王伯恭

隋唐以來高句驪士馬強富雄東陲李氏有國五百載爾來文弱空支持去年
兵變燒公室千乘播越藏野茨王師一到畔者得八道胥荷皇天慈天朝宰相
宣帝化新政徐徐規畫之曰美曰德曰英法惟王一一相摹規效此則強不者
弱惟王奉行無紆遲釜山雜島如奕棋仁川之水清不滋水深土厚產金鐵羣
賈萬里來覬窺嗚呼聖王御天下地力不盡守四夷此論迂闊有何用豎儒妄
語罪當答王生經歲來此國英聲卓犖賢王咨隆以客卿筦樞要安置妥貼平
不陂天子之吏仕藩國古有此法無可疑我從府主儼幕下牋牘罕簡多甯期
時時從生一言笑詩篇酒盞聊娛嬉秋風西來送寒色千山萬壑皴毛皮此時
有酒不須醉仰視天月摩頸頤祖宗手定三藩國中山越南高句驪中山已去

不可返·越南岌岌·壘卵危·安得天下嚴·口禁秘密·不遺句·驪知·

早晚

天下於今幾九州·縱如衛霍不能侯·蕭蕭木葉秋風下·浩浩青天江水流·杜甫
乾坤空有宅·管甯遼海更無樓·征南老將兵威重·早晚邊氛合便收·

漫題示履平

夜夜床頭擊柝聲·朝朝窗裏見飛旌·韜鈴不分今來識·疎懶翻從久病成·放膽
笑言因子在小詩·黯淡欲誰驚·看山相約同攜酒·明日重陽况雨晴·

阻風泊無爲州江口

逆風如泥客·未夕泊山莊·出地孤星大·連山野燒長·鄉遙驚歲晚·酒貴識年荒·
籌策何人事·憂時漫慨慷·

寄懷范无錯武昌兼懷令弟中木同年

黃鶴樓頭見月明·晴川閣下枕潮聲·我從徼外兵戈地·羨汝胸中山水情·病起

翻令歸興減。鬻文料是可憐。生京華三月。逢君弟回首。笙歌涕泗橫。

朝鮮雜詩

王氣赫遼瀋。太宗奠神京。大兵臨其邑。朝鮮遂奉迎。聖祖及高宗。教化開文明。聖人豈愛士。俾爾知忠貞。事大天所佑。福祿其群生。蕃息其衆殖。百物豐以盈。至今三百載。有若投母嬰。忍如漢孝武。不問越鬥爭。

八年秋七月。陪臣金及魚。報書於督部。神色慘不舒。督部誦其書。上言恕臣愚。下言國內變。縱火燒王廬。發矢及王蓋。君后藏菰蒲。冒死從宿衛。萬卒無一夫。微聞有主者。尊貴莫與俱。督部不敢斷。上之于天都。

興宣大院君。康穆之從季。厥有子三人。一爲康穆嗣。爲父乃私情。爲臣實大義。如何緣衆怒。便思易王位。不在攝政年。作事何濡滯。智者當不然。人言一何熾。人言雖則爾。父老亦涕淚。

王師橫海來。罪人唾手得。偉哉將軍功。天子賜顏色。宰相眷小邦。一一爲修飾。

互市則已矣。練卒以爲德。少伐豈不馴。名爲王羽翼。更恐芋菽窮。驚
眼見爪牙。徒化爲豺虎。賊前車豈不遠。愚者昏不識。

江左有伯叔。生長于泰西。伯者習其教。其叔爲養兒。相公收材峻。洩
相公嘉其才。以伯撫句驪。扶政及禦侮。百事爾主持。身爲天朝人。北
匪惟臣事之。拜跪如西夷。固知尾已才。不若頑鈍奇。迂儒抱春秋。老
朝船迎潮生。暮船迎潮落。刺船雖云美。不如爲官樂。互市既有科。遣
不知何姓名。但聞才不惡。王人使蠻夷。取官于臺閣。中朝固有體。甯
此論今不然。儒冠賤如糞。

興宣攝政時。西虜來寇邊。興宣驅孱卒。一鼓摧中堅。乃知克西虜。不
如何貴人口。畏之如帝天。兵凶而戰危。智者策萬全。不見賣國碑。興
大書戒子孫。垂示千萬年。厥志雖不成。君子嘆其賢。

一日發京華。二日海水清。四日登之罘。七日辰韓城。書生不習武。熟

昨者英虜使

側聞庚申變

贈徐

不謂三年別

仍憐禾黍薄

已失英都護

朱絃方在御

靜安

柳侈花嬌佛

爲烏喧大幕

奉和

對人苦道不

有夢縈香篆。私願將身化舞衣。不信徘徊雙孔雀。獨能無意接翎飛。
見畫私憐弱腕涼。不曾識面亦知香。故應錯點煩軀改。拚作垂痕較淚長。離思
何因關曉露。苦心端爲怯秋霜。酒闌一誦陶生賦。如海風情未得狂。

喜林怡菴至軍因聞官軍已臨越南

歲暮衝寒出。依人如此難。中年有白髮。得酒見朱顏。聞道安南境。新開漢將壇。
擁裘方病起。喜極欲加餐。

更說閩中帥。防秋未點兵。如何倚天塹。不畏棄陰平。天意存南服。傾邊看去旌。
期君待消息。強醉快時晴。

留別朝鮮士大夫

漢陽城闕激清笳。英蕩乘邊久繫查。暫許君房罷遠郡。終防魑結苦長沙。島人
殘落回兵氣。虎士新霜拂劍花。私憶西山好昆季。傷心衛貢獨咨嗟。

九州一道海波通。風仆依稀長邱鄘。兩境姬熊商玉帛。十朝冕輅視禽封。漫疑

商奄非東土。終慮吳牟責。上供努力者。臣謀國是未應衆口賦蒙茸。
驟聞龍節返中原。祖軔千官咽國門。幕府清宵殘蠟炬。邦人招宴有金罇。兼旬
病濕甘餐惹。中歲離憂欲采蓀。料信客裝虛縞帶。小詩微響亦慙論。

題朝鮮金小棠爽準韓齋雅集圖

眼中前輩去堂堂。五十金生鬢亦蒼。莫唱前頭天寶曲。金釵零落不成行。
徐孔張王舊有名。餘人才地並崢嶸。當時已盛黃墟感。零雨荒煙弔李生。藕船
相對清尊意暫歡。詩成涕淚忽洄瀾。藕船孫子今寥落。誰問西風葛屨寒。

贈張叅戎

千峯黛色映瑠戈。人道將軍俠氣多。觀海方思回地軸。看星徑欲挽天河。懸知
盤稍工騎馬。自昔聞笳早善歌。出塞王師近乘勝。與君南望意如何。

海外春寒殊劇漫題一首示履平

異域垂楊樹。由來無二形。如何三月暮。猶惜一枝青。脫葉聲喧地。回風雪上檣。

不因與朋好，誰復到郊垞。

感候怨別愴然有述

元菟城頭漢月高，登樓遊子看征袍。十年蠻府能騎馬，一夕狂名謝釣鼇。春雪
凜人驚臂粟，寒柯摧茁縮拳毛。東風白袷江南路，此際何人憶我曹。

贈朝鮮具少年繹書

家世威名都護使，襟裾瀟灑少年場。文章知羨中朝貴，尊酒能留遠客嘗。坐久
鄰人窺竹牖，日斜樹影滿山堂。平生却有題詩筆，恰對郎君未易狂。

朝鮮儒生李秉哲以詩見投報以此篇

李子輕華臘，端居惟養親。高歌送長日，花樹爛青春。久客嫻風土，論詩喜逸民。
不能追世好，只是爲儒巾。

同履平登青龍山望北漢城有作

漢陽城東山嶽嶽，十峰五峰轟稜鏗。青龍囊首勢略平，病客中途氣已索。却嗟

竹木無春容。更悲家山成左約。意中林壑空渺茫。眼底歡娛翻棄閣。邱生足健氣亦豪。興來挾我遠山椒。依稀北漢城如斗。想像旌旗夜似潮。太宗當日天威重。元菟承恩先入貢。但詔藩封戒獸心。豈聞屬國輸銀甕。天恩此日都如昨。橫海戈船甚鷹鷂。烈士微聞蹈海心。詩人暫道看山樂。俯睇俄驚掠數鷗。回眸失喜橫孤鶴。迢遞關山意若何。邱生擊劍吾當歌。不須更到何峰頂。東望扶桑海氣多。

青邱篇

漢家將士勇且賢。元戎坐備青邱邊。出身楚國多君子。任俠三河最少年。英姿颯爽千人羨。凌厲冠裳輕裊掾。寵渥應知將略尊。位高但覺征夫戰。似虎甯成謝不如。比鷹鄧尉猶慙見。威重由來孰敢方。少年族貴材更强。依稀舊篋留金僕。彷彿殘鬢遺鐵槍。君不見李廣當時勇絕倫。前軍迷道涕滿巾。數奇况失將軍寵。結髮前功空自陳。祇今回首夷羌處。蕭蕭風雨愁殺人。

朝鮮柳中使小園聽土人雜歌

歌聲未作先打鼓。十聲百聲不可數。一人發響數人追。一人中間沐猴舞。時連復斷或大笑。應是歌間帶嘲語。小亭四月花飄搖。垂牆拂地千柳條。借問譯者頃何唱。但云啁哳同謳謠。豈知中有唐詩曲。散入蠻荒化歌曲。龜年幡綽爾何人。漫對空絃嘆幽獨。衆中邱生尤好古。忽聞此言喜欲舞。但覺黃河眼底流。如聆劍閣宵中雨。白鳥簷前三五飛。野人歌罷醉還歸。座中聽曲成蕭瑟。歌者心中無是非。

和朝鮮黃鎮奎石然

玉垂八十老中樞。爲道黃公節槩殊。已分心情膏木石。不煩坐臥在江湖。春花開落尋常見。漢水東南日夜徂。借問鬢髯成皓皤。未妨尊鳥對紅膚。

龍女圖爲黃仲弢編修題

碣石高懸漢月彎。連峯萬騎却東還。何人夜下蒼龍背。拾得蓬萊左股山。

送汝乘雲謁帝閭。諸天曉色正微茫。西鱗不辨東鱗赤。知受金地百道光。

贈黃叔庸

倦拂句驪馬上雲。今來當酒易成醺。蒼蒼極目惟寒色。往往清言到夜分。叔父方爲少司馬。詔書聽起越南軍。扶風暫得論經暇。矯首南荒不可云。

我家江委海之門。君縣甌王昔所屯。澤國幾城絕峯火。野人何屋長雞豚。鼓山落木懸清籟。楚水秋瀾想涕痕。見說虎文尙書節。已驚蠓動月氏魂。

三十同爲黑鬢時。更堪早歲並孤兒。安知眼際人如海。一讀君文淚過頤。兵法豈聞賢馬服。孝經坐欲惜顏推。陶山自古移家域。去問通明試一窺。

出朝鮮王城雨中作

崇禮門前細雨霏。不愁細雨濕征衣。祇憐久客人情厚。復恐他年到日稀。徼外山川存古道。眼中薪火嘆危機。東風吹得垂楊綠。誰遣楊花滿地飛。

送王考功歸省台州

眼前與子並離人。獨羨高堂有二親。布被宵長難別曙。枯腸酒入易爲春。苦追一第溫衰白。倦想雙田實賤貧。雁宕天台天下絕。正思風雪阻嶙峋。京洛前驩酒變痕。中原戰鼓百雲屯。朱鷺曲盡歌難轉。紫室星高手得捫。已悔空名持九物。祇應墜葉戀孤根。共燈談笑甯非樂。短景天涯怪月昏。

寄張仲明提軍金州兼懷張子紳明經并寄周彥升校官長沙

多時弓劍耀邊霜。別隊雲中救楚王。回轡雙旌仍照海。懸軍三矢早歸房。征人頭易中年白。絕塞山從盛暑黃。武壯平生遺令在。要留堅骨報吾皇。幾歲張生尺簡無。喜聞賓主最相娛。同爲遠客忘枯菴。坐論吾曹或嘆吁。節士幾人成儉博。清時或地著孫吳。周郎楚國愁卑濕。更恐淒涼飲興孤。

題畫

待詔天門午夜霜。退朝林月帶微黃。五山花草朦朧見。疑有朱鷺白鳳皇。紅梅水仙羣帝朝天宴蕊珠。酒終遺却赤珊瑚。戟郎取種方壺島。十萬春秋更不枯。紅梅

馬太夫人七十

聖清三百載。文筆在桐城。閩洛真儒氣。江淮節士名。貞風見樊衛。嘉頌及旄嬰。銀管書忠孝。今年歲在庚。

我峩馬太僕。前史有輝光。諫草傳親澤。雲孫拜禮堂。丹青相禪替。弦吹各聲香。節槩男兒事。無因慕范滂。

父子歸神日。文宗癸甲年。皇慈勞軫節。藐稚失瞻天。大義回金石。餘懷觸簡編。可知范史傳。最有少君賢。

偉絕湘陰序。能傳聘士文。更繙都督集。如對岳家軍。華杞英靈在。眈盱忠節聞。惟餘青史筆。正氣欲干雲。

仲氏交情久。因聞叔子才。能譚天下事。新略越南回。昆弟經生業。冬春壽母杯。虞譚有慈教。今日養堂開。

信有芳馨遠。諸孫骨氣清。祖爲太丘長。爾慕魯諸生。毛羽今方茁。雲霄會發名。

從來書籍滿手指與雙楹。

薄仕無佳祿。三千波路長。高年娛骨肉。近海便舟航。春饌桃梅熟。秋盤稷稻香。喜聞楚萊子。畫像漢祠堂。

慷慨安危事先姑。有訓言。兩朝忠義傳。三命郡君門。高館青當戶。芳筵綠滿尊。堂階足春意。隨地是邱樊。

送江庶常兼懷王五丈

賢兄四十赴軍期。同住蓬萊閣子西。令弟今看除秘職。里翁料欲乞新題。病辭車蓋甘書帙。倦喜兵人奏鼓鼙。終感年時從府主。到今碑社滿青齊。五丈平生眼獨青。肥干諸老未晨星。喜聞子姪親前輩。約嘆儒人寫座銘。理學從來尊氣節。貞廉要可挽風霆。海波九月平如掌。送子無妨睡酒瓶。

劉兵備招飲武庫

入門緣路盡垂楊。引水栽荷綠滿塘。五載軍中驚見此。三山天表坐相望。華堂

驩宴尊如海。赤縣發兵箭在房。泰始年中新武庫。苦思驍帥備兵涼。

示馬生彥循

一月常能十日風。海邊九月抵深冬。短林秋盡無棲鳥。怪壑宵吟有伏龍。弟子讀書沈夜漏。先生美睡忤晨鐘。將來爲買楊雄宅。與爾平分江上峯。

寄肯堂

旅順所居屋。俯聽大海波。始聞疑耳聾。又疑風霆過。主人閔曠獨爲我。營行窩。命吏督夫卒。架木剗坡陀。南人四五家。亦有雞鴨鵝。村老相愛敬。但知美冠鞞。騎馬六百日。足力不見多。三年救婦病。一病九跌蹉。問君有何懷。那能笑與歌。今年却移居。粗得營薜蘿。丈人附書至。其月婦病瘥。爾來稍發意。遂思大聲哦。丈人愛吾筆。但恨不共科。平生說張吳。餘人徒傴僂。火急鈔鈿字。十年載一駝。誓靈變此計。孤學世所訶。武昌七十翁。幽居當如何。

贈吳靜山

江縣如丸小。清時寄著多。殘黎幸茅屋。崎客保山阿。楚產喉牙變。吳儂語笑和。將家終好武。子弟識瑯戈。

小箭花門器。新師越騎營。少年習軍法。間道望公卿。此藝因時用。敷天享泰平。百年神武觀。徒積魏時兵。

氣有千夫敵。軀無六尺強。去從軍府節。歸奉楚人觴。窮海春無綠。驚沙晚帶黃。二遼邊塞地。從古少垂楊。

劉海峯贈汪寶書詩卷墨本寶書之孫菊坡乞題因憶往時所見姚郎

中爲溫明叔侍郎平點左氏傳禮記等十餘種

零落海峯集。兵戈無處尋。遠名若流水。寸楮抵兼金。高弟詩才富。故家喬木深。遺文懸絕學。望昔若爲心。

受業姚夫子。峩峩溫侍郎。殷勤如骨肉。親手賜丹黃。風氣咸同變。微言鄒魯長。挽回有神力。太傅出湘鄉。

題畫

花開照江水。花落覆春隄。越女輕衫薄。吳兒短髮齊。臂寒才約釧。鬢重乍橫笄。生惜殘紅墜。紛紛上馬蹄。

旅順西有小城。土人傳爲蘇武牧羊處。云有唐人刻石在焉。

馬渴人飢越數山。丹林綠草小舒顏。道邊誤信唐碑在。城上惟餘漢月彎。銅虎徵兵闌海縣。黃金捧土置天關。龍拏虎鬥騰騰見。寂寞田翁一醉間。

桂之華軒詩集卷四

泰興 朱銘盤 曼君

爲馬太守李司馬雜題畫屏

僂聃老子說紛然。難問龍門司馬遷。誰料後來孫子貴。玄元皇帝領諸仙。老子
桂樹葱龍幾萬春。常儀來後後無人。縱令月蝕蝦蟆死。不與人間判作薪。吳剛
世間漂母知韓信。天上天孫識子儀。同是婦人具高眼。恨無人建女郎祠。郭子儀

神仙黃白事難論。竟有中篇八卷存。夜半王宮呼救火。千年丹鼎不重溫。

淮南王安

大酒肥羊味太腴。那知養石養清癯。嶙峋本自成頭角。不待仙家勅勒符。

黃初平

老翁藤杖與扶持。化作蒼龍亦可騎。騎向交州句漏縣。丹砂爐畔喚孫兒。

葛仙翁

虎鞞袍笏自稱臣。鬼使從聞爾策勳。見說終南青到海。那能有路上青雲。鍾馗

老守西京執戟郎。生嗤彭祖太頭長。如何激惱西王母。不把桃樽獻武皇。

東方朔

日本花媛女史畫冊

興能書法重中唐。始識倭奴接帶方。終有大朝烟墨氣。女兒畫手亦堂堂。
拂筆何時自寫生。一時諸態變陰晴。圖經不載花谿字。留取詞人攷異名。

送顧未航同年入秦因呈其尊人耀州刺史

耀州刺史官如雨。洛下書生筆有風。百置無秦雙寂寞。七年秦履各西東。貧思
補吏求丹穴。醉欲題詩問碧空。下第情懷終不惡。未妨瀋溷著書功。

中年昆季惜分翔。握手甯知意短長。佳婢聞當歸郭璞。生兒料可勝東方。懷人
西睇晨雲紫。犯暑東行夏木黃。苦憶水心亭上酒。深盃樹影落青蒼。

寄樊雲門

西山朝翠界秦雲。聽誦新篇憶使君。解褐一爲中著作。守官仍帶府參軍。如聞
諫草傳天下。合有生碑乞我文。百嫉音書知不易。漢波長得碧沄沄。

天津送朱又笏同年入越并寄譚丈仲修

壬年同舉六明經。五有三年似曉星。南去西湖在懷袖。東回碣石繞窗櫺。過江

詩與千山秀。出塞春無一草青。子有戴兄官俸美。買書勝致百娉婷。
范二平生病更愁。何嘗詩筆不能遒。一時鼠變歌兼苦。十里蟲聲夏入秋。此會
夜吟同蠟燭。明朝海日送扁舟。譚侯詩旨無人識。四始才能不斷流。

姚仲實以尊集見示敬題一詩

蘧塢姬傳一文律。乾隆嘉慶兩通儒。丈人弈業爲循吏。令子雄篇照上都。窮海
風烟變毛髮。穰山警欬勝瓊珠。人間僞體紛紜出。望古從知道有徒。

贈龔兵備

四十專城舊有名。懸知五十擁蜺旌。紛綸治譜從西漢。合沓高才動上京。銅虎
暫兼軍祭酒。水衡平視大舟輕。卽看輶轍經行處。便有廉泉百丈清。
不用淮南大小山。公餘嘯詠足舒顏。一門子弟星辰上。萬里崑崙枕席間。爲惜
荆王輕尺璧。終思晉客寶雙環。那知私喜藍田佐。看了官書自掩關。

贈李叟

久爲遼左羈棲客。喜對江山厭鼓鼙。人海萬端真蠛蠓。平生一飽只鼯鼯。悔思
駟馬汙橋柱。不薄郎官媚小妻。早有幽憂今不解。欲從李叟問刀圭。

題肯堂照像寄肯堂

肯翁寄我赫蹄影。賤子懸着瓜廬隅。審君貌肥膚革緩。料是病起毛髓枯。水心
亭上二十四。目長眉遠丹肌膚。黃鶴樓邊政三十。氣充骨勁耐歌呼。論文不眠
僮僕怨。絕學銳討門戶孤。武昌白頭財七品。冀州脫手空三都。君我尺牘互嘲
弄。商量便服利走趨。季翁腹飽喜高論。彥叟病癩甘腐儒。餘者羣子各南北。有
時一見在道塗。吾黨爲學幾途轍。丈人及我一冶鑪。天津對酒電過眼。南蘇望
遠月邊湖。古時軾轍說麟鳳。君家罕况真於菟。我無楚丘卜臣妾。安知方朔生
龍豬。令人感激想年少。轉眼老醜成顛胡。

贈姚仲實

世人結交安足論。姚生于我有贈言。姚生媿媿清且敦。身是望溪侍郎之邑子。

湖南提刑第二孫道光名臣有列傳廉吏孫子爲清門東溟遺文往所誦怪浪湧出千鼉鼉外如屈彊中平正法言法服見道根丈人儒術宰中縣嘉花異瑞騰郊村此皆明德所感召帝嘉爲令嫗黎元姚生三十好文學說經已入扶風藩章句細儒曹文筆獨君健者詞飛翻老守家法亦已足况能大海窺渾渾天性質實過名譽又無說士淳于髡吳越男兒脫如子早聞千口相騰喧南蘇力城天東極地無春夏無寒溫草枯花竭山水惡有如坐井忘朝昏得君洗耳聽未有折箸捶裂老瓦盆賢兄令弟各健絕僕有一弟難方轅兩家人才懸高下此關人力非天恩鄱州江縣治僻左固陋往往堅籬樊命代先覺古無有安得東京才子停高軒

戲爲淮揚地名詩

晚江都張綺土甘泉又香羽儀徵前峻瑰寶應景光塗高郵傳遠道泰州都昌江東台觀麗中興化理長關山陽景闔物阜甯以康魚鹽城邑屬靈清河軌方

不聞安東節。桃源誦軒皇。

二十八宿詩詠軍旅

角弓陳宣雅。亢龍戒皇羲。氏竇服神教。房韞偃鋒威。心齋契至道。尾大寧無規。箕狼靈應伏。斗弧聖人持。牛乘散桃野。女謁弭南詩。虛禮拜大將。危哉戢火辭。室劍以蓄晦。壁門有降夷。奎光曜八野。婁聞詔偃旗。冒明九州稔。昴降世家垂。畢罕戢菟獮。觜爪豐狼狸。參伏雖在據。井閭蒙帝慈。鬼方非殷歲。柳塞有貳師。星辰終開闔。張軍待箠笞。翼翼邊城將。軫結將何爲。

天幹詩詠史

甲觀集髦彥。乙部紬秘書。丙魏謨術異。丁雍恩怨殊。戊尉扞漢裔。己釐潛莒都。庚平始建國。辛庾墮忠圖。壬林種康樂。癸已歌選徒。

示仲雅二首

四放春官未足悲。歸來兄弟飽論詩。粗官思乞邊州刺。報政望鐫大字碑。盤谷

而今少深處。濁河終古有清時。子能長句吾能和。不用紛紜兒子期。
失學何顏更著書。強爲題目嚇癡愚。私誇漫叟文章老。追雪荆卿劍術疎。齊烏
三年無翮翼。蜀人五世有亭廬。買山粗足吾當隱。與爾春塍手自耰。

九月二十四日卽事

狂歌不記在天涯。亦有歡娛絢歲華。小醉女兒生日酒。親澆紅菊未開花。書城
班劣容增秩。詩國壇高勝建牙。不信聲名與官職。從來只屬白公家。

題畫

蓬萊見說化人居。宮闕金銀世不如。欲問王皇千萬壽。誰繙本紀上清書。
美酒仙桃絕泥人。麻姑不敢自嘗新。相將贈與西王母。留醉周王蠚蝨臣。
碧海風高浪拍天。無風海水滑于箋。槎行不記何皇世。疑是張騫鑿空年。

寄肯堂

心恨大范無報書。如垂長竿不得魚。無魚猶當嚼園菜。得書黃金比不如。黃金

可成河可塞。只有爛漫無計祛。讀書寫字有日格。以忙塞咎君欺。余望君太酷。當自劾。逋文堆牘行爬梳。君當文淵波浪闊。甯知泥淖掀大車。發言高議咽腸胃。那用鐘鼓祠爰居。平生喜誦伯倫傳。酒星在天不照余。書來要說天六幕。八荒日月爲瓜廬。

生日

窮海春回未似春。不成愁思細如塵。年過秦氏鬢鬢媚。詩寫湘靈渺渺人。鵲有東南求好樹。樓無西北接重闈。懷仁輔義何人事。却怪桐江只釣綸。

三月一首

醉倚高臺聽暮笳。朝看旌旆動龍蛇。一秋海氣常連霧。三月春風不見花。見雁北來知代客。問人南事抵還家。爲君詠得江南好。細雨輕寒燕子斜。

百年

武侯日與庸人語。韓信身兼噲等游。稍勝空山親鹿豕。未妨野老狎鳧鷗。百年

惟見天東轉。萬手難令水北流。自哂甘同陶飲酒。猶當不效粲登樓。

入山

貧極還思買一官。小營園宅慰清寒。昔嗤平子歸田晚。今信陶公乞食難。憤想入山披短髮。狂思追虜拍雕鞍。范雎不死誰能料。枉使虞卿夜挂冠。

答人問旅順

君問南蘇歎壯游。那知風物逼人愁。晝中海氣晴翻雨。晡後腥風夏變秋。舟客仰魚穿浪水。賈人挈婦出營州。管甯不值公孫度。誰識遼東有舊樓。

得王謙文書却寄

校弩臺顛漢月靈。逍遙津上蜀山青。騰牋寄讀休文賦。小閣仍徵馬岌銘。新論通玄上下卷。舊抄細字十三經。人間老輩卿雲見。此叟神完眼似星。

昔在淮南聖政初。天清地泰卽華胥。弘羊稍進縉錢計。司馬能通諫獵書。不信神州阻亭障。如聞畏壘禁耕耬。告公欲擬玄居釋。萬緒牛毛不可梳。

浩蕩山川寂寞行。那知水濁復心清。不嘲屈子親山鬼。爲失桓溫捉老兵。梅有
晚花容獨晒。鳥無長味暫高鳴。中年安得辭哀樂。說與常人笑又驚。

漫興示弟

著書歲寫三千紙。海月看經七十圓。畫作天龍殊誕漫。夢爲周蝶亦翩躚。何愁
河渚車無蓋。親對班揚右屬鞭。二陸雙丁成故物。老兄望爾一飛鸞。

舍弟南還應恩科省試

無計新滕署下農。又來海上五春冬。生兒料可雙宗武。愛弟惟親一士龍。六幕
詔開王母宴。干城歡拜紫泥封。秋風鷓鴣扶雲起。看汝飛騰羽翮濃。

次韻答弟

漢朝司馬絕峩然。門有相如太史遷。却怪吾宗人物少。看人麈尾似神仙。
平生艷說洛城春。一屋東西住兩人。淇竹衛蘭從古貴。而今都作棧河薪。
進少鷹鷂搏擊姿。退無威鳳表鷓儀。庾公北伐渾無用。枉拜神君白石祠。

呂公唐舉故無論。漢志叢殘無一存。那用并州求老婢。也知越石勝桓溫。
故紙鑽研道可腴。便甘山澤不爲癯。傳呼揚馬驅潘陸。抵得蘭臺竹使符。
眼看戈戟不能持。露布如風未解騎。祇願生兒親紙筆。稍勝元亮五男兒。
身是周王蟣蝨臣。不隨造父不銘勳。只因不識西王母。錯喚桃花是絳雲。
白衣四十不爲郎。孤負羅敷寶髻長。若是身爲猿臂李。不令漢武說高皇。

詠史

死蒙感謚朽無名。咄叱庸奴醉夢身。敢擬涼州作袁紹。妄斬元子召星人。冰霜
不過春三月。冀壤安知帝化闔。鬼瞰高明天奪魄。習生青簡不須陳。

顯忠祠書壁

木底南蘇遠更疑。近思崇德駐兵時。一城碧血沙蟲魄。二帥彤弓虎豹旗。廢壘
尙餘崇正礮。哀丘惟闕顯忠碑。當年全力防遼瀕。追惜黃金塞漏卮。

題畫

揚州城下柳如烟。細水鱗鱗滑膩牋。填得新詞無唱處。教人恨煞柳屯田。
醉認西方漚鉢羅。珊瑚枝上玉交柯。可知璧月團欒夜。便有宮人得寶歌。
海上羈孤不解愁。三時風月似深秋。如何馬上看秋色。偏是征人未白頭。
一樣梅花冒雪開。此山偏得早春回。祇今大宙無南北。不望江南驛使來。

題龔芝麓尙書詩集贈龔文卿太守次題畫韻

宗伯文章絢紫烟。當時寫滿益州牋。百年公姓朱輪起。未羨南山二頃田。
開國才人盛網羅。珊瑚翡翠發新柯。苦將徐庾平生意。度入新聲宛轉歌。
海水連天不洗愁。濯將詩筆寫高秋。王楊盧駱齊名姓。端賴龍門在上頭。
大暑如湯散帙開。微吟便得送涼回。知君四始爲家法。苦望因風健句來。

答文卿次前韻

裁看荒島聚人烟。便有吟情擘短牋。至竟江南好風景。船頭蓮葉碧田田。
玉府仙人被絳羅。酒終爛却幾樵柯。人間不見東方朔。愁絕梁鴻五噫歌。

不遣高雲爲盪愁。空山華髮注春秋。幾人闕下通黃老。驛路黃金絡馬頭。
鷓鴣秋高眼倦開。霜情風意日千回。書生說古無人信。却有空穹射虎來。

奉和座主通政使瑞安黃公六十生日次韻

丁甲秦鞭起蟄雷。要令神馬壓羣駘。彌天浩浩江河勢。慕古荒荒管葛才。僵臥
豈無王室念。廢書徒爲昔人哀。長吟獨笑都無謂。一地春風自往來。

恭聞壯日馭征騑。異部同躔願不違。龍節朱幢迎日麗。驟車白服帶霜歸。棠花
入詠題嘉樹。斗柄藏溫寶古衣。几杖自然有家法。不聞忠孝近危機。

秘郎顯職近中垣。衣有宮雲澌澌痕。給傳行爲臺大使。鋪墀跪進禹昌言。邊獠
異俗繙新詠。魯士峩冠獻上樽。自古中年有哀樂。苦吟并欲愴心魂。

初政如春帝盛明。絲言萬里挾風行。諸公私議陳三表。一筭行看下百城。喜極
鑾輿停輦受。猶聞便殿伏蒲爭。史家別有孫通傳。不廢當時魯二生。

雍部衣冠拜季長。西都經術重平當。繡衣行郡銜中詔。弩矢前驅引上襄。吳會

山川春爛漫江東人物古微茫停車一蕩輕揚俗多少葵心向太陽

天閭不隔九重雲恭默原非帝倦勤徧聽樂人歌聖德未須霜簡奏風聞春秋一卷行何用蘭艾千叢望不分屈賈從來非俊物徒令萬口說高文

警叟廉貞挺歲寒忠清義激不爲漫中丞舊是西臺主謁者今同置外官肯就桓溫商出處豈聞鬪釋有悲歡平生諫草無人見留與丹青異代看

羣牧岐陽劍佩磨憂天一老獨滂沱思收的博雲間戍欲挽昆侖塞上河未肯低心法莊老不無健句壓陰何回思召對承明殿親奉溫顏語最多

史例紛綸襲伐侵神州變局到如今事同睨酒依然渴病隔垣方不可鍼齊婿仰冠惟獨笑左徒聳劍只哀吟誰知杖履東軒下未敢瞻天一寸心

扞城道誼故巍然弟子南行述大賢儘有經師裂三傳終無魔法謗諸天使君畫象經臺上門義生碑芟舍前翻怪子瞻少真氣去官祇是欲逃禪

但知出處與天宜遑計椿萱甲子期酒藏自編人物表國工不語死生棋一門

子姪騰驥早十卷封章箸錄遲縱是狂名驚九牧武皇不道處沖癡
賤子登門耳目新從游往往十淹旬親看草疏風生閣私慕論兵氣逼人餘事
文章足沾丐解官屋室太清貧徑途乍轉風雲異無數花叢換好春

雜詩

南蘇城外海如天東出丸都路幾千早有遼東賢太守龍城不入慕容燕
崇德年中有駐旌後來寂寞只空營曾聞閩縣王巡撫議設登遼海上兵
百尺危臺列戍旗左軍右衛各分司甘州老將聲名在親布鉤陳捋素髭
淮南部曲有英名意氣如山總絕倫趙國兩賢如不死王渾王濬爾何人
築壘營臺尅日成老軍皮骨將聞名當年孝達陳封事只曉山東有丐兵
將貴金多不恤勞疲人鎮月有逋逃伍符尺籍通兵部府主何曾問馬曹
別將朱旗備盛秋幾人有夢不封侯誰憐碧月清霜夜無數征人望女牛
視天畫地膽輪囷夜倚高樓太白明裁啖筵前一生彘便思上殿說橫行

萬金神礮出西夷。講館戎臺有礮師。定見聖工通穀率。志人一目中人眉。
龍驤上將駐樓船。萬鳥千花擁醉眠。可惜不繙唐樂伎。白公湖上住三年。
少年南海弄潮兒。轉眼高官得展眉。莫怪人思廉恥將。由來不值一羊皮。
袴褶元戎是急裝。古來枉笑武靈王。若教破賊如吹捧。司隸何難許鄧羌。
千工萬指擁飛雲。礪鐵銀鏤眼不分。自有龜茲新樂部。中流簫鼓夜深聞。
三年金鼓帥臨戎。鞞注彫弧滿下風。親爲健兒愛身手。不令鳴鏑射飛鴻。
行臺幕府置船官。楫署峩峩赤縣看。歲發金錢供作部。元來江海不波瀾。
武門下觀近高牙。激電驚霆走鐵花。秦始咸甯精甲仗。一時萬口怨張華。
武庫新成殺氣摧。荆拖夷箭費通才。馬隆不拜西平守。誰辨當途朽杖來。
一陳簿功萬人歡。冗吏污商戢戢看。今日白衣妄男子。明朝黃綬正員官。
銳頭豎子版軍司。謁拜府公如小兒。辨眼看人有青白。由來蒙馬是皋皮。
白玉山頭戰骨香。鑊錢祭鬼太淒涼。柳車馬革無消息。多少生妻已下堂。

髡宮道觀插天奇。涼館崇臺絕水湄。那有詩人題好句。一間破屋顯忠祠。
貴人厚祿有閑身。約醉徵歌日日新。祇道今生風雪少。道中無復凍僵人。
海濤瓦屋忽連雲。私店官籬望不分。今日匈奴猶未滅。令人痛哭衛將軍。
中駟笙簫立部歌。僂兒纖步掣風過。樓楣元有霓裳曲。不許凡師譜介科。
燕姬長髻玉釵橫。齊女琵琶大道聲。頽壁泥牀都草草。冬郎太息對飛卿。
陶侃當年督八州。榜蒲戲具擲江流。豬奴自有人間樂。枉苦生公呪石頭。
賽犢椎豚史有辭。高官大勝競瑰奇。從來此段蘇侯力。不讓鍾山蔣帝祠。
海艇家家插小旗。打魚最遠入高驪。惡風怪浪年年有。最穩江南牧犢兒。
十日黃沙五日風。花枝三月不曾紅。春蘭秋菊無人識。白髮飄蕭七十翁。
來見春風第六年。欲歸偏少買山錢。沃州太遠無心住。滿意南山二頃田。

上已

馬踏沙隄細碎聲。耳邊好鳥不時鳴。垂楊稍似江南樹。短草翻疑火後生。何處

將軍蘭渚禊。幾家思婦玉關情。六年上巳看春色。轉憶花間聽玉笙。

左海

山河險阻國東門。事過如雲一不存。黃馘腐儒考沿革。白頭老將辨營屯。世無郭璞圖經讚。客有羊公太息論。西望青齊成右臂。神州左海角亢尊。

傳聞

歸對南風晚覺涼。深春仍未脫裘裳。心中何限蕭寥意。水際初無荇藻香。越騎新軍環北極。丸都孔道出東方。傳聞下詔車同軌。夾路青松萬里長。

山寺

荒殿殘喬木。新僧是老兵。壁無初祖偈。碑有達官名。山海窗中攬。旌麾坐下平。偶行歡喜地。未欲學無生。

馬健父以玉蝶梅一本見贈

玉蝶梅樹尺半長。如李如桃如海棠。健翁贈我破春悶。翻令春色橫窗光。大花

如杯幾百朵。主何災變何禳祥。健翁告語太世法。心雖諾唯口倔彊。四十豈敢望騰趯。眼見後輩皆軒驥。亦如此花小軀幹。供人娛玩陳几旁。賀花得我爲高詠。勝我黯黹無文章。

書馬生文

郎君從我四年強。智慧如雲出輩行。年比桐城呼後學。人如扁鵲事長桑。別開犬壤爲邾莒。收拾牛韋犒馬揚。破體紛紜難指計。張吳華髮是靈光。

高采堂以濬縣子貢墓楷葉一枝見贈

濬縣祠堂古。先賢墓樹長。一柯雄衛土。片葉帶經香。高叟瞻宮宇。幽人贈馥芳。何年闕闕里。大地兩青蒼。

寄懷彥升二首

苦憶蓬萊共月明。冬同羹酒夏同冰。南蘇城外天連海。季札碑前雪滿陞。世上馬牛遇莊叟。山中鸞鶴辨孫登。美遊枉得江山助。四十歸田爾獨能。

文學徵斯日討論庭芝嘉樹長春根九三九五遜貞吉四十四年今抱孫牛門
螳鳴爲醒醉月歸日入有寒溫談天說海三千牘燒盡都無一字存

桂之華軒詩集 補遺

雜詩 甲戌分燈集

高天無纖雲。衆星粲可數。前溪有行人。時聞隔林語。清境感奇懷。美人在何許。振衣揚清謳。憔悴中情阻。引領入空帷。終宵起容與。

人生不衣食。千古無匪人。黃金變爲土。跣躄亦良民。哀哉名利客。機智多所營。造物本無罪。人自喪其真。君看雲中鴈。高飛何冥冥。

卽事 乙亥陔餘集

清溪放棹去。十里菰蒲香。高樹滴殘雨。水禽嬉晚涼。微雲秋漠漠。山影遠蒼蒼。爲問烟波客。詩情幾許長。

醉後口號 乙亥

人生不能飲。辜負好醽醑。飲酒不能醉。醒時空蹙蹙。狂語一豪驚。放歌八荒促。不見謫仙人。一醉三百六。大筆生光芒。長空當詩屋。

都轉方公以二知堂詩集見賜并索余近稿賦詩爲謝兼呈禮園司馬

乙亥

廣陵名勝地·水木絕清華·山勢圍城堞·江聲過白沙·平山幾楊柳·官閣有梅花·
合待文章伯·攜豪落采霞·

昔者王司李·登臨賦冶春·可憐臺上月·曾照古詩人·世事催華髮·孤懷滿白蘋·
茫茫大江水·愁思若爲陳·

詞賦悲今日·文章忽古風·湖山歸大老·領袖屬明公·岸幘從容候·排箋慘淡中·
好將對雪句·誇向杜陵翁·

著作平生富·槃槃太史才·閒情繫魚鳥·灑氣失風雷·客路關河迥·秋風天地哀·
蒼茫無限意·爭向筆端來·

峩峩吳季子·文學亦吾師·猥向先生側·長吟賤子詩·憐才同骨肉·含笑動須眉·
自愧無標格·空勞說項斯·

平生知己者。海內幾英雄。
今日逢青眼。中懷倍黯
儒冠空岌岌。竟日走風
坐愧先人語。兒郎小玉
書劍一無就。閒吟空白
清音願惠我。傾耳聽朱

邊詞六言聯句

漢月隨人千里。管樂

方濬頤 子箴

莫道山西出將箴。於今

才

壯士弓鳴霹靂。才將雷

桂之華軒詩集

信本碑能落雪。箴敦煌隸可避風。戈壁明駝載水。叔穹廬寒雁唳空。才
封侯不在年少。才狂叫有時拍張。李陵台上草白。曼明妃塚畔雲黃。箴
先子東歸日記。箴富於西域見聞。恨我未曾出塞。叔看人書劍從軍。才
十金買一壺酒。才百金買五尺刀。帳外雪花掌大。曼崖前冰筋鐵牢。箴
畏凍狼尾拭鼻。箴示猛貂尾飾冠。車中鬥葉子戲。叔問誰輸卻羅襪。才
目中已無醜虜。才頭上自影曼胡。龍泉如鏡照影。曼犀甲連環衛軀。箴
練兵不如練勇。箴出關何時入關。夜夜藁砧相見。叔蒲萄一醉開顏。才

消寒第二十一集用昌黎東都遇春韻聯句 乙亥

壯心老未已。逢場強欲競。叔平文字追古人。後先此輝映。子箴雄幹爭拓張。殊
態門明詭。曼君體製各有程。尤宜審聲病。才叔推陳乃出新。語險氣彌橫。叔要
憑方寸間。瑩然若圓鏡。箴璠璣絕纖瑕。疇敢肆譏評。曼譬之奏黃鐘。鏗鏘足鳴
盛才嗟余萬念寂。收視兼反聽。叔天花豔群稿。鞭日豁眩暝。箴久陰忽放霽。快

若酒初醒。曼造化誠多。才日汲未嘗罄。才履險當如夷。大道本平正。叔茫然人
迷途危哉。落深窞。箴鑄鑣安足恃。志士有本性。曼物交頻見。招心賞獨來。聘才
風噓百卉妍。冰泮萬鱗泳。叔可愛冬日暄。無滓碧空淨。箴陽和暢肢體。熊鳥各
伸經。曼獻笑不及排。情以自然。遊才人生類。搏沙暫離亦。旋併叔雲龍互追逐。
誰歟東野孟。箴疎狂且賭健。對酒欲中聖。曼時序裘葛更。歸思弓弩勁。才況聞
臙鼓催。斗杓轉新令。叔玉郎在何許。曰吾桑梓敬。謙齋往會館三日不至箴公謙
追建安。俳句薄長慶。曼奇氣不可遏。屢空仍受命。才刻燭詩俄成。興酣漏未竟。
叔

金州述別聯句

甲申

西風吹送幕庭寒。曼君萬里驚秋客。袂單遼海無因悲。遠戍季直燕雲有夢促。
征鞍清笳一迸州門淚。邱屨平心坦苦酒難平壯士肝。出塞王師近乘勝。曼一時
諸將自登壇。季

平津賓客幾人存。季往事低徊。僕射恩。豈謂生平託簪履。平更煩涕泗。到荃蓀。
淒涼丹旆橫秋色。曼零落青袍。惜故痕。杖策何如歸隱好。季迪維皇甫各山村。

贈金州同知陳鶴洲士芸聯句

平生回首信陵門。曼君于我渠渠夏屋存。刀壁似聞求故器。季直風雲徒悔信。
招魂金州司馬賢無對。曼盛府賓僚事莫論。天壤皋牢成棄物。季炊梁藟非意
何溫曼

駢文
桂之華軒

張謇書端

桂之華軒文稿序

予未見曼君先見曼君之文曼君之文因禮園而達於予猶記去年春禮園過寶米齋曰寶儉爲先生得一佳弟子因出曼君上予書予受而讀之高古奇逸離塵絕俗近今人士得未曾有禮園曰曼君以文爲贄願列門牆先生其許之乎予欣然曰盍招之來未幾曼君來師予有所作必乞予訂正之予曰子之文不患無才患無氣不患無格患無骨氣輔乎理骨根乎情過鍊傷氣則理未足過琢害骨則情未真去其幽隱怪僻以返乎博大昌明化其巖積堆垛以入乎汪洋恣肆子今者甫逾弱冠心匠既巧腹笥又便由此進而愈上烏能限其所至哉予若子之年媿弗及子思之思之宛然在目今老矣來日苦短不得不勇於自課以補蹉跎而實則祇形其拙耳願子學予之拙勿學予之勇也曼君曰然則弟子舍駢體專攻散體可乎曰是又不然文無定體以達爲宗六朝唐宋豈能偏重方矩圓規殊途同軌果兼衆長斯爲作者子其勉之用弁簡端以爲

息壤

光緒元年歲次乙亥定遠方濬頤子箴序

桂之華軒文集目錄

卷一

泰伯廟碑

勅建倉聖廟碑文

翰林院檢討陳君墓表

候選縣丞邱君繼妻朱孺人葬誌

女嬰塋銘

爲廬江公與黃詹事書

程君家傳

東援紀功之碑

卷二

焦尾閣遺稿敘

先祖母事述

趙惠人海左金石錄敘

饒州詩徵敘

七返

周彥昇朝鮮紀事詩敘

周君題畫詩敘

觀畫蘭記

謝朝鮮國王賜藥物牋

謝朝鮮國王賜物牋

葛君墓誌銘

爲廬江公與朝鮮國王遺牋

卷三

爲淮軍僚佐祭廬江公文

祭廬江公文

哀廬江公文

平山圖銘

南菁書院記

泰興縣慶雲寺照潭和尚身塔銘

恭送座主少司馬黃公述職入都敍

馬貞烈女之銘

積蹟廬記

朱氏宗譜敍

南阡志銘

清故署荆門州知州知府用湖北候

補同知吳君志

清贈朝議大夫李君誌銘

爲張提軍上朝鮮國王牋

卷四

顯忠祠碑

與顧舍人書

新阡志銘

與黃侍講書

周仲璞哀辭

義丐傳

邱履平墓誌銘

祭邱瓊章先生文

卷五

李君墓前石碑

關天君行闕之碑

卷六

柳西草堂記

陳百生遺集敘

曹君墓誌銘

朝鮮平壤城箕子廟碑

張夫人家傳

王母節孝之碑

告墓文

武昌張先生講堂屏風上壽詩敘

通政使瑞安黃公予告歸第詩敘

卷七

朝鮮王城同人醴壽林怡庵四十敘

前四川按察使定遠方先生七十敘

王丈菊人七十敘

爲易布政壽座主前湖南巡撫劉公

韞齋八十敘

通州張季直之父潤之處士七十敘

爲宋少保壽合肥國相七十敘

周彥昇之母黃太孺人七十敘

劉一山之祖母八十敘

馬太夫人七十敘

卷八

孝子費君碑

白華書塾記

名宦張君祠堂碑

清故廣東水師提督廬江吳武壯公

墓誌銘

答孫東父書

感逝銘

謝龔太守惠物啓

書溫州老婦

蝨隱園賦

復顧耀州書

造石佛像銘

卷九

答顧未杭書

謝范无錯啓

登州魯仲連祠堂碑

四裔朝獻長編敘

弔古駱文

桂之華軒賦

節孝特徵錄敘

卷十(補遺)

方氏夢園書畫錄敘

與張季直昆季致袁慰亭函

桂之華軒文集卷一

泰興 朱銘盤 曼君

泰伯廟碑

述夫盤精西燭。屏燧木於桑根。觴委東徂。棄昆侖於荒表。登高邱而望遠海。豎亥不能闕大矩之閔。握地柱而執天衡。共工不能階撐犁之峻。聖人有以鎮天下之動。裸壤齊於山龍。聖人有以折天下之機。墮屣鈞於旒纒。太羹元酒。詢萬舌而知甘。大布麤絺。覆千肌而識美。自昔中衢浩詠。伊皇迴凝馭之尊。北面諏經。姚后降齊衡之貴。狼星返鉞。更悔讓於桐流。犢跡成墟。終潛姿於箕壤。其襄發揮之代。元黃搏戰之辰。崇名迫於清陽。閭氣遁於素曜。靡不騰神處寂。斷丹墨之留蹤。羽響疑空。絕笙簧之采律。未有知常而知變。見始而見終。承天之心。繼人之志。浩乎江河之博。不足以爲大。巍乎泰華之雄。不足以爲高。如吳泰伯者也。自禕翟升衲於大野。遂蒙冰翼之徵。農師歸娶於廣都。仍致冬膏之瑞。指

轅殊俗。淪輝於水弱之朝。倣迹軍軍。振武於荒居之域。上穹於焉。頽矚下土。由斯環望。山符瀆契。回光景於天都。羲矩農規。宿精靈於累牒。梁山羣軌。扶耆童而構新巢。岐郭三霜。撫徽軫而張高韻。帝王之道備矣。天人之事在矣。由是測皇根於遠緒。玉粹金昭。攬王氣於中台。鳳翔雲躍。司空受節。甯參瘞壁之心。西落開曩。暨鬱俘王之略。遂以五色比象。三辰旂旗。聲厲旂纓。火龍黼黻。三十之數。方歸八百之基。攸屬于時。珠庭當蹙。宮中虛鷓。鳥之祥。馭運其衰。河北痛射囊之主。月靈金氣。乘海水而橫流。毫閥殷功。逐風埃而掃地。微太王之聖。不能通帝命於方咨。微太伯之賢。曷以謝坤珍於垂握。江淮千里。分滄露於中壘。藍華雙蹤。改重昏於南裔。龍魚殷麟之囿。銅金苗茁之區。鞅牟嗜劍之鄉。卑溼天男之士。絕包虛貢。皇鑪遺塊於將灰。枕江帶湖。帝橐灑涓於瀕涸。裸人拱揖。杳疑漏耳之遊。木豕紛拏。暨類重瞳之宅。神符挺籥。德翕甄陶。營規於駐杖之間。造圯於褰裳之下。廓牢籠於籩俎。八表元功。控嶮要於波瀾。一匡大國。道暎地

脊詎聞鐘鼓之兵。路迴炎維。不覩龍蛇之戰。夫其神聰隱慮。承懷於撫器之年。馴德流光。通節於號弓之歲。洞庭右閉。成九命於戎師。斗宿旁潛。歸三分於蒼帝。道高洗耳。誼均墜黼。遂使曹君介弟。攀戶牖而升堂。州來雲孫。望邱山而踵路。孔子曰。泰伯其可謂至德也已矣。三以天下讓。民無德而稱焉。抑又聞之。出金奏而陳廣野。則鱗馬趨聲。抱元珠而叩重淵。則龜龍赴照。庚桑畏壘。終致稔禾。柱史厲鄉。還成雲物。阜游命駢。姚庭論馴獸之庸。逐電銷兵。穆滿上控驪之績。單車南邁。種霸略於荆湘。被髮東行。輸王風於濊貊。飛龍在天。大人造也。尺蠖之屈。以求伸也。有田一成。有衆一旅。足以修復政。光舊物矣。二年成邑。三年成都。足以稽皇圖。披帝文矣。况乎柄陶染之權。撫尺寸之士。農疇當坼。勺波敵江海之恩。急景逢寒。衣縵埒純狐之用。公輪削墨。準瘻腫於方衡。歐冶冶銅。一槎枒於清鏡。河洛天府。關隴神皋。潁汝中原。膠菑雄國。永江廣漢。界火域之襟裳。上黨飛狐。露坤輿之肩背。語其冠帶。則山東出相。山西出將。龍變而雲蒸。論

其風俗則大蒙之人崆峒之人濟鸞而淮橘至於味風玩藻清源芳塵鴻生振衣鉅儒振翼臨筮對管鄒魯之效唾仍新寢典饋墳淹稷之翱翔末遠芳瑛駢組推荆璞於殊瓊繡貝連絲尊和珠於最采非聖人之教其孰能與於斯乎國家道合中天運隆下武通乾象之精執坤靈之寶聖祖以仁聲武誼開明堂而朝諸侯高宗以景烈洪輝經兩儀而緯四象五年巡守滂甘雨於南天七校軒騰駐非烟於江介寶書累閣惠馥分腴盛典連營斟規酌雉皇帝欽承累洽虔奉重熙皇綱攸在帝紘斯振臨軒案謀地經一臂之所通憑几舒函禹甸九陽之所界接手貫皮之國尺咫爲鄰犬種羊性之民烟火彌望景天測地張華色奪而藏圖擊電追風騶衍詞窮而卷舌血渾當幣巨蒐有內面之名帶續矜華朔傲有輸忱之象將使陪臣詣闕乞聖漢之藏書貉道歸誠化鄒人之忠敬夏后清臺之上括地增條軒轅扈閣之間中經拓野文犀菌鶴俱爲外府之珍俞鹿歐蟬悉比中州之產豈直三江潮汐盡匝吳臺千宅絃詩共聞周禮烟塵旣

靜潤色方滋。此州境屬維揚。星分斗次。今爲劇郡。昔號句吳。往哲邈焉。神靈斯在。升階七尺。儼受社於侯封。複閣重軒。易宏規於草創。冕裳樸陋。如親采藥之蹤。棖桷丹青。似覩文身之俗。奉中尊於椒桂。垂綬雲敷。申上席於蘋蘩。圓冠雨集。自魯人展惠寶。遺壘於生王。蜀漢通侯。屹崇祠於私奠。未有如斯之萬一者也。使河如帶。長勒名於魯殿之前。微禹其魚。合空首於尼楹之下。敢爲銘曰。

平壤言邁。蒼梧不還。龍虎八字。風雲九寰。紐搖地海。石墜天痕。稱鱗躍水。言羽

鳴山。其一古公劍霸。伯子繩武。稷苗載興。姬曜當午。回眷旁條。紆神季主。潛翼岐

孫。懸規商土。其二無聲窺隱。何形通意。機均往駑。行虛載縞。朱霞方軒。照電喻轡。

伯倡仲同。弟歌昆吹。其三倉皇綦帶。顛倒衣裳。陵都跨國。犯露蒙霜。裔江是宅。近

淮爲壘。殊方纂組。異俗聲香。其四卜世三十。卜年六百。闔閭相員。版圖以闢。夫差

臣。話梧宮不夕。嘉彼延陵。刊名麀冊。其五邈矣教迹。大哉神化。似火忘冬。如陽失

夜。道絕諸蠻。聲高中夏。烈貳隨山。功雙誨稼。其六聖文洋溢。皇路夷平。戶競藏玉。

家爭濯纓。撫根感植。飲源知清。遂光神宇。式績丹楹。七其千族同書。萬封一軌。假宮何年。下佗誰士。革陋稽籌。勒勳停史。望昔仿皇。翹心仰止。八其

勅建倉聖廟碑文

敘曰。營都作鎮。嘔夷入桑。乾北流迴。旆弋弧樞。宿共黃星。下燭窺天。察地聖人之肩戶也。則奢龍東方。大封西方。處陽制陰。帝者之雷霜也。則皇直斬寇。應龍翼雨。建國邑。正方位。治神明。膺不若。非策力不能訂。少典之圖。昭文章。明貴賤。辨等列。習威儀。非文字不能勵。自然之運。然後皇王后辟。競嘯動於方句。初哉首基。乃孳胎於庶品。隣盼丹齡之氣。傾陶橐而靡藏。墳紘媪母之靈。闢華離而盡洩。窮坤輿二億三萬許里。累簡則泰華非崇。自開天七千八十餘年。積楮則隸首難竟。案倉聖名。頡軒轅皇帝之左史也。自弩羊啓后。三台之配。風從雲鳥。翔軍二壘之倏霧。沸祇車倅轂。彷彿皇於河水之濱。旃冕企旒。荒忽於哀霖之下。由是承圖探祕。秉翰留姿。百官以治。萬民以察。牒觚簡畢。聲高史甲之盤。律弗

籀牌光斂雍鴻之策。加以長君肇迹。仲氏駢蹤。造迦羅而制鸞。瞿號虱吒而名邪寐。月氏南邁。荒荒恆水之鄉。忉利平臨。簡簡屠頭之國。豈直六篇地典。但列內經。二卷陰陽。惟存班志。春膠冬幹。推勁質於揮弓。濟麥鄗禾。資相春於雍杵。八十問難。十二考音。貨狄舟船。胡曹冠冕。光搖殿陛。余裳則扉之旁。響駐淵雲。倫磬岐簫之際。徒揚芳於一藝。祇飛名於寸能而已哉。赤文遞乳。綠字相繩。飛潛無可遁之形。俛仰無難昭之理。上盱高狀。孕旁帝而爲端。下督氏形。指山尻而朗說。闕陽精於充腹。日文懸輪廓之規。瞻闕影於辭絃。月體脩太陰之魄。工聲觸聽。遂呼蜀徼之流。可響疑真。用號岷崙之瀆。旆旌戢武。開保大於荆王。毛采羞神。足驚魂於鄭伯。葦莉萱葛。互律而雙鏞。畫畫者耆。貫璠而共藻。令爲發號。亦署縣君。長屬鬱毘。並言正伯。布帛菽粟。戶藏而欲味。溫甘風雨露雷。日覩而難名。燥潤是以平鄉。神筆規蟲迹以彫文。素臣纂言。準蝌形而削竹。巍巍乎蕩蕩乎。民無德而稱焉者矣。千畝輟耕之代。翔十五之殊文。六王銜璧之年。騰

七章之偉著。高窺熊載。墜聞菟蜀郡之家。平揖轅邱。遁義出黃門之篋。河平大匠。振音於元。尙新編茂陵司空。揚藻於西州。故訓一百二章之續。扶風之蹟。屬焉。十三萬餘之繁。汝南之觴。斯委魯經蒼傳。驗刀漆於垂零。美鼎桓銅。辨蛟鼉於方折。桑邱科斗。毫都仙人。金天鸞鳳之姿。丹陵神龜之迹。縝紛鐘鼎。製傳虎鼻之皇。沸卉鳥魚。源啓烏銜之歲。六雄龍戰。彰麗狀於芝英。櫛水虬潛。燦瑰姿於倒薤。泗濱通藝。門人灑翰於麒麟。熒惑藏炎。司馬濡豪於轉宿。抽枚勞計。填爰萁隸之名。罄竹窮揮。蛇鶴蟲蛟之體。採山得璞。而瑾璫瓊瑛等理。而同鯁酌水資烹。而酸苦辛甘異名。而殊味西酋戊亥。螽斯不能校生齒之繁。南朔東西。伶律不能一脣喉之響。在昔姒年。織席義世。裁冠鹽祖。夙沙筮原。農后僉云。肇造並合。升禋豈夫神州文物。蕩海移岳之功。邃古聲香。經乾緯坤之力。鴻生茂德。陳籩豆而無堂。鼓篋摳衣。望宮牆而何路。光緒某年某月日。有詔令直省州縣。得建倉聖之廟。炎圖非遠。我皇凝指掌之聰。智人有靈。來者叶同文之矩。崇

輝億丈。徂中羨而邁從更。洪響四維。周蹠通而回報德。非夫治隆金運。天垂山
地之徵。道協雲官。史倦招搖之紀。曷以契往聖訓。萬禩者乎。宗聖侯之奉廟。魏
黃初之元年。柱下史之刊碑。隋開皇之六載。修堂豐宇。集彷彿於禎祥。就位來
庭。駐揆瞻於遊蹈。諷籀書於九千字。學僮之律方嚴。攬封禪於七十家。金石之
題有在。自中原猘猱。赤縣虺蛇。三古委填於橫流。六籍沉淪於茂草。河汾絳帳
不傳。侯岡之篇。蒙嶧青衿。罕識禾人之字。皇帝眷緇帷之闕寂。閔黔首之膏愚。
四篇啓照於學官。八體逮波於寓縣。儒人奉律。蒼姬保氏之司。博士填門。東漢
石經之刻。抗龍牛翬。開編詳異。畫之繁。褫池草監。運舌得求聲之誤。暑芻暴而
振博。僻文甯駭於亢倉。詢六峯以能呼。攬昔何疎於管子。田疇一畝。車涂一軌。
律令一灑。衣冠一制。秦權羸碑之體。讀之而可通。經幢貝丘之文。載之而可信。
若夫劉歆學奇於揚子。鋪藻采於周官。臨淄縑古於胡公。寤權輿於隸祖。不玩
其所習。而蔽所希聞。可以有通人矣。王次仲之所述。不云大翻之山。王子敬之

所長不稱大鳥之足。同歸而殊塗。一致而百慮。可以暢皇風矣。功蓋大象。德播無垠。舟車所至。人力所通。豈使礪石虛銘。濡丹輟篆。况乎瑤琨篠簜。禹貢揚州之區。海鹽章銅。西漢淮南之國。建平元始之際。藝文沸渭。而雲興膠葛。海岱之間。儒林駢闐。而踵出。徒恨岐陽晚石。靈修眷之。而听然。衡山今碑。明神顧之。而不頷。晉內史補仲華之典。臣不敢知。沈初明表通天之臺。下情震蕩者也。銘曰。壽邱毓帝。姬水開疆。似春中夾。如旭暎桑。黃丙浩浩。青戊茫茫。五辟六廓。北野南鄉。龍顏侈侈。四目靈光。媯蹤雷誦。貳輅雞湘。神圖受瀆。睿德歸倉。左史執簡。中宿曜茫。七緯遐祖。六書允荒。匪炎靈歎。異夏龍藏。天垂寶籙。代啓珠囊。齒脣喉舌。赤白青黃。萬派同軌。八紘一匡。仰維土撮。載溯河觴。葩間據翰。鐘際凝裳。紆神躔次。眈目穹蒼。崑崙赤岸。烏谷青羌。有文在手。自鳴於吭。皇娥少皞。昌僕高陽。戴肩帝鬢。履翼陶唐。滋涼茂德。高密蔥祥。輟而不舉。後嗣何望。自古在昔。周發殷湯。降及嬴后。亦越炎皇。史籀爰歷。博學凡將。南閣祭酒。黃門侍郎。灌輸

億頃委逮千霜八體璀璨五變低昂我皇神聖至教無方紆情涿野合契文昌
倫榮鐘磬女媧笙簧棲靈築館薦馥升薌金革絲木珪琮瓊璜顏生蜀國曾子
華陽他他栗栗峨峨鏗鏗依稀陽武方弗利鄉大鴻拱揖左徹徬徨鼎文題柱
鳥迹書堂如聞壁韻終挹波芳億齡萬代何毀何傷

翰林院檢討陳君墓表

觀夫浚城僻土處子發其遠聲曲陵曰阿大人揚夫靈氣若其揚綏邦家之彥
命阻立年應瑒駿異之材位終庶子若我檢討陳君固滋可悼痛者歟君諱寶
字百生江南東臺人也譬夫貌矣涇縣割自堂陽子焉東門並彼海曲蓋軒軺
之所罕戾纓綬之所希聞曾祖萬鳳祖作賓國子生父智開廩膳生實有懿美
見推邦壤並抱寶懷珍棲巖遁谷君幼負荷薪之戚長服教績之訓既爲諸生
益有大志會粵寇熾煽江淮塗炭泰州徐君曉峯以兵備拜督辦下河團防之
命卑溼之國利用舟師子弟之兵稍同邱甲由是內保疆圉外策江海庸君之

謀蓋以濟事。敘功補贛榆縣儒學訓導。旣而欽差大臣副都御史項城袁公漕運總督盱眙吳公安徽巡撫徐溝喬公先後延召。禮命在門。或寄君轉輸。或資君申討。事重度支。理艱祭酒。鬪穀於釋之室。不曰私財。公叔禹人之鄰。匪無節士。足以振厲感慨。昭曜平生者焉。君中同治丁卯科舉人。明年入都。于時翰林侍講袁君保恆奉詔佐今大學士合肥李公擊撚逆任柱等於山東。君從軍關右。參謀下辨。駕我騏驎。與子同禪。薦孺子之論將王孫滿之料兵。旣重習簿之談。遽入黃祖之腹。故得斷其股臂。殲厥渠醜。昔者曹騾騎之幕下。實倚孔璋。竇都尉之軍中。端資班掾。方之今日。彼獨何人。事平累功。以知州分發湖北。賞戴花翎。明年中同治辛未科貢士。改庶吉士。十三年授翰林院檢討。稽古之儔。詔校祕書乙科之生。得補文學。遂乃發百家之籍。究萬變之務。濟代之略。昭于列眉。括地之形。陳于掌上。以光緒元年八月丁母憂歸家。服闋入都。尋以四年八月十七日卒於京師館舍。年四十有二。以五年十二月二十一日葬於某所。三

世皆以君官贈奉政大夫妣贈宜人君娶王氏繼妻許氏女三人君撰百生文詩集若干卷遜茲枚叔闕下有上書之兒異彼馬談河洛有能文之息天情開朗風神夷遠身長方朔眉秀季良有公孫之好儒有周仁之不泄料情度勢則魑魅鑑中慮敵制勝則羌戎席上篤嗜言易兼治春秋爾雅故訓說文小學並討議未終篇帙淪蕩曾不假之壽命俾竟尺寸直以次房入洛有去無還元伯黃泉千齡萬代皋門直對誰言太史之墳萬歲亭南有此故人之筆謹表

候選縣丞邱君繼妻朱孺人葬誌

孺人姓朱氏海州邱心坦履平繼妻也始履平亡其初妻無子有女才數歲家貧田屋薄陋母孺人春秋高履平既好讀書歌詩及擊劍用兵之術甚篤一爲軍部曲將不得意棄歸愈益銳力歌詩海州邊海僻邑士大夫率不好文學又多鹺商大賈上夸奢爭益輕笑履平無肯與女老儒朱翁九岩家貧有女獨視高履平以謂終當用詩名天下履平故高尚氣節其爲詩湛厲雄壯往者湘鄉

曾文正公嘗稱以爲忠勇過人而德清戴望子高及今武昌廉卿張先生皆嘉嘆以謂奇絕者也。朱翁因遂以女與履平。孺人之歸履平年十九歲矣。履平乃益挾其詩遊東南名山川所至忘歸。其客金陵也。朱翁使女跨驢已徒步間關千里抵履平所。至則余方從履平飲。履平呼婦前拜余。余望見孺人固頤然福厚人也。履平曰是故儒家女。顧頗善擊劍。然從吾苦矣。旣履平移客山陽。日鬱鬱不得志。年且四十未有子。余從軍江浦。又從軍山東。或踰時不相見。某年月聞履平生子甚喜。一日得履平抵書報婦死矣。書淒惻甚悲。且乞爲文志其葬。余故嘉履平有俠士之行。顧私惜其剛烈卞急。慮無以致門戶之和。又動好以大義責婦人。女子迂闊閎辯。若鑿圓而內方。持寒冰而詰燥炭者。而今乃如此。嗚呼。豈非其命也歟。悲夫。孺人之歿。以光緒七年四月三十日。年二十有三。以某月日葬於大伊山之麓。子一人。福銓。女一人。前妻生也。

女嬰甄銘

器泰與朱銘盤曼君第二女也。銘盤客登州。一日晨起方沐。僕者持家書來發視。知器死。初視書荒忽。若不知所以置懷者。久之乃涕下。器以光緒六年五月二十八日生。而以明年六月十二日死。死又以剛瘞證。病不及一日。可謂遽矣。貧家無媪婢。婦人日躬炊爨浣濯之事。亟則臥小兒風中。兒啼求乳不得。益號急。外風薄內風觸。乳滯遂以發病。婦人女子倉卒不察。或遂取竈土丹砂黃金之屬。凌雜鎮治。書來謂疣墳于腹以死。固其當也。一歲女誠不足爲深慟。顧爲人父迫家貧不能拊畜。以至于殤。亦可悲已。銘曰：

汝何欣爲我女。二歲殤亦云苦。藏我銘告來者。

爲廬江公與黃詹事書

疇昔之日。盛聞直聲。執事鷹揚於上京。下走蒲伏於人海。承接寡路。但有詹印。頃者沂水道次。祇謁軒蓋。聆善論而如俶。殫勝懷而若歸。想道慕義。良足娛說者也。自別以來。鋒車北首。旣軫世路。益念賢者。攬彼數子。亦云佼佼。矧况執事。

亮哉偉人夫燭霄之珍不靳曜於一武覆厦之植甯闕陰於寸牖今茲官守吏氏所職故亦足以昌儒術暢皇風矣長慶不才蒙被詔命昨自歷下抵乎登州規巡審都已畢役自維謙薄罔裨毫毛又不獲與執事抗論世艱經度便要恐昧詩人羔羊之義靡遁伐輻素食之矧徒擁明友度遼之號終遠楊僕橫海之勩豈不爲當世笑哉朔氣日厲霜風戒寒伏承與時禔福不宣

程君家傳

君諱澍初名光洛字宇灑號澗西江南廬江人也廬江屬隸廬州廬州山澤曠偉控引四疆道通七行省之地號爲雄大劇郡自古利用兵民氣樸忠材武人不相推下獨廬江風氣稍異懦多力耕作士夫之倫益循醕矣咸豐同治之間今相國李公旣用淮軍有大功廬江吳公亦帥其邑黨驍武之人從李公爲別將而程君外甥劉君雲生海樓實從吳公軍中籌策機務劉君簡易朴直貌而天者也嘗從容謂銘盤雲生不幸早孤從寡母畜舅氏得今壯大長育其子孫

惟吾舅恩德甚盛厚敢請爲文俾付其家以永吾舅之令名銘盤則敬應曰諾
劉君乃言曰吾舅無兄弟二十而父大川太學君卒太學君既治生業起家如
上農舅益發奮儉節躬孝養母孺人歲時戚鄰相過從疾病昏喪問視當去留
酒食厚薄餽遺豐殺必視母孺人指及購售屋室竹木粟米糶糴牛馬雞豕微
細一事一物毛髮之屬亦請命或里黨有緩急不舉陰施與無有少吝雲生又
嘗聞先母言舅少好食酒或深醉外王母輒大呵責舅舅俯頸承戴悚惕移時
輒喜笑如嬰兒也自先子之沒而吾母不能不就食於舅雲生與諸姊妹財數
歲耳母食而子哺兒櫛而女巾朝盥夕簪夏單襦而冬複禪既長既大皆爲姻
昏吾舅晨興宵憩一絲一粒必躬必飭積歲而累年吾母子安坐而享被之無
有幾微秋毫之艱勞於其心天下之至恩也君既有孝友之行又好施遺坐是
稍貧不給重遭值世亂流離轉徙愈用不自贍足益日縱飲酒無算遂發病以
咸豐九年六月終於家以某年月日厝於城南之發蔭庵又十二年而改葬於

喬家冲先墳之兆。娶某氏子孫若干人。大義之際。齊民勝於士夫。吾觀劉君述君行誼。未嘗不嘉與三歎。追念吾嚮者。孤子危苦之會。且浩然隕涕者矣。

東援紀功之碑


皇帝履至尊而制六合。開明堂而朝諸侯。啓洪爐以陶鑄域中。執敲朴以箠笞天下。故以春秋七十二國。非無魚爛之邦。西域三十六種。卽有操戈之旤。東漸於海。西被流沙。南踰丹徼。北拒元闕。靡不眷乃父子。若辟呬於几筵。肅爾君臣。儼冠裳於軒陛。服者懷德。貳者畏刑。德莫厚焉。刑莫威焉。惟我外臣。朝鮮國王李熙。故康穆王之嗣。而王族李昰應之出也。長河異瀆。就軌靈源。若木旁條。承華中幹。魯啓方之卽阼。僅越八齡。晉周子之承藩。未逾十四。是應義均叔父。分同負辰。太公雖貴。實在人臣。定陶私尊。猶然北面。始宏輔冲之體。終返共和之政。會司農絕饑。衛士阻饑。敢依中軍之名。輒就公徒之甲。伯勞利矢。幾徹王輅。樂盈凶徒。已乘君屋。又東倭虜使。並被虔劉。楚盜方甚於雲中。鄭師已入於宋。

郭是應亡不越境。反不討賊。太史執簡。厥罪斯在。趙盾之志。疇原霍光之形。稍著。是以齊史一舌。不亮扞擻之心。秦士同喉。咸據無將之典。兵部尙書右都御史直隸總督張公王畿。作牧甸服。視師稱兵之事。已聞。上變之書未至。陪臣魚允中。金允植等。方息徒馮翊。頓轡轅轅。召問端倪。因陳睿聽。昔者葵邱作誓。代無易樹之君。城濮觀兵。衛有復侯之辟。豈况舜咨肅宄。軒伐銷蚩。天威運而無方。神武征而不聽者乎。光緒八年七月某日。建威將軍廣東水師提督雲騎尉吳公等。奉帝威靈。承天聖武。率舟師以踰海。壁隩險以據兵。越自水濱。翔於城下。是應方授粲以迎使者。上謁以勞王人。門堵遽失於王親。武帳遂驚於漢詔。雍容就逮。拜跪授策。楚人滿道。不聞後車之呼。駒支成禽。寬彼朝位之責。遂乃乘機鼓勢。執訊獲醜。蒞非種以甯良植。斬害馬以伸駿步。交臂屈膝。威儀仰於華風。女業男疇。惠被膏於諸產。當此之會。倭酋散卒不逾千人。始震蕩於漢旌。卽遲回於梁野。奄奄窮寇。喋喋黎元。楚國歸王。朝懸於廣。駕衛侯命婦。夕致於

魚軒固曰臣勞實昭上德有詔晉公三等輕車都尉寮佐將吏增秩有差嘉其
伐也漢犁絕幕諸將皆侯晉入齊師三卿賜服發轅解甲曾不越乎二旬馳譽
宣威豈虛煩於一矢遂使孔門胡輦之士寢問首陽窮荒元菟之區有同漢郡
萬枯方達百廢庸興是固文淵不能專名楊僕無以獨貴者矣公名長慶字筱
軒江南廬江人也清規諧祐雅量符遵但發指於樊彭惟驅馳於靳傅若臂運
指論者歸焉幕府僚佐將吏等並江淮豪杰吳楚英靈西漢雲龍盛產豐沛東
吳驍桀咸出龍舒旣宏帷帳之謀良藉搏拊之力若夫文慚班固頌謝楊雲曷
用美寶憲之勳勒充國之績亦以侮非外至變起內訌謀人國家事艱於伐畔
處人骨肉體寓於存恩方之楚滅春申秦夷文信顯晦之情匪一逆順之勢乖
焉士卒等披練三千超乘三百與有勞苦名不勝詳其自吳公以下姓名並勒
碑陰俾此邦人永懷聖德於戲渾波霰霜之烈匪自帝心君臣父子之間攸關
國步森堂陴而嚴儀斷甯惟耀武於虎賁結舊好而納行人抑慮陰遭於蠱尾

勗哉藩服罔替斯言銘曰

遼東外徼陪都蔽衝上下故鄣箕檀往封李氏撫壤康穆蹇宗他子果負枝川
波從日柄方還義軍絕餉腹心圖僚蕭牆憂季公適昭宮稠規郊次吳卒及郢
狄人入衛趙穿構難盾則何辭南越內亂嘉實倡之危均見足阻鄰去旗帝命
虎臣士惟孔武翔軍灞上率彼淮浦鉤膺條革暢毅文茵上宮適館郊勞皇人
封車甚澤斯騎如鱗禮徵折俎位當下卿涉何宣詔北地抽兵懷露秦組几陳
漢纓援無靈輒鬪矢彌明夾戟登乘葱靈蔽容衢隱億日路翳萬瞳樓船道咫
檻車策窮回戈餘孽授元諸凶上將飛翻東鄰蒲伏退舍鷁行伏江介宿觸噤
藩羝鋌虛險鹿豷綬委虵重錦往復功懋懋賞德懋懋官介冑受詔挾纊辭寒
闕千刺裨功百誅蘭良體遠疴善國來祥羊牛雞犬麻絲稻粱鄭備他族楚嚴
猛狼國瘳噉衆外狡狙疆理炳在古義懲今王流江足銘燉煌可鐫太宗昔詔
豐碑三田皇帝今聖垂休萬年式彼荒服視此朝鮮



桂之華軒文集卷二

焦尾閣遺彙敘

敘曰焦尾閣遺彙一卷黃巖王君弢甫母太淑人之所著也夫其高行殊邈羨蹤於隗妻大孝在躬方規於詩婦載彼志傳無煩覲縷抑聞詩書之言女德尙已大都要其行誼不及文辭蓋非能之寡而傳之者寡也僕誠鄙人頗覽前事觀夫扶風女弟安定嘉媛並皆盛擅詞章代稱高秀豈夫誅德緣情之製所可比倫麗辭逸思之篇此焉萬一盛德之積則修辭彌工韓子不云乎仁義之人其言藹如也嘉樹百尺陰暍遂其蔽阡幽蘭懷貞芳馨絲是千里如斯之指可得觀焉王君旣重有何恃之悲加彼手澤之痛奉持道路儼若對越大夫君子輒得覽觀茂製鉅文紛到沓至抑余又歎夫自昔才秀之倫往古清亮之節藝文三十六類旣乏於傳書列女十有八人並罕於遺簡豈非穀慙家訓逞昧先文若王君馳驅塵鞅之下眷心杯棬之內永謝世典咸漏之義終葆先人清醕

之名後之讀者又可怒焉感愴云爾

先祖母事述

先祖母姓何氏恩貢生蒼厓公孫而附貢生廷蘭公女也年十九歸先祖舜琴公三年而先祖卒先祖諱南薰以高才生有名且大起方是時吾家幾甚貧不可復支先曾祖教授生徒里中里中稱其長者有子三人長先祖次先叔祖次先本生祖湘浦公湘浦公於昆弟最幼去先祖卒二十二年而始生先君因以爲舜琴公後先祖母撫之不知其非已出也而先母之曾祖于先祖母之祖爲同母昆弟姑爲姑姪爲婦焉始先曾祖既歲入日蹙不能贍衆口至以先叔祖爲其舅後迨先祖卒而先叔祖所後之家愈益貧大困夫婦塊然相守惻惻歸故家矣而先叔祖母殷性尤善佛數侵厲先祖母先祖母益下意承解之未嘗有諍言自先祖之卒家又益食口先祖母獨攜一女往往依母家母家不貧願必爲人縫紉刺繡得食性尤廉親戚或餽米布雜錢物必爲操作完其直堅謝

不少弛且纖悉必以奉舅姑無自私者女歸王氏則更往往依女一如依母家
不孝嘗見蒼厓公分財物子孫書署其尾曰孫女五人人百千長卽先祖母也
先祖母生富厚之門少習溫飽之業爲人婦一旦卒然遇不測之痛勞苦堅忍
拊成弱息竟以如此先君不諱先一日呼兒立床前執手而告之曰吾與若幸
讀書得一諸生皆先人之德不可忘嗚呼痛哉自湘浦公爲人鉤稽田穀得償
先父得補學官弟子教授歲得數十千錢先祖母乃不復依女家然猶以爲雖
篤老不可坐食浣紉雜作未嘗不助自爲婦至老與男子言雖卑幼未嘗出戶
外言未嘗色作食未嘗先飽自先曾祖先曾祖母與族鄰言必曰孝也一衣數
十年數年而敝一履一扇數暑終身未嘗有一裘其卒也未嘗有幾微疾病之
痛實以咸豐十一年六月十四日年八十矣去先祖之卒且五十九年是時不
孝且十歲今年逾三十名爲讀書冠帶之士起居動靜之際乃一端不可以告
吾先人歲時歸其家聞諸父母或談笑說先祖母平生孤子絜苦之狀浩然有

太息者當是時輒悚然愧感面赤立起自責如不可一日處乎人世者矣先祖母節孝之行得旌如例不孝敢以所聞於先父者涕泣敘次於篇幸當世君子能文章者表暴焉不孝孫銘盤謹述

趙惠人海左金石錄敘

朝鮮襟帶東裔代承大藩英儒俊人更昌迭熾固以秉訓往聖依光清時前史所載極微遐土嚮風慕義之傳無足方也夫官司之紀總轍於史書私論之行散條於金石當世則榮沒則已焉非夫斤斤遠古之士勤勤討昔之倫曷以總羣貝於指掌彙衆畸於數闔朝鮮兵曹判書趙君甯夏字惠人康穆太妃之兄子也世爲勳輔少秉嘉稱自其弱年奉使上國駐輪薊邑徘徊晉將之碑觀禮成均睇矚周宣之鼓由是慨然歸而纂錄始泰安之元祀終勝國之季年地不越疆數乃累百揆其懇博可爲難能者矣余旣不獲辭惠人之請因爲述其大凡亦欲使縫掖之彥抑志於鄰子雲鳥之言鄒魯之生愧心於荆人邱索之雅

云爾

饒州詩徵敘

觀夫豹論不朽。惟遠述於臧孫。尼慨無徵。恆眷懷於亳典。固以遊弋之地。君子弗忘。邱墓之區。昔人攸戀。故夫鄒魯喻說。動指於岱東。西京方言。輒舉於華岳。論橘實則蜀漢。美其鄉植。語剝棗則燕秦。珍其土宜。况於蹤軌。前修景徽。往烈者乎。饒州維揚剖域。楚國東偏。按其山川。則有九英鄱陽之壯。考其人物。則有番君仲公之賢。若此之類。都都而然。邑邑而有。靡足異矣。抑孟子有言曰。聞柳下惠之風。鄙夫寬薄夫敦。聞伯夷者。則頑夫廉懦夫有立志。他日又曰。予未得爲孔子徒也。予私淑諸人。此在賢聖德道。感發百世。固然焉。卽至風節小異之士。鄉黨自好之倫。單語隻詞。流逮身後。亦使耆耄述而太息。士夫論而嘻吁。豈况取精用宏。秉道核藝。誦廊廟之什。則魏邴訐謔。觀山水之篇。則陶謝駢服。雖其短長時異。工拙偶殊。或此鵠彼鳧。或君黃我赤。要其膏腴來者。沾丐後生人。

習所親家珍所秘則未嘗不異歸方朔奇歸蘇秦望古之彥良曰不然是用疚心於拘墟馳情於淵海也乾嘉而還詩道大替材智之士逞其私能冠帶之徒俱置一集於是上自都會下逮郡縣競搜往製務爲繁多此雖意等炫珍事均衣繡顧其撫柯思本觀瀾尋源亦有君子之心非徒文士之見且使仁人孝子之輩覩其高曾之言懷貞抱義之夫感其忠亮之語故曰智者見之謂之智仁者見之謂之仁豈不皦然可信乎哉浮梁侯君雅好詩書最耆纂輯嘗取饒州自唐以來之詩都爲十卷夫先王之貴詩蓋不惟其詞云爾僕嘗論之以爲比興之旨諷諭之用自唐以還寂若絕響如使世有復古之材陶冶性情屏絕華飾衢壤之詠亦勝武陵滄浪之歌足暗粲植稱是而言則夫閭里善良邦黨翹秀鮮功罕德求稱方來第欲託夫吟嘯晨夕之辭贈答几筵之作譬若以飛蓬之細競疾於高雲一舟之微孤行於巨海也豈不盪哉

七返

吳國男子頓車勸舟，儼然隻遊。處乎旃旆之下，志拂氣鬱，肌若腊炙，鼻闔蔽芬。胃實暮化，目懸霄雲。足闕廬舍，蓋塊然以病者。於是越客聞而造焉。曰：方今天清地明，晝晦衡平。灾厲逋亡，動植遂生。士農賈工，靡不順情。主人何爲而不甯乎？主人曰：僕誠憊，神志蕩忽，莫知所云。願有以起吾也。客曰：觀夫三吳之區，海江湖而大江，滋益利也。勢渾渾而若奔，厥祖自岷，腹荆胸楚，蓋爲千里者四五。而張怒乎海門，自裕道衍，霸雲興龍奮之主。累武并力，不歸於一人。今日乃有列艦布卒，魚魚鱗鱗，端委上下，數千其旌。將率之所述，御則躍機激火，繁聲迴軸，旆動疆移，甲露蛟伏。雖使唐蒙棄檣，楊僕司權，愕眙累日，且舌卷氣縮，斯亦制亂殛宄之倉扁也。主人能彊起觀之乎？主人曰：僕朝夕見之，未之欲也。

客曰：吳淞之潒，北喻之罟，析津西睨，諸虜東賊。搏桑之根，巨艦若陵，踰百其羣。蔽漣鄣波，動輪殷鱗。升烟嘯霧，天爲一雲。猛士織皮冠，虎自鉞意。度火不空驚，丸不左注。靜若孟置，動若靈怒。十之則千變，一之則駢步。頓之則山立，發之則

鱗赴萬膏億脂積晝累暮人嫻智巧士牢握據固將以係渠醜俘虜王盪二星之大恥振天策之威望主人其聞而樂之歟主人曰若此之論任奇尙口者類能斷斷道之非所望於客也

客曰僕聞周文一怒天下以栗秦皇案劍虎視六合以鄉所云江海威雄之師其恆迹也至如皇赫斯震命將南徂雲沸雨涌萬磨千旗父老子弟頓首崩角士忘其策農忘其耰車不得銜軫騎不得尾趨詔虜之檄聲罪致誅欲使曲頸犬豕承噓貔羆高爵豐祿之徒面墨而背汗仰日而闔睫獨寤而陰吁嗟峨之詞故亦足以壯大矣主人能起而讀之乎主人曰僕聞大廈之高非一木能持長河之流豈一手能障樊噲之勇不能抗乎季布惟晉有材不能拂乎魏絳厥語雖壯未欲覩也

客曰僕有客自南來者爲僕述兵事此可以告乎主人曰可哉客曰王師戾止建壘於邊命成發歛翔平虜前一鼓夷嶮塹再鼓收旌旃三鼓氣發騰越熊虎

奮勢遂以萬平虜元鄭伯肉袒許男啣璧吳子就於甬東衛侯歸於請室崩角稽顙齎乞恩澤跛行喙息天王所錫若此者豈未足以方媯帝邁殷高乎主人曰信如客言豈場之事未艾也

客曰不然僕聞上帝好生神武不殺故明辟守在於四裔聖皇不窮於宄猾高祖利虜資而見欺平城孝武啓宇而引弓爲羶絜今則一渠柔腦百城解昧如使楚趙爲之緩頰韓魏爲之乞哀強齊戴畎中山奉卮此數國者怵夷吾之輅韓懲寤生之債濟於是天子乃命酈生陸賈之儔馮軾而下之比于下執事於萬斯年貝齒不怠此自三古嬴劉以來所未有也主人其願聞乎主人曰突如之利君子所危重幣甘辭先王懼之卽有之僕未敢信焉

客曰竊觀主人丹赤之色浸於眉頤語則甚口中則隊乎若怫騰乎若怡僕更爲主人易萬一之說設夏撫之詞藉如陛下詔都護之守吏廢河東之官司連兵海表馭奴逐夷抗命之囑虎臣馘之得趙佗之士不足以大漢得肅慎之矢

不足以威周其君是惡其萌何難於是乃拔姦植忠剖符折珪爾桓爾躬恩大於興威體光於召戎足使曹衛感晉須句戴魯百傳不替萬季無斃豈非張傅之流結軾而願聞青病之將秉旄而樂觀者乎主人曰若此則幸甚然而犬羊之衆蹄齧之性未可遠恃者也

客曰僕聞尼甫有言長國家務財用則志士憤歎賢人椎膺故孝文郤千里而倉粟溢甯王返祇貢而天下以平陛下穆然廓炎世之往德慨然眷姬圖之永清遂乃起道德之士根柢熊旻枝討中古屏放非族極志騶魯布衣冠帛躬烈瘁苦於是乃欣焉發詔垂制命稷司疇俞夔典樂咨爰與令攷工勅文命驅不若起孔聖使糾姦拜季路專擊搏於是四海之內有田有桑耆老給於體腹嬰稚免於天殤窮逖極遠軍旅之事聖人不以諭天下臣吏不以陳帝皇虎豹伏藪蛟螭沉江風雨四序麻絲黍糧豕牛鷺鷥蕃孽豐良此雖伊姚之代靡得踰也主人曰聞客斯語雖復談天之侶述海之倫顧聞昔者枚叔有言要言眇道

渙乎樂聽。今僕不脊有采薪之憂。體貌勞憊。耳目荒冥。得子之論。若測淵而獲元。拂羶而窺青。雖然周游之聖。好辯之賢。繩踵嗣武。窮累世年。曾不能握分寸之柄。持毫毛之權。以若吾儕。智遜於仲舒。材絀於賈誼。口訥於東方。生顧欲悍。狀爲儒人之談。蒙賢者之刺。僕請與子棲心長林。沈市朝之間。端默澄慮。以觀夫九寰。於是客起而謝曰。僕謹奉君子之教。

周彥昇朝鮮紀事詩敘

皇年嬰暴。混兮慘黷之辰。帝歲逢咨。殺哉戰疑之運。自軒庖之聖。不能窮其誰何。三五之智。無以塞其坎竇。欲使十日並出。掩太陽之精。百僞朋興。翳真人之宇。於是時也。蔑道義。上智巧。強陵弱。衆暴寡。九垓八埏。重足一迹。樂成宣曲之輩。權高乎侯王。雕題窮髮之區。道迫於尺咫。豈不壯夫霰涕。志士雷歎。人思觸胸。戶願奮首。斯亦自古在昔。以來莫二之變故者矣。皇朝盛京之東。是曰朝鮮。世爲外臣。閱祀三百。光緒八年六月。既有王宮之變。皇帝震怒。命將徂征。設智

發機罪人就組。世所稱興宣大院君李是應者。也是應罪狀論報安置不遣。於是天子乃命相臣畫機宜設方略。卵翼下國。俾底丕平。厥德懋焉。於是周子在琳瑯之列。躬帷幄之事。比事爲賦。最得十篇。余嘗聞古人之爲歌詩。不爲其纂言紀事而已。要其有遠量高識。託諷諭之指。博論壯詞。出什伯之上。自夫營洛道替。河洲之篇興焉。薄伐威張。六月之詩。遂出。後有作者。未之毫髮易也。抑余又聞康穆卽世。嗣王纘統。維時軍國大政。實總是應。十有餘載。虜不侵疆。在昔磻叟柄國。妣圖因而阜昌。公孫破綺。姬祚賴以七百。始蒙投杼之謗。終灑捉髮之冤。功垂鼎鐘。聲流萬億。自今方之。故亦有幸有不幸者歟。且夫詩不云乎。亂匪降自天。生自婦人。其在傳曰。女德無極。婦怨無終。襄王不從。卒罹其毒。斯固王者之藥石。有位之龜鑒矣。嚮使是應燭厲階之往蹤。懲狄后之債轍。慎選清淑。充王後宮。方當內蒙禔祉之休。外席無上之貴。祁奚請老。午也之恩。不褻觸讐。去官舒祺之寵。益固不訾乎此。而身爲軍府之囚。罪在斐隸之籍。雖使萬口。

陳情千首崩角倍駟徒穀救衛侯之辜罄竹輸波訟鮑宣之枉不能使朝日而暮出東流而西迴也嗚呼悲夫

周君題畫詩敘

聖清開國七十二載曰惟康熙五十四年寰海綏安英父輩出當此之時通州處士山茨范君實以儒人教授鄉里斯盛纂錄並工丹青動拂起於雲雷纖末成於草樹往以溫岐商山之詠附意爲圖貽贈儕輩案所署字實爲彥昇遷轉之間入於梁氏梁生稟惠在幼留意命豪會負博錢持債勝者譬夫金碗玉几迺塊礫於沙埃駝蹄熊蹯遂釜鬻於臺牧昇墜之際顧不傷歟吾友周子家祿清量闕淵峻材仰岳少慕任昉之誼遂乃自字彥昇昔者漢世名賢多稱曼倩晚周公族輒字子家竊比老彭何其篤也嘗緣劉楨伏枕之日因得孔融嘉賓之歡或奉茲圖驚走相告失喜起視坐致霍然類獲越人之方如飲秦緩之藥返金其主物歸有我頃曾語僕信若可奇遂乃緣以緜繪曬之題蹠乞羣言於

右簡綴已製於下方。蓋意悲夫鄒魯法言之儒。河洛述古之彥。亡精韋籍。槁項華門。心惕夫五十之年。情冀夫沒世之下。孤願冥想。誠以可嗟。是以達人務於及時。通士委於寂寞。今范君爲圖之歲。財逾乎百霜。彥昇誰何之人。難諮於遺考。豈非道乖旌淑。理昧滋材。揜燭乘之遐輝。閔黃鍾之遙響。抑夫行潦微潤。不能滋累陌之禾。隻繭孤抽。靡以成千絲之網。於此乎。君子何以稱焉。且余又觀夫溫岐之詩。心極瘡痛之艱。體冒霜月之苦。吾與周子同爲旅人。展覽斯圖。都如躬蹈。置簡牘於衢路。委所宵於蹄輪。顧欲懷陳王定文之心。慕彥章豹留之語。已知不可矧於他人。世有尙功之徒。任智之士。述古昔稱聖賢。附庸高名。緣飾儒術。文謝鄒客。冀譽梁王。賦慙司馬。求通楊監。則何怪農夫豐煥之計。力桑紉於見卿。靚女帷房之姿。市門優於刺繡者也。

觀畫蘭記

蘭之爲植。稟靜而不寂。含幽而能芳。是以君子齊貞。潔士均質。豈夫綴華藻上。

修治之夫之所訴也。故僕竊觀夫當世之彥，方體同嫫母，行貳齊女，迺益陽慕
閑野，冒尙沖漠，媿已荃蓀之卉，託躬懷馨之姿，何其緣飾謬計者歟。奧譏周子
有所善者曰蕙，厥姓朱氏，早有耆蘭之性，故遂假物自名。蕙旣濯濯焉，良媛者
也。至垂長裾，曳輕屣，撫弦嘯竹，用色事人，蓋已傷焉。顧且獨念昔人椒蘭之辭，
中慨浮湛，溷濁之酷，永慮孤禽棲柯之艱，故以睇晨霜而興吁，對夕露而啓歎，
端處默構，寫蘭自芳。淮南子云：木葉落，長年悲。以彼靚女，在閨感候，中惜與夫
士之俛頸蓬室，伏几彌年，抱媚川而野居，懷照闕而靡貢者，豈有二也。余旣從
周子聞蕙之人，覩蕙之筆，因遂廣周子之述，况而論之，以暴其隱。畫凡十六紙，
偃者、仰者、臥者、立者、參者、獨者、拔者、萎者、萌者、達者、葉折而根露者、任毫制體，
靡有重格。夫人事之變，蓋匪特其大者而已。一人之手，一日之作，而賦形不同，
爲態各異。是以高識之賢，居雲霓之上，不忘深淵之中，休被繡之危，則思衣褐
之樂。故自古稱蘭之貴，以爲在彼空谷，無人自芳，蓋其自芳云爾。

謝朝鮮國王賜藥物牋

右醫院三品官李基徹以下官病狀入啓。伏蒙頒賜藥物。謹奉牋陳謝者。下官文非陳阮。才遠陽皋。猥以下走庸姿。給事將軍幕府。浮湛戲下。對遠志以猶慙。迢遞親闈。緘當歸而虛寄。蕭蕭蒲質。惻惻薪憂。殿下軫此微躬。惠之良劑。傳來教語。如聞秦穆之鈞天。啓覽嘉珍。似獲淮王之仙藥。豈云未達。遽白使人。匪曰敢辭。益深私慶。謹牋。

謝朝鮮國王賜物牋

右中使某等奉傳教令。頒賜參帛。牋丸等物。謹奉牋陳謝者。丹苗素甲。用異溫涼。縹緙研綾。質分疎密。煑吉貝之液。足供軍書。斬渴吻之精。可治中熱。殿下垂廬。羈旅加禮。王師際芳歲之告終。簡多儀而用錫。珍茲靈植。意感土膏。諦彼素絲。心慙寒女。輝輝片玉。會稽有斷節之柯。粒粒圓珠。長安有喘春之畜。貌焉遠客。固珍腴胝。矧在賢王。躬參疾苦。某等夙從車騎。謬屬賓僚。譬侍宴於曹王。瓜

李遜厚方受恩於趙國絲布慙深謹牋

葛君墓誌銘


光緒十年三月某日吾友葛君卒於鄞縣寓舍春秋三十有六嗚呼痛哉零霜六月異殺菽而可悲大海千尋非沉珠而可泣楊仲武二十有九毀壁摧柯高羽真二十有六委姿彫彩若其隱暉蓬戶無楊惲之貴門繭足修途眇公理之廣宅義均悼往事甚切胸君諱桐字青伯江南通州人也樂卻慶伯或云代有公侯沛國譙人莫能詳其本末家之不造我生不辰謂天蓋高不敢不跼悲夫悲夫應奉爲童之日已聞暗記之名馬嚴十三之年便曉諸經之義逮於冠歲篤嗜金石臨淄古墜識胡公之棺銘漢禁善銅知威公之故器由是旁通二篆俯貫八分垂墨疑雲點豪驚漆華山石刻無過邯鄲之書魯相碑陰僉讓隴奴之筆同治之季始得交遊於時君年二十有三光景將升風標垂遠余嘗語君曰是爲九層之臺起於累土千里之行始於足下其後四年君旅於鄞余乃塊

然浮湛戎幕竝勃海登之衆跨沮水越故塞車顛頓馬足墮曠望乎東夷矣子雲筆札君卿唇舌我思其賢君雙其美故得秦國之中樛里爲智新豐之士弭生爲最生平若此可以觀焉曹東阿之祖應氏登邛坂而摧腸何僕射之贈茂先臨層城而感物况余徘徊九皋之內慷慨歧路之際孟公太守尺牘罕來少卿足下惠書不至人材蕭落遽聞子雅之喪朋舊彫摧卽愴巨卿之變以某年月日歸葬於某原噫嘻悲夫劉不識無子之痛親覩於生前潘安仁寡婦之篇何知於身後種十里之樹荒忽難期過五步之墳蒼茫何日遂使荊州之誅長誦榮陽蕭永之銘空懸周代乃爲銘曰

毛羽振曜蘭苕翩風伊我彥士煒哉其同自昔之英不秀不實不幸短命君子涕出萬塵同埃百情一哀山庭風月灞岸池臺徂東贊戎去君萬里不見陵書竟聞沼死臨豪歔歔旁皇昔車宜官書盡東武文虛何處長松幾年石馬藏我此辭庶諗來者

爲慮江公與朝鮮國王遺牋

朝鮮大王殿下。李參判回。曾奉會一牋。聞其航海東還。爾者計當達聽。臨訣囊首。懸系何窮。某官蒲柳之姿。未秋先隕。固年命之相促。亦人事之云然也。頃自孟春。逮于四月。咯血。癰脹。益以閉中。加波路顛勞。風露冒觸。焦慮沈想。至有今狀。旣口絕於水漿。遑冀功于大藥。管生名籍。已棄治鬼之班。趙簡餘魂。無復鈞天之望。到今月二十一日。竟以不起。豈非天乎。區區之身。奄忽何惜。獨恨中原多故。外患日滋。不能執鞭弭以周旋。奉簡書而行邁。瞻堯無日。旣坐負於明時。戊甫不終。更永慚於隆眷。人生到此。復何言哉。至如部署駐防三營各事宜。已密令某官等謹受訖。仰賴聲靈。必能料簡。伏願殿下當旰輟食。未明求衣。重農桑以官人。慎銓衡而檢吏。生聚教訓。兵且加強。衣布冠帛。國將日闢。長沙邊粵。世奉于漢靈。莒子鄰吳。代綏于周版。豈不休哉。餘生殘息。伏枕酸嘶。伏惟殿下亮察下情。不宣。



桂之華軒文集卷三

爲淮軍寮佐祭廬江公文

年月日故吏門生等謹以清酌庶羞之奠致祭於府主廬江吳公之靈曰嗚呼我公廉忠之師德以道植禮以仁規績在中原旁流九夷其生其忽疇爲致之胡攀轍之弗駐而斜光其莫追神化所宰孰能以回嗚呼哀哉惟公清操亮節遭逢聖明蕭曹丙魏舉懿揚清德騰耀於億口聲鱗洵於百城固將振駭驥若雲電屠犬羊猶鯢鯨於以隴殷武之奮撻張天漢之英聲彼穹不弔奪我老成斯固帝震於朝萌吝於塗載冕驚而發歎冠帶由斯嘻吁非夫雅雅故吏莘莘賓徒惟告哀於小己祇述恩於一夫就如劉楨應璩枚叔鄒陽陳留阮瑀京兆田郎彌復眷甚弟畜恩兼川長道祝易禮勗成圭璋疇昔之日東征以旋祖車輶騎闕河塞淵雖寒暑之乖節庶醫藥之可全壽命遽促彼蒼者天嗚呼哀哉蔬肴空潔樽酒徒溫昔之列坐欣欣討論今也寂寞瞻望空軒圖几盈冊公所

披繡刀劍在壁。公手所捫。哀哀公子。載季載昆。伏地號哭。不聞公言。旌麾暫別。有書相存。如當此訣。永痛厚坤。返神何域。歸形何原。信冥靈之難接。將恆感於前恩。尙饗。

祭廬江公文

維光緒十年六月某日。銘盤謹以清酌庶羞之奠。致祭于府主廬江公之靈曰。嗚呼。自我依公。丁年之春。歲胡爾邁。今維甲申。中更八年。日吳日齊。威稜所愴。覃乎九夷。九夷膺膺。神京所藩。保置備狡。公有忠言。匪言不忠。惟命不辰。百黜一皓。疇則與親。公有忠言。一再而四。頗聞矧公。溫溫喜事。公朝語我。吾不謂苦。不聞李廣。涕泣幕府。公夕語我。我爲子知。子爲我傳。我靈以嬉。謂公戲語。不謂其真。不謂今日。公爲陳人。公之所苦。鬱肝以煎。終以此絕。疇致其然。公往善病。輒曰當死。謂公惡病。不謂至此。昔之謾語。今來目前。位不滿德。甯非天年。羽書南至。西虜闕置。公靈而知。慨當以慷。己卯之秋。上書糾吏。我與張君。將顛而躓。

文肅既去。微公且危。蜂螫有毒。公實拔之。伏枕作書。書成嗟吁。慰我謀我。薦侯于盧。我惟公誼。若暑于陰。坐不知感。後乃思今。此此小生。胡以酬公。送公于家。臨其幽宮。其生則榮。其沒則哀。矧公大智。了然去來。纍纍篋俎。芳醕盈尊。公不能食。惻愴何言。嗚呼哀哉。尙饗。

哀廬江公文

銘盤既以牲牢。羞酌之奠。致祭於廬江吳公之靈。而益痛之以文曰。夫天有不可信。而理有乖乎常。孰謂展顏之聖。而可以久。蒼蒼之松柏。而不隕乎雪霜。以余從公。馳驅周行。蓋八年之久。其所聞戰勝攻取之略。摧鋒陷堅之方。或猶二三君子所可翹足以相望。至如清介之節。純忠之腸。詩書之光。愛士若不及。疾惡則急於探湯。此在東阿侯官諸老先生。猶且頡頏而不能過。而奚以論夫當時之良。然公竟以此見忤。而不振。而其苦心篤慮。鬱紆而膠葛。周浹而旁皇。其於人也。如夏飲之得水。冬飲之得湯。故聞者且悚然以感。豈身被者翻豪髮而

可忘今則已矣士之特行獨立矯然自異於羣者疇與託心志而同芬芳公去不顧棄我蒼茫浩海波其東逝靈彷彿而何鄉尙饗

平山圖銘

東南地缺勞哉媧后之鑪西北高樓憺哉齊女之曲是以淪漣之側有抱信之微生景山之前有容與之王子雖夫鄭士翱翔之作儒人謂其奔詞陶生綦帶之篇來者議其瑕璽曾何足累彼盛德引爲己病者乎平山圖者製於太歲在辰之載實爲考功王君所藏夫揚州江淮之間一都會也南馳北走則漲海雁門撲地沸天則塵閉歌吹悽焉過客多有弋林釣渚之悲渺矣平山非有華岳河墳之壯陽生大弟乃獨眷於青岑之阿子卿足下顧不忘於河梁之水豈非以素波越渚夷光之所凝軒朝旭城隅秦女此焉曳屣舜華留矚帳中之誤影恆微嘉樹棲情竹下之餘芳未絕重以去鷄獨邁往蝶孤征關河無期風雲不感鸞床夢怖明星昇墜之間鳳珠書還碧海浮沈之表十爲二五竟併合而不

能睫在目端。乃辨形而不可。遂使對風中之薄翼。長想輕雲種海畔之孤桑。還成染淚。昔之當溪共影。臨岫分華。隔座怨遙。界屏恨遠。輕鸞寶鳳。彌懸象於疑真。珮斷香飄。終摧懷於靡盡。乃爲銘曰。

從風贈馥。在鏡將容。洛川一帶。高邱百重。芳景睽睽。幽岑駐胸。判芍殊溱。獻璫疑漢。秋屋非春。冬衾遠日。命翰知愁。臨圖聞歎。蒼蒼蕪城。可人懸情。暫招詎轉。側喚無聲。永成渺渺。不那盈盈。

南菁書院記

東南行省。吳中最高。爲大區郡縣諸生。督學乃其祭酒。刺司橫序。則綏纓視若父兄。比秩置臣。則冠蓋親於昆季。足以丹青名物。弦吹聲香。達文囿之句萌。拓詞場之扃戶。自昔升堂講學。著錄或至萬人。本郡授經。徒衆因而成市。况乎颺天衢之元化。宣皇路之清風。鋪禮閣之殊芬。聳庠門之高譽。軒輅所至。瓊林駢衍。而來遊。麀節暫臨。瑋士仿皇而不去。研藝業者。羣奉教於民宗。言經緯者。咸折

中於夫子而仁朋德侶不聞弛擔之區方領圓冠未有懸輪之宅今兵部侍郎瑞安黃公祇承簡命校士南邦眷穆若以翹心潤斷如而改耀鍾爐出鐔譬巧冶之鑄于將途術揚材甚王良之御駮驥欣騰姿之逾邁閱執策之無棲嗟攬往之成淵惜緘滕之何託遂乃經營奉入散稷嗣之黃金俶落權輿分江陵之竹木東閣大學士恪靖侯湘陰左公視師南服澄清之轡同聞作牧揚州禮樂之塗遂遠卻穀元帥寤寐詩書平津相臣流連儒術語其聞望則秦岱之於華嵩論其交驩則荃蓀之於蘭茝鐘鏞比律並鏗闕里之堂桂柏方陰雙沐杏壇之雨眷如林之子姪析周軌之壺飧義高田相之門恩甚晏嬰之府以光緒八年四月始凡造屋八十餘間用功二百餘日用錢二萬餘千因采朱子記子游祠堂之言命曰南菁書院昔太史公稱子游吳人今常熟虞山之上蓋有子游墓云若乃海門連宇炎漢毗陵之故皋江水環襟典午暨陽之曩邑由是觀泉嚮燥攬雲物以來祥命斧催斤對河山而裁秀闢精廬於中壤綴鄰牖於旁寮

擢樓於曠閭之庭。導圃於淋離之域。佗佗拾級。足閭侃於皋比。軫軫聯巢。寶波
濤於圓海。八窗籠曜。卽盛圖書。五步平場。匪無鱗翼。胞人幹吏。供都講之昕宵。
假沐陳休。奉大師之節度。蓋秋羽春干之則。已惠於襟裳。而佩賢戴哲之衷。彌
光於籩俎。議以漢高密鄭君。宋新安朱子。並祀於後堂。而左公爲題講舍之版。
廣斯指焉。漢宋分流。學術愈雜。明堂禘祫。詞繁於相枕之薪。性道天人。味減於
交輸之水。言象數或伸傳。而黜經論道學。或援儒而歸釋。軒墀旋接。戈矛起於
立談。几席逢迎。甲盾成於杯酒。非夫鑒明任照。物靡細而可遺。衡石從程。質無
輕而不墜。曷以包含衆祕。陶鑄羣模。洗纓濁世之叢。挹藻芳風之宇者乎。王考
城之月。奉旋姚仇覽之聲。蜀文翁之官僮。不讓京師之彥。嘉晨高會。總巖岫於
扶欄。暇日清遊。送涓涔於駐杖。春申往嚙。喜贈蒼姿。季札豐楸。還通盛藹。是使
荀卿教迹。淪漣於淹穰之間。太守學臺。光景於豫章之地。

泰興縣慶雲寺照潭和尚身塔銘

和尚俗姓曹氏。江南泰州人也。淮海之隅。有同貧國。平陽遠胄。今爲庶門。年十
黍發願剃度。因受具戒。智顛在梁。經如宿習。僧伽入楚。困于緇流。三十三爲壽。
勝寺主僧。後三年爲慶雲寺主僧。凡崇飾佛壁一區。佛閣五區。成就戒弟子二
百許人。和尚早通正教。本絕世機。泊焉浮沈。非其嗜好。雖復聲靈里閤。足域邦
壤。纓冕罕逢。銘勒未遠。要是精進。爲力殊異。人羣者也。以光緒六年九月十二
日。滅度于寺中。越六年。其弟子用慈華禪契。成再傳弟子。權平共茶毗之敬。造
身塔于寺西之原。端甫靈骨。常依安國之壇。不空碑銘。卽在大興之寺。銘曰。
祁祁潭公。晏晏寡異。賀跋金象。天台銀地。崇殿飾宇。窮熒極煌。寶階三道。琉璃
五光。上座示珠。南堂悟箭。華冠不成。過車豈見。未盈四百。遽超六塵。藻此靈塔。
尉其嗣人。

恭送座主少司馬黃公述職入都序

敘曰。自孫宏應制。詩書高異等之材。元始命官。郡國右宗師之教。所以經緯五

業陶獎羣倫。濡染忠清。紛綸辯奧。軒輶繇其光路。冠帶此程。之傳徒盛萬人。揚州郡之生。惟云千輩。法清人貴。揖高譽於往名於東郡而已哉。鹽銅金錫。春秋吳望之區。篠簜羽毛。淮禮化。彌眷宸懷。恆簡重臣。敷茲鴻藻。同光之代。海宇初平。使夫子以才賢崇任。絃吹名邦。將插羽瓊條。延英珠樹。其間高之班。旋拜夏卿。溫詔三留之地。貳尊麟鳳。論者以爲華賚。參條奏。夫匠成翹秀。蕩汰積埃。崇化厲賢。勸學修禮。固云文德原。今萬國大同。八荒一軌。江湖襟帶。犬戎處若伊川。南服全重。吳方厚產。貪賈之所必趨。揚州輕心。往誥之所未備。非夫之清風。幹棟儒林。曹鄆城之通識。曷以眡權知重。植圭求晉。推郭賀之風。東海襟裾。頗述蕭生之概。謂公精誠照日。直節翼王室之功。發張猛以擅盟匈奴之罪。參廷議則曰。各從其

在臣右起雲中之守。知魏尚之能軍。憫楚國之危。信包胥之可將。佞臣當殛。悚危聽於游魂。邦洵請除。扶頽型於司寇。凡諸故實。得之流聞。蓋將藻繪丹青。雕鏤竹帛。豈夫北海振衣之士。所敢高窺。西河奉袂之生。此焉抗語。若夫講堂旣考。威儀盛於魯鄒。禮容不讐。諸生親於子姪。杜元凱之左氏。包國子之漢書。邳君章之直心。丙京兆之清行。靡不琢磨懲倦。鏡燭忘疲。越軌惇師。騰銘老德。在昔文懿。譬曉皎譽。長安無量。建端振音。上國方之今日。彼有慚色。且管子不云乎。埴之在埏也。惟陶之所爲。金之在鑪也。恣冶之所鑄。弟子受命。豈不然歟。張壇容裔。高車遲回。賦柳而來。及瓜將去。遂使學官僮子。攀車轍以翹心。相圃門人。眄旌旗而凝矚。圖道斌之像。甯足酬深。建翟誦之碑。未云罄感。如使豫州疆理。天眷滋隆。河北典。至情有屬。封公去冀。竟聞再牧之年。李君到官。終慰德音之想。求姦破柱。豪右寒心。擁節宣風。車師抱足。單車卽滄海。波與圓沼俱平。杖鉞所臨。甘雨共大。雲借潤。其或辨稽九伐。總宰六師。方將整飭。龜劉芟夷。害

馬拔任安於小吏識卿子於末將周之司馬爲佐王平國之官古之大臣有以人事君之道將使魏陞之禽樂祚右手慙其無功甘茂之拔宜陽私金增其厚賚陸懾水慄益稽首於中國聖人撓酒橫刀不寄笑於上書男子

馬貞烈女之銘

同治十二年月日某官某等狀白大府列稱某所居金匱縣民馬廷燦妻范物故一女在幼約婚包息范妹施夫死爲寡有桑中之行茨牆之辱燦大瞽露持女屬施食宿澣刺從施依居女舊范霞卿許霞卿子金乞施啓已得薄女歡施果厲諄如金所請夜女眠臥迫睹金至登便呼叫金掇溼絮按塞女口持搏枝梧益提衾蒙冒女頭加鄴頸上須臾氣絕霞卿施更乃妄語廷燦若息私露吞藥以死他或議尸面眼口鼻實非自藥以死燦包驚聞大寤走白長吏發棺之日尸赫若怒掖下都赤餘絮在口施金並伏夫施爲從母實有吹沫漂山之心金爲男子乃忘中夜燃蒸之語某等伏惟樂羊貞配有操刀之英風韓憑令妻

有高飛之厲唱方之今日彼難專美於是大府感白列狀上請旌閭之詔事下郡縣父老邑子萬口嗟歎爲築墓於無錫縣錫山之下而前刑部尙書吳縣潘公立石墓上孝婦之塚在東海之高原曹娥之碑臨上虞之江介足使邯鄲驛路長泣枯桑漆室霜冬不零貞木銘曰

董之質絕鑿鑄吁茲美雙其賢皎素月咽流川口爲古萬歲年攬景烈雲在天刊穹石倅形編

積頤廬記

費子旣以不舍鏤榜其齋復名其廬曰積頤之廬而命僕爲之記夫費子何乃好孫卿之言若此者乎孫卿之言曰積土成山而風雨興積水成淵而蛟龍生積善成德而神明自得聖心循焉大哉乎此無異我孔子之言也孔子之于學博以文約以禮循循然至於大道云爾孫卿學聖人之道不謂不深且久值賢王三爲祭酒于齊不可謂不榮卒乃爲令不終至于閒放可不謂天平哉今之

君子之于學也。操數寸之管。求所謂利澤天下之事。日皇皇而無窮。彼既已得其志。並世又無若鄒衍田駢公孫龍之徒。異趣而破其道者。以彼其意。豈不謂乘風雲而上天。且無若古所云也。余知交多有治孫卿書。而費子尤篤。費子通詁訓。善文章。不爲迂大閎辯之論。而多有心得。讀其文。亦足以見其志之所存。

朱氏宗譜敘

敘曰。銘盤所錄宗譜。得皇言一卷。世錄一卷。祠墓一卷。閨範一卷。世表七十九卷。凡都爲八十三卷。自衰周之季。國亡族散。人自爲生。渙然靡有統紀。於是周官小史。奠繫世辨昭穆之法。寢以墜廢。魏晉而降。有九品中正之司。上自族望。下逮卑姓。雜譜並藏於官。蓋二百有餘年之間。至唐而不衰。五代以還。蕩然無復什一矣。宋歐陽蘇氏始以高望魁儒。興復古制。爲來者宗尙。豈非三代良法。美意不絕如髮之明證者歟。吾宗自晚宋之世。始著籍此邦。迄於明季。未有系牒。崇正元年冬。先僉憲府君既罷職以歸。乃始爲朱氏宗譜。而敘之曰。邑中舊

姓吾宗最先至。蓋自宋迄今五百餘年間。爲計十八葉。他姓未之有也。第自寶明府君而上。世代不可考。長老相傳。遷自鍾離。今亦無所據。聚廬而居。地名朱家巷。說者謂蜀岡脈盡處。當宋寶祐間。祖塋有靈芝之祥。載在邑乘。歷世以仕顯者。宋則徽猷閣待制。元則辟舉。凡十人。國朝則長史少宰諸公。此後簪紱漸寥寥矣。大都其人。愿慤纖嗇。自力穡而外。無論徵逐。攫拾一切。鬪雞走狗。鮮衣怒馬。諸豪華之習。旣門風所未曾有。而性荏苒不難爲人。茹閭與里中有所較計。往往得解而止。無敢徵勝。近乃稍稍有一二越尺幅而競錐刀者。然其耆老。諄讓子弟不少假借。而子弟唯唯。卽胸懷可否。迄不敢有所牴牾。尙餘未散之樸云。小子馮。憶幼時侍先參知府君。爲言先世醕德。庶幾懷葛之民乎。出先大父參知府君所纂宗圖授之。而念宗譜未具。以爲缺然。屬小子異日張戶。當成祖若父所未竟。迨先參知棄養時。小子馮尙浮沈諸生間。越十年而後通籍。羈縲王程。其間凡三十年。無暇執筆供役。今年戊辰。以撫閩無狀。落職家居。

自惟髮如此種種矣。歲月幾何。蒲柳早衰。儻日復一日。前人蹤跡。漸就湮滅。先
參知有靈。謂析薪不克負荷。何於是。與弟一善一瀆。一陽共爲編次。十三世以
上。一準先大父所授圖。十三世以下。則一陽遍考臚列。藉手爲多。其遷出者。若
靖江。若如皋。若南京。其先世各載於圖。今仍其舊。而後此圖所未載者。姑俟異
日。在南京者。四川參議貞。又職方郎中潤。身在靖江者。近有孝廉士烈。方待對
公車。又山東平山衛有翰臣者。登萬曆甲戌進士。自言出吾宗。而前世未有考。
此皆自他有耀者也。譜旣成。小子馮竊惟先世之遺澤綦遠。已邑蕞爾。江靡僻
壤。吾宗田廬。尤號瘠土。然世世鳩宗。於是中更三朝改革。凡再見而村墟如故。
墳墓如故。家食先德。人服先疇。未有河濟之綿葛。中野之蔽樗者。以至於今。質
殖未拓。而食指日繁。且跼蹐之業。較前增培。卽如小子馮樸。椒無似。猥被國恩。
謬塵華貫。忝竊節鉞。夫非奉遺訓。蒙末庇。以至是。爲我子若孫者。憑堂構之遺
母。爲東門之侈。紹家庭之跡。毋爲伯石之汰。遡岷崙之擘脈。而念葛藟之庇根。

毋爲秦越之相視參辰之不相能庶永永無替乎粵稽唐太宗綜天下譜牒退
新門進舊望膏梁寒素合一百九十三姓千八百九十一家而吾朱氏與首稱
焉號爲甲族非一日矣自今以往家駒種麟袞袞競爽鬱張戶之琳琅錯登朝
之瓊寶以生色簡編垂蔭弈葉使里謔穠蔭之豐年而世傳鉤策之華閱是在
後之人哉抑是編之所不載者緒往而旣墜派佚而莫收者何可一二數也卽
是編之所載者面目不相識名字不相聞者又何可一二數也夫孰非先人之
一體而至於是銓次之餘蓋不能不三歎焉是編成而人知率祖因人知敦族
歲時相存也緩急相收也善敗相勸也計世且益昌而嗣是按圖論世者且益
覈小子馮實庶幾望之其後百六十八年昌遠君等爲宏八公支譜是爲乾隆
乙卯譜至今凡四修又二年士美君等爲宏九公支譜是爲嘉慶丁巳譜至今
凡四修又七年聲振君等爲宏五公支譜是爲嘉慶甲子譜至今凡三修又二
十二年香南君等爲宏一公支譜是爲道光丙戌譜香南君去僉憲府君垂二

百年而宏一公支子孫又最繁盛甲他支願乃搜輯遺墜犁然勒成一書其功力可不謂懇懇乎哉宏一公從父昆弟以宏行者最二十人凡五人之後有譜其不甚著者爲宏十二公支亦有譜又達五公支子孫僅百人散處城南十許里間自言爲清湘兩公苗有縣官租券可信譜成於嘉慶道光間在香南君先自國家定著籍之例雜姓卑族冀望幸進爭爲世譜以愚官吏而一二著籍遠古之門負恃舊族非諂新貫或乃一宗之裔彼軒此輕輕相諛笑而鄉里知讀論語孝經之徒又自謂通曉譜學私心喜怒以爲進退夫譜牒之掌後世旣無有專官國家登進材彥又益屏去漢魏以來族望之習且吾宗自始遷到今仕宦無至一品階者迨皇朝二百四十餘年之間未嘗有三品之官願清名厚譽往往流聞鄉里數傳而不泯豈非以長世之德所及者遠歟淺儒愚老乃至造述神異厚誣往古纓綉巾卷之倫熟聽而不疑斷斷而固然右稱名爵而左言道德抑亦通人君子所難知者矣香南君旣爲道光丙戌譜越二十五年其子

輅君復踵爲之。是爲咸豐甲寅譜。大抵宏一公支齒最衆。冠帶亦較盛。人善其所私學。以繩墨子弟。途稍稍雜矣。小子銘盤竊惟先僉憲府君功績著於當時。蒙謗失職。顧念忠節不遂。自暴乃退。而修孝友之行。宏禮讓之教。揚述祖德。收卹宗黨。此與夫子孝友爲政之指何異焉。昔魏晉之代。家重譜牒。過江以後。淪亡者十九。僉憲生丁勝國之季。竊觀其意。烏知不感慨時變。大懼淪墜先德。爲子孫百世長久之計耶。僉憲所爲譜。凡二卷。甚簡古可法。後益煩近矣。往昔治經著論之士。多研究譜學。若劉知幾鄭樵之倫。言之尤最詳核。而宋王荆公元戴帥初明歸熙甫氏及黃梨洲顧甯人姚姬傳諸賢所爲譜。詳略或不同。要皆無戾於古。竊獨私怪吾縣近數十年以來。風氣不爲甚樸。人士向學者。不爲不日新月盛。獨於茲事。大率倜然簡易。不以爲非。是矧銘盤少失學。中更奔走。卒卒無日月之閒。得潛究問學。卽欲萬一古人何可得耶。抑嘗竊窺僉憲之意。拳拳於墜緒佚派。輒慨然歎息。則夫後之分爲錄紀。各相畛域。非僉憲之意可知。

也。今取乾隆以來諸分譜并合如舊。凡計存口大要五千許人。富者或擁累千金而貧者至終歲願一金不可得。輾轉他縣以餬其口。賢者恂恂於鄉里。其不肖者至攫拾搏擊雞鳴而不已。此又非先人所大痛者哉。光緒十三年七月十二日。

南阡志銘

志曰。出泰興縣城南門直財一里。曰旃檀庵南原也。有朱氏五塚。並南東嚮。最東爲先祖贈大夫縣學生諱南薰。厥配何宜人。西爲叔祖諱德薰。厥配殷。又西爲先本生祖諱蘭薰。厥配陳。又西爲先府君贈大夫附貢生諱光魁。配何宜人。並合葬。又西陪葬爲亡弟盂也。於是銘盤及弟孟從弟功等五人。並以幽室。阻慮千齡之下。有淪佚之歎。爰迺循李氏記三墳之故。於光緒十四年某月日。刻石墓下。俾百世子孫具知之。銘曰。

戲懿祖。早就亡。母稟節。厲肅莊。及仲叔。封同岡。考舉秀。淪不揚。盂十四。爲中塲。

次三糸縱百霜地則縮天何量告遠者幸不傷

清故署荊門州知州知府用湖北候補同知吳君志

君諱寶儉字禮園江南泰興縣人也曾祖諱文運祖諱士珪贈光祿大夫父諱存義吏部左侍郎君幼挺殊姿博綜世典文詩賦頌尤所精暢少侍厥考有聲輦下周攬滇傲衍歷二浙鉅儒承風彥士接履先遭父喪有絕水之痛旣憤兄仇無反兵之志以郎中改官同知分隸湖北時逾星紀凡一權荊門州牧三筦釐務姦豪亡去商賈從市於是湖廣總督卞公湖北巡撫彭公薦君廉能有詔補同知後以知府用嘉其材也君匱於貲產尤好施與親戚待其舉火友朋叩其存活論文辭之美則方駕曹劉言政術之良則經綸豹產不幸奄疾以光緒十二年七月壬子卒於武昌寓舍春秋四十嗚呼痛哉妻王氏息守訓以明年十二月伏奉君柩返葬於本縣東門外姚家莊之原石馬銜悲霜禽含慘孝泉流而不涸風樹響而如泣

清贈朝議大夫李君誌銘

君諱源本字松亭江南懷甯人太學生以咸豐元年九月二十一日卒配梁氏以光緒十四年十一月初一卒年八十以其年某月日合葬懷甯縣城北四里回回營之原祖傳德父萬年子三人長延佐次延佑並早卒次延祐補用同知直隸州兩世皆以延祐官累贈朝議大夫妣皆贈恭人孫二人年籤年筠延祐出以年籤後延佐爲之銘曰

李出大理皋陶孫散處皖國今禮門厥先五世同簋殮鄧叟完白象鵠傳君遊其庭聲則抽耽樂孝弟輕產疇南遊吳會從如鱗起人飢渴無疏親頌義在口故若新火燔其文黯不揚下痛玄淵上青蒼厥配媿媿大國梁如桓于宣龐於詩出入堂堂嬾所治笄櫛紳佩饅羹飴脫簪施珥者且仁戚鄰來赴涕集中我銘其壙告萬春匪子儁彥懿曷彰匪文不死譽曷長我肝獨愧無文章

爲張提軍上朝鮮國王牋

朝鮮大王殿下某官昔從使節上謁華宮仰奉嚴襟過蒙曲眷軍人靡戍甫之
詠戎士息徂東之嗟迴翔彌年便蕃盛惠其後中原用武上軍班師猥從故提
督兆有吳公左右朱旗翼衛青社無子蒲復郢之績遽躋于崇班乏嚴助浮海
之功遂膺于高賞既愧下走且悲吳公德盛而位虛功高而命促爲可痛也頃
自乙酉之歲振旅西旋故提督因積瘁之軀處廣斥之域遂已觸馬援之病瘴
患班超之金夷謝去兵符返彼初服不謂儻忽遽焉漸亡以光緒十三年閏四
月初三日卒閭巷奔問既輟於春歌將卒聞聲彌躔於涕泗念其昔擐甲冑懸
滯名邦親奉橐鞬馳驅當轂異榮陽之深壁甚雲中之受戈甄厥前勞規蒙永
眷敢陳大略上瀆明聽非有冀望之懷爲彼子孫之利比聞殿下宏敷善教益
廣盛明國阜人熙邇安遠肅雖復分躔殊部終是瞻德依仁朝歌升堂之恩未
均此切元長受弓之感甯喻其深伏惟覽啓增懷撫端軫慮臨封瞻戀不任下

情謹牋

桂之華軒文集卷四

顯忠祠碑

述夫飛龍戰野其血玄黃月靈在東厥魄生死一則土崩瓦解一則東征西怨避溼就燥者或去商朝姬風翻雲飛者或朝曩夕相亦有執執介士斤斤將軍雍丘斬於李由鉅鹿隕於蘇角田橫之客盡於海島之中樂氏之臣殲於短垣之下直節動天地英聲激河海故以勒感孝之頌齊永平之元年樹比干之碑魏太和之甲歲上以追揚忠孝下以顯融臣軌豈况宙合符量稽古太宗日月昭明於皇世祖昭示史法曰若高宗何有吠堯之犬與刑天同誅逐日之父與后羿共殛京觀十仞不別於貞誠燎火一原莫區於蘭艾者哉顯忠祠者祀皇贈左都督故明登州鎮總兵官遼東黃龍及游擊李惟鸞部將項祚臨樊化龍張大祿尙可義在今盛京金州旅順之島旅順東走遼瀕西浮登萊漢度高驪之師魏有遼東之役因利乘便悉趨茲道是以勝國曷爲東土太宗規爲左海

並扼此喉吭。爭茲股臂。於時聖德旣博。萬邦惟懷。李氏望款。類鄭伯之逆師。降人崩角。邁呂興之上節。崇德七年六月己卯。命貝勒岳託德格。類率右翼冷格里左翼伊爾登昂阿喇及石廷柱孔有德耿仲明等甲卒萬人。取明旅順。遂以翼月甲辰攻下其地。實明崇正六年七月也。先是孔耿來歸。道出龍境。大見斫刺。落其牙距。以斯二憾。厲我衆士。亟肄以敵之。多方以誤之。故得破其高壘。不藉牛燧之功。拔其堅墉。無煩蟻附之力。龍旣伏劍。鸞亦隕首。一軍如墨。闔門同盡。連尹沈尸於邨土。狼臙捐屬於彭衙。漢骸宵積於睢流。楚儻晨駢於木表。皇情載軫。贈卹有加。都督之官。仍沿明號。漢帝之思。趙將甯譬。其恩晉皇之眷。葛侯未均。此德乾隆四十一年二月庚戌。有詔俞大學士九卿等。明代殉難諸臣三千六百餘人。專謚通謚。及應列入忠義祠之議。於是龍謚忠烈。惟鸞謚烈愍。其餘四人。並從祠祀。頒勒祠額。題曰顯忠。故夫君子聞磬。則思死封疆之臣。王者式鼂。所以厲勇士之節。非夫孔量絕我堯仁如天。豈得道絕於曩編。澤醲於

百聖如我高宗者也。靈廟荒頓，今爲平場。其地舊有水軍，故罕民落。互市旣廣，夷舟日衆。楚旌齊羽，翻飛於戶牖之間。越艦吳艤，鱗次於堂陛之下。國家控制，遼遼始駐海師。有舟楫之官，有軍器之監。可以保置設險，可以夸翟威戎。曾不歲年，薈爲塵市。於是懷古軼蕩之士，攬代偉異之儒，瞻戀堂宇，曠睇山海。悲夫朱氏之季，帝咨萌怨。忠臣戟腕，志士雷憤。或有百疏不答，沈軀境上。孤軍自淪，膏血原草。明有十敗，我有十勝。益以嘆神策英略，絕前邁今。非夫秦亡漢興之語，所可比倫。湖清社鳴之徵，此焉髣髴。某官等伏惟魏朝掾史，立范府君之碑。晉代上公，修張子房之廟。所以景行刊烈，微管申嘆。若乃路窮徑絕，不感風雲。奮首觸胸，終効割裂。固宜遺芳遠概，奮乎百世。遂乃別建堂宇，增施丹漆。庭階戶席，筐筥錡釜。二仲之吉，薦饗斯堂。仰對於皇靈，俯通於元感。雖復刻木爲信，遺像陳茫。入廟瞻達，精靈綿邈。要使魯人結慕於展惠，秦士凝痛於子車。宏風闡道，千齡萬代。銘曰：

萊隈東直勃濟西規。明倚左臂。皇命前旗。齊趙宗鎮。弁禹偏師。斗絕島城。焚哉別旅。摧叛甚鷹。搏凶逾虎。識昧青黃。首昏龍鼠。二帥歸國。兩師疲人。西南備我。東北乘闖。太白門歲。龍尾伏辰。遼東忠壯。躬膺別將。矢盡道窮。印存軀喪。軫不函元。孟無構葬。李侯空弧。兵危身孤。荆卿湛族。要離焚孥。死不纓絕。沒而銜須。尙侯桓桓。平南之族。亮瑾二天。跖禽異腹。始託文龍。嗣分廣鹿。裨貳福戎。百身一忠。生則毅將。魂爲鬼雄。名昭皇冊。神駐靈宮。靈宮伊何在。海之浹。冠帶仿徨。纓綉羣止。節感魁人。神悲虎士。太歲在寅。六月爲且。臣爲此詞。以揚帝謨。以訊代人。搢紳大夫。

與顧舍人書

聘者足下。奉別而還。卽以十七日抵天津。又十二日乃至旅順。塵軌眯眼。波路蕩魄。痛痒之狀。豈可說哉。侵晨維舟。仍覩軍壘。家弟相見。疆爲喜笑。入則夫婦相慰。出則友朋相溫。稍營几案。便置書筆。日爲程格。以自令督。所撰集西漢已

來四齋朝獻事。便已累帙。今須手寫。更付庸史。日可十數紙。裁計文二千許耳。所居室屋。截板爲蓋。牆則土石相積。最畏滯雨。甚或傾壞。小亦衆漏。若矢著人牀几。或然燭數起。移牀就燥。檐滴財止。中饗仍奏。若此之夕。歲幸不月。覲覲乃在。夏秋間耳。門距海水。僅三五十步。繚牆五尺。裁及人鼻。舟船出入。堂上皆見。船旗誰某。久亦辨之。往七八歲時。始見江水。私謂奇絕。今茲所見。乃更倍萬。故以竄覽八表。感慨古人。以爲此堯以來。青州之故區也。漢伐朝鮮。魏討公孫淵。唐太宗伐高麗。趨平壤。入鴨水。並取塗茲域。成彼雄閱。明漢兵若雷風。摧敵若拉朽。何其壯歟。足下日有好友。塵事蓋簡。規可流覽。百氏廣其野。獲隱觀當時。以啓洞識。若僕屏跡窮裔之外。放意草木之域。騶卒對語。泥塗爲侶。地無冠帶。何有士夫。山無林木。何有禽鳥。井泥一斗。何有滄茗之歡。海魚怖人。何有魴鯉之美。霧風腥鼻。高詠何區。朽石如泥。摩厓無所以。此自構坐損而已。自夏以往。風力日甚。冬晝出門。更患膚裂。有何可喜而來此乎。夢璞計南還。未杭入秦塗。

路可念買婢事幸更申告之卒卒不宣

新阡志銘

光緒十四年十二月二十日銘盤及弟銘孟伏奉先繼母蔡宜人之柩葬於泰興縣城南新阡之兆從遺令也其日從弟銘功等三人亦奉叔父嶺梅君葬於其左明年銘孟婦鄭氏卒因右附焉依形家之說並乾首巽趾去旃檀庵南阡之塋凡百有餘步俾靈無恫焉乃遂伐石爲志系之辭曰

出縣闔直南繡原如鱗吾母安此可以娛厥神昔唐有二李子曰陽冰季卿述其先墓到今一千有幾春兒之不才乃敢望古人上告日月星下告淵淪何千萬年無鋤耕

與周校官書

彥昇足下不共言矧忽彌五載星辰殊躔關河異部上同日月下同波潮何有毛髮之神藥其痛癢循誦惠簡及五言詩三篇如魯生說經言言有故覽其體

貌考彼情響。故可貳配曩士。俯睨今彥。足下謂吾文發端甚遠。舉足千里。優俳之說。要諸故訓。吾亦謂足下聲氣簡動。若河伯靜波。噫氣收聽。潛意中轉。彌可矜也。假令足下生順康之朝。在冠帶之列。得不令尙書屏氣。開府流響。太倉官其繁聲。宜與蠲其英藻。何有流宕千里之外。浮湛什伯之間。韜心斂志。跼蹐乾蹠。坤如今茲者乎。都下材彥之士。往往而有知足下者。十裁四五名實之理。固無可言。益以歎力田力桑。古人譏爲拙士。終日不獲。國人鄙其賤工。非偶然也。憂悲繁興。炮灼精氣。若銘盤。近年以來。殆百無好趣。婦孕不育。比已四五。妻子紛然。去國千里。門對渤海。日聞潮汐。舟船翻飛。風雲千變。仲夏五月。乃見青草。大暑若火。無一陰樹。如此之日。若彼江南魚稻之國。竹下烟月之地。瓜李如陵。荷芰如海。清池在前。涼風在後。顧不美歟。書旨灼然。見望甚至。比與家弟商論。累夕了無善計。足下幸自料量。若楊雲之宅。足得一區。公理之田。裁供酒糲。便可謝棄人務。歸爲中農。不者則嘗述田須無去國之說。誦柳下惠直道之辭。爲足

下雍容焉。抵仲弢編修書。已如來指。乞便改定。墓事如何。慘怛不欲詳。聽邦之大夫。何以處之。銘盤白。

與黃侍講書

中弢足下。頃出都門。不復走白。垂發之晨。師駕臨送。溫言煦煦。若對子弟。學績陋薄。旣乖明教。又無當時之榮。仰慰百一。上眎下貽。無可自解。比以孟夏晦夕。始氏所次。中更波濤塵日之苦。又無朋舊懽遇之樂。念彼鄉國江湖之美。而處濱海廣斥之域。遠違英彥文酒之儔。但有老兵對語之日。若斯之類。殆不足爲吾賢說矣。周君彥昇。天下奇士。校量材業。賢我百倍。身客異部。婦墓見發。此人何譽。乃爲神懟。昨氏五言詩三篇。固以情會相違。百志怫鬱。周賈所以貢憤。孝若所以見誨。今之學人。多尙口耳。因利乘便。自致霄漢。聞一知幾。輒擬顏回。體中何如。便爲祕書。顧我彥昇。乃令若此。豈不異哉。足下俯攬流品。博知世彥。取彼撰錄。刊布當世。誠所頂戴。小史過書。名貫並異。恐遂流衍。見惑來者。謹騰詩

牘寄上左右幸便抵書勒正還其藁草京師澤潦河決永定旬
踊大夫君子如何如何

清故候選訓導何君之誄

君姓何氏字杏衫又字小谷江南泰興縣人余祖母之兄子又
也生有殊稟博誦彊覽韶歲孤露苦自振厲文藻煒密長老驚
科副榜貢生其後連試連放竟以光緒十四年某月日卒於本
左江潑風氣簡樸冠帶之士家善私聞進退子姪不欲紛紜誦
君槩然遠覽以謂良玉在石白沙在泥古之君子蓋有誑身奴
賈之列奮迹污泥之中發聲蓬蒿之下用是提挈後進宏獎志
坂甚渴夫之從飲加斂容虛己詘尊狗卑隻論之善言必出口
北面謙謙君子大易所美非夫通人我之域握善敗之符鮮不
合世者也若余備諸甥之列在弟子之錄追維舊恩彌以痛悼

天鼓八風。此融彼覺。義則當坎。仁惟應震。官書斯張。古聖攸信。魯修禮樂。齊習
僛勁。曰余鄙縣。代遠干戈。江送餘濶。海通微波。士惟葆樸。俗以養和。自古在昔。
先民孔多。孺子惠者。討其姓名。諷其觚畢。吹其簫笙。衆睨孺子。蠅噓竅鳴。君曰。
孺子心開。魂清。感此奮揚。積朝累夕。就于通人。第其玄白。徵君激揚。因十得百。
繞柱萬趨。修不及尺。我別舅氏。在亥之冬。城樹發發。水波淙淙。禮有卒哭。形無
再逢。述哀緘涕。以告厥封。

周仲璞哀辭

光緒十七年七月十九日。余從母弟乙酉舉人泰興周君仲璞諱維申。卒於金
州寓公馬氏教授館舍。年三十有二。嗚呼哀哉。馬氏循曲禮。殯友之文。弟子守
寢門。哭師之訓。附身之具。既周以飭。其年九月。君伯兄子熙持棺南徂。將歸靈
於先墳之阿。君天資亮特。年齒壯盛。方營心九垓。舉足千里。苗而不秀。仲尼歎
之。綜其生平。蓋有數美。徒行異部。勞均臣虜。節甘約旨。以奉二親。一美也。親賢

取友。詘躬卑文。疾惡若湯。從善甚渴。二美也。甄討載籍。流覽方藝。有一不寤。引爲大恥。三美也。笑閔濁世。睇眄往修。思自樹立。以閱世典。四美也。夫寤寐有得。足覲於神明。精誠所至。嘗開於金石。若君氣高雲漢。而運阻立年。才感風雲。而名終鄉舉。遂使慈父有卜夏之痛。寡妻抱杞梓之悲。藐是諸孤。出則靡至。嗚呼哀哉。爲之詞曰。

莊生有言。身名孰親。惟名是赴。乃煎厥身。君氣方熯。若華在春。若決大水。其無涯津。如何弗通。天塞其塗。一朝大別。神嘻鬼吁。君病之始。趣君南徂。醫云法絕。不云斯須。君之遘閔。病加於憂。小人甚口。謂同伯牛。顛倒白黑。縱橫戟矛。君今大寤。聽諸悠悠。從母昆弟。惟四三人。獨君年少。又有二親。今覩沈酷。呼天不仁。君雖奄忽。其鬼必神。知我與君。微心無窮。昔之譚讌。茫如飄風。宵暝晝寢。神與君通。作此哀詞。告君幽宮。

斷指生傳

光緒中安徽巡撫以降人李兆受毆斃命婦事上聞兆受遂誅死先是咸豐中兆受以窮賊挈衆來歸擁兵滁泗之間觀兩端自保滁泗數百里中士庶往往被其毒害乃不可勝計而滁州斷指生爲尤異者生姓侯氏名度字謹之晚又自號隘民家世庶族少有馴孝之行嘗受書法於蘇州葛翁葛翁死無子其墓在清河去滁州六七百里生歲歲徒步自滁州往祭之益推究筆法銳心篆隸之學其論書專欲尊尙古法刻絕一切可喜之見以爲古人事事必有本祖不可以意爲矣兆受雖僂僂武人乎然陽尊禮儒士聞君名則召君爲題所居堂榜旣不許卽益遣其黨誣君他罪逼請之不可且殺汝卒不聽乃斫君右手一大指以去學政某公聞之曰嗚呼此獨行之士吾不可不旌異之會按試其州乃以君斷指事令諸生賦焉又榜其堂曰一節千秋之堂君因自號斷指生云論曰余方冠時識君君五六十歲矣屈年輩與余交謂余終當有文章之名幸爲傳其人余嘉君有節士之風多爲海內士夫好奇節者述之且君非獨能用

一行自著也。好善嫉惡，發自天性。數嘗面折人人，或規議之。君曰：然吾褊甚，不能忍，奈何？因又自號隘民也。

義丐傳

吾縣人有甲，詣官堂，皇告其婦者。縣令讀其狀曰：婦爲人傭織，盜人絹，大辱門戶。請出婦，令許諾。甲又曰：身將以婦予乞人，令方計不許。甲則已馳從官舍門外。曳一乞人至，曰：以畀若乞人。曰：吾一人乞食，且不飽，安用婦？甲益固予之。乞人乃逡巡呼婦與俱去。去至北門外，厲壇旁敗屋中，積十數日。方婦從乞人去也。母家議以錢贖婦歸，以乞人望直甚過，持不決。甲聞大愧恨，乃自從乞人議贖直。乞人大責甲曰：若好夫婦，若告彼盜絹事，直捕風耳。今旣悔，大幸，卽持去我。十數日乞食饋若婦，與饋姑姊妹等矣。有毛髮點若婦者，厲有鬼，必擊我。朱生曰：吾弟仲雅從里中來，說丐事頗詳密，恨不憶其名焉。弟言里中無能嘉其行者，又輕薄兒相謂曰：若妄言耳。今世安得有此人，有之卽柳下惠，何以異。

丐何能爲此。丐何能爲此。余悲夫風俗衰薄。乃至不信道義之行。使在二漢魏晉之世。守令旌其門矣。

考功王君秋鐙課詩圖後敘

伊夫荆臺饗魯。仍返大屈之弓。晉師燔虞。終收垂棘之器。斯乃專務詐力。無當神感。若其忠憤所激。朔野有沸地之泉。孝思所凝。寒波有騰冰之鯉。况乃昭融簡翰。流行撰錄。語其高秀。則蘅蕙轉於光風。論其賢明。則組紉流於懿軌。豈有從風霏霧。任運波蕩。羣名塵壙之下。的然口耳之際。譬彼蜉蝣。亮同朝露者哉。余以光緒壬午之歲。遊乎侍郎黃公之門。侍郎有箸錄弟子曰考功黃巖王君。厥名彥威。字曰弢父。其先實名禹堂。用渠城爲字。蓋舉秀勺年。計廉冠歲。聞一可以知二。拔十此焉得五。嘗取先母夫人之製。勒爲秋鐙課詩之圖。故以上闡懿光。下示來葉。遂乃挾持左右。晨夕覽誦。類銜捲而置涕。甚撫箴而述哀。鴻生鉅儒。大夫君子。故以鑒其精誠。昌之詩頌。其時侍郎仲兄比部尙薌黃公及翰

林院庶吉士侯官仲愈楊君皆當時所稱賅通閎儒也。並耆友若珙璧扇善若風霆傳賞茲圖許爲揚贊。天不佑德二君淪徂考功亦以齊期之喪請急南邁。夫蕭葛之感且以三秋爲言參商之辰動以終古是喻况乃金石同性人鬼殊路者乎。考功旣除服還府追覽往昔一以感慨逝賢一以瞻戀墜簡悲夫聖善之妣墳奧之訓昔傾耳而卽聞今凝匡而無覩且又惠班之息遽亡于典訓之篇師母之兒頓失於授經之本如考功者可以悲焉。時移歲變言哀已殺訶求故物曾無衰情會有中書舍人閩縣蘇龔鄭君用疏通之材在清顯之路閱篇異製紛綸輦下已而從考功之求爲先文之敍命豪未終穆然疇昔蓋舍人與楊君吉士同爲州人兼有嫺特弔哭旣卒理其遺文考功亡圖獨入鄭氏行坐相保殆逾十年以爲手寫之文寶于齒髮口誦之製溫于餅壘固乃人子之微心庶士之細願至如臺卿之字易曰邠卿虞茂之名改稱虞預雖復聲從風遠終是文與事乖或主客相對而連畫不知簡牘交陳而累歲未寤一朝豁然洞

若破塞乃使訪田遠歸於魯人寶龜遂返于臧氏其爲慶幸可勝言哉是圖自辛未已來先後題名之士幾近百人徵蒐之勤殆爲莫二私獨異夫纖微之物不沈霾於風淪文字之精卒配珍於鼎彝則夫昔之仁人孝子危身棄軀卒以感皇穹之矜慈被靈祇之援拔垂光金石勒名青簡者爲大可信也

邱履平墓志銘

同治光緒之間中原兵事大定於是重臣碩將則并力合智以謀海上之事蓋其始湘鄉曾太傅用縣人爲兵謂之湘軍其後相國李公所部有大功爲淮軍淮軍名淮北人而廬州諸屬縣乃十人以九然方淮軍之先桐城有馬三俊命之廬江有吳廷香蘭軒宿遷有臧紆青牧庵並以儒人提挈鄉兵數破走悍賊而紆青所將有虎兵之目宿遷古彭城東連海州北走齊魯民氣剛勁材武故徐海之民往往多可用不者且去爲盜而吾友邱君履平數嘗爲余言之蓋君嘗提徐海間奇材健兒數百人從故編修靈璧錫嶸張君擊賊關隴間旣張君

戰死而數百人者亦遂紛紜四走有如雲飛蓬散不可復合若邱君爲尤可悲云始君以兵賊長短之策于曾太傅徐州軍門一見語大合而幕下計君棠及張編修以君又能爲詩尤重君其挈君入秦也令以布衣爲五百人將旣連勝乃使將千人君之爲將剗去故習破斥崖岸邊幅一以恩誼浸灌死士又能痛自磨刮委己於瘁嘗以所部兵搏賊數萬於虎牢追斬數百里其後賊乃望旗以走蓋君尤善簡討士卒其步伐擊制器械礮堡之法一以戚元敬茅元儀氏爲師而火器爲後張編修之死也諸營皆沒獨君所將能人人殊死戰竟以不動然君雖以失帥棄軍南歸而曾太傅終以爲可用其後卒因太傅得入廬江吳武壯公軍君之議兵知寒飢恤勞苦重百金之士貞信若金石以謂爲火器之用借資於物足令人人失自強之道勝則鳥聚獸并其敗也乃至風靡波蕩此與驅血肉之體以就洪鑪之燎何以異然是時中國數有備夷之事益大購泰西火器及習其軍法以爲鄉者戈矛刀劍之屬卑之不足用若君躬出入戰

陳之間獨偏意尊尙古法雖其用未嘗大褻於時固猶爲絕學者歟君生平行義多有可取其視朋友尤甚篤愛士如其性命救危急困不以自損爲悔故所至人多樂與相親然年少意得之夫聞君迂闊閑論或頗非笑君或輕君卑官窶人陵厲之君一以爲顯晦所遭不足復計也君姓邱氏諱心坦江南海州人其先實山陽人國初有檢討象隨君高祖自君曾祖移貫海州暨君祖父並隱德不仕君初以軍功擢至副將益棄去入賞爲候選縣丞竟以縣丞終實光緒十七年十一月某日卒於天津縣大沽口海神之祠年五十有五明年三月君從弟心澄來迎君喪將歸葬於先墳之兆妻劉氏朱氏朱氏前朱氏之卒余爲之志所謂邱君繼妻朱孺人者子三人福銓福漢福彪並幼福銓前朱氏生女一人適士族君旣卒福銓僦然奉君遺詩來乞爲刪定君之詩余向爲朱孺人志已昌言之悲君有文武之資終其身乃坎坷孤飄無一得心遂意之遇而世乃有身未嘗履帷幕之間幸得蒙上賞而握旌麾者項領相望也倘所謂運數

尸之者耶殆不然耶爲之銘曰

西漢募兵郡國少年曾李師之厥功茂焉梁楚之間古產壯士一人奮挺萬夫
躍起奇材劍客君合其雄毅隕輻折散如飄風主將旣傾君又大困纖兒爪孺
笑君迂論君長於余拙體相師願以遺集付余定之君身旣亡詩則奚補于紙
萬縑不澤黃土平生嘲謔今則爲真勒山置水何救陳人君行甚高不怨不售
書之昭明用告大宙

與譚仲脩書


仲脩一丈足下曩在江南始與足下書問往復其後稅駕武昌又從吳公禮園
備聞風義以爲足下方從武城莒父之政規子產門豹之績未皇討議文章之
事也去官教授起乎何年入楚返越以何本末今年朱君又笏以都試來京師
乃從聞之朱君齒學並進大異少年奇光騰紙玄言竟席殆亦足下忘年之友
矣因彼南返贈以小詩其卒章之亂乃頗及足下今之詩人多尙僞體假使叔

敖更生中郎不死。楚優雖巧。荆王安有寢邱之封。虎賁雖伎。孔融必無接席之語。如足下濯纓童冠之歲。纂懿比興之林。遂使六義黯而更新。四始絕而復續。不亦僂乎。又文章之體。多同俳優。新進少年。競尙口耳。曾不討究原本。坐訟身心。其人或略辨蒼雅。凡將裁聞扶風高密。便思巧爲緣飾。輒欲俯睨羣流。若京師有一二前輩。以文事自許。觀其體骨。乃無異常。製大都情響。餒匱駢服。牴牾諷諛。乖違續采。凡薄述問對近語。亦復初哉。首基紀都邑方言。輒謂瓠瓠服匿。凡諸癥病。應手而出。要其師法。非崇氣體。未盛類彼尺帛。方繪寸雲。遂同纖絲。裁傳微響。自昔子桓發歎。昭明騰譏。豈况今茲。能無太息者歟。承足下六十之年。方勤殖學。有衛貢之知。二有遽叟之進德。可以總事賚策。可以禮堂寫書。特恨星宿分躔。州部異鎮。接履寡路。撰几無晨。俯仰瞻戀。以爲敝罔。銘盤近頗。撰錄二晉及南北八朝故事。規爲會要。續徐博士之書。其體例乃一依博士之舊。邊海左僻。士人又寡。據几抑首。得失自領而已。因朱君奉述。盛指欲垂覽鄙文。

謹錄上數首惟賜教定銘盤再拜

祭邱瓊章先生文

維光緒十八年某月日門下士朱銘盤謹以清酌庶羞之奠致祭於文林郎山東卽用知縣先師南豐邱公瓊章之靈曰賤子之生頗負世謗高冠長鐔與俗異尙前有雙侯驚其童文方吳詔亮名起如雲侍郎斤斤掀之塗淖偉其文詞若駭虎豹遂以鄉舉出乎公門年盛意銳謂當翻騫癸丙庚壬春官四放遨於諸侯誦誦言狀旄丘誕節謁公無期遽悲異路舉學酌之悲公在皖送人宰縣白服俄霜驟車乍轂悲公入齊北征哦詩修仁客喻金鹿哀辭悲公曉徂託棺沙門愧匪宋玉招其師魂悲公直道古之矜者感重須無慨深柳下凡諸梗概得之流聞淚來若雨追其私恩晉有稽紹受辟成都服其舉吏萬口嗟無又有許孜師事孔冲送喪還郡行爲儒宗情則並前誼乃慙古蕭繁艾叢荃獨愁苦大海東注與江通波傳芭成禮以當九歌尙饗



桂之華軒文集卷五

李君墓前石碑

懷甯李君萬年字雲峯以道光二十年十二月八日卒葬本縣城北十里埠又五十二年爲光緒十八年第三孫補用知府延祐以君遷窆於縣西分龍嶺用形家言良首坤趾以第一孫延佐左祔焉君生有孝友之行推產之美收卹宗族存問鄉黨日若不及其他軼行尤多延祐晚生不能盡知大父事稍述一二俾書於墳前之石使子孫有考焉辭曰

李君第三孫與余友善爲布衣弟昆述其先祖以謂不可及絕嘆無言中庸之德民鮮久矣聞諸孔門雖有飛文麗藻信舌奮筆厥旨不能宣古人尙庸行今人高奇節卑之無甚高論豈知孝敬爲吉德文藝爲其輔道義爲之根若君名不出閭里非有賢孫孝息疇能窺本原我爲此詞以告李氏世世孫子以謁于厚坤

寫幽思賦

歲在玄默之陽。月次朱明之季。穹荒荒而無雲。曜晶晶而燔地。蓋火正司辰。蕤賓奉契。物假大以宣平。皇處臺而休吏。主人方收擊神明。調和口鼻。笑今閔古。區物以類。乃浩然嘆曰。悲夫。昔皇之愚黔首也。區之州部郡縣。閑之詩書禮樂。鈞以青紫黃墨。網以臺省府閣。后發口以尊典。臣屈形以仰若。被漢嫚而號儒。嬰辛剝而褻謬。昌騎項以激忠。賀鋸顛而抱恪。匪拜姒與廢姚。疇皇軒以鱗躍。蒙踈蹠於茅下。承先廬之遠芬。修弧嫩於手指。規仰弋於懸雲。朝鈎故於歆略。夕討波乎揚文。吁。小人之行險。既連謁而連放。無蘭筋之露奇。又不遘乎歎相。單居悲吟。禁思懲望。伏臘命於支子。妻孥竄於海上。是海也。濔泔澶漫。奔騰滂漾。古名沓渚之隈。今號旅順之島。直金衛之西南。綿度遼之波道。土斥鱗以谷寒。地春終而無草。萌仰海以爲根。耆賀元而薦稻。遑詢俗以咨吁。對揚越之侈淫。喜茲壤之未鑿。思架構乎豐林。策余騎於敦邱。將俛攬於奔流。帝王以之設

險謀臣俾倪而籌。僉元封之命。將壯樓船之寡。儔置詭機以瞽虜。映斬送於王頭。閔右渠之區。霧負嚴城以抗天。託赤心於諸相。卒膏草於野田。外臣之號不嗣。王險之祀忽焉。公孫起於郡吏。衍三系而逮淵。受侯印而不拜。誑吳使而媚曹。終冠犬之鞠。眚值狼顧之奮刀。彼首鼠之曹據。豈三遼之長王。遭雲攘而竊娛。詎越佗之是况。帝有錫於溫人。宣多閔而遽貺。嘉甯原之清風。雖三賢其疇尙異。煬皇之好武。將甘心於句驪。部十二之軍道。建南蘇之麾旗。申臨敵而請詔。郢垂拔而屢稽。內則土崩瓦解。輿僨舟覆。翻勞神於辟晷。忘沈膠與折輻。受降王於軍門。獻貂俘於太廟。勅嚴裝於軍期。方吳溺而仍笑。神武鬱其龍奮。排羣謨以徂東。發萊隈以飄海。指箕壤以過宮。吳艘隴其若陵。士怒沸而澹空。皇懸燧而兩箴。勸手鉞而監戎。野無重合之旅。城無再薄之墉。雖刻銘於爪士。實秉機於帝聰。州蓋遼於邦。販匪跨封而寶土。憫蠕喙之睽靈。故申方與命虎。寫蜀材以飭船。勒耆臣而取虜。怪纖酋之蠢蠢。賀逃威於塗鼓。陟金山而覓睇。美

唐驍之如雨。拔絳州於募徒。卒鑄崖乎天山。偉三城之立下。詔嘉功而載驩。獨將則所向摧朽。共功則岷威失師。故蕭曹秦越而同悃。周召肺腑而見疑。平陽別將而累伐。成紀左次而失期。若此之倫。不可殫思。俯金井之清冽。思鴻臚之遐情。誰某鑄於茲石。魂氣散於靈英。今攬昔而發慨。審方來之何名。夫操翰而述意。甯祈免於耒耜。憬微響之浮宙。嘉尼父之所營。德不建而名不立。又何議乎。虧成我升茲山。言睨羣塚。蓋有勝國之所經營。驍帥之所宅穴。其地乃草木披離。岡巘綿綴。魚鹵豐於軍資。嶮陁阻於斗絕。憾將忽其斬門。帳下糾而喋血。辟昧愆於偶棋。士弊忠於舌折。繫星門而雲崩。雖萬口其何說。竟坐棄於天關。憤士談而氣結。聖哉神乎我太宗之受命而帝也。貴降虜於後車。視宗臣而授節。蓋算神於晉帝。度博乎漢皇。步闡至而國宜都。項纏歸而封射陽。覩夫崇德之下此城也。則豈特我武維揚。侵于之疆而已。必將慰父老拊金夷。除苛政綏朕師。自我天覆。嫗以吹之。乃用發詔命。率經野置州。將不移軌。師不番休。固乃

纂嚴則扞圉軍期則鍛矛崇以上階武號資以牧苑屯田時清矧於兵略將貴
遠於戈鋌將無盛而不弊豈今窳而昔堅歷祀二百而迄乎茲年聖人以無已
用兵國家以備豫無患詔龍驤以飭材督荆尸於組練直萬於蒙衝鱗艦製百
於餘艘飛雲起耨鋤而授鉞何猛毅之紛紜錄公喜而主諾聖皇俞而云云麾
旄戾止旌旗龍文涼臺聞館綺纒糾紛私邸儻旅封澤汾沄極日歌與月舞訊
高穹而莫聞此齊氏所以禁於屯邸殷人所以刑於酣醺也可不傲懼乎舟卿
掌於舟船水衡尸於軍器集巧工而督程固威戎而鞏備剗膏血以灌卮塞儒
人之陋議憤南軍之前輿躬鑽舟而翦翅曾不肆夫市朝翻拜恩於舉吏於是
人民彘集市闌絡連家致異部之產戶有直突之烟晉戎駢咽漢胡相先趙女
盛於容飾齊姬亮於歌絃何埽土之僻左不日月而絕然昔之南蘇廢縣蒼巖
故鄆木底安復懷化來蘇懟方志之迕錯閱十口而瀕無又有朱旂白羽百勝
之兵並海置戍負山植營剗曾厓而設衛或闌谷而增京絙連巖以帶障若飛

蛇之胎驚冰裂趾而仍督炎龜坼而勒程卒頑鈍以苟飽何明恥之心生有冒死以爲刼乃駢頭乎軍門將靡共苦之志士有惡上之言博陳威而張武又奚前乎煩冤我徂南望言睇東萊祖龍之所凝蹕武皇之所裴徊燕齊方士之宅化人金銀之臺主招諛而自蒙下構虛以餌祿或邂逅以櫻誅有養榮於高足痛此人之謚愚曾不齒乎翔鶴指曾雲而西睇悼危邦於箕封吁辱王之寘御蹈報惠之往蹤雞晨而商精晦雉鳴而殷道凶外則虎視逐逐國則狐裘蒙茸匪王靈之不逮疲百牢之是供犧牲陳於二境杼軸竭於司農皮之不存毛將焉附周子命於諸卿衛燬安于大布庶盲視而痿興在王衷之一怒其北則天之析津國之南戶持節都督之本封司州刺史之屬部府公則總統州兵別將則分開軍府校射則馬若龍程力則士如虎論兵而孫武舌撝敍閱而青病色士暨乎墨子之鈎距名船魏公之霹車爲器田單火攻之材徐承舟師之帥韋豫州之英驍張長史之辯智陳平陰謀之異能陸賈下佗之僂議皆收英攬豪

區門部類厚滑嘉魚此飽爾醉若乃華門圭竇之士槁項黃馘之儒幼諷尉律之字長誦學官之書考典則孟堅子駿飛文則揚雲相如或欲升高邱以望遠海或思臨岷崙而釣巨魚蓋逸氣陵於常輩高情配於皇初曾不得與乎數子焉蓋天下之所尙尚殊矣古之志士有視天畫地招魂哀郢者抑又何居乎闔蓬竇以處默據案几而優游揖三古於黜漠網百氏於玄幽或孤嘆以獨矧何解人之予求閉高議於腸肺乍啓脣以仍收昔陳王之生貴且居疵而私憂矧旅士之細微實浮湛於堯日託靜思於文絃蕩繁淒於清瑟感候產以瀑懷匪庶華而丞實其爲春也則思夫江南草長雜華綴丹黃鳥暝響元羽振翰百芬敷於林色衆羞薦於俎盤駘遙思以流詠行履紛其迎歡左孺右稚送溫知寒若夫日永仲夏陶陶體安俯澄瀟以送矚養停雲以凝觀寘前瓜而後李喜漱寒於石齒連詩招於玄暉琴歌邀於周子洗仲路之北聲陋雅哀之小己忽大宙之返令仰高天之露激撫江縣之砥壤東臯戴其可升賀暘澤之順敘數秋

茨之敷。勝米斛直於三十者。加額而孺騰。雖堯年與舜代。曾未足以喻其嘉徵也。於是元冥司威。天收地闔。萬植告功。水吐火納。乃講老易。詠國風。召管輅。速孔融。呼劉伶。謁揚雄。究玄言乎所極。剖儒墨之異同。頌酒德之本始。像文章之聖工。第古材之品目。攬天人之端終。四序眇而禪換。娛樂繩而不窮。神不叛於理物。雖顛沛而帝通。丁驩娛而固有。躬劬疲而念茲。彌年歲而不返。告靈表而無辭。往羣季之我問。戒歲辰以爲期。旣一門之待飽。又無田以植葵。買園虛於讖夢。誅茅形於謳詩。呼老兵以醺對。接僮荒之話談。禮護軍之門士。謁浮屠之鬼龕。懼裂壤乎聖幅。類嵇公之不堪。幡孔思之行素。尼訓貺於我甘。懲險怪以取貴。俗駭震以醺貪。齊大鳥而歲伏。鄭小駟而御駟。物幸蹇其何怪。士墜昇而匪慙。言念故人。東西朔南。張叟頤志於養舍。周生瞻戀於白華。范伯韜精於公府。張季嬰歡於耘瓜。或七十而疑年。或四十而言老。平生師友之故恩。端居飛揚之襟抱。昔感於朝挈。暮提今喟於長波。遠道睽彼英儔。騰茲遙想。莊舄發於

越聲尼父眷於闕黨信萬族之齊懷詎凡情之未廣寤億類之一致何部區而分曹生出於人主之口歿聽於文士之毫或虎用而鼠棄有先笑而後號孰膠而如晦疇鶴音而聞高信在物之名裸若九牛之寸毛悲夫昔者金章紫綬之貴士龍軒鳳附之人豪侍中詔詰之顯職祕書史官之英髦或口銜憲制筆司譏褒立朝堂而述典若波淪之滔滔痛代人之受柄何私鉗之可逃由是觀之人學義而得師玉爲璋而俟琢故克己詔於顏生修身嚴於方朔古之哲人型于先覺至乎蘇季抵掌而動趙于髮絕纓而貴齊蔡澤片說而搖應范雎立談而感稽朝負薪而被褐夕對組以臨珪今則諸侯無客辯士無師師無孫卿鬼谷弟無韓非李斯百家之學絕一聖之道熙封君有時而牛馭待詔不免於腹飢故五穀不熟不如乎萑稗雖有鐵基不如乎乘時信此言也顧博博其焉爲

關天君行闕之碑

敘曰漢諸儒刺六經王制厥昭羣祀之名晉內史錄古文武成惟曰百神予相
其後太一最貴置於壽宮神君秦鬼有神禮于將軍杜主其神有言語飲食祕
書不授於代人其類有諸布九臣祠官不領於侯國扶風郊祀之志龍門封禪
之書並致嘲譏無煩陳著若夫帝重華之大理皋陶爲司獄之神陶唐氏之火
官闕伯居商邱之士臺昭宣於汾澤實金天之帝孫實沈應於參躔固高辛之
季子祀太伯於吳郡祠老子於賴鄉議功則萬邦惟懷校德則百世勿替亦有
馳馭龍虎嘯咤風雲非侯非王無年無紀壽張臨濟蚩尤並造於神堂江左吳
興羽項仍留於祗殿至夫曲逆獻侯之鴻閔歿爲淮水之靈楚相伍員之戎功
祀於博平之縣秣稜尉東京毅魄南朝署蔣帝之神城陽王西漢高勛東晉建
臨淄之廟黃陵左姒王治水奉祠於蜀漢年中翁仲爲秦皇將兵鑄像於司馬
門外生則銘旂勒鼎歿則蕩患扞菑未有異勛昭於當年神功靡於百世出雲
見怪不足狀其神靈畏衆服民無以眩其變化袞龍法服備帝者黃屋之儀折

俎加籩視尼父褻成之秩由京師而迄萬國胥建於神殿靈宮自天子以至庶人必備於齊明盛服如漢前將軍漢壽壯繆亭侯者也案晉著作郎陳壽蜀志侯姓關氏諱某字雲長本字長生河東解人也原其受姓關龍逢建讜於昏朝語其旁枝關伊喜延芳於周季世表臨蕩譜牒波淪河東神堯之故都解縣解梁之廢邑昔則號爲劇土漢則少有人久鬱而申極乎杪暮惟侯稟山川之媪富挺宇宙之殊靈傳說應箕宿而生鄼侯感昴精而降百六鍾運數值龍蛇五百應期身爲閑散功躋上將而德配於闕里先師位終人臣而貴極於太上無位聖哉神乎不可知也袁彥伯三國名臣之贊事異于荒邈之年班孟堅十人通侯之銘語系於皇朝之典如侯功在遠古而上澤流杳冥之間言幽異則疑於干令升之搜神述靈蹤則類於祖台之志怪述聖之經安在事鬼之道不存綜後方前厥有義例以爲昭烈劉宗之裔曾無通籍之名涿郡禦侮之年未有君臣之義分管區部非若亞夫節制之兵絕旨同甘無逾魯將吮癰之愛

乃精貫日月。恩洽波淪。扞城嚴于公侯。翼衛堅于領護。先主周旋節鉞。出入敵
隰。甚沸湯之擬雪霜。危衝風之當脫葉。非侯之力。疇濟艱難。操盾拔主。以顯功
名。則漢高之樊噲也。雲擾之世。多昧正閏之名。螿戟之夫。輒以金帛爲利。故以
三齊辯士。知有韓王。漢王護軍。同於賈儉。惟侯高識冠絕羣流。以身許君。百死
無二。曹公網羅英俊。溢極優隆。口舌銜於憲章。車服擬於九五。烏則擇木。魯叟
不事於衛侯。臣無二心。狐偃名在於重耳。定節立謀。千載一遇。則光武之馬援
也。三古命將。惟詔六卿。季世軍官。專惟武用。力牧棄爲蟲簡。六韜視爲塵言。遽
欲毀議孫武。低昂翦服。惟侯聲震天下。兵冠諸侯。指麾而楚漢動搖。舉足而隗
劉輕重。出則摧破強虜。入則造次儒生。穆如清風。載流諷詠。孝友之德。敦於詩
書。則宣王之張仲吉甫也。且夫火德告謝。羣雄蓬興。號帝稱王。跨州連部。昭烈
裁辭履席。甫攬英豪。商賈之富。儉於一成。縣尉之官。卑於牧正。惟侯有梁統推
帥之義。有僖負鑒微之精。有平仲事君之忠。有子產敬上之節。卒能摧蕩凶逆。

開建神都祀高配天不失舊物冠名諸將之上紀閔中興之編又少康之女艾季杼也天不佑德以忠隕身臣主倉皇公姓衰替雖沈名於簡牒實流神於中區逮至隋年肇建祠廟有宋崇甯之代始勅署於真君勝朝永樂之年乃備禋於中秩萬歷季歲增奉崇名曰三界伏魔大帝神威遠鎮天尊關聖帝君從道錄也顏子淵爲三天司真晉文公爲水官司命臧洪授北斗天門之亭長庾亮拜太帝中衛之將軍義取神書無關典制列聖道洽區宇百神効靈秩祀之儀有加往典乾隆三十八年三月己丑制曰朕惟關帝歷代尊崇逮經國朝尤昭靈貺前於順治元年勅封忠義神武關聖大帝至康熙雍正年間復爵晉所生澤延世裔典禮優隆朕式展明禋以神原諡壯繆未孚定論爰飭禮官易諡神勇是皆考行定名俾彰義烈若夫靈威默相屢荷嘉庥宜備懿稱益昭美報可加封忠義神武靈佑關聖大帝其官建祠宇秩在祀典者並依新號敬謹設立神牌大哉聖言至哉神道上靈斯眷嘉貺屢臻嘉慶中有震懾逆匪林清之功

道光中有穢擒張格爾逆黨之異載在實錄昭示萬年益以歎漢之白石神堂
晉之赤松靈宇宋彭城之白狼壇廟齊義鄉之長風鄧神猥隆法食之名無當
奉常之典豈如侯之雕名策府流潤大宙皇王后辟合周公之釋文大行大名
符太公之謚法子思謂發強剛毅天下至誠子輿謂至大至剛塞乎天地其侯
之謂歟行省一十有八郡縣千有餘區並以二仲之良申茲薦報盛京奉天府
金州旅順島者備海之險置水衡之行署文有左右光祿之秩武有車驃將軍
之班掾屬有諸曹參軍之官部曲有騎督戍主之列咸以禮有舉而莫廢神有
格而如臨是用規建神祠開通庭宇東漢遼西之故郡公孫文懿之舊封昔沈
淪於當塗今鈎連於左海王師如雨非無高皇雲龍之英南海爲壘足陋周王
攻同之士翩靈旂而晝下常巡夫綿嶠長波瞻將星以夜懸俯照乎凶夷小羯
庶憑顯耀高翼威雄兵氣以之飛揚凱吹於焉盪闔才非張祁謬製於華山堂
闕之銘文謝陸機乍騰於高祖功臣之頌是知曹東阿述素王之禮必推燉於

今皇薛元卿作老氏之碑。實歸恩於天子。系以銘曰。

炎精四百。皇運中微。東井匿曜。南頓潛輝。費亭燼灼。揚粵翻飛。劉宗下轡。虎將前旂。其一桓起布衣。超通降牘。忠拔堅墉。雲扶顛轂。關實元功。恩惟骨肉。名首五臣。精感二牧。其二臣維攀翼。帝則潛龍。管蕭定冊。耿鄧摧凶。文儒雅詠。驍帥推鋒。萬夫之敵。千頃之胸。其三戲悼隕身。壽評國士。韓耿雙蹤。望閔貳軌。忠咽江潮。誠開玉壘。華杞如生。先軫不死。其四倉皇置史。草昧營都。書文寥闕。實錄荒蕪。雲頽庸蜀。日黯夔巫。遂痾皇抱。載歎炎圖。其五冊府屢朝。侯封三系。輿位侍中。統連帝壻。參議爵堂。綿榮甲第。燎火方揚。貞金共敵。其六季漢之英。江山炳靈。電飛敵愾。虎烈時驚。生丁皇會。徂落星精。昭昭神感。千祀垂聲。其七絕地通天。事人事鬼。申毓崧山。相趨箕尾。澤流下人。精感皇辰。籙筭時陳。衣冠古偉。其八爾神予佑。曰若聖皇。屢崇顯號。載勒典章。武成尙父。鍾山蔣王。未齊上秩。甯配升香。其九邑邑靈宮。都都神殿。芳潛春陳。嘉殺秋薦。日次上下。禮規釋奠。

制命陳儀重臣北面其十古之軍祭秋獮春蒐周祠馬祖漢禮蚩尤惟神孔武
厥聲長流吳艘魯戟楚練秦矛十一德澹海澹風清碣石漢旅前縱隋兵往迹
青部妣暨嶠夷堯宅地攬東枝天隆左腋十二威戎夸翟稱干比戈皇威震爚
神聽誰何庭宇晝肅礪俎晨羅雲雷闔闢劍佩磋磨十三竦閣干霄危樓入漢
功溢區中神臨霄半飲福嬉娛雅歌豈衍淪漣東徂芳馨不斷十四

朱氏宗祠述頌之碑

朱氏之先厥祖凡四一爲宋微子啓子公子朱之後一爲陸終第五子邾俠之
後二爲拓跋魏族渴燭渾氏可渾朱氏改姓朱氏之後獨邾俠之後最盛大有
沛國丹陽永城吳城吳郡錢塘義陽丹陽太康諸望凡九族吾宗長老皆言其
先出沛國然特無載牒可證獨吾祖僉憲府君所爲朱氏世表有曰宋贈御史
中丞府君爲始遷泰興之祖謹案府君諱寶明宋淮南西路定遠縣人當高宗
之初以參謀軍事棄官渡江買疇治宅遂爲縣人凡二十八傳以迄于今蓋自

中丞以後十五傳至明崇正元年始有合食之祠其後迭廢迭興不常厥盛盛則戒事之辰子孫冠帶父先子後秩然有序不盛則牲瘠酒酸拜起雜沓鬼神咈焉不享蓋始皆有程法可依據後亦寢變寢廢焉光緒十有三年冬銘盤爲朱氏宗譜旣成益念上世懿德醕行闕焉無紀且身粗曉文章獨遺忘先德不爲勒記大不敬又五年乃始爲述頌之碑而敘之曰吾宗始著籍此縣爲冠帶之族蓋自宋以來爲京朝官者有御史中丞一人殿閣待制一人左丞相一人尙書一人侍郎一人郎中二人員外郎一人拜中書不就一人行人編修庶吉士各一人六部觀政二人國子助教典籍教習翰林院待詔兵馬指揮詹事主簿禮部儒官等十人爲行省郡縣官者有宣撫使一人鹽運使一人都元帥一人人都總管一人諸路總管三人宣諭使一人巡撫一人左右參政參議二人按察司二人布政司一人分巡道一人知府二人提舉一人同知三人推官二人知州七人知縣九人監督州同通判州判縣丞州吏目衛經歷布政司理問縣

尉按察司知事府經歷主簿教諭學正訓導巡檢大使檢校等一百七人。又三品大將軍一人。校尉一人。衛指揮僉事一人。乾清門漢侍衛一人。都司一人。營衛守備千總把總外委等十六人。爲武官辟舉十四人。舉博學宏詞科一人。舉賢良一人。進士六人。舉人十二人。武科進士一人。武科舉人六人。諸生三百二人。諸生重遊泮水二人。爲科目之士。府僚有王府總管紀善長史公府學錄元帥府檢校各一人。其由府僚召見賜官及御書一人。武官賜孔雀藍翎二人。死事贈將軍一人。祀鄉賢一人。著書可傳十二人。勒名明史二人。通志二人。郡州縣志四十八人。書名旌善亭二人。受子孫贈官二十九人。以富人爲糧長六人。其以從軍改龍門千戶金齒鳳陽懷遠甯遠鎮東三萬等衛軍籍七人。皆在明世。寄籍沐公府及通州大興等五人。四在明世。一在百年之間。又明以來遷浙江二人。金陵儀徵各一人。靖江通州各七人。如皋十二人。山東大興揚州陽湖雲南各一人。皆勒在世譜。嗚呼。一人之身。七八百年之間。而枝裔散處六七行。

省大者無慮數千人小亦數百瑰瑋俊異特出之士殆皆不可勝紀可不謂極盛乎哉自古賢人君子身榮名顯則必有鐘鼎之銘祠堂之頌以謂先祖之德其傳于後乃益無窮也其並世聽聞者亦遂羣焉拱手推服信乎其德之大且遠而其文章又足以光大顯耀之則其推本於仁人孝子之心爲斷不誣焉且又使邦之賢大夫得行其族正族約之法以輔飭善治彌縫政教以返乎三古聚民之風宗法既定而門無私爭義田有常資而子弟無頗辟卽亦先王之隆治而神靈之所灑然而喜乎泰輿之置縣自南唐始其由異縣遷著此土以吾宗爲最先而戶口尤衆今則幾萬人矣往與宗老數公歎息而言悼生齒之日增懼祖訓之易墜以爲天祚我宗必將有忠信果毅之夫身榮名顯慨然動于心遂以振拔而保持之者其非儒人之空言焉無疑也昔方侍郎議吳郡范氏義田計口授糧俾愚者怠于作業因以爲非義其論誠美矣彼獨非吾祖子孫而令其若此若范氏固亦未可輕議也哉旣以語宗老乃揚述先德而爲之頌

曰

中丞斤斤文經武韜從軍衛主摧戎江皋遭世屯塞志沈波濤蓋有天幸身為

宗宋御史中宣撫奪材有聞無紀仲公抱貞慶流厥子芝壠告徵神娛萌喜

實有篇章如日止止宋宣撫使總管亮特作鎮于揚保州禦寇厥闕用光

帝頒政制曰余汝賦卒為良牧身榮民康元揚州處士猶傳沈默有恪孝

弟於門德隆位薄有息蒸馴述先如昨勒漢故民方古天爵明處士鎮國孔武

明之虎臣書庸巴蜀隕身全圖單騎沈敵塗草膏輪皇贈都使垂聲萬春明

將軍長史瑰文耽幽娛寂高望陶疏匪沮伊瀾忠懷閔皇和而不激帝嘉旌

堂世儒奉覲明秦王侍郎雋異鐵基晦農遂登薦板剖符大封詔貳太宰朝

堂寅恭遭喪痛絕行為門宗明吏部贈公孺親剖疇析哺子弟溫涼六親甘

苦厥宗以昌君實張戶是生參知蹈其前武明參知媿媿儒風煦時推

燥就溼守玄抱雌萬口誦善公讓不怡孝友之則儒人所師明磨翁孤

驚醕德不曜晚遯荒江形賀影弔循牆讓耕謙宏內劭代嘉其風先暍後笑明

管士校公承樸受榮不違淳心質行絕俗偃機卓有鄉譽邱園道肥有子致孝

扞城帝畿明指揮諱倫僉都錚然忤璫下吏靖海表庸萌謳士記終憤蠅

樊遂同蕉穎玉改宗沈行歌坐淚明右食都御助教通雅薦膺大科世典淪蕩

官書誰何追懷鴻筆馳想鑿坡書揮寶翰晨鳴瑤珂博學宏詞國子助教諱敷公清華和

中以介雍容膠橫柳清伯隘寢古忘年齊懷青芥孟輿不云學如蕘稗明諸生

行人貞白臺使之模戒擾却饋風清上都知生知卒陶生同符名德方顯中道

云徂行人司行慶遠吏能在官清潔摘伏發奸雄摧豪折百務騰功萬口惜別

實有私文追銘芳烈慶遠知府樗巢潛學老注春秋杜門冥想孤懷寡傳弦詩

獨慰古聲以抽歷紀二十神隨天遊孝廉諱萊翁名耆究心儀制極論鄉飲援

古茲契王禮是昭餘風不敵實惟翁功通堙決滯諸生諱明經老德邑子所尊

任卹是務孝友在門漢興厥吏幹聲飛軒惠猛不害慶流子孫楚賈諱西漢

桂之華軒文集卷五 十一 一

子惟雋材孫則幼惠詩語驚人基爾三世振翁討幽癖古專詣書亡題存十

口紀歲諸生賦葉子明經篤孝奉亡若生伏臘拜墓痛哭失聲疾風飄

雨神淒魂清餘善丐衆嘉會元亨鄉貢州佐清風流澤邦壤旌門勒珉昭融

吾黨輔公嬰嬉膏潤滋廣舖及窮門道弛禁網州同摩河壯邁退息漢

陰長枕大被風暄家林懷遠經論沿辯漑今弟子著錄載傳雅音訓導

賢未跨諸生明經馴德百年一規閉戶愛鼎升堂供脂曾與請徹老萊嬉兒

題名貞石清風焉追金祕郎雅篇伯仲彥謂季挺麗才討古是侶老抱孔

經歌風情抒兄弟怡天笙簧牡粒編修監州雋健蓄意高文馳

情漉瀼清言吐雲山水是好悼道無羣聲動相國勒詩有芬直隸孝廉禁

方今之倉扁閱儒是嘉題君上選匪藝足矜悼才不展有斐雅文淵淵清辯廉

贈郎在約拯危後軀儒林尚誼敦風橫數俗濟甚水君溫若鑪名在方志

范諱 贈郎在約拯危後軀儒林尚誼敦風橫數俗濟甚水君溫若鑪名在方志

後賢用吁

贈傅林

曾父樂貧殆庶淵憲觀文甄圖遜世无悶羣仲循循日

暄風契清德代師詔我教良

補生

廣文行篤在官承顏晞翁

幼學爲章班班有弟博物著書緘瘼厥聲不姚後嗣何攀

秦州學政

尉肫仁忘軀起母卑僚有聲頌懿在日月翁博懷探藝如藪微響纖資蕩靈十

九

武略

奉直無祿苗秀不華宣尼斯嘆君子用嗟遺文發篋秋禾春葩

固嬰曾痛晚暮時斜

贈大夫

王考勳清勲勲教族繕治神堂宗靈有肅重惠

知歸近道若谷仰惟潔鮮禮云盟獨

贈大夫

清苑宰縣省繇惠黎公事解職荷

戈邊鞞朝臨馬窻夕備白題厥有雄製稿草是稽

清苑知縣

詹僚幼聰帝經爰

究規配中藏鞞脫獨繡縣佐慨慷救災弭寇旌閭匪誣揚芳豈陋

贈縣丞

府君卓苦壯乃得師報恩舉吏心喪比兒重爾千里返樽歸尸潔白在性芳

馨自持

贈大夫

滋叟苦吟王孟是祖晚嘉徵生牽柯獨取詩法昭融仍規襲

矩地志不彰刊名世譜

縣丞

文林早惠下帷遠經五放不起鞞藻遺

若雨子姪亭亭遠有佳譽延芳戶庭

學隱文弟
生隱文弟

晨老席貧耽志小學却饋

忍飢居邱抱慙厥弟鴈行馴風照倬莊云貌天匪絲般斲

諸生隱文弟

主簿

博士異材同趨崇風右義後勞忘劬溫逮微細寒人用蘇里老述歎今士則無

主簿隱文
縣導隱文
連城

桂之華軒文集卷六

柳西草堂記

柳西草堂在海門直東若干里。曰長樂之鄉。其中有俊人焉。曰孝廉通州張君。厥字季直。又曰處默。含道韜文。茲焉游止。通州江海之國。張宗孝友之緒。陶季直止足之雅。君羨其蹤。沈處默處士之林。君雙其懿。登高能賦。不爲大夫。行年四十。身在季子。其爲虞樂。何以加焉。夫術業無盡。功力有程。是以衛賜方於顏生。顓師比於卜夏。聖軌賢迹。非所敢同。至如孝標自儼。敬通謂有三同。四異。以余方於季子。蓋亦同異。曠然粗舉大綱。以當談笑。季子出身壠畝。家爲寒門。噓枯吹生。仰於代彥。僕單蔭衰薄。門無從政。祖文父筆。裁見彫摧。名師佳朋。遭逢壯日。此一同也。季子偉文閎製。照郡騰州。明經孝廉。匪顏伊伯。朝士望而捧手。里賢就而乞論。僕小才鄙什。彷彿大賢。猥同邦州。遽齒世喙。顏謝潘陸。連類而言。此二同也。季子負俗孩年。不爲里擇。浮湛壇旆之下。論議帷帳之內。西曹祭

酒諮議叅軍流連賓僚激昂府主僕雁行兄齒首尾十年對案裁書聚火寫檄此三同也著錄武昌之門盡通賀瑒之業上書侯官之府幾蹈正平之危氣壯神高曾無悔嘆名滿千里謗亦隨之此四同也季子家有敝廬可蔽風雨野有下澗足供酒稷一歸不出堅若邱山招隱之篇不日則月僕一椽一壠什二不訾妻兒紛然留滯窮海朝對門士夕呼老兵眷望端居報我夢寐此一異也季子上有老父兄祿千鍾老萊斑連之衣少君挽車之役昔聞此語今見此人僕霜露摧心遺書在囑闔門計口菽粟無情此二異也季子軒車所適多有通人陞伏鄉邦匪無忠信芳草十步賢士百里足以陳述高議激礪心神僕東走二遼地如裸國發言建論暄寒在心翻悔平生猥知文字此三異也同異之數在於偶然君子之行貴於守素若僕况狀又有甚焉何足摟抱觸懷申吁啓嘆第以王風蕭葛詩人慨於三年粟里停雲貞士睇於八表况僕於季子情好有加類銅山之於洛鍾甚鍼鋒之於磁石送襟贈抱又何異乎昔者司馬琴室王融

絢其華篇。新渝茅齋。延年留其高贊。季子之舍。乃無吾文。足使窈窕私吁。淵祗發唱。季子處陵藪。而懷夷老。佇蘭林而眷幽人。亮有高情。鑒茲微慤。上堂置酒。中廚烹鮮。左顧孺人。右顧稚子。激流植援。問農督桑。無戚戚之懷。有俯仰之樂。豈知仲舉掃室。匪無登車之心。黃門郊居。終有西征之賦。

弔孫聖與文

光緒壬辰春。余以都試入京師。兵部吳君彥復示余所爲詩。有哭孫聖與一篇。聖與蓋從前出使日本大臣黎公庶昌爲記室。比黎公代人至。其人故善聖與。及是乃大何聖與。聖與旣辭歸。中路溼鬱雷憤。乃遂投身海中以死。死後日本人有善聖與者。或爲祠祀之。聖與安徽來安人。諱點。初字子與。以拔貢生官直隸州州判。嘗從興化劉先生學。爲高第弟子。好友當世知名能文章之士。余雖無似。亦其友之一人也。因爲文以弔之。曰。

嗚呼聖與。弱余數年。余以弟畜。徐行不先。今之世宙。若風鼓塵。孰爲賤貴。孰符

孰麟聖與不察乃隕厥身早事劉公循循學道胡不自珍視軀猶草境往觀昔
淚來瀉今招魂何路蒼波沈沈有母有妻有子提提養堂渺蹟寡婦空閨左徒
俄終魯連匪假氣高行危蕩魂淵下精感殊族廟以祠君焉如老友宣哀斯文

陳百生遺集敘

檢討陳君既卒之明年余從其家得所爲文詩若干首其詩凡都爲四卷往者
甲乙之際余與君同在揚州兩人相善也殆無三日不爲詩一日呼余及蔣太
璞同遊平山堂余墮騎破額君亦陟陂陀下墜幾摧傷足趾明日乃各爲詩相
嘲笑以爲絕樂君於詩慕其鄉先生吳野人布衣之風顧不銳意刻深遭逢兵
革身在帷幕之中故指陳時事若伸拳而數其文野人不能及也旣爲進士入
翰林翰林名爲侍從文學之臣所爲文乃益和平夷擇無有殊絕者君好博觀
廣覽其廷試嘗引鶡冠子語幾左置丙科方君別余去揚州入都也抵書報余
程次及室屋車馬僕賃諸細事甚悉所至多有詩詩未嘗不及余蓋君論事喜

跌宕昭朗爛然一陳利害於前而無所愛蔽其爲詩殆未嘗不然其平日與余共賞文字或有所推奉訾鄙兩人意悖又往往多同雖相違覆無大改焉顧君頗好深沈之思其顏色乃望與淺人無異意其才略誠若不可度量者歟造物生此人又不令一試其用豈不悲哉君卒之歲余府主廬江吳武壯公嘉君之文以賻贈之訾命余爲刊布之今距吳公之卒又九年矣君家在東臺去吾縣幾二百里家又無張戶之子久不相通問獨其詩日陳於余前時時得諷誦之與面對若無以異焉爲尤可悲也光緒十八年七月初九日

歸來軒遺集敘

秦東門之故壤漢臨朐之舊封淮南二邱之曾孫湘鄉相公之府吏其材有文武之質不遘於雲起龍驤其沒以五十之年遽痛於寡妻弱息歸歟之願若盲士之求元珠飛騰之心甚弋夫之慕高鳥足令志士短氣朋舊摧肝玩諷遺文流連雅故此之不痛孰則可哀沒而不稱爲善何望余旣取邱君履平遺詩四

百三十七篇。勒爲四卷。於是平生故人讀而歎息。咸以君生有昭質。不假羽毛。沒爲故民。無聞金石。獨其英光烈采。昭曜簡編。苦孝危忠。激昂諷詠。居有孝章。盛年之嘆。行有孟堅。幽通之思。入有季路。啜飲之艱。出有平子。愁望之慨。有妻如敬通之婦。挈鼓懸幡。有子如王霸之兒。蓬頭歷齒。茅屋蓬戶。居無一椽。下澤。墾田。耕無尺地。乃能夷猶烟月。擗闔風雷。開張國士之風。跌宕人豪之氣。篤耜。朋好。尤善文章。儒林則劉注。任戴之英。儔文學則杜夏。黃劉之偉。士奇材劍客。淮南王帳下之豪。方伎雜流。范秘書傳中之輩。嘗遊濊貊。識其大人。比其還也。賦詩盈篋。且君之信友。一務吐誠。疾惡若風。說士甚肉。是以三更府主。再入兵間。上賞其忠。下感其誼。文淵可邀二帝。平仲能事百君。史鮪用秉直爲懷。公孫以惠人爲學。吾聞古語。今見於君。昔則親接容光。今則追哀往故。建鄴駐車之日。揚子對酒之宵。討秦碣於之罘之山。慕漢功於元菟之野。從莊生而說劍。呼馬服以論兵。日月幾何。音塵不嗣。海有東逝之水。日無西迴之光。君家海上。相

去或二千里而遙。僕滯周南。著書非五百年之作。撫今悼往。聊復寫之。

曹君墓誌銘

今年正月二日。吾婦諗余曰。吾一昔夢衰麻拜吾父。吾父其死乎。余發占夢書視之。如是無凶兆者。又十餘日。婦之弟手書報余曰。大人不幸。以今年某月日棄孤子。卒之先無有疾病。其日沐浴談笑以逝。蓋君絕篤於倫理。於庶人之孝。無所不盡。其視儻然利祿。若潔衣之畏泥淖。少孤養於繼祖母。既壯大。肫然孝養。不爲章章昭褻。繼祖母有所者求。雖甚難致。至鬻賣他衣物以給。夫婦奉匱承盤。視頤所向。或微忤指。則悚惕恐恐益謹。俟意解。歡笑乃敢去。平生未嘗議人愆過。有不合。卽微言解譬。俟湔洗乃益親愛。其喻人孝弟廉正。若出天性。然里中士人與君相知者。殆無一不謂君長者。要亦莫能名其人也。性尤絕介。雖親昆弟。未嘗意有求取。或至數日。不能有一錢。君則獨貰薄酒自酌。披書微諷。婦子怡然相對。卒未嘗見有可憐之容。彼其意。豈知有勞神焦思以求利祿之

徒之爲者哉。是故不易幾也。君姓曹氏，字子勤，江南泰興人。縣學生員。祖金鯉，景山宮官學教習。父怡歲貢生。君以光緒十八年正月四日卒，年六十有四。以其年某月日葬於縣南某原。先墳之兆，妻葉氏、子二人、國琛、國琛女三人皆適士族。孫一人、炳，孫女一人。誌君墓者，君長女夫同縣朱銘盤。銘盤挈妻子外遊，與君絕闊遠。往者君抵書，歸時惜余牽率於人事，益委詞謝君。君之行灼然於鄉里，近學官徐君以行端志潔旌君門。余聞之以爲近古郡縣中正之爲，且坎坎以喜，不虞君溘然以往也。銘曰：

一士稟介爲縣宗，馴行潔矩今不逢。厥聲闕邇靡遠縱，夫姜妻桓息禮恭。女夫述行哀摧胸，匪右厥戚惟心從。鑿石配謠于春冬，八月爲壯辰在龍。

朝鮮平壤城箕子廟碑

荒荒嬗步復者天地之心，洋洋造功大哉聖人之道。啓于殊建，宣父苞其殷仁。伊墨分塗，輿叟賅其百里。窮地互世，故夷叔有造天之聲。黜桀尊湯，故大人爲

偶道之首有天地然後有萬物有父子然後有君臣語君臣則乾上坤下皆有級威語萬物則方足員顛皆有血氣建邦分土何必黃帝九州翼子詵孫何必夏王萬國且夫陶居成市羌有前規燠穴爲君匪無曩典况乎聖人之後吾君之子配天之主七葉實有卵翼之恩東方之夷九名固無犬羊之酷太陽迴照萬植繇其昌蘇甘雨滂垂百情此焉震蕩遂使禮樂射御蔚爲中畿蒲姑商奄衛我東土上有翼戴王靈之后下有北學中國之儒孔子曰君子居之何陋之有若此者厥惟箕子乎案晉司馬彪云箕子名胥餘服虔杜預以爲紂之庶兄馬融王肅以爲紂之諸父蓋靈河別派帝幹旁柯比熊枝爲昌意青陽方姬緒爲文昭季穆國則河南沃土爵則五等崇封貴爲太師密爲宗室懿親國老無與二焉遠巡煬國方騰象玉之波扶翼酣王卒覆共旒之緒撫弦激響不能蕩太白之羞負石沈軀曷以藥狡童之痼由是隻輪于邁被髮東徂以爲檀君王儉之故城神堯營州之外徼析津當次箕宿臨躔其地爲冽水汕水神明之區

其人有嶠夷藍夷賓門之典故朝鮮地志以爲箕子所都曰平壤城今屬平安道卽檀君始都也檀君建國在伊耆戊辰之年箕子開都當武王辛卯之歲邈近龍興之會遭逢絕德之皇並綿緒于春騰光累謀非偶然也明德之裔必有達人有功於民報之百世漢延壽元祀實鑄倉頡之碑晉太康十年始勒太公之表展大夫之遺壟生王翰樵禁之科叔梁父之靈宮弟子下豐筵之拜司州鄴縣有西門故令之祠東郡長垣有卞人仲路之廟公孫子產新野奉其神堂國相伍員東燕造其靈宇豈有建邦置社辟土經疆語文德無異太伯開基校戎功有若無餘啓霸且夫青邱攢木陋逾龍子之鄉九津揭天瘠甚鳥田之產傳系四十一世祚引於姒裔姬苗分國二十一都地撫於句吳于越如使矢弓告瑞偃王不神六蓼沈宗庭堅斬祀則是疑聖人爲大盜信畏壘有穰年楚產自隔華風杞子甘淪夷禮君子之澤豈若是乎平壤箕子廟者在城中曰里仁坊蓋前古之所建攷其支裔是姓鮮于代有賜官守其廟祀李氏有國因循前

規隆以崇禋待之賓禮而祠後有箕子墓其旁有古木一本井田一區皆傳爲箕子所遺云據中都之名壤面大聖之崇山扼牧丹之危峰臨九疇之特闕八條聖制萬撓秣而恆新四宅神區百堯年而不變丹楹藻桷恍瞻於重屋曩規山龍華蟲似仰於黼冠舊制加此邦纓冕七十之服仲尼累姓君王行潦之宗河海語其道德卽曰東方聖人聞其姓名如諱私門考妣自昔一成一旅初哉首基成邑成都皇王后辟得兵民而膺帝讖無假尺寸之階起石紐而握皇圖不藉勸進之力雖復規模殊幅終是德潤同科况夫造次經綸倉皇裁割禮湮諮野典失諷夷一隅自爲商聲五行倡其絕學以視古公介息兄弟營家少康幼男君臣就國一則繫恩枝幹一則受策朝堂欣憂之理皦然順逆之情可觀而朴高王李尙署外臣元菟樂浪僅云下國長沙鄰於南粵頗苦邊兵申人界於荆夷恆縣戍旅遂使笙簧歇滅睽吳季之神聰簡畢沈淪隔宋人之耆宿偉文不嗣終輪於微子祠堂帝翰難通卽晦於比干遺墓春秋二仲不領祠官去

來千年無聞太祝不亦闕儒之所遺慨君子之所喟嘆下官昔從軍旅親謁崇
祠旣覽疇圖仰思聖詠嘉此邦柔謹之俗追往賢寬略之令犧牲陳於二境終
奉皇周虎狼下其外城不臣秦帝君子之教嗚呼遠矣爲之銘曰

於昭箕聖玄王之昆鉞稜杪劔旆曜晚昏枋尸丞拂茅稟宗藩晦明龍戰顛沛
皇根我祖震維言綏東土方妣程行比姚鹿侶越翳昌羸邁熊張楚至教方蒸
王風非阻氓祛左俗主挺盛明規儀殷服沿瑄商聲孽文襲軌韜璧誅牲世潤
雲露代濟忠貞普天率土靖共述職象譯騰章鴻臚攷式今王媿媿依仁歸德
崇墉言言詞姦截域非后何戴非聖孰親非禮奚久君君臣臣父父子子千齡
萬春禮有增秩廟無寒禋終返堯垓懸違亥里受吏天朝陳圖太史躋典奉常
升經博士聖喟無聞我徵宋子

張夫人家傳

夫人諱某廬江姚氏生而夙孳孤露養於姑母張氏隨中從姊妹奉事姑母與

已母無異姑母因絕憐愛之告於姚氏宗人以夫人字其季子季子諱應魁累官補用副將以傷亡贈建威將軍今沂州通判光照季昆所後叔父也建威君年十餘歲卽從湘淮軍行擊賊吳楚以同治三年卒於軍中夫人聞因堅誓斷水米不肯復食飲積三四日有天幸以得不絕內外親黨又益表裏萬方譬慰乃強許不死然自是日財一再食若竟日不一食無如常飯者費用此自煎毀以絕張氏家故席貧田屋薄陋先是建威君諸兄弟子姪多耕農爲事或頗遠在兵間太夫人旣篤老又晚多羸病委家事諸婦諸婦男女衆盛門內百務凌亂各有營作獨夫人日在姑左右溫寒飽飢窺意順欲諸長姒竊造次驗視之終未嘗一失毛髮時場景風之辰或從太夫人娛戲庭中雜述兒時事爲笑樂太夫人尤絕嘉憫之嘗語人曰好兒不若好婦自吾有此婦殆不知有痛痛之苦又謂諸婦曰汝曹但委我季妹更勿復措意蓋出于太夫人之口者多如此禮孔門弟子記四十九篇中內則一篇最言婦事舅姑之禮其曰如事父母云

云語尤絕深。至今世女子內父母外舅姑者衆矣。固亦有仁賢淑孝之性。發於自然。動合於古人如夫人者耶。豈可謂非家門之祥也。夫人旣以光照爲建威君後。益拊愛有恩。光照自兒時已父事建威。旣爲主後。益不知非夫人子也。夫人以光緒十一年七月卒。年四十有四。其貞孝之行得旌如故事。又四年光照用諸生承廕受賜官。

述曰。余與季昆之兄仲明提軍少相友善也。因得善季昆。又從季昆兄弟得聞夫人行事。季昆欲不死其親。命余爲家傳。以誌來者。嗚呼。如夫人之行之心。固乃灑然無意於不朽。曾無所假力于余文矣。余又可答其孝子之意乎哉。

王母節孝之碑

吾宗二十二系有貞妻孝婦。明經何公之孫。茂才之子。厥年十九。嬪於朱門。實我王母。公說嫗喜。九親有賀言。四年而寡。春秋八十以卒。家亡其尊。同治五載。得旌於禮部。蒙被帝恩。光緒十八用孫婦讓封。贈爲宜人。伏維王母令類。琳瑯。

體躬備身順事我王考孝養二君與古比倫觀閔處凶拊提孤子合冥感神歷世三葉父誦子襲推母之仁有善不褻愧天忤地有賈如淪諸孫私議願勒貞石垂著萬春

告墓文

光緒十七年不孝銘盤以軍功得贈祖父父並爲奉直大夫祖妣妣並爲宜人乃以黃紙別錄制誥之文使從弟銘功用清酌庶羞之品焚黃謹告於墓其辭曰嗚呼維我王考萌德不秀堂有輿親窆無淵壽府君介節諸生以終憲襟方迹路菽同風微生晚出不覲王考過庭有言禮探書討時則嘗替他日念之去國萬里霜淒露悲一命之榮涓波如海恩逮九淵感深年載爰命支子陳薌薦芬庶通靈爽鑒茲微心尙饗

武昌張先生講堂屏風上壽詩敘

先生之生太歲在未入此歲來年政七十先生官不過七品舉不過孝廉出無

楊惲朱輪之榮。入無公理廣宅之樂。孤學獨行。非有弟子數千。冥心單思。非有撰錄百卷。靜則三古揖讓。奉手俛眉。動則一門嬉娛。呼孫詔息。故以據几獨覽。觀川內營。低昂百齡。晦明千晝。雖有金壁在後。珪組寘前。非子騁其閑詞。蔡澤飛其眇說。我心匪席。我心匪石。不可卷也。矧可轉也。先生厥生之初。海宇康定。後乃桀盜蜂起。中原蕩沸。然且羣士奮興。異人輩起。帷幕之士。不絕於弦誦之聲。棘矜之夫。不忘于鄒嶧之教。先生委蛇節下。出入轅間。苟志於仁。顛沛斯在。若贈太傅湘鄉曾文正公。贈總督益陽胡文忠公。並命代先覺清時。閱儒俱得。仰奉師資。俯循甄冶。譬彼顏氏。聞一有知。十之聽方。彼衛賜告往。有悟來之哲。其爲道也如彼。其爲學也如此。旣而聞道有得。若聚水成淵。奮厲無前。儼積頤爲壘。由是羣流景邁。鱗介赴於蛟龍。方軌風趨。御士謀於造父。其時曾公初奠三吳。方恢儒術。以爲君子務其遠大。小人務其細近。遂開建講舍。博選大師。或以泮勵躬修。或以揆張文藻。上乘道法。大人豈倡於游言。下奉規繩。華士非騰

于枝說今則燥髮之子乳臭之兒甫覩鄭君裁知許慎便已抄撮小集專欲誹
詆前儒孔子有云吾猶及史之闕文也有馬者借人乘之撫今而追昔啜醢而
思醢豈不泫然至可閔痛者歟先生博一之志不忘于心壯老之功不譽于素
以謂二十八篇之冊實史記之濫觴三百十篇之詩乃總集之祖本魯史出入
都爲約劑官書禮說紛紜悉是儒流私議總其旨趣並爲詞章義理散于空虛
事物由其同異雖復文居道右終乃道爲文輿夫未覩叔敖而虛營儀度其情
乖也不居莊嶽而空爲齊語其聲左也舍情何以足志離聲何以足言去志與
言文將焉附蓋羸劉以降纂言之家亦疇不循此通塗遵茲闕轍以余觀于夫
子實以追配往賢自非知人必驚斯語或乃譏孟輿爲阿好謂董生爲大愚豈
非洞庭張樂淵鱗聞而深潛東門考鐘海鳥驚而不饗安其所習蔽所希聞者
乎時流之學以閔肆爲名先生之業以積累爲務是以其爲人也寂寞守德不
揚芳而飛文清靜游神匪信舌而奮筆蓋智若勇倩而去其諛嘲泊如揚雲而

參之矜特是以庠序後進綏纓少年道從風翔學與時赴或乃謂侯芭奇字精于其師王嘉史才賢于其父若先生抱玄衡門之內處默長林之下縣令不執弟子之禮郡守不致羊酒之奉羣卿不修揖客之敬將相不避正堂之舍一顯一晦理有固然若夫侍郎明操于解難秘書喻譏于賓戲平子昭務於應問亭伯解玄于達旨胡老樂賤而釋誨孝若陸沈而抵疑上則懟天下乃憤世猶且龔恬憺之貌陳冲夷之譚進違顏生殆庶之風退乖尼父浮雲之旨矯矯先生又安用此語哉

通政使瑞安黃公予告歸第詩敘

通政使瑞安黃公起家秀孝射策高第選補文學遂佐秘書出入清顯迴翔省闕凡四持使節一掌兵部以抗論軍事左補今職自神聖開國求進謙言官民上書悉絲通政比于中朝謁者西漢公車其後海宇清平天下無事堯舜都俞其上皋夔坐論乎下吏民白事一皆禁絕通政所掌揭帖題本而已職務簡曠

掾史竊情臺主或以家爲府令史至請急不對見聞習熟以爲固然公之到官振厲奮發有直退之格有考課之令僚畏吏驚以爲大異昔卜尙書之在上省用軌正當官王侍中之居門下以謹實蒙譽方之今日彼難私美旣而移書稱疾本官就第以道自進不可則止可以夏秋讀書冬春射獵男唯女俞伯歌季舞坐禮堂之上則寫書滿前釋玄居之篇則門人並侍語非解難而旨遠于揚雲地不陸沈而疑深于孝若顯晦不一轍彼此不一時難進易退公之志乎且夫處朝堂之上則經綸長世居淵林之間則歌詠聖化或以佐天子而理物或以勒本朝之一經公昔起秘郎轉補洗馬再遷庶子遂領宮僚入爲中書侍郎出爲夏官司馬封事密啓殆無虛月督學之役辭對便殿命汝納言在遠猶邇於是都人喧傳士夫走賀以爲汲黯長者公實當之勝之直指公實任之故以猛虎在山藜藿不食蓬生麻中不扶而挺上以彌縫政術其次激勵風概則聖人之教也已而羣策羣力百緒赴理一弛一張六轡在手相則中外都督將則

儀同開府度遼橫海並爲六郡少年征鎮安平多有三品軍號左賢右戚因時而見珍崇武尙文應機而合節則以儒者之道勞而少功道謀之言雖成不遂又聖人之旨也公仰窺天心中察人事退則繾綣恩禮進則浮湛道德嬰兒之依慈母可資親而事君巨魚之赴大海乃跼天而踳地君子之道忠臣之志何其遠歟往從屨杖習聞嘉言揚子雲之弟子略傳其古文魯申公之門人稍受其詩故豈得不顯融德量昭耀性情建之上乾下坤告諸大夫君子使夫纓綉藻德哲士應聲廣忠讜之風信清明之氣庶朱游汲孺之往蹟不獨表于西京劉暉曹志之嘉聲非專鳴于晉世公盛德在躬遠名若浼區區諸生之願要非公之所樂聞也

桂之華軒文集卷七

朝鮮王城同人醜壽林怡齋四十敘

歲星在龍之次。吾友孩命之年。越逮今茲。厥紀四十。旣以軍事無曠。公家有程。蒙露犯霜。踰溟度渤。詢其揆日。實在中途。於是幕府賓客。僚佐之倫。十有餘人。敬以卮酒。壽君長年。且慰勞苦。朱生遂乃進而稱曰。夫連苑之植。含貞則榮。伏淵之鱗。潛志則樂。是以大體無躁切之節。正樂無不平之聲。眇道微旨。君子上焉。惟君抱靜爲懷。秉冲成性。本無忤於世网。良有契於中和。季路緼衣。不聞扼腕之嘆。王子異國。都無登樓之篇。此其一也。家驩戶荆。墨客以之代譽。豹革鞮羽。華士於焉求稱。揣彼癡癡。有同顛一。君賦頌之製。惟用自娛。學問之功。欲若不及。是以三都遲出。不識太冲之才。魯殿未觀。豈信延壽之筆。謙謙之德。又其一也。車魚之士。爭榮於諸侯。儀錯之徒。論兵於人國。自謂英詞博識。駕侶陵儔。君和同其間。若衝風之過聽。浮湛其際。等秋雲之去霄。斂響如鐘。守口甚括。淵

默之懿。又其一也。衿裾富於早時。盍簪盛於軒冕。人知展惠。卽曰和風。士述不疑。俱爲長者。君惟抱相接。罔或爾虞。陋祐穆之虛聲。鄙耳餘之壯意。狎不勝敬。又其一也。最斯數善。有萃其躬。凡在羣賢。僉曰當合。夫朋友之嫩不著。則古人引爲己慙。是用抽簡進毫。陳言貢意。庶使岳恆增峻。淵久茲深。五十之年。彌晉衛瑗之德。六十之歲。益守宣尼之言。薰被何窮。芳馨靡輟。同時周君彥昇在鄒枚之列。范子先錯處江漢之交。咸有名篇。藻君盛美。周旣耆飲。過石不辭。范並工文。善刀自蔽。方君指趣。差足權衡。僕則陳中尉之度河。船人疑其懷寶。趙簡子之御客。巧者哂其賤工。要其巧拙。偶乖。佛悅遂異者也。昔人覩豔色之麗。歸而醜其本容。驚偉材之琦。返而燒其往作。立年方至。進學何期。益用徘徊。君我之間。踟躕翰墨之會者焉。

前四川按察使定遠方先生七十敘

大哉文字。天地練以爲言。盛哉辭章。聖哲倚以詔後。固乃席珍流響。木鐸應聲。

精義淵繁垂則愈遠語其昭麗則日月齊光論其貞堅則喬彭慙壽况夫卷阿
吉士之作平仲仁人之言得不並福若兄受祥如止雖復季直往烈不聞東武
之書敬仲端居無復梁帝之勅要其坐鎮風俗彈壓材賢馳騁陵武跨躡遷固
自非準經稟雅以立則好學深思而通微曷以絃山川之清音藻時序之芳潤
昔齊士推高於伏叟東都歎仰於桓榮昇墜偶乖衷懷共服者也夫子幼齡殊
異中歲飛翮美政懿庸給于黔庶金石之業語焉不詳至其承命按蜀惠澤在
人民氓樂其寬和長吏怪其政簡當此之時天子方下詔以誘直言旁求以啓
賢路常因召對詢及老臣嘉桓寬鹽鐵之材壯綺季衣冠之偉故知驚風迴霰
非元化之初心餘露修雲實滋材之本意由斯感激益用咨嗟抱義懷忠如鑄
似勒夫晉衛之業騰高伐於鼎鐘隨光之倫貞嘉議於山澤明晦之情不一聲
稱之遠有同在昔二漢之世材彥奮興揚雲振奇於解嘲東方託情於客難枚
叔揚芳於詞賦班生姚美於二都嚴忌投策於當時敬通垂名於來葉此數子

者官非宰相爵非通侯類皆晨雲而夕泥暮淵而朝鄰然皆偉詞宏筆照古騰
今鋪張人主之闕休恢拓無前之盛軌餘楮零簡旁逮羣公雖使高光之功文
武之烈韓張英彭之閔寶馬耿鄧之材揮霍風雲之威澄清江海之力不得不
假其毫翰託其吹噓是知處長林之間酬主上之德如彼衢歌壤頌尙乃千春
萬年豈况夫子躬前修之能樹不朽之業中書邱遲之解職不獻於責功之詩
司馬園令之端居非構於封禪之草者乎簪紱之後秉以謙冲清明之躬重以
問學琴瑟書策日居月諸而平生故人已辭于廷尉門下賓客罕接于任安今
昔之間抗墜之際愚者感而咨歎通士覩而听然思夫疇昔之日上壽淮南自
命風雅者接武於軒墀號稱才峻者踐塵於堂席揆彼意志惟在陳諛豈知竹
柏之姿不浮湛于枯苑璆琳之質匪貴賤於霄泥是以犧經美其邱園毛詩嘉
其澗谷大夫君子咸曰尙哉銘盤旣以驚下之質奉教於尹公復以俯仰之資
受恩於趙氏身心丐被固非一端企仰之願無窮藻績之能有盡誠不若宋玉

麗賦稟左徒之風。侯芭高文。蹤蜀郡之學。要其聞講。扶風之第。受業劉歆之門。歷時最深。窺指尤切。餘人之述。未足校明。顧乃從樓船之旆。旌厠橫海之戈。櫓眷懷几席。搖蕩心神。至夫登山臨水之篇。睇景述情之製。原本雅頌。極意師承。則何嘗不潤色川原。指摛動植。方諸凡作。或謂過之。豈非崑山零石。都無砥砢之材。涇水微淪。悉是澄清之色。高睨遐矚。又足自豪者焉。來歲季春之月。景良之辰。惟我夫子年政七十。他諸懿美。固不待陳。是用述天爲言。推本爲義。上極化育之理。中驗賢聖之訓。下及有朋之賞。歎旁攷餘子之平生。庶幾坐券者。年有符保。合至夫軒車林藪之別。蕭艾椒蘭之詞。則浮雲之喻。久服尼甫之教。被繡之戒。無易莊生之言。明達之儒。必能辨之。非小子所敢論焉。

王文菊人七十敘

神皋竝海天官。牛女之經。於越開置。東漢永甯之縣。語其毛產。則紵麻禾稻。勒典於史書。論其山川。則天台委羽。騰名於道笈。自邦君伐木。太守貢畫。真人藏

景於蕭年。侍御受鑄於牝季。埏埴既廣。珠璧斯衆。家成鞶帨。戶攻輪輻。弦詩之雅。介於都人。耕讓之禮。蒸於魯彥。雖復錢唐劇郡。越州大區。此叢冠蓋。彼工商賈。以云節概。或未伯仲者焉。王氏自開國以還。多有懿德。翟公父祖。世居下蔡。揚雲先人。故家蜀郡。往行馳於邦壤。遐風垂於在茲。鶴鳴九皋。高高而可聞。風雨如晦。喑喑而不已。復乎王公。何其嚼然高厲者歟。夫木饑水毀之理。實原本於陰陽。傷農病末之驗。固孳胎於經術。故夫二十六卷。衛贛候歲之書。九而十之。管相聚珍之要。山淵博而獸魚往。匹夫富而仁義歸。自軒皇以降。墳素所紀。未有迹窮紘極。勢振王侯。利百乎齊秦。氣高乎張郢。如今日者矣。公往以壯者三十之歲。受太公六十之傳。何君令子。早爲蜀商。朱公長男。雅聞父術。遂乃朝筮王孫之卦。夕覽儒氏之策。驪角棗栗。遠賢於千戶之侯。玉勒陽皋。旁獵於百家之製。夫其幼稟純質。學有令稱。受大義於先師。擢殊材於曹黨。翬翬之理。良以可觀。是以丙氏貰貸之日。不去文學。白丹貨殖之年。必根仁智。其後倉皇避

盜犇走趣山彭脩有護父之名李充有遞衣之節趨闈躬養挽車輪而甘勞撫床切情對病孤而失寐高訾之直略貳於君房分財之數遂繁於卜式故得妻賢姜令子同班掾州里贈譽黨塾流美少君華首恆感於先姑之言潘尼屬文必述於家祖之訓非夫公之道周帷闥禮洽堂階豈得高行流聞英風迢遞挂名夫世典之冊曜光夫代彥之林者乎夫趙士尙氣謂有武靈之風薊域驚悍或曰故秦之俗列在方志第其大凡豈可偏聽往辭斷爲近習今台州民俗朴儉人士秀文著於官書頒爲令典世之從政曾不念茲謬舉馴風方彼獷土且夫上有良牧則黔黎遵軌里有善人則稂莠革化今銀艾寡色風草輟響使夫述盜牛之語徒媿心於田翁論還豕之仁輒推名於鄉老規時之士所爲發嗟而興吁者也公旣以躋駁之後獲享甯期耆老之年棲心息壤益復流連水木嘯詠陽秋追往嬰懷拊今規遠糜竺之家旣落仲弓之息俄奇諸郎並噪於當時長君尤善於下走入則公幹之筆振藻海隅出則楊生之文高視都下自喉

舌高望省掖魁人藏室瑰儒郎署琦士京兆杜季雅之輩陳留劉桓公之徒靡不捧手承風推襟將意證嘉誨於早日歸盛善於丈人若夫濩落淺材區霜郭說甯足揚芬百一騰暉尺咫長君弢甫虞衡猥承庭教下求鄙文將乞常少之書歸頌彭喬之紀是用推整俗之券究爲善之符仰告綏纓俯喻芒布按其詞筆匪曰可存亦欲令高堂進瑟之晝流覽而稱觴哀衣介酒之朋誦言而拊手者也

爲易布政壽座主前湖南巡撫劉公韞齋八十敘

國家德通上靈運鍾下武體隆紹接贊窮登邁文宗用緝熙之業廓軒包之規穆宗以徇齊之聖閑宣光之軌其間踴奮山谷飄飛風雲斤斤孔雅兢兢宏策效足於駿人騰名於皇錄若斯諸賢未易更僕至如御史丞相第用醕謹九卿中郎專以長者斯又至人無爲之運聖帝張弛之道其有修身喻鼓鐘行己類愛鼎奉職若治田芟惡等驅疾楚人載路爭覩於諸梁荆老行疇俱歌於孫叔

且猶遭彈世喙見譏鄉校坐曾與以殺人告樂羊以縱敵抑又君子之所憤惋志士之所感槩者歟天文井鬼之區禹貢梁州之域蒙樂背峙蘭滄左帶夫子秉醇懿之姿挺峻茂之德自爾少日已譽聖童出其餘力足跨羣輩及乎迴翔輦轂騰蹕天衢職清事秘綜機典密老氏臧室承明著作並以探轂得螽絕馬欲步旣更擢拜遂貳侍中有王商之敦厚有地餘之經術由是軒輶溯漢蕩節臨湘徜徉神禹之山睇矚媯皇之野遭逢盛眷寵百於王傳賈生宣布皇風體貴於楚人唐勒蓋文宗以日月臨下夫子以心膺奉君故以拜爲太中不滿於一歲甄補大郡無煩於四遷自爾以還諸盜蝟出羣策奮武婁歲大定其後夫子以九卿顯望巡撫湘部巡撫始於東晉湘部兼於荆牧肇革金鞞高車駑矢郭君再至子產殖我昔者景完石刻公方表頌並沈卑寮又闕盛美猶心戴口誦騰爾蹕遠豈况善教懋政若我夫子者也梓柯貧國苗民逆命賴轉饒之功成搏拊之力大夫君子到今猶稱豈我小言所能私美者乎且夫秉道不變王

良失驅車之巧。時事並異。張儀無執戟之望。故莊叟復悟於被繡。揚雲寄嘲於懷符。令史密爾於斯文。中郎述旨於釋誨。故夫高鳥之性。不忘於曾雲之顛。潛鱗之心。不釋於淇淵之下。獨處者易。遂衆集者難。同也。若乃揆時度務。又可略覩者矣。開闢既遠。機械日廣。上乘其運。下奮其智。陋堯版之四宅。狹殷圖之九有。且夫虎嘯而冽風。龍興而致雲。天地自然之感也。穆者駿而造父。生孔好龍。而劉累出。帝者提福之符也。才非異等。要留滯於漢年。道匪變通。終泥蟠於晉世。豈况夫子習昇隊之運。參毀譽之致。味端居之樂。抽隱機之條。何有不一致。鼠龍齊論。元皓者哉。某往以著錄之士。鼓篋於洛陽。既以部曲之將。參軍於下。辨申之以道德。重之以昏姻。眷仰生平。殆難覲縷。要若宏農無財物之奉。東海絕田宅之計。官極旄鉞。而居如中人。學窮載籍。而退若在野。或乃中軍枉路。造申叔之門。令尹到官。謁門氏之宅。教令因而隆替。功閥由斯輕重。何必擁旄建節。廁劉陶之間。登壇授鉞。在青病之右。始能敷福祉於黔庶。揚芳風於無前者。

乎今年三月之吉。夫子八十之辰。蓋聖清受命二百七十有一年。又今上皇帝親政之初紀也。昔在漢世。若華容胡廣。躋台鼎之尊。南陽樊重。揚閭井之譽。並登此壽。騰美世典。以予觀於夫子。賢於二子遠矣。

通州張季直孝廉之父潤之處士七十敘

述夫粲粲門子。廣微絳蚨之篇。媿媿嬰兒。萊子斑連之服。故以孝莫大於嚴父。福莫盛於老壽。若夫中涓白首之日。建爲郎中。仲翁賜告之年。受爲少傅。陸生流連於好時。曼倩委蛇於東海。並優游娛道。子姪如林。若是等倫。難可逢覲。故夫過武城之晦。輒追羨於瓜哇。登南山之椒。或馳欣於橋木。至如伊尹高齒。太公大年。張夷方朔之父。壽倍於百齡。安期海上之生。數半於千歲。北山道者之紀。西天寶掌之算。雖事多逃遠。語近荒淪。要亦人子之所樂聞。吾儕之所恆述。矧夫躬令懿之上德。體被禧之往驗。焦氏云其受福。劉向謂爲享榮。如吾張公者乎。英宗遐胃。累牒增書。仲顯於周。老傳於晉。釋之建忠於苑狩。子高振威於

京兆迄以紛綸難用次第自公上世代著此州孝弟以赴漢科耕田以歌堯歲公之少日備準往風以謂成都揚氏之祖世業於田壩南陽樊重之門代專於農齋中更饑毀失我坻墉酈生之居無衣顏歎之家晚食率乃致產陶邑起家曲阿待火及於六親全活滿於百輩大中之息親見於爲龍陶生之兒無懟於求火行路稱其長者州壤推其馴風道盛澤厚又豈偶然者歟且夫賢人百里忠信十室善類鱗從莠士革面豈况此州並大海之浹席疏野之風重互市以來民性趨利入粟爲郡縣罕良宰或乃同陽由之曲法類梗陽之成賄古有側行敝席造丈人之廬效羊行酒過高士之里至欲屏車騎脫簪紱徒步請謁如弟子焉今此等輩曾不念茲要如吾公散趙溫之糧析王丹之產述八務之訓分四經之業六十之歲無常伯之尊七十之年無復陶之號顧其茂德良譽振邇姚遠足使耆老聞而加額士夫慕而奉手綺里之居商洛尊爲山翁孫卿之在齊國推爲祭酒由是此陳曲禮彼歌小雅國老之稱旣洽眉壽之頌興焉何

有不衍喜暢志愉豫適情者哉始公以坎壈之歲持金隻遊會有船人貧且鬻婦登棄所挾拯彼危痛甚梁高之載穀逾張仲之推財終能翁哀鸞於垂分隄溝水于方邁夫躬蹈艱苦親被顛沛且猶嚮任卹之風慕好施之雅其爲德量固宜若斯遠乎朋酒斯饗稱壽之故風咒鱣其鱓頌福之令典加與令子孝廉季公有問學之誼處著錄之次習聞梗概伏願推揚又里閭曹耦行觴奉爵多有禱頌獨銘盤夙苦行役久更留滯不獲眷鞫鄭堂之上奉酒陳車之下雖復遺豪鋪牘陳述盛美究其區區之忱未可百一盡爾

爲宋少保壽合肥相國七十敘

敘曰經邦論道莫大乎三公分土肇州莫尊乎都會所以權衡百職控御萬方甄緯陰陽牢籠區宇是以周之召伯鄭伯常爲卿士之官晉之丞相太宰恆領荆揚二牧我朝上稽成憲近準曩規今之總督軍務古之都督軍事不帶郡國所以專督監之權不兼中秘所以嚴官府之限至如神皋重鎮赤縣大區兵刑

選舉鹽鐵民政轉餽輸粟度支尙書之所司宣防濟災河隄使者之所掌重譯
琛貝職儼通於鴻臚五校舟航事乃兼於都水理大物博千梁百柱身縮六印
腰懸四綬非有博陽憂邊之計管蕭匹亞之材配宗阿衡之風參德儒宗之望
曷以仰麗靈緯俯措山河建廣大之規養清靜之福惟今欽差大臣太子太傅
大學士直隸總督肅毅伯李公爲體之矣公經綸夷險勒在方略猶告訐謨載
在冊府勤勞忠順則上合皇心德教光華則滂潤八表固以主臣一體公侯親
於腹心山川九埏任昧介於枕席雖令吉甫作頌不能寫其清風孟堅爲銘無
以賅其亮伐要其忠勤謀國剝剝調時上懸三光下謐四海拯橫流撲燎火而
天下不震其勞夷神嶽塞洪河而天下不驚其力豈非神機默運匪以焜赫爲
功明鑒中含唯以康救爲務若斯之理可得而言夫儒冠韋帶之士多是古而
非今員顛方足之民每樂成而畏始自海禁大弛萬邦會同三十六國足陋班
超之圖八十一州有甚鄒衍之說虎啗龍門陰疑陽戰指遽於元淵理繁於莽

縷公坐運遠略高攬羣材自強則知人任人變通則可大可久持節之使道倍於護夷中郎舟楫之官職重於水衡都尉凡夫文字言語食貨軍政左行右曳蒼頡二兄之書提官隗構白狼四言之詠珍物怪產含塗之所陳宛距鐵拖荆夷之所寶靡不斟彼良窳歸我陶冶使夫懷方之職法周而爲文翟胥之司先南而暨朔由是銜勒在我風塵不驚動如川流靜如孟置此則公之智也有德之世柔能制剛聖人之兵征而不戰是以光武報臧宮之詔志在息人季布折舞陽之詞謂其謾語何可引票騎以爲辭援北地而自壯公澄慮所及專務甯民政美於葛侯賜深於仲父譬齒牙之於飲食習忘其甘鹹若動植之受雷風陰蒙其散潤由是天清地謐恆盛於名物詩書夏長春生常寶於左滄右粥上輔堯舜恥一夫非唐虞之民下濟蒼生登衆人於仁壽之宇此又公之仁也公總制百郡兼押諸蕃非掌禁旅而機要於護軍不領尙書而務繁於總錄是以中旨垂問或命散騎侍中征鎮上書或遣參軍長史鋒車暫莅詔書絡繹而頻

臨軒蓋方旋奏記駢闐而交集莫不就宗臣而決策仰元老而折中典籤爲之神疲胥史由其腕脫公應機立斷不取道謀當官而行無煩野獲同季路之片言可折侷董相之春秋決事識高萬物而不眩雷霆力舉千鈞而不動聲色此又公之勇也公三德具備百祿在躬本官則禮絕百僚加崇則班高六傅論其寵眷則畢公保釐於東郊語其聲稱則太保留詩於陝右可以對揚顯命勒鼎晉祠俯謁靈祇銘鐘衛廟庶乎顯微交格嘉賴無窮上與日月同恆下與河岱並壽昔者於皇姬代時則有太師齊侯亦越漢京時則有陽武丞相並累佐四葉算逾百年矧公氣稟五精道周四國七十未老如皦日之初中八千爲春儼修川之方至方將佐命垂統輔翼成化帝則受軒后之神筴冠名七十二皇臣則比邵公之耆年得壽百八十歲咸有一德享於天心邦人大夫請事斯語

周彥升之母黃太孺人七十敘

述夫東周爪士懋畿父於陳襄西伯使臣宣黷忱於諗母是以虞思與方爲太

守遽返餘姚華敬則財補安平更求常侍賈獲之遭鄭寇道有扶車泰貞之走蠻中州有孝子古之順孫馴息動性任天固有服嫗爛之衣甘藜藿之食矧夫蜀郡揚子祖宅汾隅魯人顏淵襲田郭外宜黍宜稻淮海陽鳥之區作之脫之禮書雞鳴之典覽其堂上則有平仲楹書出其外門則有戶牖車轍孫事王母童年或擷於冬芹婦奉君姑嬪則已昭於晨管蓋庶人之孝莫大於分地用天而君子之朋莫善於稱仁稱弟由是推明發之愷述聖善之風儼清范母之規配名鈕媪之贊古之君子不敢辭也僕有肩隨之友寔曰周君彥升往以王妣八十之年命爲子孫侑酒之頌迄於今歲蓋逾一星母媪之年又已七十追依故事更督余文別求范張推陳古誼僕聞進退者犧易之訓素行者孔氏之軌周子昔爲侯客跋履山川甘脆寘於道塗佩悅繞於寤夢夕奉手教朝展黻幹子則上堂問安母則拊牀詔息以爲縣上題門之士母子偕居霸陵椎髻之家夫妻共逸太原王霸之兒子無忤於蓬頭扶風班氏之家孫有挺於童角六親

五服固聞雅道相傳一姓九宗。悉是芳風流譽。語其戚黨。則有蕭琛李頌之英。舉其朋僚。則有荀爽賈彪之美。麻縷絲絮。足資於夏清冬溫。黍稷稻粱。行比於仁漿義粟。地當僻左。無江淮輕心之風。門臨海澗。有淪漣寫情之樂。以視登山臨水。賦離人之篇。舍舟升車。求飛蓬之聞。其爲得失。不已顯乎。夫知止知足。殆辱茲焉。不居守玄。守雌養生。於是有主。周子穀梁之學。放弗范甯緯算之精。頡頑庾詵四聲音韻。則方駕沈劉。校治圖書。則低昂孔到。四分三統。劉歆李梵之疇。俗志地書。裴秀圈稱之體。日邊灑翰。效臺卿決錄之書。域外裁詩。仿王氏爾朱之傳。煒文鴻筆。人言阿士更生。瑰製崇篇。衆謂儀同再出。願其韜精羈藻。望若鄙夫。樸貌天情。卽同孺子。非夫欽承祖訓。仰奉慈規。安能齊昇隊於同塵。攬晦明於一致。出則四子講德。入則對案奉觴。居則古人爲徒。行則野老是侶。冲融夷漠。若今日者乎。因思夫弱年之友。無逾四人。今君與張季沈精於鄉邦。僕與范生備書於異部。動靜之端。匪一問學之途。同焉。然范則楚人。萊子堂有二

親張則陳氏元方。上有老父。君之慈母。抑又大年。是則歆羨之理。甚揭父之睨。酒觴距躍之懷。逾弋人之睇高鳥者也。

劉一山之祖母八十壽敘

吳中並海之國。曰海門。直隸廳海門魁琦之儒。曰周君彥升。父周君之弟子。曰一山。劉子。一山之祖母。曰陸氏太君。以今年壬辰登壽八十。其月辛亥。其日戊辰。其土揚州之域。有魚稻酒稷之供。其宗內則之風。有棗栗飴蜜之饋。其門之黨。有伯叔甥舅姑姊姪。祈年之觴。其孫之朋。有陳郡東海潁川吳興文學之彥。蓋劉子依祖爲命。太君抱孫如兒。懿德景風。著於邦壤者矣。夫爍暑沍寒。天運也。暮岸朝谷。地道也。揆諸人事。亦有其端。是以鮮民寄痛於雅篇。貞臣竭肱於百六。誼士鼓憤於荒野。孤嫠方衷於溧泉。故以蔚宗昭其甄圖。延壽勤其撰錄。炳然方策。未爲誣也。且夫桓少君之高行。班惠姬之馴風。趙娥以烈。亮明資。袁倫以貞。操樹軌。始見述於孫子。終耀香於史書。於曲禮爲毋誑之言。於孝經

爲庶人之孝。劉子遜詞卑語博，心陳衷求，友於先生之朋，徵言於千里之外，殆亦有古人之意乎。古之幽閑植表，端操流蹤，旣績管彤，亦明圖篆，則夫勃海鮑氏之婦，有提甕之劬，齊里守肉之隣，有束蘊之請，病姑之側，藥糜記其親嘗，隣母之門，江水覩其朝汲，永興丁氏，一時營於四喪，吳興婦人，期年成於七墓，王妻枯骨，有棺器之恩，陳穰寒人，有收養之澤，苟無懿德，安有芳稱，繫惟太君，實綜厥美，觀於周君，尺牘劉子書辭，以爲門蔭中衰，田園晚落，兩世孀獨，一孫儻然，方之武平，虞門，犍爲李族，宗元卿之庶姓，劉長盛之望宗，彼旌誼於順孫，此積恩於腹子，教之射御，書數，導之宣慈，惠和，詔以東西，朔南之行，區以夏秋冬春之役，有田百畝，可以剖味分甘，有椽一屋，可以障風蓋雨，太君流連光景，慨想年時，亦豈不眷仰先姑，追懷君子，雖復宅非高第，其孫不除宮僚，家裁寒門，其嗣不署郡吏，養堂上壽，非有章綬表榮，里老陳詩，非有詔書旌義，否泰之理，其致一也，僕於周君，有投漆之驩，於劉子，有盍簪之雅，居同鄉里，則宜闡揚懿


光名能文辭。又宜表章貞晦。持此數義。安可無言。可以附地志之官書。入劉宗之家牒。上以顯融祖澤。下以昭示曾玄。則夫今之潤色宣徽。鋪陳禔福。亦猶大雲高翥。裁瞻膚寸之容。靈瀆東趨。始觀盈觴之注者焉。

馬太夫人七十敘

桐城馬氏。自明中葉以來。爲冠帶之族。自其始遷祖以下三四世。卽皆已有清德懋學。照耀閭黨。其後有太僕卿孟禎。當明萬曆天啓之間。用亮忠大節。不容於朝堂。天下志士人人慨之。余嘗與太僕遠孫健甫。質甫。昆季雅相知友。得見其家譜如此。已又讀健甫父徵君之遺文。及桐城方京卿宗誠存之所爲馬徵君傳。益感慨忠節。若升堂而親奉其手。徵君實以咸豐四年。痛父見害。復仇畢命。賊中者矣。是時健甫才數歲。見虜于賊。不可得蹤跡。始末而質甫益提幼獨健甫兄莪園。才十六歲。奉母太夫人以出入于難。頓苦艱瘁。所經歷殆皆不可言說。而太夫人又益痛絕。堅誓百方。忍自毀決。卒皆蒙有天幸。得以不害。今三

十四五年。太夫人年且七十矣。健甫嘗爲今
有先兄之變。今母氏幸健。固甚善。往者體山
自救。至子孫伏請。乃強許。先是太夫人始歸
嘗相謂曰。此婦故嫻順。又頗識義理。他日以
得視莪園遺詩。微聞其將兵時事。直節盛概。
夫君子之澤。其長且厚。固以如此也。而健甫
上官奉母。僦居二千餘里之外。朝夕懃懇。不
異挺出。嶄然若將大絕於常器者。藉使太土
水君之言。則一慷慨烈婦人之事之名耳。抑
乎哉。余頃爲健甫言。讀晉書虞潭母孫氏傳。
相類。由今思之。虞氏在吳晉之際。富厚名聞。
餘人殉節以來。艱苦往往多有過之。若其知

享大年之慶則固方古莫二者矣



桂之華軒文集卷八

孝子費君碑

君諱洪周·姓費氏·魯大夫之食邑·著於春秋·費長翁之儒宗·顯於漢氏·公枝侯
幹·散布諸州·今爲江南通州人也·君代力農·裔僑居海門·家貧有母·賃直給養·
分酒賜饌·義不獨飽·趙盾之肉·必以遺親·鄭伯之羹·未嘗濡口·主人察狀·別饋
其家·嫗歡孺騰·耕作有倍·熊翁廉直·獨有士風·郭氏奉親·必用己力·母老白首·
篤疾彌年·甲往丙返·傭格無廢·夜寒須火·抱趾取煖·浣滌滌器·勤兼私奴·撫癢
抑疴·動合典禮·歲踰二紀·情無晚倦·不幸奄忽·以道光某年月日卒·遺令藁葬·
獨取棺直·賃田畀母·母衰嬰痛·尋亦淪隕·母卒之歲·所居被火·衆物蕩盡·母主
不壞·真感上契·靈祇動容·可謂庸德之行·庸言之謹·不肅而成·不學而性之君
子者也·於是邑子周家祿·劉桂馨等·以君事狀·列上諸府·蒙被詔書·旌君孝子·
篤行董氏之宅·表於歷陽·顯親左尉之門·榜於諸暨·校行比德·何必舊聞·爲之

詩曰

君顯祖名易宗。貽遁述爲漢庸。鳳除相銀艾蹤。樟輔蜀雲風從流。遐胃代力農。鬲有客匡爲傭。區寒燠衛春冬。膳芳潔醴清醲。損口悅充慈。供感疇輩致敬共。報十百穰不凶。出繭足入嬰容。累星紀戚無悰。結死慕割生逢。反風火靈憧憧。今之人母主饗。父借帚。諱以訥。縣不督。州如聾。有君子摧腸胸。曝一行風四封。王文殊。滕曇恭。無今昔。昭三雍。

白華書塾記

海門人士敦風崇教。旣綠小雅景行之誼。立孝子費君之祠。耆孺推風。纓綉申歎。於是近地結屋。開建學館。不置勸學從事。無煩儒林祭酒。遂乃百家一師。十三就業。詩不云乎。孝子不匱。永錫爾類。費君沈名。齊人食力。下走所事。獨有一母。所願不過一金。豈悟美報騰於方茲。崇禋衍於來葉。鐫名學官之版。勒狀地志之書。使夫家言高閔。更生人曰。騫路不遠。如今日者也。晉之江惇。束皙並有。

刊碑梁之劉峻劉訐俱傳私謚此人迴翔臺寺歷典州郡門生列顯職朋舊盈數州生與鍾磬比響沒與黼黻方麗校資論地今古懸絕且費君身不立橫校名不通州府蒿里大去長爲陳人韃爲衰門更無五尺乃流風景烈奮乎百世名實之理又豈誣焉學館工竟署曰白華孝子潔白之義大夫嘉樹之歎學人警潔之慕國風勿翦之愛遙情遠喻照後騰今凡爲某屋如干間用錢如千萬用功如干日課士之格悉依常典四部諸籍次第閣置其人士名姓錢物諸簿並勒碑陰副在別版

名宦張君祠堂碑

名宦張君祠堂泰興縣人爲故令張君建別廟也君以道光二十八年到官五年而轉在江甯洪秀全陷江甯君與上元知縣劉君同纓俱死劉君先嘗爲泰興知縣在君後稱績不及君乃君與劉君後卒同死於官泰興先後遂有兩前令爲死節吏可矜也君始到官察民好以細事聞訟胥徒鉤連爲姦利士氣肫

然野樸。又諸鄙有田。磽鹵相傳不可治。及孤寡六疾不能自存。甚衆。君因事立政。若循病而投藥。期年無不馴變。卒亦未嘗爲民病。會遭大水。君益帥縣誼士及屬吏出財穀爲賑。又躬區列版簿。持舟分鋪。凡數十百所。所教遣卽無敢豪髮私利。不如君指者。由是凡縣界十數萬人皆以得活。君益用賑財募民夫築江隄百二十里。江勢自武昌以東。近蜿蜒北趨。故邊江諸縣多南漲而北蝕。獨此縣後雖水無大苦。又枝港十餘。皆君所濬治。諸孔子廟先賢祠堂收養孤幼之館。經君修置以十數。益衆碎不可記。獨君所築隄堰。功力甚盛大。及識拔諸生子弟多醇謹。端士各能以君教教其閭里。風俗因以大變。自君去後。縣父老言好官必曰張君。張君君後有數四墨吏多爬梳積金錢。或遂身死家滅。然方盛時。百姓往往被其毒害。因益追念君。君自言爲縣無他能。曰吾於欺於倦不敬不痛自割割而已。君爲人長身偉貌。微須髯。其坐堂皇及私居燕處。並未嘗見矧。至他言動多斬斬。中方幅。非曾子所謂身帥而民從之君子者。與。何其聲

之大以遠也。君既卒之三十年，縣故民試用教諭周之瑋等三十六人附貢生于春煦等十有八人，先後列君政狀上諸府禮部以聞，得從祀名宦如故事，而別爲廟於北城之善化舖，爲二仲祠饗之堂。君先去官時嘗有生祠在城西七里，并此爲二祠焉。君諱行澍，字瀚門，河南祥符縣人，家世冠帶，以舉人起家爲縣令，其家在祥符縣馬府坑，子一人方杰，優貢生，居貧爲端士，能文章，有父風，系以詩曰：

自君之卒垂四十年，名在人口，疇令其然？君昔當官，不爲章褻，人見心肝如昏，見燭吏虎民鼠，百縣一規，稂慝不薙，人無甯期，百廢緒興，不需不蹶，一目不張，君汗以艱，後之替者，人人自賢，亦有猛吏，樹威答鞭，愚者瞽瞍，以寬爲惠，豺鳴狐行，窮陰不霽，凡此等輩，皆君罪人，君軀可贖，秦當百身，我爲一民，不識君面，如誦古書，產碑豹傳，崇祠翼翼，孔宮之西，庶有遠譽，卜冉雙齊。

清故廣東水師提督廬江吳武壯公墓誌銘

公諱長慶字筱軒姓吳氏江南廬江人也廬江屬於揚州漢晉之大郡吳氏出於秦伯公侯之子孫魏之西河守齊名孫武漢之廣平侯龍驤四七昔則銀艾襲軌繼則冠帶流蹤始爲涇人改著今縣周訪曾祖安城移於尋陽閻續名家河南盛於安漢曾祖定邦祖鳴盛並縣學生員贈建威將軍南城羊氏以清德世家河東王門以儒史修訓縣人號爲長德州壤推其馴風父廷香孝廉方正優貢生贈四品卿銜建威將軍方正之日盛於程收杜夷明經之生貴於袁良龔遂粵寇犯縣實舉義旅南平內史首討石冰揚州秀才遂斬錢璿縣城再陷義不反顧柔之隕於桓賊贈以九卿高資周虓死於太原策以三品軍號賜官立廟儒者爲榮公少試學官好覽經術既嬰大故代領父兵邵平北之遺軍歸於令子陶府君之部曲統於弱息詞求父喪窮日累月截髮爲誓剝膚自刑終獲先軫之元卒反灌孟之構服闋襲父爵雲騎尉隸安徽巡撫部六郡良家之材羽林孤兒之號授兵畫策衆以爲能咸豐六年八月攻下縣城剿除愍逆泣

血斷纓之所。刺兵仇人之胸。推鋒先驅。捷書屢至。又先後用桃鎮護城。花子岡等功。擢守備。加都司銜。賞戴孔雀藍翎。換花翎。五品校尉。職比鷹揚。拆衝四品將軍。秩視廣威。積弩耀首之飾。方於散騎。右貂附蟬之儀。績於武臣。赤幘可謂騏驎。萬里此其展輪。層臺五丈。茲焉撮土。高勛殊閎。願有述焉。同治元年。太傅曾文正公。今大學士李公。命公別置一營。從攻上海。司馬祐裁臨軍。陳特置四部牙門。諸葛喬始嗣干戈。便給精兵五百。虹橋之捷。陷陣摧堅。連下七十城。坐破百餘壁。進官遊擊。轉守廬江。遊擊領護之高官。廬江淮南之舊縣。旣而回戈南渡。率旗東邁。用江淮之卒。通吳越之道。勾吳名將用兵之地。宛然東晉武臣破虜之區。斯在公之威略。何必古人。錄前後楓涇西塘千審平湖等功。進秩副將。蘭子雲以天監軍閫官。至雲麾領州。徐嗣徽以巴蜀戰功。位爲東宮右率。於時嘉興一郡。據爲僞州。比於索虜滑臺。慕容大峴。旌旗溇溇。荆揚梁益之兵。崇墉言言。漢水方城之固。公激勵猛士。身爲前行。流血及履。未絕鼓音。交矢於胸。

虜傷吾足。旣而天槍西指。下有破軍。大滑流空。地有積骨。遂乃破姚襄於伊水。禽李勢於成都。角弓其鯨。戎車孔博。論功校閥。公爲優焉。有詔嘉獎。以總兵記名。給勇號。力勇巴圖魯。免騎射。都督之號。晉有總統諸軍。勇爵之名。漢有揚威白虎。坐則赤幘。曲蓋行則官騎親兵。府公上其英驍。詔書美其策略。豈止北地都尉。擢守新平。建威將軍。起於督護而已也。四年上克蘇浙閩二府二縣四鎮等功。以提鎮記名。五年轉從北征。進統親兵。慶字二軍。用轉戰皖鄂豫齊四省。功賞穿黃馬褂。給勇號瑚敦巴圖魯。正一品封典。北征之役。淮部甚盛。蔣欽周泰咸出九江。羅憲滕脩並產揚部。泰州方急。瑛旂有不救之嫌。吳國初平。渾濬有校功之奏。公當樹而立策馬而前。不言部將之勞。惟曰上軍之力。平陽侯之戎閥。盡屬於韓王符離侯之軍功。並歸於票騎。故得關中建督。加服侍中。輔國爲營。賜衣一襲。太常光祿。征西祖父之封。紫綬金章。臨賀太君之贈。名號顯爵。埒於四部大人。軍賞高官。優於庶長。上造。中原大定。放馬歸牛。公獨領舊軍。作

鎮西楚亡命阻險劇逾太末之區菰葑逃亡危甚海陵之縣會他軍潰卒仇其主人類東嬴乞活之師似安陽芋菽之衆公應時解散不續而溫斬其豪渠無米而粟大府入告詔軍功加三級嘉其能也賞級因於秦制得服劉氏之冠增位盛於魏朝上同三司之禮九年移駐揚郡旋丁母憂用軍營舊制穿孝百日桓竟陵之解職不聽終喪顧領軍之居憂遽起視事漢制不敢遂服晉令惟許遺甯旣而移壘循江建塢置壁嚴於淮口三壘壯於朱雀浮橋費減勞贈吏誦民悅六合民變公往解圍召止魁人釋其從脅平浩亶之調役滅山陰之米布吏歎於室氓歌於野光緒元年補直隸正定鎮總兵官二府交奏仍留還屯平東宋哲別戍於華陰常侍華侯留營於霸上三江震澤淮海揚州沿於江海達於淮泗聲名若此可以觀焉至如甯國之獄漢胡紛紜勾吳信巫臣之詞匈奴受李緒之教蜀師用其左道鄴人行其妖言兩造不備五辭不聽卒能區分黑白剖孽晉戎蠻人負漢輸以黃龍一雙李脫妖書律以大逆不道微公秉直民

將苦之於其返也。送者盈路。羊征南之居荆部。沒爲諱名。唐儒宗之在幽州。生爲刊石。濬治水道。督勸農桑。貧給耕牛。歎資糧種。修六疾之館。建講學之堂。官不絕書。士無虛記。故以殊勳。騰聽甚和。季之奏張光。往績昭然。逾元常之表。季直六年。進浙江提督。其年調補廣東水師提督。仍幫辦山東海防。漢中太守。召見東堂。荊州督軍。入朝正月。手畫山谷口。陳事機。故得假節東征。監青徐之軍。事服領南邁。號樓船之上將。窮成山而望碣石。並勃海而過黃腫。經營未終。且有後命。朝鮮卑濕貧國。嗣主杪暮。酣王兵交父子之間。患生觸蠻之地。公率是戎旅。進壁王城。再宿而禽呂嘉。尅日而甯楚子。由是大車凝軫。皇周有戍許之兵。籜節翻風。漢朝有長沙之旅。王人最貴。禮崇於鎮蠻護軍。臺使親兼。威重於綏夷都尉。固以黔夫爲守。燕人祭其北門。李牧爲將。匈奴不敢近塞。帶方倭國。通好如初。元菟樂浪。比漢內郡。皇代無其故事。史策少其邊功。足以存銘太常。薦功清廟者矣。論功行賞。予三等輕車都尉世職。奉車駙馬。爲朝請之官。關內。

關中在鄉亭之次。娟娟蠅野。徂東三年。悠悠旆旌。去國萬里。有詔振旅。星言夙
駕。西征東怨。家咨戶歎。詣闕請留。不蒙詔可。育上膏下。秦醫於是旋歸。實沈臺
駘。子產徒焉。博物不幸。奄疾以光緒十年閏五月二十一日。薨於金州軍次。春
秋五十有六。有詔賜卹。予諡武壯。史館立傳。功所建祠。給一子六部主事。從優
制也。以其年月日。題葬本縣某鄉之原。其後朝鮮國王李熙及浙江安徽山東
巡撫各表請立廟。詔並許焉。司馬遺墓在於三時高原。賀婁故憤。葬於苑川本
縣。譙國梁郡。並有神堂。漢水峴山。匪無別廟。蜀漢丞相叢祠。滿於蠻中。伏波將
軍私祭。盈於南服。豈直劉向蘇武。以父任爲郎。張軌鄧攸。以賜官顯代。夫人余
氏。早歲躋神。先從大夜。溫嶠亡婦。不及大封。鄭袤先妻。從聞別葬。夫人王氏。肅
恭成性。溫靜表儀。琚璫珎璜。巾襪組紉。公子保德。縣學生員。襲父爵雲騎尉。兼
三等輕車都尉。卹廕六品正員官。保初兵部車駕司行走主事。哀哀孝子。國國
棘人。咸有父風。足爲令器。孫二人。萊孫麗孫。並當提幼。早見崢嶸。知爲鄭公之

孫無忝鎮惡之祖。惠吉善慶信而有徵。公體貌矜嚴。風神爾雅。被服必於儒者。論說必本仁義。有卞盱之孝。有耿恭之忠。有公綽之廉。有馮異之釀。陳金於廡。不以入家。投醪於酒。不以私厚。言易則會稽伍振。重儒則齊相曹侯。英俊資其吹噓。族姓待以溫飽。聞其捐館。路人亦爲神傷。追其遺風。百年可以隕涕。公孫少正。輿詞稱其愛人。國相晏嬰。當世善其久敬。今之從政。無以方也。在軍三十年。用財累千萬。成都私宅。甯聞八百之桑。郵城舊居。未有一篋之寶。持以入地。可質坤靈。用以傳家。是爲孝子。銘曰。

西河弟子。商山隱人。河南作守。長沙亡秦。陳留廉吏。南皮宮賓。德門布蹤。芳風襲趾。禮堂祖孫。詩庭父子。訪卒撫輿。邁終堅起。孝惟卞息。勇實灌夫。遂下卽墨。進屯慈湖。左懸金僕。右畫山圖。楚國君子。漢朝羽林。府公嘉績。邑子歸心。函首告墓。撫弦沈音。磔楚膊吳。排國搃越。燕秦載綬。衛齊薄伐。勳在旂常。班崇節鉞。廉過季札。清逾胡威。廊金不入。羌馬空歸。食同下卒。桁無留衣。經歷關河。流連

淮海戶識重旌人知葛鏜樂社如林唐碑有待居無賸御坐有文儒蓋公正舍
五侯中廚大夫是矩羣帥爲模羣帥紘紘我公抑抑在醜不爭抱玄斯式人信
援車帝嘉祐德東髮戎旅致身官公周親惠暨九族恩同十雙薄殖一畝卑宮
貂蟬甯貴鐘鼎非堅雅聲電遠溫風春宣無弦韵逸不續華妍南周揚越東澹
九夷神明奉式慈惠稱師揚水無怨行枚有詩令妻孝嬰故人門義在喪言哀
臨幽隕淚武庫當門祁連象地昔開幕府雍容周行今銘玄石寤寐笙簧綿綿
此志代代無忘

答孫東父書

張孝廉書至損辱惠告過賜垂謝循誦三四以爲兢惶府君昔臨鄙州微生方
在稚歲仰聞稱績疑爲古人承轉大州累典劇部都都有頌邑邑有碑徒以身
爲寒人未修民敬故以采其輿誦宛游寢丘之封瞻其高車如過公孫之里位
不滿德降年不融使夫故民有失母之哀門義有心喪之服國家褒賜臣吏勒

在秘書如我府君可無銘饗鄱州人士各發乃誠非有阿私不爲虛美且以竟陵行狀未盡平生始興上書不賅本末豈可復承獎藉謬許風規足下廉吏之苗吾公之子方當蓄林木以挺名節振鱗翼以邁高衢願節盛衰足弘至道弦詩金石方聞億載之聲名江海波潮竊有無窮之愛護塗路有局公私方滋不遂面白良增於邑伏承動定不宣

感逝銘

故縣學生從叔父諱廷蘭字滋圃故縣學生李公諱晉字秋丞故大使徐公諱兆鴻字菀齋故縣學生儀徵劉公諱蘊輝字玉生故縣學生曹公諱克成字子勤故署湖北荊門州知州吳公寶儉字禮園故四川按察使定遠方公諱濬頤字子箴故翰林院檢討東臺陳公諱寶字百生故戶部主事高郵董君諱對廷字策三故太子少保兵部尙書合肥張靖達公字振軒故廣東水師提督廬江吳武壯公字筱軒故太子太保兵部尙書兩江總督侯官沈文肅公字幼丹故

翰林院庶吉士通州馬君諱毓鑿字勿庵通州葛君諱桐字青伯右一十四君
皆微生年時被服恩誼者也或乃識賀循於童龀偉應詹於弱冠拔李含於寒
門甄楊方於陋族若嘉澍潤草惠風振柯投困鱗乎清流縱勁羽乎遙野豈直
豫州有吹生之惠司隸有容接之雅若其調護險阻瀕訟讒謗力逾九虎功隆
起痿使夫太行化青松之道素絲慶返素之日豈非情兼伯叔道稟雷風者歟
昔人感賜灸之微惠記免奴之纖恩彼皆九等下表六品冗輩何有君子不能
凝懷故夫庾信有感舊之銘高允有徵士之頌若余四十之歲無稽古之榮飽
食之軀無博奕之善念彼諸老抑又慚焉故以寫其感概禔之文筆以昭達情
志抑揚悲哀人各一首凡得十四篇云爾

溫溫叔父處脂若冰排俗慕古落蔗葆丞撫頂賞惠序賦騰稱翹心駒足結願
麟徵便便先師多喻疆誨鑄之鑪埏紉我蓀佩時短心長道滋年退過墓言哀
廢書述對祁祁李叟槃阿是營大人靈氣泰音無聲耽墓圖詠遺割時榮等我

子姪寵之吹笙晏晏大使志掖晚進如燧解冬似涓廣潤口詔世典手授筆陣
厥聲不颺道實可信煦煦曹父獨行之儒爲息擇對無禪有禱訓我貞介刊遺
華腴好德樂道邦壤是模斤斤吳公吹枯起涸假服羽毛抑情彫削運阻中年
名昇體落江漢湯湯流恩可託穆穆按使弘道博文綈繡土木鈎鐫雷雲日鑿
在晦懲膏近焚老戒恥殆傳其師聞秩秩檢討學高意下天骨豐雝溫情陶寫
激弦嘯簧騰風蹕雅忘年爲朋期我董賈媿媿董子醇風煦時屏落世耀高曾
爲師聲匪蓬問文承前規有口嘯我俾也可思翼翼靖達古之陶劉專征交廣
恩流數州說士如渴伸善若抽在萬爲一在藥則瘳明明武壯躬膺節將發藻
書林騰名代望羣流趨風諸生慕量在目不思遙年結尙桓桓文肅奉材自天
曜崇照下運涸神淵方皇奏記割刈波連沒有餘潤結感如綿簡簡馬君雁行
議齒淪善如躬覩枉若己驅風燮蠅引輪方軌凝惑述哀連縑百紙峨峨葛生
交自布衣猶昆比仲慕往義歸門隨身熄聲期翰飛輟豪濡痛在情不違

謝龔太守惠物啓

使至奉惠肫肉蒸鷺冬筍兩橋四事一櫛最貴遠同主壻之名公膳貳珍不慮饕人之易製從梁典便中甘蒞來自揚州甯聞變枳總茲嘉貺足褻溫情某食粟無功致鮭乏術何年作郡奉盤肉於桓公幾日讀書昏兔毛於壯武方諳爽竹幸非蜀客之愚身不學仙差曉華胎之味謹啓

書溫州老婦

乙酉丙戌間瑞安黃叔庸爲余言同治十三年某月日穆宗皇帝上賓遺詔頒下郡縣有瑞安老婦聞遺詔哭數日夜不止竟以死朱生曰吁嗟悲夫人能弘道何有貴賤魯穆公年老太子幼漆室女倚柱而嘯隣人驚其悲武王伐紂會盟津會者諸侯八百國伯夷叔齊不食周粟餓死于首陽之山屈原諫楚懷王不寤投汨羅之淵以死本朝吳御史可讀上疏請立穆宗皇帝嗣子以尸爲諫卒以大寤聖后此人皆博意壹志如有不得已于其中故乃憫然爲之而無所

疑戀顧惜。韓子謂一國天下非之而不顧者鮮矣。又况窮天地巨萬世而不顧者哉。從古小人多不樂推人之美。一聞瑰意烈行。或遂譏議之。以謂險怪取譽。不合于中庸。其恂恂守繩尺者。或又訾以爲僞儒。天下事安用僞儒。嗚呼。是真無與於是非之心之尤者哉。

蝨隱園賦

合肥王謙齋先生有小園。余爲之賦。

若夫九江屬縣。東京侯國之區。淮南大邦。中朝揚州之治。三國吳魏之疆。五代漢胡之地。人兼齊魯。醕風士帶。并涼健氣。值毅皇之中興。挺魁人於三事。於是望淵濯鱗。睨霄振翅。名充於帶郡。領州狀闕於臺府。局吏亦有梁朝貴游。江左才地。風動牋符。雲翻表議。笑嵇康於泥蟠。怪龔玄於不至。豈知天山逸民。少無宦情。陳留有文貞處士。襄平有崇虛先生。閣無太守揚宣之畫象。門無刺史桓溫之通名。遂乃泥塗自穢。草萊孤營。冬春夏秋。風雨晦明。鄙夫沈約。郊居之年。

積望於台鉉。潘令面城之日。遘危於永平。自名以鉉。跼伏爲生。劉子覩難而寤。憚莊叟呼牛而不驚。其人也。太原晉陽之別派。琅邪臨沂之大宗。門顯於齊梁。世譜位極于文武。官公徐苗。則世爲博士。周訪則累葉江東。亦旣騰名臺使。飛躍人叢。行議上於公府。秀才策于郎中。然且隱文羈藻。抱質含冲。仲長公理之良田。背穹山而構屋。蜀郡楊雄之祖宅。臨汾水而環宮。遼塵瑳以端居。敞修園而散慮。粗有林亭。聊相部署。慚東田之百一。方陶園之殆庶。人無萬里之心。家無十上之疏。固非若勁禽之棲卑。柯穹鱗之居沮洳。蓋自肅肅顯祖。邈邈往賢。寤入廟之被獻。甘對岫而臨泉。勝牽船以爲宅。願買山而無錢。於是經營十畝。酌斟百年。名增飾而崇麗。財充席而容筵。是以水則方鏡。微宏山則比拳。校懽臺及丈而已。崇戶平眉而須俯。雖非裴第。頡頏金谷。比數視夫。霍氏大將軍之池臺。司馬會稽王之東府。蕭竟陵之後園。韋黃門之私圃。震一朝於華榮。不及稔而焦土。是以誠取精與用物。遂守玄而抱雌。牆不薙草。屋不翦茨。奴無桓伊。

善相。媵無樂。正玄妻爾。乃純菘菟。非絺綌。羔覺國風。詠以旨蓄。曲臺修而爲儀。暇則讀書誦典。詔子命孫。子則授經有述。孫則賜硯有言。或命耜以授耒。亦堤流而督藩。至乃幕府停轅。旄節過禮堂之下。舍人迴駕。軒車交學館之門。雖題銘而不覲。終蒙被而何論。豈知田光少年。燭武壯齒。嚴安之上書。一車陳琳之飛箋。六紙揚州秀才之義兵。洛陽賈生之才子。說杜弢而生還。呵王如而不死。終焉憩豐林。釣淺水。翕道門。遁世軌。忘去溲而辭卑。會長生以久視。故夫劉伶以中酒長年。留侯以微病得仙。况無營於代務。又七十而可傳。纏華鳥於寤夢。流風雲于歌篇。客難駕辭。擬諸東方朔。揮霍高議。比於魯仲連。蓋神龍不可爲。驂服。怪瑋不可爲。雕鏤。雖睇之而若近。有詣之而邈然。爾其留滯異國。瞻望停雲。我思夫子。載馨其芬。有陳書而再拜。亦勒詩以云云。思夫吳建威淮南之軍門。方大夫江都之別墅。賓客則陳徐應劉。氣誼則君我爾汝。元暉之連句。侵晨馬卿之工篇。邁侶今則琴館春涼。吹臺晝楚。一翁北斗之南。一臺富春之渚。感

舊之銘如干編年之詩幾許是知膏煎蘭而易銷木全天而可壽玩時華而綿繡相宣娛天籟而笙鏞交奏齊士以安步當車宋彥以不貪爲富悟在萬於齊莊雖九夷而豈陋

復顧耀州書


晴谷年丈左右往秋仰奉教言猥以昔時同異之談形乎善謔重垂獎藉溢乎常分若持綈繡而被土木染丹青而績糞壤何其隆哉銘盤戶蔭單陋非有德門人物之雅少壯失學未若丈人三篋之富隻身依人哀樂非已豈如君子素處之娛行年四十龍賸不知甯望閑儒分經之日行潦之于河海凡鱗之于龜龍殆不可同年以語矣卑辱輿奧日以不堪常思發憤勒成一書以蠲所恥是以含垢忍辱不去泥中而生旣褊心又多芒刺觸目卽乖傾耳便午辰起戌臥都與古人爲緣外則百金之家一命之士禮命不接苞苴不通若此之類不可說也吾黨諸子翰飛鱗振殆皆一時之駕各有千里之想年旣壯大志亦乖異

離合生于貴賤。親疏起于勞逸。黑白殺于風塵。學述迂于憎好。同里共井而中。若冰炭地醜。德齊而陰相奴虜。此最可痛也。至如甫除秘職。輒乃居儼封君。裁辨凡將。便欲蕩除閩洛。君子犯誼。處土邪說。又不足道矣。門戶殊途。南北異軌。比入京師。燻灼郵甚。華名之徒。往往在目。觀其矜論。飄發偉詞。衝起若馬。鄭屬鞭而退師。班揚歛戈而奉轡。求其文筆。乃無異常手。故知假羽毛於齊人。蒙虎皮于晉馬。第欲蘄勝儕輩。非爲抗心古賢。吾黨二三子。雖爲聲譽不及此人。猶幸不坐吾貶議也。此皆平日所深鄙笑。每引鏡照面。重裘爲喻。益願丈人第其妍惡。往時周子彥升最耆鄙文。而指摘尤酷。今規寫所箸雜製二本。一寄周子。一陳耀州。魯人斬桐以爲良琴。楚王剝圭以爲械秘。持道喻器。足爲雅談。承轉在醴泉。比方試守。昔李充以家貧求除刻令。葛洪以出丹請補句漏。丈人崇懷高致。未亞往賢。矧處有威鳳來儀之美。行有鷹鷂搏擊之用。然醴泉雍州故壤。漢志舊俗。姬德羸弊。事在主者。庶幾嘉蓮兩穗。郡上石圖畫贊生碑。吾承文事。

規茲品狀。且慕流聞。便當自求邊州。乞公教格。亦望官錢。足以買田宅。資力足。以蓄圖書。不必借說文於太常。賃敝廡于皋氏。小人升斗之計。飲河足腹之願。亮足副也。承重勒玉篇及文詩集。皆盛德大業。至所仰奉。何時得讀爲幸。臨書於邑。伏承動定有福。不宣。銘盤再拜。

造石佛像銘

清光緒十九年太歲癸巳三月二十四日。泰興朱銘盤奉爲亡祖父母亡父母及亡弟監盃亡女嬰之亡姪孝提造此石佛像一區。伏願一切咸同斯福。銘曰。漢后通寂。晉皇圖形。露濡十地。曜郭九經。天堂寶國。魂依魄甯。四大千佛。萬震億星。福祿歡喜。蓮華亭亭。



桂之華軒文集卷九

答顧未杭書

未杭足下。得去年六月十五日告尺一之牘。情有千里。承到北地。瞻戀養舍。有家人父子之樂。有笙竽倡詠之驩。挈羅敷以登樓。命婦以奏瑟。俯吟仰嘯。不必門有朱輪。秋軫春醪。不必庭生桂樹。加大人清高。惟有匹絹官廚朝夕。但有美酒。視僕竄身窮海。寄孥東荒。愉佛相懸。何異萬里。又承買蜀婢。許用見餉。新安之致。奴子阮姑之留胡婢。古今流聞。以爲佳故。重損來教。遂隳前盟。荀偃改于載書。張儀欺于六里。小君之志則可。仲路之言安在。况僕稽之聖典。內言闕於外門。準之曲臺。夫人廢於大饗。有如繳日。邱明恥之。如使鄴中有新城之奴。司州有夫餘之口。幸念魯叟貳過之訓。重致梁楚白金之聲。不至令顏生懷譏。季布騰諷也。又承與賢兄並勒家集。及注尊製華原風土詩百篇。昔曹允恭能記目錄之文。顏孔歸自爲父集之敍。了無偉異。亦蒙華名校之吾賢。彼方慙色。

向令伯魚贊尼父之曲禮。曾元寫子輿之孝經。孟堅草漢書于班椽之前。子長
勒史記於太史之側。其爲盛美。乃足多也。君之兄弟。乃復偉然似之。芝蘭叢于
庭階。子弟列于左右。所以追芳蹤於萊子。蹈嘉議于高曾者。殆無踰于此。獨怪
足下單車入秦之日。抗手西邁之辰。慨然寤歎。以爲敵罔。豈知高雲之下。乃有
沮洳甘薺之外。更生荼葉。如賤子者乎。休璉陳苦懷于侍郎。文通致五短于交
友。叔庠夸青山于從事。鴻勳告還郡于大弟。私願不遂。中心臧之。足下念此。可
以莞爾也。敬承動定安止。不宣。銘盤頓首。

謝范无錯啓

某啓。伏蒙以夫人書帖見餉。謹奉啓陳謝者。偉語驚人。弘詞配古。中郎爲父。故
善八分。太冲爲兄。遂工銘讚。猥以劉盧族望。騶苦通家。入馬季長之後堂。覩衛
夫人之法帖。期之聖學。乃簿錄之餘波。臨以至人。見大方之秋水。玩詞尙象。起
白雲滄海之心。置座鑄銘。寤太元法言之指。欲酬雜佩。婦豈陳玠。規蒼苞苴。息

非道韞。惟使閨中小學。奉如女史之箴。竈下胡奴。日誦洞簫之賦。謹啓。

登州魯仲連祠堂碑

魯連先生。體自然之姿。守不詘之道。甄經究緯。而不干世主。理糾釋紛。而退處冲廓。功均九鼎。無龍蛇之詩。智踰萬夫。有蟬蛻之節。可謂高操挺乎日月。颺情邁乎風電。蓋大人之閱經。高士之變概。周秦之際。無其比也。夫其淵量廣博。瑰詞滂瀆。若升高漢而睨元淵。坐嘉蔭而閱負擔。聳昭相萬愉。怫二致。抑又楚人耦耕之徒。大隱在市之侶。蓋將履華宮若山林。御赤芾猶麋鹿。其視萬乘之威主。三軍之元帥。殆將玩嬰兒於股掌。叱褐士於車下。巍乎奧乎。不可測已。若乃魯國枝庶。公侯子孫。或則文王之昭。或爲武王之穆。故有詩書之訓。禮樂之則。宗師仲尼。憲章二祖。故以著錄儒流。列名諸子。有夷叔之清。有務光之節。有衛贛之辨。有臧武之智。世遠虞夏。不爲臣僕。坐無先師。不爲顏回。固有陰濟區宇之心。哀閔天下之志。悲夫。影纓振履。紆綬結璽。充耳無聞。翳目不覩。辟若對夏

蟲而論凌冰之寒持蟬蛸而語松喬之壽遂遊戲人代揮霍風雷蓋勇足以振太山智足以周豪末故乃洞天人之秘奧辨皇王之同異且三代之起由來久矣或以七聖重光或以三后襲武高禔而曾稷父斷而子丹尺寸之功要諸龐首毫毛素業期諸百歲並仁灌嘉澍誼動警靈滂澤滲九淵義功提四海故得蒙皇穹之垂命受戎夏之謳獄福流苗裔光昭孔經今秦據戎落之士挾虎狼之毒睥睨中國窺窬龜鼎一旦開明堂而朝九牧執鞭朴以答天下將剗棄聖典烹滅冠帶使鄒魯不傳弦誦之聲後生不聞周孔之說是以發憤輒論激昂詭辭嗑吮大國制命上將百戰百勝而不費一兵一縱一橫而世無我對先生之道固若是乎故建威將軍廬江吳公以光緒五年九月持節督山東軍事周覽東垂弭蓋中牟觀大海之斗岨悼戎備之不設旣經營鎮戍申戒軍曲將以振大漢之撻伐講威戎之武事爰於登州之左始建先生之祠以謂今之山東古之齊魯可以北走燕趙南馳荆揚東薄青營西通梁衛其民舒緩闊達其俗

夸奢虛詐。又膠東高密。並海爲國。黠戎悍夷。繡居都邑。雖復不覩野祭。終是漸殺儒風。故到鎮之日。下令綱紀。厚經生之廩。重祇教之罰。謁先賢之墓。申耆老之敬。欲令革變衰俗。振厲士氣。使人有高慕伯叔之心。戶懷徽管左衽之歎。歸趣禮樂。遵軌忠孝。公之微尙。有可觀焉。銘曰。

仿皇潛密。翔瞻故齊。峩峩先生。高鶩遠栖。儒言造次。清風提攜。目閔圭組。氣干霄霓。羣雄並興。士練口舌。犀首張儀。孰爲工拙。子輿畫轅。孫卿淹轍。先生之風。道與儒通。作之不已。終爲聖工。素書十四。勒名漢志。九牛寸豪。太倉纖稊。持告齊人。襮張高致。扞道折戎。逃芳遁餌。於穆建威。國之光輝。孔武有潰。慕賢不違。東海之滸。先生所歸。不有靈宇。何循高徽。

四裔朝獻長編敘

竊聞職方掌天下之地圖。禹貢布九州之山水。是以六合以外。棄焉不論。一物不知。汗出於額。故僧祐有薩婆之傳。裴矩有西域之圖。梁秘閣有婆羅門之書。

宋段國有吐谷渾之記。並代瑋延閣。世秘藏室。若夫夏后御歷于夷內賓。周王披圖。肅慎賄矢。交南白雉之薦。追貌獬皮之貢。皆延頸聖膏。沐浴皇澤。非關內外之辭。固無祝史之媿。然非誼主都俞於太極之廷。明牧謨謀於爵堂之上。文德曜乎玄淵。威雄震乎聳俗。則豈能寤其酣魂。糟魄。開其獸嗜。禽心。被忠信於爪牙。馴拜跪於角翼。姚皇無司空之武。遠苗不能革音。姬世無薄壘之軍。崇人靡以崩角。故知舞干爲相濟之義。修教爲得半之功。故洪川奔而淵無不首之。麟勁風披而野無不拜之。草春生而百昌昭蘇。秋粟而千芳零落。衰則木蠹而蟲出。盛則馬逸而蠅從。豈非虐老獸心。橫生鳥視。貴貨根於性命。譎誑包乎寢息。是以昔之聖辟。不爲藩籬。比其衰也。晉人闢萊而居戎。秦氏置鄣以絕虜。自謂冠帶之屬。引弓之民。各爲主臣。不相德怨。約既不固。志又張皇。或乃利其屈伏之名。美其回面之語。張壇之使未返。赤白之丸已至。至有朝臣夕虜。父鬻子賓。兄將而弟俘。夫犯而妻順。豈知盛美不可名。龔軒堯非能立致。古籍無緣盡。

信臣諛不謂皆忠。是以六典有蕃國世見之文。太保有不利遠物之諷。違道用濟。則吾未聞。若夫因緣自利。上下攸同。聞蒲萄則開大宛之國。覩犀甲則建朱崖之郡。致生口則許扶餘。通關牧牛馬則聽匈奴。合市遂奉贄。鴻臚上籍典屬。外則校尉護之內。則官邸所舍。莫不葳蕤簡編。紛綸表議。尋朝覲之例。厥凡數端。紫燎助祭。從封嶽瀆。宗廟陪祀。爲吉禮之屬。大喪奉慰。拜謁山陵。告赴國哀。爲凶禮之屬。遣軍助討。請兵伐叛。告師奏捷。納款陳誓。壁門受降。爲軍禮之屬。君后躬朝。子弟宿衛。俊秀入學。扈從車駕。遣使起居。元正大朝。冬至小會。展賀嘉禮。卽位請冊。報謝寵授。立儲傳國。改建邦名。求賜國姓。爲嘉禮之屬。又貢之爲物。一爲土地。二爲方物。三爲典籍。四爲俘獲。皆因事立制。隨流而名。代變瘡。洪事日益廣。至有鈎連商賈。巧猾姦利。毀壞亭舍。陵厲臺傳。由是決蟻穴而潰。大河逸星燧而炎崑岡。往事昭曜。不可勝數也。大凡交際之間。利一而害九。彼我之際。福晦而眚昭。尉佗箕踞而見陸生。屬賓絕遠而剽漢使。烏珠恚變於故。

璽莎車懸奪於都護。喉鳴鏑以射父屠太守以祠天。餘無持其兩端且鞮謂其
兒子喜則龍象孔甲怒則豕啼貝丘谿壑非珠璣可闕火炎豈勺波能熄弱則
君臣之國彊則兄弟之邦是以飄滑封親晉之王猗咎蒙單于之號苻健剖茅
於襄國慕廆胙土於遼東弋仲爲高陵郡公元海實廬奴縣伯其後乃狼顧京
洛獬吠皇王指江左爲岷夷呼元明爲睿衍雖復治有隆殺聖別上中終知犬
羊之心不可被以冠帶蹄齧之性非當革以鐘鼓故南越朝滅而夜郎夕朝且
蘭今誅而滇吏明至蒲陶借館匈奴破碎之年烏丸來王三郡彫枯之歲故得
名王稽首比於內臣大酋折節過於漢舊向使五帝不以龍鳥爲營衛三王不
以六韜爲兵法則豈能內暘谷於東裔通王母於西極故萬夫之長可以觀政
行潦洞酌可以昭信尋其舊典亦有足觀今錄自漢元年以來至于明季凡二
十五朝朝獻故事通爲若干事昔梁有天監職貢之圖唐有入朝首領之記宋
有雀峽列國入貢之篇明有吳氏西洋朝貢之錄並專紀本朝不賅前古今此

總集義主閔張固以明帝皇之至尊示夷戎之難御若朽索之控八駿譬一繩之綴萬石弛張在於威德澆濡繫於政道畏壘可以穰歲荒宅可以成都豈况巍巍大聖之朝必有喁喁慕義之美司徒司馬各有司存疆場之事一彼一此殷鑒不遠在於夏后前車未終來軫方急大夫君子庶幾覽觀焉

弔古骸文

光緒十八年淮軍將士於金州東南百二十里沙谷堆築造壘壁培地得髑髏一枚大如斗魁中貫矢鏃有異常製蓋古戰士効命邊城者也倉皇棄置覆諸淺土不復施棺槨悲此壯士身爲挺節之雄沒無三泉之葬遭遇凡猥無朱林還祔之禮鮮惠連哀薦之文名沈身霾足用永歎是用睇古累悼敬爲弔之詞曰

訐青壤之龐幟亮神皋之左肩山嶸霓以媵嫫波沸渭夫淫川帶碣石而樹鎮門東胡而鉤緣胎元封而振武換夏戎乎千年有拔荒而柎版抑朝略而哺捐

擲萬命以徇寸。鬪骸闐乎坑淵。曩京觀而平嶽。何資斃而蕙全。瑋介夫之沸卉。羽皓霜之利鋌。龔犀合之壽鎧。志組超而檻堅。當交綏而踈旆。醜冬霜乎暑天。灑淒風以膚削。允處哀而勝旃。或君子之甚出。失手弓而罵焉。臣掀淖而仍岨。表木下以佹然。此人憤其激曜。踊挺殳而陷前。面冒矢以橫野。喉攢鏃而丹阡。諮漢雄與魏烈。寤晉閔與隋煬。意致節乎明杪。殆翼趙而忠唐。昔藁土而失錮。掩桐棺以倉皇。系王頸而拂素。奔修夜以蔽暘。諛年籍與軍閥。蒐贈詔與誄章。無墳前之刻石。將古存而今亡。豈文鄙而莫顯。抑佞儂而不皇。理若茲其難寤。廩哀古而淋浪。往聖皇之在御。頒月令乎州邦。申埋鬻以掩骼。謂循侯而歸藏。悼此靈之連屨。旣沈軀而嬰災。黷忠節而匪朗。翻題裂而和摧。木柴虺而斷柎。榘紛颺以飄灰。無新榑之返瘞。魂痛令乎魄哀。告明靈其展笑。莊大去而何懷。願昇雲爲參伐。天狼刑乎帝臺。入山鬻爲雄伯。閉餐虎而清垓。雖靈聲而豈懟。愉天澄而宇開。覽吾辭而反袂。靈憲憲兮去來。

桂之華軒賦

余家自天啓中營宅於縣南城之鉞街歲逾二百年相襲凡十世余所居宅五間其東有桂樹一本先大夫所手植也余以同治十三年遭父喪明年樹亦萎謝追惟君子手澤之義韓宣嘉樹之歎因以名其軒而爲賦以寫之賦曰

大江之朔海陵之隈唐保大之遺縣吳全都之一坏古少名人比於河東小縣區淪海角譬之中原飛埃厥土應典而白壤其俗儉嗇而重財若夫淵秀高士清辯通才鸞鳳振響於常羽蘭茝擢英於叢萊天道無門養之以福意落莫於金瓊情蕭寥於耳目平通開第而門無朱輪蜀郡爲郎而身無丹轂太尉有行田之牛阮氏有襪陽之服貽孫則仲華經書分子惟仲長斂屋歌斯哭斯聚族於斯顏生處巷而不陋張老拜手而頌之肅肅我祖文章之師當天啓之中葉有神君之生碑再臨大郡一爲憲司海奸懾其軍號閩氓營其私祠旣而投珪謝組下肩垂帷或閉關而藝菜亦課農而拔葵於是薄營林圃少有臺池側屋

飛軒敬游隱居之策。蒔華漉酒。陶公南山之詩。遂孫承而曾襲。有東益而西虧。淺房鱗細。低戶眉垂。庭方界格。巷曲剖碁。或陸氏弟昆對處。兩頭之屋。或謝家娣姒平分。一樹之枝。或父子異居。孝廉有當時之諺。或舅甥不別。魏公無應宅之奇。若乃少微含真。怡心養神。不恤蟻牛之鬪。自置鸚鵡之臣。子雲之先。四世陳氏之譜。數人守蕭廬而不拓。抱遺書而獨親。自我高而迄祖。乃禮考以逮身。於穆府君。清風高致。瓢飲水而不憂。波投錢而愈厲。一生湫隘之居。十葉五經之笥。獨殆於杪暮之年。安趾於清貧之地。其居也狹於五步之樓。小於十笏之寺。方牽船而四無淪漣。比小幄而旁無車騎。開北戶而畏寒。近溷藩而掩鼻。酒鑑茶竈。擠壁排樵。書几經窗。依尻駢臂。醒調夢噉。夜互答於連房。積布中牕。畫紛綸於庭次。賓來而一榻橫。陳父出而羣兒邀戲。亦有四時之花。百年之木。紫薇璀璨。以垂軒丹杏敷滿。而纏目。右績駢乎桃華。左鮮扁乎天竹。雜草鈎連。衆英交屬。槐糝金而夏零。橘鱗鱗而冬熟。我君乃考第英華。流連芳馥。徒彼桂樹。


之柯植根小庭之曲。初茁葉而申青。旣覆陰而堆綠。善開九月之花。戲比一囊之粟。思鄰生之射策。撥其高枝。想淮南之山阿。配其野服。固已郁毓紛庭。馨芬溢谷。綴之連縷。足充椒蕙之餽。劑以名饈。宛吸桃花之粥。無何而天荒地變。石壤梁傾。素冠有鬪鬪之痛。莪蒿有哀哀之聲。皋魚則淚濡風樹。晏宗則涕濕書楹。如日如年。恨蜉蝣之不死。在辰在己。痛龍蛇之無情。此花於是萎素質。雕疎英脫茂葉。拜纖莖。才子毫而墮髮。壯士老而亡精。屈子魂遙。洲渚之木蘭並落。嵇公化去。小園之修竹無名。爾其靈魄晶空。繁霜布皓。海棠弄色於垣陰。黃鞠搖姿於衆草。橙未熟而已垂。橘初丸而尙早。悼此樹之渺然。嬰煩憂而如擣棘。人搏搏勞心。燥燥思夫。曳履浩歌之日。扶杖訓詩之晨。暄庭戴曝。暑簟清塵。袷衣親背。魯酒溫脣。喜清秋之獨美。撫嘉樹而逡巡。幾日扶闌。睇高鴻而送遠。有時當戶。速鷗鳥而爲賓。入則公驩。而軀說出。則粟義而獎仁。嘗余小子。獨爲鮮民。以年則姜氏一門。伯淮爲甲。校貲則陳留諸阮。仲容最貧。况乎士衡。士龍少

漣洳於縷經君苗君胄壯寤羨於耕緡幸符懷於下澗終不懟於寒人言題素書低余仲子諗酷戀於山阿思經營夫廬里詔植援而代坦命激流而引泚閒居之願信於潘岳黃門歸田之心亟於張衡平子楊大夫不爲給事譬渤海之失雙鳧王子淵徒責髯奴如秋風之吹馬耳則何不求齊曷之車遊梅真之市濯游童之纖纓循輿公之逸軌彼夫洛陽秦壻四十爲太守侍中江左荀郎三十爲監軍刺史釋之減產於彌年馮唐遷官於暮齒乃昇墜之乖違非斯人之臧否故東方述志而解嘲揚暉低昂而獨喜則是軒也雖非楊夫子之鱣堂陸大中之好時輿馴候以任天亦抱禧而揖祉者也

節孝待徵錄敘

桐城方節母姚夫人旣以從子致祥心齋官太原參將贈二品夫人其嗣子晉齋縣尉則述夫人行事以乞文於當世通人閔儒蓋亦已有年於是總集方京卿存之己下二十四人之作爲一卷爲方來彤史之本以諗於銘盤銘盤故

與心齋爲拜親之友。知心齋有叔母賢明媿媿人也。其後與桐城馬兵備健父相善。健父之母壽也。余爲其文言平生嘉懿之行甚至。蓋健父之母爲心齋從姑。故心齋與健父爲中表昆弟。心齋之叔母與健父之母爲嫂姑焉。桐城方姚馬氏並高姓清族。匪獨士君子爲彬彬可觀矣。乃其女子亦高秀挺異。殊絕於他縣。若夫人之志之行。忍死以全宗。遘危而衷禮。倉猝而不失於度。卒以奠亡者之體魄。永生人之家祚。使方氏之宗危而不亡而已。亦躬被其聲焉。豈可謂非卓潔之操哉。其於往史之所記。安有二哉。今夫人方就養江甯。而心齋遠官太原。往余與心齋相從。心齋輒爲余言叔母之恩。恨己方貧賤不能仰報也。後乃卒讓封以榮夫人。若心齋者可謂賢子弟。卽又以見夫人之恩之不可忘也。



桂之華軒文集 補遺

方氏夢園書畫錄敘

(乙亥)

昔愷之嗜奇。縑楮畢致。憲父攬古金石。斯萃觀其寄思。匪局紆情。必遐綺豔之製。弗膺乎我衷。豪素之託。迺愜乎沈慮。故其言罕近韻。詞發生趣。意匠是契。爰宏篆籀之規。太古以養。能悅山水之性。邈哉昔人。歸乎岌矣。夫子學徹。郎韋精研。鍾索胸次。絕曠神妙。歸其毫顛。纖微必綴。華鳥媚其腕。右少寶。觥異夙性。翰札何臧。何游不廢。乎六藝斯寢。斯饋身之者。卅年搜羅。旣勤。繞獵遂博。上自六代。迄乎近人。鑒賞之富。甲于江左。每當初旭。散暝夕烟。霽空清琴。罷張春醪。輟撫時雨。灑潤之畫。停雲懷人之天。披帙流覽。則奇芬忽生。抱牘雜誦。則幽趣可挹。駸駸乎其韻深。其旨渺矣。夫因好卽物。達人所難。明辨悉當。大雅匪易。夫子抱通靈之才。鏡瑩澈之智。朗鑒在遠。清言益多。弁以論說。次十卷之目。潛發伏采。成一家之書。踵古式于藝園。趨前規于墨林。洵可謂心手交暢。華實竝茂者。

已鉞盤謬以陋質。瞻茲鉅觀。徒駭望洋之奇。靡極游夏之贊。三宿以臥。五中俱膺。雖使涼情沁懷。浣孤月于林際。幽響獨結。迓好風于水涯。奚以易此樂哉。用是抽翬翬之思。陳俯俯之言。附諸簡端。用誌怵悅。若夫羲獻之軒輊。吳曹之低昂。揮拂之靈妙。衄挫之矯異。清論高議。娓娓炎炎。後有讀者。可景然悟也。

與張季直昆季致袁慰廷函

(甲申)

別後僅奉一書。固知司馬勞苦功高。日不暇給也。彼公內調金州。以東事付司馬。並舉副營而與之。竊想司馬讀書雖淺。更事雖少。而彼公以三代世交。肫然相信。由食客而委員。由委員而營務處。由營務處而管帶副營。首尾不過三載。今彼公處萬不得已之境。僅挈千五百人。退守遼海。而以中東全局。爲司馬立功名富貴之基。溯往念來。當必有感知遇之恩。深臨事之懼者。及先後見諸行事。及所行函牘。不禁驚疑駭笑。而爲司馬悲恨於無窮也。司馬初來。能爲激昂慷慨之談。且謙抑自下。頗知向學。以爲是有造之士。此僕等貿然相交之始。迨

司馬因銘盤一言之微而得會辦營務處之號。委札裁下。銜燈煌煌然。迎謁東。撫言行不掩心。已稍稍異之。然猶以少年氣盛。不耐職事。需以歲月。或有進境也。東援事起。適際無人。蹇遂與司馬偕行。彼時司馬意氣益張。然遇事尙能奮厲。不顧情面。節而取之。茲猶足多。曾不意一旦反復。夸誕謬戾。至如今日所聞見者也。凡諸無據。如自上申報以弋虛名。詭設同文館以穢物聽等事。尙不足以折司馬之心。姑不說。請卽僕等所躬被者論之。一營務處常事耳。南北兩洋。漕河沿海道府州縣。往往有營務處之名也。僕等與司馬雖非舊識。要是貧賤之交。而往春初見。雖詡詡作公孫子陽見馬文淵之狀。一再規諷。不少愧悔。此一可笑。蹇今昔猶是一人耳。而老師先生某翁某兄之稱。愈變愈奇。不解其故。此二可笑。督司彼公支應所。司馬既有領款。應具領結。督因司馬問領結格式。遵卽開寫。輒斥爲何物支應所。敢爾誕妄。不知所謂誕妄者何在。勿論公事矣。督於司馬平昔交情何如。而出此面孔。此三可笑。願此猶尋常世態也。司馬今

貴人不足以爲輕重。更卽有關於司馬品行心術者論之。司馬所謂營務處。分統三營之營務處也。會辦朝鮮防務。會孝亭辦也。公牘具在。文理昭然。而司馬札封稱欽差北洋大臣會辦朝鮮防務總理營務處。將不屑於此間。歟。則不應受事。將以此愚瞽東人歟。則東人不盡無知。將竊借北洋以欺人歟。則人不可欺。言官劾左寶貴者。列其妄稱欽差欽命字樣。不知司馬此舉與左寶貴何異。此其一。營務處是差事。而官則同知五品耳。於鎮將用札於州縣用札等而上之。將道員兼營務處者。於寶缺提鎮亦常用札耶。在司馬之意。豈不謂關防頒自北洋。便用北洋體制。彼州縣檢簿之印。無一不頒自禮部。將亦與禮部一體耶。事例乖繆。此其一。旣爲孝亭會辦。同見國王。便當孝亭居左。一應公事。便當會孝亭前銜。而事事任性。妄自尊大。威福在我。陵蔑一切。致使將領寒心。士卒怨涕。司馬將謂勢力可以懾人。權詐可以處事耶。不學無術。此其一。內地職官。惟寶缺出。則張蓋若營務處營官。從未見有用之者。乾嘉間冊使東臨國王。迓

以肩輿曾被詔旨申飭事載朝鮮大事考例而司馬居然乘輿張蓋製五色馬旂呵殿出入平時建兵船黃龍大旂不知自處何地置孝亭何地置國家體制於何地此其一副營是彼公三十載坐營方檄司馬接管之曰歎歎嗟嘆徧謂寶僚慰廷是二世交情吾所識拔必不負吾必不改吾章程而司馬接管後初次來函便較論海防教練各費吞吐其辭意謂彼公會藉以冒領浮支使之驚覺恐懼乎不知海防費二千兩金州朝鮮各得其半係有明文教練費早於去冬十月截止鼎鑪有耳豈不聞之且彼公故人舊部從者實多用度日絀而其津貼司馬動二三百四五百不等卽司馬到營之始僕役口糧亦照差官發給今恩誼所在略不顧義利之辨略不省此其一彼公以副營界司馬有舉賢自代衣鉢相傳之意受人知者雖其人之一事一物亦須顧惜而司馬自矜家世輒譁然謂是區區何足奇便統此六營亦玷先人夫子孫當思祖父所以榮當時而福後人者兢業已紹其休不應蹈君家公路本初四世三公之陋說且由

司馬之說則令叔祖端敏公令堂叔文誠公進士也尊公及令堂叔子九觀察舉人也司馬何以并不能博一秀才玷有先於此大於此者何不此之恥而漫爲夸說使人轉笑彼公付託之非易一人而如此焉司馬謂其尙有良心乎此其一販烟有誅宿娼有禁司馬所曾律以殺人刑人者而烟膏鬻自三軍府則容隱之官妓三名聚宿三軍府則躬與之不知何以對所殺所刑之人而無愧此其一教練新建營會辦朝鮮防務司馬所得預者軍事耳此外朝鮮一切政事豈應越俎而尹泰駿之被梏歸第李祖淵之解去兵符司馬公然爲之關說張敬夫所購湖桑必不值一萬四千金此種弊竇人人所曉司馬公然爲之主持司馬今日方謂憑我一言何事不辦以此自鳴得意曾不顧有識之嗤於其後此其一彼公於北洋三十餘年之舊部也孝亭亦三十餘年之舊部司馬於北洋輾轉因緣而竊承其呼吸者裁年餘耳司馬嘗爲僕等說李某忌文誠公先公事憤恨不已今何以裁得其一札公牘私函便一則曰稟北洋再則曰稟

北洋豈昔所謂怨者。今已修好耶。抑挾北洋之虛聲。以籠罩一切耶。抑前所云者。不過因李某方冒天下之不韙。而姑假此說。以附清議之末耶。是皆不可。况北洋未必能吞噬天下之人。天下之人亦未必盡如司馬之呶心。委命於北洋。不能愚人。而徒自露其先後不侔之迹。此其一。茅少笙紀雨農之二人者。司馬曾親爲僕等言。其輕躁貪鄙。販貨挾妓之狀。且述二人酗酒辱罵。彼公語斥其病狂喪心。當時意司馬誠知人。誠能於彼公有昔賢待府主之義。今何以比而暱之。所聞司馬之議論。且如出茅紀二人之口。此其一。僕等與司馬相識。今三年矣。以司馬往日之爲人。疑其不應出此。以司馬今日之行事。恐其不止如此。試爲溯其源。則司馬胸中。旣恃家世。又謂二十許人。作營務處營官。姓名見知於一。能辦洋務之宰相。是曠古未有之事。又有虛僑者。浮儉者。圓熟者。庸惡陋劣者。左之右之。頌功述德。務求合乎司馬之所樂。而司馬亦遂志得意滿。趾高氣揚。而不顧蹈於不義。試爲窮其流。則司馬旣與尹秦駿等換帖矣。必益聯絡

朝鮮之中使外務衙門張皇體面高掌遠蹠使孝亭不安而退必用兼併之術揚此抑彼輕此重彼使彼公舊人互相不安而退必借北洋以干預朝鮮一切用人行政之權必交歡閔氏俾國王專奏力薦希圖防務商務之柄必以取重於國王者因取重於北洋希作海關道凡此之說未免近於逆臆然欲檄總兵劉朝貴爲提調分明是鬧標分明是制郭春華是何體制而飾其詞曰以符體制此次國王來函無一不稱曰袁會辦而孝亭轉似在牽連得書之例此得謂非司馬心思力量手眼之所構耶今僕等於司馬隔若秦越亦何樂曉曉然竊念當時交誼實不忍徒引闈於知人之咎而坐視其沈迷故痛切言之冀大聲疾呼以寤司馬或者謂司馬見此訊必大怒大罵必來見彼公辭差必以訊併入浮言之例哀稟北洋以箝將來之口而益堅北洋之信或謂司馬雖大怒大罵然必故事含宏謙詞謝過指天誓日以明無他是二者意司馬必不出此亦不必出此司馬誠試思所說有虛者否有不是者否願司馬息心靜氣一月不

出門將前勸讀之呻吟語近思錄格言聯璧諸書字字細看事事引鏡勿謂天下人皆愚勿謂天下人皆弱脚踏實地痛改前非以副令叔祖令堂叔及尊公之令名以副彼公之知遇則一切吉祥善事隨其後矣此訊不照平日稱謂而稱司馬司馬自思何以至此若果能復三年前之面目自當仍率三年前之交情氣與詞涌不覺刺刺聽不聽司馬自酌

桂之華軒文集終

